



hinc itur ad lictum, in quodam, nro

97

XX


100



ut per Bal. in d. l. i. quis in tantam col.  
le casu is n. in restituatur ad possessio.  
fitur ad statum, in quod erat, n. ibi.

97  
XX  
ad se h  
ult. op

lib. in 3. p.  
reca. in lib. 3. p.





ROMVALDINA,  
SEV EREMITICA  
MONTIS CORONAE  
CAMALDVLENSIS  
ORDINIS HISTORIA

*In quinque Libros partita.*

AVCTORE Luca Eremita Hispano.  
CVM LICENTIA SUPERIORVM.



In Eremo Ruhensi, In agro Patauino. MDLXXXVII.

*remiorum Camaldulensis Montis Argenian*



LVCÆ RÆSII  
DALMATÆ.

*Carmen.*

QVi mores, normā simul, & primordia sacra  
Vult ROMVLDINAE noscere militiæ:  
Quis docuit primò syluestrem ducere vitam,  
Qua datur ad superos aptius ire Deos:  
Ille legat CATHALANI nūc monimēta disertī,  
ROMVLDINAM, qui contulit Hystoriam.  
Hūc genuit Barcino, Mōs tenet ecce Coronæ,  
Vnde coronatus tendit ad astra poli.  
Cui decus, & nomen, laudemq; parare licebit,  
Extinctum, & superis adnumerare suis.





ILLVSTRISSIMO,

AC REVERENDISSIMO

DOMINO,

D. ANTONIO

CARDINALI CARRAE

Domino suo colendiss.

*Ermi Monts Argenti*

LUCAS EREMITA S.



RÆCLARA tua,  
eaq̃ plurima  
in Religionem  
nostram, Car-  
dinalis amplif-  
sime, beneficia

quoties in mentem veniunt (ve-  
niunt autem sæpissimè) gratitudi-  
nem iamdudum animo recondi-  
tam diutiùs sepultam latere non

a

2

finunt:

sinunt: sed eam, iusta occasione  
data, orbi facere testatam, me  
nō sine ratione compellunt. Quod  
quidem conuenientiū adimpleri  
posse, quā munusculo quodam  
literario, non satis video: hoc nāq;  
in æuum permanet, & quod in se  
gerit, vniuersis perpetuò morta-  
libus reddit manifestum. Quam  
ob rem opus quod olim rudiuscule  
informatum, solita benignitate  
hac tua, non solum oculis diligen-  
ter lustrare: sed etiam affectione  
quadam amplecti, meq; deinde  
blandè hortari, quò ipsum ad iu-  
stam plenitudinis mēsuram per-  
ducere conarer, dignatus es;  
ut cumque absolutum ad te denuò  
mittere decreuimus. Romualdi-  
nam



nam,inquam, nostram dignatio-  
ni tuæ iampridem cognitam, ac  
familiarem: quæ tamen ( quod  
me malè habet ) non eo apparatu  
verborum, seu elegantie cultu co-  
ràm te stabit: quem consumma-  
ta doctrina, vel sermonis eloquen-  
tia, quibus tu polles, desiderare  
videntur. Sed quæ admiratio est,  
si genitor inopia pressus virginem  
suam, quantumvis ei chara exi-  
stat, nec sericis vestibus induat,  
• nec gemmis adornet? Vnde, qua-  
so, pauperrimo solitario viro, in  
deserta Eremita iam annis vigin-  
ti, aut eò amplius, commoranti  
verborum copia, dicendi facun-  
dia, aut rhetorici colores, quibus  
rudem materiam excolat, suppe-  
ditari

ditari queunt? Non etenim hic  
modulatur Virgiliana Musa,  
nec resonant lyrici vates: non hic  
reboat Ciceronis oratio, nec ar-  
gutè ratiocinatur Peripateticus  
Stagyrita: in quorum vicem suc-  
cesserunt scriptura sacra; vulga-  
ris locutio, Sanctorum vitæ, sim-  
plicissimus sermo: libellus præcū  
acquisiti styli dissipatio. Hic de-  
nique linguarum nulla peritia  
viget, nec aliqua loquendi exer-  
citatio permittitur: sed è contrà  
perpetuum silentium, planctus,  
& iugis oratio: nec non diuinarū  
laudum cōtinua decantatio, om-  
ne studiorum tempus absument.  
Quid ergo mirum, si indigo pa-  
rente genita, in q̃ pauperrima do-



mo nata alumna nostra, casta  
nihilominus, ac munda intus, vili  
amictu induta, parumq<sup>2</sup> exulta  
foris appareat? Veruntamen apud  
te, colendissime Domine, quem  
diuitem esse non ignorat, abunde  
locupletari, pretiosisq<sup>2</sup> monilibus  
ornari, magna fiducia sperat.  
Neque hic certè diuitias appello  
corruptibilia argentum, & aurum,  
neque honores, vel etiam istam  
supremam (quam iustè possides)  
dignitatem: sed præclaras virtu-  
tes, scientiam, prudentiam, Chri-  
stianam pietatem, ceterasq<sup>2</sup> penè  
diuinas animi tui dotes. Vnde  
proculdubio fiet, ut tui clarissimi  
nominis splendore refulgens hi-  
storia omnibus pulchra videri,

atque placere incipiat : sic tuis  
suffultus auspicijs libellus , detra-  
ctorum voces minimè pertime-  
scat . Quis enim eum tuæ præcel-  
sæ auctoritatis clypeo munitum  
attingere præsumet ? vel sinistro  
oculo intueri audebit ? Suscipe  
igitur humanissime Præsul , mu-  
nusculum hoc , quod dignitati  
tuæ libenter dicamus : Et sub um-  
bra alarum tuarum Romualdi-  
nam protege tuam , atque bra-  
chio propriæ magnitudinis defen-  
de . Quod utiq; te esse facturum  
nullum me dubium tenet , cùm nō  
semel expertus sim , quanta erga  
Societatem nostram ( cuius ipsa  
typum gerit ) affectione , ac solli-  
citudine uti semper consueveris .

Nec



Nec me latet eidem te ubiq; fa-  
uere, & quoties opus est, præstò  
adesse: memor enim sū, qua ani-  
mi pietate, ac beneuolentia Pa-  
tres nostros, meq; præcipuè, licèt  
indignum, in Patriam tuam: in  
amplissimum, inquam, Neapoli  
Regnum olim ( preparato prius  
idoneo solitudinis loco ) viquadā  
sanctissima pertraxisti. Neque  
hoc contentus, eadem ferè cura,  
diligentiaq; effecisti, vt Roma  
Ecclesia cum opportuno hospitio  
Congregationi huic, multo labore  
obtenta, in perpetuum vniretur.  
Ecquis denique Romualdinis  
Eremitis unquam propensior ex-  
titit? aut quis pleniori fauore Co-  
ronensem Eremitum prosecutus re-  
peritur?

peritur? vel pluribus gratijs, in-  
dulgentijsuè Apostolicis Religio-  
nem hanc decorauit? Quatandè  
ego minimus seruorum tuorum à  
te acceperim beneficia, quantaq;  
semper mecum egeris familiari-  
tate, ne molestus fieri incipiam,  
ex industria reticebo: pro viri-  
bus autem enitar, ne aliquan-  
do animo excidat tuorum erga  
me meritorum cum singulari  
pietate recordatio. Vale Car-  
dinalis Illustrissime Ecclesie san-  
ctæ decus, & societatem nostram  
semper commendatam habeto,  
meq; solita clementia diligere ne  
dedigneris. Ex sacra Ruhenſi  
Eremo: die secunda Martij,  
M D LXXVII.

INDEX



# INDEX CAPITVM HVIVS OPERIS.



## LIBRI PRIMĪ.



REMITICI instituti origo, & auctores. cap.j.	fol.1
Sancti Benedicti vita, & Monachorum Cassinensium institutio. cap.ij.	7
Regula, & profectus familiæ Benedictinæ. cap.iii.	10
Côuersio Diui Romualdi Eremitarum Camaldulensium fundatoris. cap.iiij.	13
Romualdus in Galliam peregrinatur, reuertitur, & Eremiticam vitam instituit. cap.v.	15
Constantia, & virtutes Romualdi. cap.vj.	17
Vtilitas ex Romualdi institutione secuta. cap.vij.	20
Sacræ Eremi Camaldulensis, & Fontisboni hospitij ædificatio. cap.viii.	21
Romualdus Camaldulum relinquit. cap.ix.	26
Hospitium Fontisboni in Monasterium redigitur. c.x.	28
Prima discipulorum Romualdi institutio. cap.xj.	29
De laudibus sacræ Eremi Camaldulensis: & cur tota religio ab ea denominetur. cap.xij.	33
De initio, & augmento Monachorum Camaldulensium. cap.xiiij.	38
De regimine, ac suprema Religionis huius prælatura. cap.xiiij.	41

## LIBRI

# I N D E X.

## LIBRI SECVNDI.

<b>B</b> EATI Pauli Iustiniani ortus, & iuuentutis studia. cap.j.	46
Paulus in patriam reuertitur: ac dotes corporis, & animi prænотantur. cap.ij.	48
Paulus studia mutat, & Hierosolymam proficiscitur. cap. iij.	50
Paulus loca sancta perlustrat. cap.iiij.	51
Paulus specie recti deceptus, negotijs secularibus implicatur. cap.v.	53
Paulus scrutinio de quibusdam Religionibus facto, Camaldulum peruenit, & fit Eremita. cap.vj.	56
Pauli iter, & Religionis ingressus. cap.vij.	57
Pauli nouitiatus, & Petri Quirini conuersio. c.viiij.	60
Paulus sacra Eremiti defensorem agit. cap.ix.	63
Delphinus, & Paulus de congruo Religionis remedio deliberant. cap.x.	67
Labores, & prælatura Pauli. cap.xj.	71
Veteris desiderij Eremitici instituti dilatandi, matura deliberatio. cap.xij.	75
Beatus Michael consulitur, & respondet. cap.xiiij.	79
Paulus iterum Eremita Maior eligitur, & privilegium Eremitici instituti dilatandi à Sede Apostolica obtinet. cap.xiiij.	81
Deposita Maioratus dignitate Camaldulum relinquit. cap.xv.	84
Aluerniæ in sacello Beati Francisci orat. cap.xvj.	87
Mirabile quid Paulo contingit, & ab idiota docetur. cap.xvij.	99

## LIBRI TERTII.

<b>P</b> AVLVS Eremitum cum socijs intrat. cap.j.	96
Quanta dilectione patres Camaldulenses Paulum persecuti sunt. cap.ij.	99
Monasterium Sancti Leonardi de Volubrio, & Eremitus Sancti	



# INDEX.

Sancti Benedicți Vltrò, Patri offeruntur. cap. iij.	102
Spelunca Massacij Paulo, & socijs in perpetuum renun- ciantur. cap. iiij.	105
Noui instituti prima exordia. cap. v.	106
De Elia, & Antonio primis huius loci habitatoribus. cap. vj.	110
Quædam in Paulum, & socios obiecta diluuntur. cap. vij.	113
De prima capituli celebratione. cap. viij.	117
Patientia Pauli in aduersis. cap. ix.	119
De morum rigiditate, atque celeri augmento congrega- tionis nouæ. cap. x.	123
Vnio quædam inter nostros, & Camaldulenses inita, & Iustiniani Bergomensis ingressus. cap. xi.	126
De conuersione Galeatij Gabrielij Fanensis. cap. xij.	127
De recisione præcedentis vnionis. cap. xij.	130
De principio Cappucinatorum. cap. xiiij.	131
Paulus præuidet infortunium venturum. cap. xv.	134
De morte Pauli, & laudibus eius. cap. xvj.	136
Virtutes, & opera Pauli describuntur. cap. xvij.	139
Quantas perturbationes passa sit post mortem Pauli Cõ- gregatio. cap. xvij.	141

## LIBRI QVARTI.

<b>S</b> OCIETAS stabilitur, & Eremitus Montis Coronæ fundatur. cap. j.	144
Quanta difficultate ædificata sit Eremitus ista. cap. ij.	148
De morte Petri Fanensis. cap. iij.	151
De Hieronymio Sueffano, & Ruhe fundatione. c. iiij.	152
Hieronymi Sueffani virtutes, ac sanctitatis signa. cap. v.	159
De Eremito Montis Anconitani. cap. vj.	163
De vita Iustiniani Bergomensis. cap. vij.	165
De acquisitione Eremiti S. Mariæ Coronatæ. c. viij.	171
De Eremito S. Saluatoris à Prospectu Neapoli. cap. ix.	176
De Beato Rodulpho Veronenſe. cap. x.	178

## LIBRI

# I N D E X. LIBRI QVINTI.

<b>P</b> Rocemium.	180
De Eremitico habitu, cilicio, & tonsura. cap. j.	182
De habitatione Eremitarum. cap. ij.	189
De victu, & parsimonia antiquorum Patrum. c. iij.	194
De ciborum delectu, & discreta eorum distributione. cap. iiij.	198
Ieiuniorum, & abstinentiarum summa. cap. v.	200
De sequestratione corporis, & sancto silentio. cap. vj.	202
De communi, & priuata Psalmodia Eremitarum. cap. vij.	206
De lectione, & oratione priuata. cap. viij.	209
De corporali, seu manuali exercitio. cap. ix.	211
Hospitalitas in peregrinos, & in pauperes charitas de- scribitur. cap. x.	215
De infirmis curandis. cap. xj.	217



INDEX



# INDEX RERVM MEMORABILIVM,

Quæ in hoc opere continentur.



ABSTINENTIA S. Romualdi,  
& discipulorum. 195

Abstinentiæ appellatione quid ve-  
niat. 195

Abstinentiæ prima institutio Ca-  
malduli. 196

Quamdiu permansit. 196

Abstinentiæ refectio sedêdo in ter-  
ra, & pedibus nudis capitur. 202

Anachoretæ antiqui cur in solitudinem fugiebant. 3

Anachoretarum vnitas, & morum conformitas. 5

Antonius Eremita prim<sup>9</sup> Criptarū habitator mori. 111

Eiusdem vita, & perfectio sanctitatis. 112

Antonius, & Alfonso Carrafa Eremum condunt. 172

Antonij Cardinalis Carrafa ad hoc ipsum diligētia. 173

Apostolorum schola animorū vnitas, & rerum cōitas. 2

Astutia sancta Patrum Camaldulensium, vt Paulum  
recuperent. 109

Augustinus Bassanensis nouum habitum sumit. 110

Augustinus primus post Paulū Maior cōgregationis. 142

Basilij Abbatis mala Camalduli administratio. 63

Benedicti vita, & regula. 7. & 8

Benedictus primò solitarius fuit. 9

Benedicti miracula. 9

Benedictus Occidentalium Monachorum pater. 10

Benedicti obitus, & eius religionis dilatatio. 10

Benedictini Monachi Romanam Ecclesiam regunt. 11

Benedicti religio quot Pontifices dedit. 11

Item quot Sanctos canonizatos. 11

Benedictinorum generalis correctio. 12

Biduana, & triduana quid. 195

Bigolini Paduani in nostros liberalitas. 157

Camal-

# I N D E X.

<b>C</b> Amaldulenses Monachi ad vrbes accedunt.	40
Camaldulenses Patres locum Criptarum Paulo Iustiniano ad habitandum concedunt.	100
Eundem cum suis in familiam Eremiti recipiunt.	101
Eisdem alimenta decernunt.	ibidem.
Camaldulenses Paulum ad se trahere nituntur.	106
Camaldulenses quomodo semper dilexerunt Paulū.	114
Camaldulensium Monachorum prima institutio.	38
Camaldulenses Monachi cur deserta reliquerunt.	39
Camaldulensium Monachorum congregatio vnde, & quomodo aucta.	40
Camaldulenses omnes turbantur in discessu Pauli.	85
Candiorum domus Ruhensibus semper propitia.	157
Cantus Eremitarum potius planctus.	209
Capitulum societatis primum apud Criptas.	118
Cappucinatorum verum principium.	132
Carnium esus nostris perpetuo prohibitus.	198
Quod in hospitibus & famulis seruatur.	198
Cassinēse Monasteriū fūdat. 9. Eiusdē familia laudat. 10	
Cellarum paupertas in Criptis.	192
Cellæ descriptio, & eius suppellex.	193
Cella quicquid intra se habet omnibus commune. ibid.	
Ciborum quantitas, & distributio.	199
Cilicium cuique licitum est deferre.	189
Congregationes multæ Benedictinorum eriguntur.	12
Congregatio sanctæ Iustinæ Paduæ quā veneranda. ibi.	
Cōgregatiōes multæ, & diuersæ sub Benedicti regula.	13
Congregationis labores multi.	43
Conuentuales Camaldulenses multiplicati nimis.	43
Conuentuales Camaldulenses extirpantur.	71
<b>D</b> Conuersi nostri ad quid teneantur pro officio.	208
Vcis Vrbinatis erga Eremitas nostros charitas.	98
<b>E</b> Leemofyna apud Camaldulenses in pauperes frequens, & abundans.	216
Elias Camaldulum reuertitur.	111
Fremitice disciplinæ auctores qui.	12
Fremite multi in testamento veteri.	12
Eremiti Camaldulensis erectio. 24. Eiusdē descriptio.	22
Eremitus	



- Eremus Camaldulensis quomodo caput religionis. 36  
 Eremita prior ipso iure generalis censetur. 37  
 Eremitarum Camaldulensium perseuerantia, & laudes. 37  
 Eremita sacra labores. 44  
 Eremus sancti Hieronymi Pascilupi describitur. 97  
 Eremita Criptarum Massacij descriptio. 101  
 Eiusdem Eremita primi habitatores Elias, & Antoni. ibi.  
 Huc quidam Camaldulenses veniunt Paulo adhæsuri. 102  
 Cripta Paulo, & socijs absolute dantur. 106  
 Eremus sancti Leonardi Volubrij Paulo conceditur ad  
 habitandum. 103  
 Eremus S. Bndicti Montis Anconitani nris acquiritur. 103  
 Eremus Montis Coronæ in caput religionis erigitur. 145  
 Eiusdem descriptio. 146  
 Quanta difficultate ædificata sit. 148  
 In ea residet superiores, & regimē cōgregationis. 150  
 Eremita Ruhenfis descriptio. 154  
 Olim à Camaldulensibus Eremitis habitata fuit. 156  
 Eremita Montis Anconitani acquisitio. 163  
 Eiusdem descriptio. 164  
 Eremita S. Mariæ Coronatæ acquisitio. 171  
 Eius fundatores qui. 172  
 Eremus S. Mariæ Coronatæ describitur. 174  
 Miracula ibidem facta. 175  
 Eremita S. Saluatoris à pspectu acquisitio, & descriptio. 176  
 Eremita singuli in suis cellis soli manducant. 199  
 Duodecim dies tantum in anno simul reficiuntur. 199  
 Nil sibi ex cibis coctis in crastinum retinent. 202  
 Cibum non capiunt, nisi benedictione, & lectione premissa. 202  
 Eremus tota Eremita pro claustro est. 202  
 Eremitica vita Camaldulensis mixta. 203  
 Eremitarum lectio quotidiana quanta. 210  
 Exercitia manualia quæ, & quo tempore fiunt. 212  
 Exercitium panificij, & fit cum lectione. 213  
 Exercitium semper cum silentio fit. 213  
 Exercitium priuatorum multiplex. 214  
**F** Edericus Cardinalis Cornarus cellam sibi Ruhe  
 ædificat. 157  
 b Fontisboni

# I N D E X.

Fontisboni hospitium conditur .	25
In Monasterium conuertitur, & quare .	28
Fundatores religionum antiqui nil certum de habitu statuerunt .	182
<b>G</b> aleatius Bigolinus Ruhenfibus propensior .	157
Galeatius Gabriellus Paulum primò inuifit .	95
Galeatius fe , & fua dat religioni .	128
Generales Camaldulenes perpetui quot, & qui .	42
<b>H</b> abitatio antiquis Patribus varia, & viliffima .	191
Habitus Camaldulenis, qualis .	107
Habitus, qui à Paulo nouitijs primò datur .	187
Habitu focietatis qui primi fumpferunt .	188
Habitus quo hodie vtimur forma .	188
Habitus diuerfitas vnde orta .	184
De varierate habitus cantilena .	185
Habitus Camaldulenis diftinctio .	186
Hieronymus Anconitanus dictus beatus quis .	114
Hieronymi Sueffani rigiditas, & virtutes .	152
Eremum Ruhenfem fundat .	153
Hieronymi Sueffani perfectionis figna .	159
Oblatâ dignitatē refutat. 160. Obijt. 161. Quædâ mirâda operat. 161. Quædâ fanctitatis eius attestatio. 162	
Hospitalitas apud Camaldulenes maximè exerceat .	215
Hospes recipitur, alitur, & eius pedes lauantur .	215
Historia hæc à Patribus veteris teftamenti incipit .	1
<b>I</b> eiunij diftinctio .	185
Ieiunium regulare quid .	201
I E S V S. folitudinem confecrauit .	2
Ioannes Gualbertus Romualdum vifitat .	25
Infirmi quanta charitate curentur .	217
Quanta illis folatia adhibeantur .	218
Sacramenta eis quanta cura miniftrantur .	ibi.
Morientibus illis quomodo affiftatur .	ibi.
Infigne Camaldulense à Romualdo inuentum .	30
Innocentius conuerfus quis .	124
Ioannes Baptifta Crifpus Eremi Saluatoris auctor. Carolus Caracciolus focius eius .	176
Iuftinian <sup>9</sup> Bergomëfis focietatis nouū habitū fumat .	127
Fuit	



# I N D E X.

Fuit secundus post Paulum societatis Maior.	143
Eius vita. 165. Virtutes eius explicantur. 166. Scripsit multa, sed omnia casu combusta. 167. Prædixit finem suum, & studiorum suorum. 169. Obijt sceleriter. 169	
Exhortatio eius ad Patres. 170. Diu reclusus fuit. 204	
<b>L</b> Audes quorundam Eremitarum viuentium.	175
<b>L</b> Laura Brancaccia Fremi fundatrix.	172
Libri qui competant Eremitæ.	210
Locus, seu Ecclesia S. Leonardi Romæ.	176
Loca tria in Apulia olim acquisita.	124
Ludouicus Zabarella Archipresbyter Paduæ, Ruhæ precipuus fautor.	157
<b>M</b> Arini, & Romualdi conuersatio.	14
<b>M</b> Michael reclusus Camaldulensis quis, & quâtus.	79
Monasterij sancti Saluatoris Môtis Acuti descriptio.	128
Mutatio rerum etiam in incorporalibus cadit.	180
<b>N</b> Icolaus Trunifanus habitum societatis sumit.	100
<b>N</b> Nicolosæ solitariæ scemina constantia.	104
Nolani clues imaginem Virginis Coronatæ in Montem solenniter deferunt.	172
<b>O</b> Biecta quædam in societatem diluuntur.	113
<b>O</b> Officiû diuinû idê ferè nobis, & Camaldulensib.	108
Olius conuersus comes Pauli.	85
Orationi tempus deputatum.	210
Oratio, & spiritualis exercitatio vtilissima.	211
Ordo Camaldulensis tripartitus.	35
<b>P</b> Aduæ cômunitas semper fuit Ruhésib <sup>9</sup> pijsissima.	158
<b>P</b> Parsimonia antiquorum Patrum non imitanda.	194
Pascilupi, & vicinorum in nostros largitio.	98
Pauli Iustiniani ortus, & iuuentutis studia.	46
Eius corporis, & animi dotes.	48
Paulus se totum Deo, adhuc in seculo tradit.	50
Pia eiusdem de passione meditatio.	50
Hierosolymam nauigat. § 1. Loca sancta deuotè lustrat. § 2. In patriam reuertitur.	53
Pulchra sororis eius persuasio.	54
Paulus specie recti decipitur.	55
Delphinum de religionis ingressu consulit.	56

# I N D E X.

Camaldulum venit, & vitæ experimentum facit.	57
Iter eius, & visio notabilis.	58
Paulus religionem ingreditur. 60. Nouitiatus eius, & exercitia. 61. Tentationes in nouitiatu. ibid.	
Desiderium dilatandæ religionis.	62
Paulus charus principibus, & omnibus.	63
Paulus Eremum sacram defendit.	65
Affociatur Delphino ad reformandam religionē.	67
Pontificem pro capitulo conuocando interpellat.	68
Constitutiones Eremiti conficit.	69
Paulus bonis placet, displicet malis.	71
Labores eius, & patiētia. 71. Totus orationi datur.	73
Modus pius in negotijs peragendis.	74
Paulus Maior creatur. 74. Reclusionem petit.	75
De dilatanda religione deliberat.	76
Rationes ab Eremita discedendi secum tractat.	77
Consulit super hoc Beatum Michaelē, & respōdet.	79
Paulus secundò Maior fit, & insidias patitur.	82
Orat, & diuinitus inspiratur.	82
Priuilegium Eremitici instituti vbique terrarum dilatandi impetrat.	83
Camaldulum relinquit, & Maioratu se abdicat.	85
Pauli mirabilis modus in discessu.	86
Aluerniam tendit, vbi mirum illi contigit.	88
Illic paupertatis dono ditatur.	ibid.
Pecunias omnes cum crumena pauperibus erogat.	89
Paulus in Indiam se transferre cogitat.	90
Paulus, & Oliuus in conspectu Montiscoronæ obdormiunt, & Paulus turbatur.	90
Propositum dilatationis fixum manet.	91
Paulus cum sociis quibusdam Pascilupum tendit.	96
Animo fluctuat, & ad orationes confugit.	99
Pauli familia crescit nimis.	104
Persecutiones cum sociis patitur. 119. Macerata carceratur. 120. Patientia eius ostenditur.	ibid.
Pia eius ad suos exhortatio. 121. Liberat à carcere.	122
Paulus in Monte Soracte infirmatur, & moritur.	136
Obiit in manibus Maioris Eremitæ sacre.	137



# I N D E X.

Virtutes eius, & miranda opera.	139
Spiritum malum latentem in muliere nouit.	139
Paulus multa scripsit, quæ numerantur.	139
Brachium S. Romualdi Camaldulum desert.	140
Infortunium venturum preuidet.	135
Oratione inimicum suum curat.	141
Paulo semper placuit humilis habitatio.	191
Eius, & discipulorum cibi parsimonia.	197
Paulus antiquas abstinentias Eremitarum restituit.	197
Petrus Fanensis moritur.	151
Petri Quirini, & sociorum eius conuersio.	63
Quirini laudes.	63
Petri Vrsoli, & Ioannis Grandenici conuersio.	15
Petrus Daguinus, & socii eius nominantur.	26
Eorundem viuendi ritus mirabilis.	24
Petri Delphini Generalis prælatura qualis.	43
Placidi conuersi vita, & mores.	125
Pocma venustum in laudem solitudinis.	206
Prae Monasterium Ruhæ subsidium.	158
Primitiæ Ecclesiæ mores.	2
Psalmodia antiquorum patrum.	207
Psalmodia publicè, & priuatim Camaldulensium.	207
<b>R</b> aphael Dominicanus Paulo se tradit.	95
Rasura capitis nulla antiquis religiosis.	189
Reclusio apud Camaldulenses quid.	75
Reclusionis lex, & modus. 204. Reclusi ad quæ tenentur.	205
Regulæ Monasticæ primi auctores.	5
Regulæ Benedictinæ discretio, & proprietates.	10
Religio Camaldulensis cur ita nominata.	34
Rodolphus Prior quintus sacre Eremitæ.	42
De ritu, & moribus Eremitarum bene scripsit.	196
Rodolphus veronensis reclusus. 204. Eiusdem vita, & obitus.	177
Romualdi sanctissimi conuersio. 14. Et solitarius fit. ibi.	
In Galliam cum Marino, & socijs proficiscitur.	15
Eius magisterij, & viuendi modus.	ibid.
Romualdus in Patriam reuertitur.	16
Gratia eius apud homines.	ibid.
Eundem multi nobiles sequuntur.	ibid.

# I N D E X.

Romualdus Eremitoria, & Monasteria simul cōdebat.	17
Non scriptura, sed exemplis discipulos docebat.	ibi.
Romualdi patientia, & constantia.	18
Romualdi habitatio humilis.	101
Romualdi tentationes, & perfectio.	19
Eius obitus, & miracula.	ibid.
Romualdi visio scæ, & Angelorum.	23
Eius exemplo congregationes multæ erectæ.	26
Camaldulo discedit, & exhortatio eius ad discip.	26
Eremitas, & Monachos simul instituit.	29
Quò ad discipulos nil scriptum reliquit.	31
Ruhæ locus, seu situs à quo datus.	155
Ruhensis Eremitus quibus adiutoribus fundata.	156
<b>S</b> anctorum Patrum virtutes, & constantia.	3
Sancti Patres ocium fugientes manibus laborabant.	4
Sancti Patres in Ægypto, vel Thebaide certam regulam viuendi non habuerunt.	5
Sancti multi fuere in schola Romualdi.	32
Sancti non semper quod piè desiderant cōsequuntur.	91
Sancti Sauini locus describitur. Et primò habitatus.	146
Sanctæ Iustinae cœnobij in nostros largitas.	138
Silentium perpetuū, & quādo, & quomodo soluēdū.	205
Societas Eremitarum S. Romualdi vnde dicta.	84
Societatis huius prima fundamenta.	107
Societas post mortem Pauli Iustiniani turbatur.	141
Iterum stabilitur.	145
Sollicitudo eremitarū ad horas canonicas psoluēdas.	208
Solitarij antiqui de manuum laboribus victitabant.	4
<b>T</b> empus ieiuniorum diuiditur.	200
Theodaldus Ep̃s Aretij eremi Camald. fundator.	24
Thomas solitarius Paulum in Italia retinet.	92
Ei <sup>9</sup> pulchra psuasio ad Paulū.	93
Eidē sociū se offert.	94
Thomas, & Raphael nolunt habitum mutare.	98
<b>V</b> enetiarū Senatus semper Ruhensibus liberalis.	158
Viuendi modus nouæ societatis.	109
Vitæ rigiditas nostrorum in Criptis.	123
Vnio prima inter Romualdinos, & Camaldulenses.	126
Eadem rescinditur.	130.

F I N I S.

AD



AD PATRES  
DIFFINITORES  
CAPITVLI GENERALIS  
MONTISCORONÆ,

*In Romualdinam Historiam,*

LVCAE EREMITAE  
PRÆFATIO.



V M nullus Religio-  
forum homi-  
num temporibus  
nostris genere vi-  
tæ austerior, vel  
(quod omniū pa-  
ce dixerim) pro-  
fessione excelsior  
ordo, intrā Ecclesiæ Sanctæ fines inue-  
niatur: quàm paruula pariter, atq; pau-  
perrima hæc Eremitarū sancti Romual-  
di societas ordinis Camaldulensis; in  
cuius caput Eremus MONTISCORONÆ  
consecrata est: satis mirari nequeo, co-  
lendissimi Patres, quorundam temerita-  
tem,

tem, corruptumvè iudiciū, qui de re  
 sibi incognita agentes: eandem quibus-  
 dam friuolis rationibus supersticiosam,  
 parumque ( vt ipsi aiunt ) Apostolicam,  
 perfricata fronte, improbare nituntur.  
 Cōfingunt siquidem institutum hoc nu-  
 per inuentum, ac paucissimis conuenire,  
 eoque singularitatis habere plurimum,  
 nihilq; proximum iuuare; necnon pro-  
 priæ æstimationis, ac simulatæ sanctita-  
 tis esse fomentum. Rursus nullam inde  
 fideli populo emanare doctrinam: nullā  
 pauperibus subuentionem: nullam tan-  
 dem tribulatis, siue oppressis consola-  
 tionem accedere affirmant. Addunt in-  
 super in hoc genere vitę ociosos fieri ho-  
 mines, phantasticos, melancholicos, la-  
 boris impatientes, & quasi syluestres  
 onagros humani consortij osores: atq;  
 adeo contra humanitatis iura, natura-  
 lemque æquitatem, solos solis ac sibi ip-  
 sis viuentes infrugiferam ducere vitam.  
 Porrò istorum vulgarem errorem ex re-  
 rum nostrarum ignoratione nasci, incō-  
 fesso est: ignorant namque solitaria vita  
 quos habuit olim auctores; nec sciunt  
 primi-



# PRÆFATIO:

primitiuæ, nascentique Ecclesiæ Ana-  
 choretica religio quantum dederit in-  
 crementum. Nō legerunt magnū quon-  
 dam Basilium, diuum Hieronymum, do-  
 ctissimum Augustinum, sanctissimum Be-  
 nedictum in montibus & syluis primas  
 condidisse suorum Monachorum cellu-  
 las. In summa, instaurator Eremiticæ  
 conuersationis Romualdus vbi, aut quo  
 nam modo vixerit, ne somniant quid-  
 em. Hinc proculdubio fit, vt quicquid  
 vulgò commixtum non est, insyncerum  
 putent: fugientes turbas, ac seculi nugas,  
 stultos: quietem animi quærentes, infru-  
 giferos, cerebrosoque appellent. O de-  
 ploranda nostri æui cecitas, quæ recto  
 non finit homines vti iudicio. Vna, sci-  
 licet, est via salutis? vna iustitiæ semita?  
 vno tantum Deo seruitur modo? Nun-  
 quid apud Deum Eremitæ cultores infe-  
 riores vnquam habiti sunt habitatori-  
 bus urbium: nunquid sanctior Helia  
 Esaias, aut Hieremias Heliseo? an Da-  
 uid maior Ioanne Baptista? In quo ce-  
 dit Augustino Hieronymus; aut Anto-  
 nius Nicholao? In quo denique vincit  
 Hilario-

P R Æ F A T I O .

Hilarionem Gregorius? Iam si Marty-  
res tollas, nec plures nec meliores dede-  
runt Sanctos Italiæ vrbes, quàm Aegy-  
pti deserta: nec Græciæ ciuitates, quàm  
Thæbaidis, vel Palæstinæ solitudines.  
Numera, si potes, agmina discipulorum  
Antonij magni: aut catalogo conclude,  
si nosti, numerum Sanctorum Anacho-  
retarum in orientis olim nemoribus de-  
gentium. Postremò nonne Saluator no-  
ster IESVS, maioris perfectionis exem-  
plum sequentibus se relinquere volens,  
sæpiùs in montem siue desertum seces-  
sit? Ecquis tandem tàm hebes, qui ne-  
sciat contéplationi deditos viros, actio-  
ni vacantibus longè præstare: & Mariã,  
quæ optimam partem elegit, Marthæ  
esse præponendam? Sanè si legissent isti  
illud: Multùm valet oratio iusti assidua,  
solitarios viros orationi intentos, lin-  
gua non ita læsissent. Si legissent pugnã-  
te populo contra Amalech, plùs pro-  
fuisse ad victoriam Moysem in vertice  
collis orantem, quàm vniuersum popu-  
lum acerrimè in campestribus dimican-  
tem; solitudinis leges haud quaquàm  
damnas-



# P R Æ F A T I O .

damnaſſent. Cùm leuaret manus Moyſes ( inquit ſcriptura ) vincebat Iſrael : ſin autem paululùm remiſiſſet, ſupera-  
bat Amalech . Quin & ſponſa Chriſti  
Eccleſia circundata varietate, ac multi-  
plici virtutum gratia ornata incedere,  
gaudet : ideoque vnusquiſque donum  
ſuum habet à Deo. Ipſe dedit quosdam,  
ait Paulus, Apoſtolos, quosdam autem  
Prophetas , alios verò Euangeliſtas ,  
alios autem paſtores & doctores, ad cõ-  
ſummationem Sanctorum in opus mini-  
ſterij, in ædificationem corporis Chri-  
ſti . Et , vt Hieronymus ad Paulinum  
ſcribit , ridiculum eſſet dicere : omnes  
Apoſtolum Paulum in prædicationis of-  
ficio ſequi oportere : rurſumque omnes  
Magdalenam in contemplatione imi-  
tari . Habet etenim vnumquodque pro-  
poſitum Principes ſuos, quos imitemur,  
atque ſequamur . Epifcopi, & presby-  
teri, quibus cura populorum incumbit,  
habeant in exemplũ Apoſtolos, & Apo-  
ſtolicos viros : quorum honorem poſſi-  
dentes , habere nitantur & meritum .  
Sic Minores imitentur Franciſcum : ſic  
Prædi-

PRÆFATIO.

+ Prædicatores Dominicum . Nos autem  
 habeamus propositi nostri Principes  
 Paulos, Antonios, Iulianos, Hilariones,  
 atque Macharios . Sint Principes nostri  
 Helias, & Heliseus: nostri duces filij Pro-  
 phetarum, qui habitabant in agris, & so-  
 litudinibus, & faciebant sibi tabernacu-  
 la propè fluentia Iordanis. Addam, quòd  
 Ecclesia sancta non ideò iudicauit infru-  
 giferos, aut supersticiosos Eremicolas:  
 quia pauperum domos non visitabant,  
 seu hospitalia, carceres, & alia pia loca  
 non frequentabant: quin potiùs contem-  
 plationis excellentiam contemplata,  
 eosdem diuino dictante spiritu in San-  
 ctorum numero lubens retulit: atque eo-  
 rum memoriam summo cum honore  
 excolit. Tantorum ergo ducum cur de-  
 dignabimur ipsi calcare vestigia? Ani-  
 maduerti prætereà nos à plerisque, ve-  
 luti acephalos, abortiuosque foetus re-  
 putari: &, quod grauius est, à quibusdã  
 manifestis mendacijs turpiter calum-  
 niari . Age iam, quòd diligentissimis  
 alioquin auctoribus adhuc incognita  
 manet Congregatio nostra: quidam  
 cinm,



PRÆFATIO.

enim, qui nuper de origine omnium Religionum libellum dedit, nostræ societatis ne meminit quidem. Econtrà alius, qui etiam instituti Camaldulensis laudator existit, nos Petri Quirini discipulos facit. Ac tandem Paulum Iustinianū parentem, progenitoremque nostrum, societatis, videlicet, huius conditorē, quotusquisque est qui norit? Hæc itaq; pijsissimi Patres, me compulerunt: ut nulla habita imperitiæ meæ ratione, solo Religionis zelo actus, incredibiliq; modo accensus: quò eandem à tanto opprobrio vindicarem, à prima ipsius Eremiticæ vitæ institutione, ad nostrā vsq; ætatem; rerum, temporumque seruato ordine, breuem quidem, sed fidelem perpetuo stylo, historiam cōtexere tentarem. Nec certè in cassum cessit conatus noster: perduximus enim ad optatū finem libellum: qui licèt pusillus, satis plenam nihilominus dabit rei propositæ cognitionem. Nimirum quæcunque hætenus sparsa, abolita, obliuioniq; tradita, præ difficultate desiderantem animum explere nequibant, in se pagina nostra

# PRÆFATIO.

nostra ritè complectitur. Opus utique præ rerum varietate, & præteritorum incertitudine, non minimi laboris: nullo maximè extante prævio documento. Quamobrem negotium hoc vigiliarum, atque sudoris plenum fuisse, satis legenti patebit. Etenim quemadmodum sedula apis ex multis hinc inde collectis, decerptisque flosculis suum construere, ac melle stipare fauum consuevit: ita & nos ex his, quæ legimus, auribusque nostris audiuius, Patresque nostri, qui ab initio in societate nostra conuersati sunt, narrauerunt nobis: hoc, licet parum mellifluum, opus confecimus. Descripsimus siquidem miranda sanctorum Patrum nostrorum opera; quæ quasi spicas de manu messorum in agro delapsas colligentes, in perfectum manipulum coaceruantes, colligauimus. Ceterum nullum hîc nouum inuentum, totum aliunde desumptum, totum ab alijs collatum putà: nil nostrum reperitur. Sola industria, si qua est, solus labor, qui nimius est, nobis ascribi legitimè potest. Hunc ergo nostrum laborem, hunc lucubra-




PRÆFATIO.

cubrationum nostrarum sudorem Paternitatibus vestris legendum, iudicandumque tradimus: in cuius munusculi præmium, siue mercedem, hoc vnum summis precibus, humiliterque petimus: vt opere summa cura recognito, quicquid errati, aut sanæ doctrinæ (quod absit) aduersans fuerit: emendare, corrigere, delere: seu, si ita visum fuerit, concremare curetis. Satis enim scio, per vos quibus & literarum summa peritia est, & in quibus omnis sanctitatis mores effulgent, ardetque summæ iustitiæ zelus: nihil fieri posse, nihil decerni, quod iustum æquumque non sit æstimandum. Ac mihi quidem optabilius multò est, quæ temerè forsitan pertractata videbuntur, per peritissimos, immò emeritos eiusdem militiæ milites, & antesignanos iudicari, quàm à prophanis, inexpertisque sciolis vel solis oculis intueri. Scimus insuper meliùs esse à iustis viris (quales vos estis) corripì, quàm oleo pestifero peccatorum adulatorum perungi. Suscipite tandem dilecti filij vestri vobis iure pleno

PRÆFATIO.

pleno debitum munus; quibus annuën-  
tibus elaboratum, & permittentibus  
editum extat: in quo si balbutiem no-  
stram vel doctas mentes, vel religio-  
sas aures vestras offendisse conti-  
gerit: æqui, bonique consu-  
lite: & me solita cha-  
ritate diligere  
non dedi-  
gnemi-  
ni.



ROMVAL-



ROMVALDINÆ, SEV

EREMITICÆ  
MONTISCORONAE  
CAMALDVLENSIS  
ORDINIS  
HISTORIÆ.

*Liber Primus.*

EREMITICI INSTITVTI  
Origo, & Auctores. Cap. I.



VERUM AD MODVM QUI  
florētis alicuius, beneq;  
compositæ Reipublicæ  
tranquillum, atque fœ-  
licem statum animad-  
uertunt, solent causas  
tantæ prosperitatis diligenter percon-  
tari; antiqua ne sit ciuitas, quis condi-  
tor vrbis; cuius, quorumve legibus, ita

tur curiosius inuestigantes, vt his compendio instructi, à qua radice tam dulces proueniant fructus, à quo item fonte tam salutaris profluat aqua, facilius agnoscant. Porro non aliter desiderantibus veram, perfectamque Religionis nostræ cognitionem habere, originem eius, quibus etiam authoribus initium habuit: cuius Regulam, quorumve instituta sequatur, innotescere oportet: ne ignorato penitus principio, rei optatæ finis, ad quem studiosi cuiusque animus iugiter contendit, minus percipi possit. Quamobrem nouellæ Congregationis MONTISCORONAE erectam obediētiae fortissimam turrim, stabilitam atq; munitam Eremiticæ obseruantiae, inexpugnabilem arcem demonstrare volentes: opere pretium existimauimus fore, si antiquissimos simul, ac profundissimos marmorei vigoris lapides (quibus totius machinæ pondus innititur) ostendamus reuelatos, ita vt quicquid ædificij restat intueri cupientibus, seu volentibus introire, sese offerat patefactum.



EREMITICAE igitur conuersationis,  
 (quam & Anachoreticam vocant) Prin-  
 cipes, atque auctores, magnum Dei mi-  
 nistrum, ac fidelissimum seruum Heliam  
 Tesbitem, eiusque discipulum Heliseum  
 (scriptura testante) nouimus extitisse.  
 Ioannes quoq; Baptista in utero matris  
 sanctificatus, spiritu Heliæ in omnibus  
 ambulans, in Eremo, pilis camelorum  
 indutus, locustisque victitans, tota per-  
 mansit ætate. Nec certè dedignatus est  
 Iesus Redemptor noster crebro secessu  
 desertum consecrare, miraculis multis  
 solitudinem sanctificare non desijt. Nam  
 in deserto Sathanā prostrauit, in monte  
 paucis panibus turbas, ac doctrina disci-  
 pulos non semel satiauit. Præterea mul-  
 tos fuisse in veteri testamento (quorum  
 non meminit scriptura) qui vel peri-  
 culosa hominum commertia fugientes,  
 vel cum Isaac in omni quiete meditari  
 in agro desiderantes, secretiora deserti  
 petiere, ibidem in magna austeritate vi-  
 uentes. De talibus siquidem exclamat  
 Apostolus dicens: Circuierunt in melo-  
 tis, in pellibus caprinis, egentes, angu-  
 stiati,

tiati, afflicti, quibus dignus non erat  
 mundus, in solitudinibus errantes, & in  
 montibus, in speluncis, & in cauernis ter-  
 ræ. At post Christi aduentum, illa per-  
 fectionis Apostolorum schola omnia  
 ad se traxit: qua manente, non ampliùs  
 diuersa viuendi genera quærebant pii  
 homines, sed ( vt Lucas enarrat ) omniũ  
 credentium erat cor vnũ, & anima vna:  
 nec quisquam, eorum quæ possidebat,  
 aliquid suum esse dicebat, sed erant illis  
 omnia communia. Verũ labentibus  
 annis, apostolisq; decedentibus, nec nõ  
 multitudine fidelium in immensum cre-  
 scente, cepit iuxta Domini verbum fri-  
 gescere charitas, hincq; sua singuli que-  
 rētes, animarum vnitatem, bonorumq;  
 communitatem paulatim deseruerunt.  
 Ac paulopost cepit abundare iniquitas,  
 insurrexitq; rabies plusquàm ferina Ty-  
 rannorum ( Decio maximè, & Valeria-  
 no Imperatoribus ) à Christianorum ce-  
 de nullibi abstinens. Hac itaq; furente  
 in Christi fideles persecutione, multi  
 apud Aegyptum, Thebaidam, & Pale-  
 stinam martyres sancti per varia suppli-



cia vsq; ad mortem in fide perstiterunt, coronas perpetuas, & immortalia præmia adepti. Attamen fuerunt alij, qui vel ista pertinentes, vel aperto certamine, ac manifesto conflictu demonibus congredi cupientes, vastos Eremi recessus penetrare nõ timuerunt. Inter quos, non solum tempore, verum etiam vitæ integritate primus fuit Paulus ille Thebæus, primus Eremita cognomento dictus, qui per annos nonagintatres in profundissima Eremo perseueranter vixit, cui per idem tempus spelunca domicilium, fons limpidissimus potum, palma verò cibum & vestimentum præbuerunt. Huic coætaneus fuit Antonius natione Aegyptius, athleta sanè incomparabilis in hac palestra, miles veteranus, antequæ signanus strenuus. Quem omnia dæmonum territamenta, diabolicæ visiones, frequentissima verbera, ac durissima flagella à sancto proposito nequaquam amouere potuerunt. Tantorum ergo ducum postmodum exempla secuti sunt Macharij duo, sacratissimi filij maximi assertores. Item Amathas,

# EREMITICÆ HISTORIÆ

& Palemon, Beatus Ephrem, & humilitatis exemplar Hilarion. His adde Pachomium, Teonem, Arsenium, cum infinita solitatorum multitudine. Atque adeo circa annū à Christo nato cccxxx. & supra, intantum huiusmodi Religio, Domino fauente, accreuit (temporibus scilicet Constantini, & Constantij Imperatorum) vt non solū Aegypti deserta fusissima, & Thebaidis latissimas solitudines, verū etiam Palestinæ circa Iordanem, nemora sanctorum virorum frequentia stiparet. Isti sunt denique, qui omni labore solitudinis quietem appetentes, gaudium propriæ salutis, ac fidei, diuino munere sunt assecuti, ceterisque mox exempla sublimioris vitæ, sacratiorisq; præbuerūt. Omnibus enim terrenis exuti negotijs, adhuc morantes in corpore, Angelorum imitati sunt sanctitatem: per quam ascendentes fastigia celsa virtutum, vltra admirationem enituerunt mortalium. Ita vt in nullo prorsus antiquissimis (quos ex veteri testamento commemorauimus) Patribus, inferiores extiterint: quin & cum Sanctis Marty-



Martyribus, qui p Christi nomine mortem sustinuerunt, laboribus & meritis veniunt comparandi. Cur enim nō eis æquiparentur, qui inuisibilibus hostium occulta molimina, & infernalium furiarum versutas insidias ad nihilum redegerunt? qui inimicorum ignita tela sine intermissione, inuictaque constantia retulerūt? O' beati milites, quibus (vt Paulus ait) non erat iam colluctatio aduersus carnem, & sanguinem, sed aduersus principes, & potestates, contra mundi rectores tenebrarum harum, contra spiritualia nequitiae in cœlestibus. De talibus exclamat eorum commilito Hieronymus dicens: Vidi, & verè vidi, thesaurum Iesu Christi in humanis absconditum vasculis. Viderat enim eorum multos in terra positos, in humili, arctoq; tugurio cœlestem vitam agentes, multos vaticinandi spiritu, multos prodigiorum signis præclaros. Qui etsi rudi villosaque veste, vel sacco cilicino contexti, ac dispersi in separatis cellulis, silentes in summa quiete permanerent, eosdem tamen vinculo charitatis orna-

EREMITICÆ HISTORIÆ

tos, vnitosque animo, atque constrictos  
 diuinus amor habebat. Breuis somnus,  
 lōga oratio, meditatio mortis, proluxa  
 psalmodia apud illos noctem consuma-  
 bat: quicquid verò temporis supererat,  
 manuali operi dabatur. Nullus quippe  
 illic panem esse otiosus sinebatur. Vnde  
 præter se ipsos, suis laboribus multos  
 alebant pauperes. Veri profectò Euan-  
 gelicæ doctrinæ æmulatores, in nullo so-  
 liciti de crastino, non præmeditantes  
 quid manducarent, aut biberent, neque  
 quid induerentur, memores scripturæ di-  
 centis: Primùm quærite regnum Dei, &  
 hæc omnia adiicientur vobis. Hinc est  
 proculdubio, quòd apud Hieronymum,  
 & alios sanctos auctores, multos eorum  
 legimus, qui in corporali necessitate cō-  
 stituti, incomprehensibili modo diuina  
 manu refectioni sunt. Fuerunt ex illis, qui  
 (oratione fusa) Nihil reprimebant inun-  
 dationes: alij profunda fluminis sicco  
 transibāt pede: Propheticum spiritum,  
 gratiam curationum, dæmones eiicien-  
 di potestatem innumeri à Deo accepe-  
 runt. Quid ni (quæso) acciperent, qui  
 nihil



nihil terrenum, nihil carnale, iam sapiē-  
tes, soli Deo suo, Angelorum more adhe-  
rebāt? Quanta fuerit in eis cordis sim-  
plicitas, quanta in laboribus tollerā-  
tia, quanta in aduersis patientia, quā-  
mundi ab omni malitiæ cogitatione,  
quā ab omni criminis suspitione alie-  
ni extiterint, satis plenè Sanctorum scri-  
pta testantur. Hæc denique erat gene-  
ratio quærentium Dominum, quæren-  
tium faciem Dei Iacob: hæc gens san-  
cta, genus electum, regale sacerdotium.  
Hoc certè valdè mirandum est, quod tā-  
ta cura, vigilantiaque maiorum suorum  
traditiones obseruabāt (Cassiano teste)  
vt nulla inter eos in tāta hominum mul-  
titudine, ingeniorumque varietate, vi-  
uendi diuersitas, aut morum discrepan-  
tia facilè inueniri potuerit: sed omnes  
vnanimiter præscripta sequi, studiosè  
seniorum mandata adimplere, pacem  
seruare, & custodire vnitatem. At qui  
eorum mores, ac ritus plenè cognosce-  
re cupit, apud eundem Cassianum, inq;  
vitis Patrum assiduè legat. Certa autem  
Anachoritis illis, aut præscripta viuēdi  
regula

regula non fuit, sed solis seniorum exemplis ac monitis edocti, plusquàm regulariter viuebant, certantes inuicem quis officio charitatis, abſtinentiæ, paupertatis, nuditatis, atque orandi virtutibus præſtantior fieret. Nam regulam, quæ ſancto viro Pachomio ab Angelo de cælo allata dicitur, vix à paucis obſervatam fuiſſe legimus.

PRIMA igitur Regula Monastiæ conuerſationis, illius fuit, cui omnis laus exigua videtur, illius inquam, qui non minus ſolitariæ pœnitentiæ ſagum, quàm Episcopales infulas decorauit: Baſilius ſcilicet, cognomento Magnus, is quidē Regulam ſcriptam dedit, quæ cū pro tanti auctoris reuerentia, tūm pro ſermonis, vtilitatis, ac ſanctitatis excellentia, ab omnibus, qui in Oriente fuerant, Monachis approbata, & ſine cōtrouerſia admiſſa eſt. Etenim tantæ æſtimationis hæc Baſilij doctrina extitit apud ſanctiſſimos illos Eremitas, vt multis eorū Religio foret, aliud præter vtriuſq; testamenti codicem, ſacrâq; diui Baſilij Regulam non legere. Cū igitur nulla

Mona-



Monachorum congregatio in partibus illis inuenta sit, quæ Basilianis nō adhæserit institutis, ideo Basilius omnium Orientalium Monachorū Pater meritò est appellatus. Floruit autem Basilius eadem ætate qua Antonius, sed annos ferè triginta Basilius Antonio superuixit. Obijt verò cccxxx. anno ab Orbe redempto. Istis tandem & similibus documentis Eremitica gens fundata, atq; instructa, in sanctitate morum, ac vitæ integritate, in Dei seruitio cū omni humilitate, obedientia, charitateque stabilita per tempora multa perseuerauit. Iam defuncto Basilio, statim surrexit eximius ille Spiritus sãcti interpres Beatus Hieronymus, qui priùs in Scythiæ deserta (Roma relicta) confugiens, ibi Anachoreta factus, multas (vt ipse ad Eustochium scribens refert) tétationes passus, grauissimam poenitentiam egit. Rursus (vitijs excoctis) Romam reuersus, corruptos Cleri mores ferre non valens, iterum inde egressus in Palæstinam nauigauit, & in nemorè Iudææ haud longè à Betlehem, constructo Monasterio,

cum

# EREMITICÆ HISTORIÆ

cū pluribus discipulis sibi ob Dei amorem adhærentibus, quietam atque foelicem ad mortem vsque transegit vitam. Cuius instituti obseruatio vsque in hodiernum diem manet, maximè in Hispaniæ regnis, vbi multa, & inclyta sunt Hieronymorum ( sic enim vocantur ) Cœnobia. Inter quos propter eorum vitæ sanctimoniam, Carolo Quinto Imperatori Imperio relicto, & priuatim viuere, & mori placuit. Mox deinde Hieronymum imitatus est Aurelius Augustinus, qui in alto Africæ monte prope Hipponam ciuitatem, Eremitarum cuneos instruxit, quod innumeris sermonibus ad fratres de Monte ipse manifestat. Quæ quidem Religio nomine saltem Eremitarum sancti Augustini latissimè patet: instituit & Canonicos Regulares, de quibus hîc minimè disputamus. Superuixit autem Hieronymo Augustinus annis ferè octo, vt pote, q̃ obiit anno ccccxxx. ille verò ccccxxii. à Christo nato. Ista sunt tandem prima, ac vera Monachalis status initia, atque Eremiticæ vitæ fundamenta, de quibus hæc



hæc dixisse sufficiat, & ad ea, quæ instant, transeamus.

SANCTI BENEDICTI VITA,  
& Monachorum Cassinensium  
Institutio. Cap. II.

**D**EMONSTRATIS igitur cōpendio breui, quæ ad Orientalem plagam spectant, ordo Historiæ postulat, vt ad Occidentem stiliū vertamus: nimirū & Solis cursum Deus Optimus Maximus in Lege, Fideque sua amplificanda, seu dilatanda, iam ab initio seculorum obseruasse noscitur. Quo quasi naturali ordine religio Monachalis in Oriente exorta, cursu temporis in occiduas regiones translata concreuit, ramosque suos mirum in modum extendit. Quod idem Deus misericordia motus, maxima prouidentia efficere curauit, vt nusquam piè viuendi opportunitas fidelibus suis deesset, ac piissimi patris effectum nobis vbique ostenderet. Porro incomprehensibilis est Dei benignitas, & deploranda toto fonte lachrymarum

rum

rum mortalium ingratitude, ac cecitas. Quotidie mittit Clementissimus Pater novos Prophetas, qui moneant fugere à ventura ira: novos Doctores, qui doceant quæ facturi sumus: novos duces, qui nos doctrina & exemplis per vias rectas deducant. At nos insensati ad eorum voces obstrepimus, ad eorū clamores obturamus aures, eorum denique exempla contemnimus, ac sanctissima opera deridemus. Demum quid facere potuit vineæ suæ bonus agricola, quod non fecerit? de qua tamē cū expectaret vvas, accepit labruscas. Ecce vix vna cum dimidia præterierat ætas post Magni Basilij mortem, & alterum Basilium suscitavit mundo: ecce calefacto satis Orientali solo, naturali cursu Solem mittit in Occidentem, qui luceat, ardeat, ac gelida pectora accendat. Sol equidem fuit fulgentissimus, iubarq; cœleste Sanctissimus Benedictus, splendore gratiæ, virtutū lumine, ac spirituali benedictione illustratus. Hunc nobis olim vrbs vetustissima Sabinorum inclita Nursia foelicitè dedit. Quæ cū frigida sit, feruentem



tem animo, alta humilem, aspera blandum, rudis sapientē nobis misit alumnū. Cuius vitam Beatus Gregorius secundo Dialogorum libro non minus eleganti, quā luculento sermone describit: de cuius plenissimo promptuario ea tantū, quæ ad nostrum conuiuium preparandū necessaria videbuntur, depromere curabimus. Sanctissimus ergo Pater Benedictus adolescentiæ suæ tempore, relictis literarijs studijs, quibus Romæ operam dabat, magis Deo placere, quā mundi huius vanitatibus inservire cupiens, in Montē (qui Sublacus dicitur) quadraginta ferè passuum millibus ab vrbe distans, secessit: Ibiq̃ue in arctissimo specu absconditus, nullis hominibus (excepto Romano Monacho, à quo certis diebus panes accipiebat) cognitus, per triennium mansit. Mox verò cū placuisset Altissimo eum ad opus maioris ministerij vocare, à pastoribus in eadem specu latitante reperto, eius nomen ac sanctitatis fama per vicina loca diuulgari cepit, & ab hominibus deuotionis gratia frequentari, quem iam exinde multi re-

licto

lieto mundo quasi discipuli sequi cœperunt. Postmodum, cognita cunctis eius eximia sanctitate, à magna quadam Monachorum Congregatione in Abbatem eligitur, quod vix multis precibus, nec sine difficultate obtinuere electores. Recusabat namque vir pius impios eorum mores corrigendos suscipere, Spiritu præuidens in cassum ituros labores suos. Suscepta itaque administratione, ab iniquis Monachis multa passus est, quorum nequitia in necem Magistri machinari cœperat. Quamobrem (ne locus daretur Satanæ) inde pius Pater recessit, ad locumque dilectæ solitudinis rediens, solus in superni Spectatoris oculis habitauit secum. Construxit postea in circumuicinis locis monasteria duodecim, atque in singulis eorum duodecim Monachos constituit, paucis admodum secum seorsum retentis, inter quos Placidum, & Maurum fuisse scimus. Nec tamen huiusmodi loci commoratio diuturna fuit, nec ibi animi quies absoluta. Tanto liuore Sacerdos quidam hominē Dei persecutus dicitur, vt eidem vene-



rabili viro, eo quòd non longe ab eo moraretur, deuoti que omnes, eius Ecclesia derelicta, ad monasterium properarent, sæpe infidatus perhibetur. Re autè perspecta, quo sibi & discipulis simul prouideret, inuidiæ locū dedit, ibi q; substitutis præpositis, rebus cōpositis, fratribusq; relictis, ipse cum paucis ad montē Casinū se contulit. Vbi circa annū dxxviii. Casinenſe monasterium toto Orbe terrarum celebre construxit, quod postea totius Ordinis caput semper habitum fuit. Alia quoque monasteria non pauca fundasse compertum est, sed de singulis hīc pertractare superuacaneum putamus. Ex prædictis ergo apparet Benedictū solitudinis fuisse impensè amatorem, cui ab infantia totum se tradidit, quamq; semel derelictam rursus repetijt, Monachos male moratos fugiēs. Neque aliud fuisse monasteria ab ipso fundata existimandum est, quàm solitariorum bene composita domicilia, eòq; in montibus, & syluis, locis quieti congruentibus, eadem collocauit. Fuit autem vir non solum remotæ solitudinis,

B

aut

aut solius contemplationis amicus, verum etiam omnium virtutum studiosissimus, quibus miraculorum, ac diuinorum operum patrator existens, quasi celeste sydus clarescere meruit. Etenim demortuum puerum, & monachum ruina parietis confractum suscitasse: signo crucis vas~~um~~ venenum continens confregisse non est ambiguum. Animas ad coelos vidisse ascendentes, futura prædixisse, demones effugasse, abscondita atq; longè posita spiritali oculo vidisse, eius historia docet. Quapropter apud Gregorium, post virtutum, signorumque narrationem, miratur Petrus ille auditor, dicens: Mira sunt, & multum stupenda quæ dicis. Nam in aqua extra petram producta, Moysen: in ferro verò, quod ex profundo aquæ redijt, Eliseum: in aquæ itinere, Petrū: in corui obediētia, Eliā: in luctu autē mortis inimici, Dauid video: & perpendo, quia vir iste spiritu iustorum omnium plenus fuit.



## REGVLA, ET PROPECTVS

Familiaē Benedictinae. Cap. III.

**B**EATISSIMVS ergo Pater doctrina non mediocriter ornatus, ætate prouectus, forti & constanti certamine vitiorum, temptationumque victor gloriosus, diuturno insuper magisterio mores discipulorum callens, plenius intellexit non omnibus solitariam vitam competere. Quæ sanè & paupertate gaudet, & parcimonia alitur, atque rigiditate vestium, manuumq; labore confouetur; vigiliis, & perpetuū silentium affectans. Qua pijsissima consideratione motus, communem potius multis normam piè viuendi dare, quàm paucis asperam viam salutis, tradere maluit. Ideoque monachorum Regulam discretionem præcipuam, sermone luculentam conscripsit. Est namque abundans pauperi, mediocri sufficiens, tolerabilis diuiti, infirmis larga, delicatis compatiens, fortioribus moderata, poenitentibus misericors, peruersis seueræ, atq; bonis optima. Meritis itaq;

B 2 San-

Sanctissimi Benedicti ab Oriente in Occidentem translata Religionis perfectio conspicitur : vnde Zacharias Papa in prædictæ Regulæ confirmatione, Benedictum omnium Occidentalium Monachorum Patrem iustissimè appellat . Ceterum cum pijs omnibus Regula Benedicti præstantior videretur , factum est, vt omnes qui sanctitatis viam ingredi statuisent, eandem sequeretur, eiusq; institutionem profiterentur . Cumque post obitum Benedicti ( obiit autem in Monte Cassino anno <sup>1</sup>DXLII. ) eius beata familia in omni perfectione, ac sanctitate vitæ floureret, breui tempore in totam ferè Europā dilatata est : adeoq; aucta, ac propagata, vt, si credi potest, non desit qui assermet, Benedicti monasteria septem supra triginta millia numerum excessisse . Quod omninò mirū videri non debet, si hodie vel cohabitata, vel diruta, vel etiam alijs Religiosorū familijs attributa monasteriorum ædificia consideremus . Quanta verò pietatis, charitatisque perfectione, quanto deuotionis feruore, quanta doctrinæ abun-



abundantia, prima illa huius sanctæ con-  
 uersationis ætas processerit, ex hoc ple-  
 nè colligitur, quòd nisi Benedictinus es-  
 set, ad Apostolicam sedem, ad Cardina-  
 litias dignitates, & ad Episcopales ca-  
 thedras vix assumebatur. Atque, si histo-  
 rijs credimus, per aliquot secula vniuer-  
 salis Ecclesiæ ex hac quasi virtutū scho-  
 la delecti Pontifices clauum rexerunt.  
 Vidimus siquidem paginam quandam  
 ex annalibus Pontificum extractam, in  
 qua adnumerantur Pontifices Romani  
 xxviii. Cardinales 2000. Archiepisco-  
 pi 7000, Episcopi verò 15000. Neque  
 compertum habeo, ex eorum guberna-  
 tione Dei Ecclesiam in aliquo fuisse læ-  
 sam, sed à multis abusionibus liberatam  
 lego. Magnum quidē est quod diximus,  
 sed quod sequitur, laudabilius censebi-  
 tur. Tanto zelo in primitiuo huius ordi-  
 nis statu regularia præcepta obseruaban-  
 tur, tanta æmulatione colebatur pau-  
 pertas: ea simplicitatis, charitatisque  
 inter monachos vigeant studia, vt in  
 catalogo Sanctorū ex eis quatuor supra  
 tria millia canonizati reperiantur. Tali

vtiq; modo se habuisse, per quæ multos annos hac foelicitate processisse castam Benedicti sobolē, apud probatos, piosq; auctores inuenire est. Veruntamē postq̃ labentibus annis, prima illa obseruantia norma, ac charitatis refriguit feruor; diuini cultus tenor, & obediētia ritus elanguit: inde orta regnare cepit libertas. Hęc est siquidem mortalium conditio, vt diū in eodem statu permanere non possit: quę humana infirmitas relaxationi huic facilē occasionem prestitit. De isto profectò lachrymabili religionis statu iustissimē conquerebatur olim Poeta quidam, in hæc verba:

Omnibus occiderat superum reuerentia terris:

Et decus, & prisca Religionis amor.

Quin etiam ruptis errabat pauper habenis:

Sancte per anfractus, grex Benedicte tuus.

Rarus & incerta Monachus statione peragrans,

Non dabat Auctori debita vota suo.

Post hæc idem Auctor Benedictum intrò ducens, qui pro Religione sua iam iam peritura deprecetur, talia ad Deum direxisse verba, elegantissimē refert:

Maxime Rex, patent Coelum cui terra, frētumque.

Omnia, qui nutu dasque, regisque tuo.

Aspicias, vt longo probitas malè frigeat æuo?

Aspi-



Aspicias, vt toto ferueat orbe scelus?

Cernis, vt aduersis agitetur fluctibus omnis

Relligio; & nullo milite fulta eadat?

Ille meus quondam teneris benè cultus ab annis;

Quò fugit antiquæ Relligionis honor?

Quemque ego tam lata moriens ditione reliqui,

Ordinis heu nostri, dic mihi, feruor vbi?

Iam mea progenies tandem, nisi penitus illi

Prospicis, è summo culmine pulsa cadit.

Quamobrem Sancta mater Ecclesia filiorum suorum sollicita diù non neglexit iam penè labentem Religionem pijs ac iustissimis latis institutis reformare: ritè præcipiens quæ ad primam Regulæ obseruantiam spectare videbantur. Ex qua sanctissima correctione etsi multa monasteria deficere, ac labefactari visa sunt: attamen semper integra mansit sancta Cassinensis familia, quanquàm non sine rerum temporalium magna iactura. Atqui non multò pòst precibus, & meritis Sancti Patris Benedicti erectæ sunt congregationes quædam, quæ iterum penè totam Europam impleuere. Ex quibus primam fuisse Cluniacensem plenè còstat. Deinde secuta est inclyta Cystericiensis proles, quæ latè pater & sanctæ obseruantia integritate

celebris semper habitata est: ideoque à sancta Sede Apostolica vbique priuilegijs, & honoribus cumulata. Est & in Hispaniæ Regnis amplissima & ipsa obseruatissima Vallis Oliuetanæ numerosa familia, in qua sacrosancta Montis ferrati domus continetur. Sunt & in Germania, inque Belgica prouincia, siue Flandria multa & amplissima monasteria, in quibus vltra religiosos mores, litterarum scientia maxime floret, quæque aduersus hæreses, his nostris infoelicissimis temporibus, spiritualib<sup>9</sup> telis acerrimè certant. Accessit ad hæc semper Veneranda Sanctæ IUSTINÆ Patauij Congregatio, quæ cum Cassinensibus vnita à primo tēpore existat, in Regulari obseruatione nulli secunda reputatur: immo Cœnobiorum numero, magnificentia, atque opulentia; necnon Religiosorum multitudine, & in pauperes charitate, alias omnes excellere crediderim. Ita demùm floret hac nostra ætate Benedictini gregis institutio, vt neque in vitæ sanctitate, neque religiosa obseruantia, neque cultorum multitudine,



titudine, quicquam à primo illo laudabili eiusdem religionis statu amisisse videatur. Præsertim cùm & aliæ multæ Congregationes, solis habitu, & constitutionibus, inter se differentes, sub Benedicti regula hodie militent, vti sunt Camaldulenses tã Monachi, quàm Eremitæ, Oliuetani, & alij non pauci.

## CONVERSIO D. ROMVALDI

Eremitarum Camaldulensium  
fundatoris. Cap. IIII.

**T**VNC ergo cùm iam de Monastica religione in occidujs quôq; partibus, sicut in Orientalibus multò antè euenerat, prorsus desperandum videbatur, magni Benedicti meritis, summiq; Dei beneficio: ecce quasi Sol inter nebulas, & quasi rosa inter spinas, insurgit, atque effulsit Sanctissimus vir Romualdus. Is Rauennæ anno ab orbe redempto 907. ex illustrissima Ducû progenie ortus est, Sergij nobilissimi viri filius. Qui in pueritia, inque pubertatis flore in delitijs educatus, factus  
ado-

# EREMITICÆ HISTORIÆ

adolefcens nobiliũ corruptos mores in multis fecutus perhibetur , fed paffim piã vtiq; mentẽ in actibus fuis oftẽdere vifus eft . Natus verò annos viginti, homicidij à Sergio patre perpetrati ( fola præfentia , nullo tamen confenfu ) particeps factus , Patriæ illius confuetudinem obferuans , monafterium Claffenfe quadraginta dierum , pœnitentiam non commiffi delicti acturus, adiit . O quàm mirabilia funt opera tua Domine ? Homicidæ focium iuuenẽ facis, quò poftea Sanctorum comes efficiatur, in loco patratì criminis præfentem conftituìs, quò deinde ad locum pœnitentiæ ac meriti faciliùs perueniat . Iam in monafterio commoranti Romualdo , laicus quidam Conuerfus idiota, fed pius , Religionem ingredi fuadebat . Recufabat iuuenis : verùm cùm Conuerfo nocte in Templo orante , femel & iterum , corpus Beati Apollinaris, ibidem fepultũ , fplendore ornatuq; mirabili , ipfe tunc præfens vidiffet , fuadenti confenfum præbuit . Nec mora , tanto illectamento diuinæ gratiæ captus , Religionis habitum fumpfìt.



psit, atque in dies magis magisque in Dei timore, pariter & amore accrescere cepit. Diuino itaque zelo accensus, sociorum suorum mores parum sibi placentes considerans, ausus est sæpè grauiissimis verbis obiurgare. Quod illi ægrè ferentes, pijsimiq; iuuenis correctionem proteruè respicientes, odio maligno insidias ei tendere cogitauerunt. Hæc animaduertens Romualdus, perpendensque inter iniquos difficile fieri virtutis iter, eoque illic perfectionis semitam, quam mens dictabat, se arripere non posse, diu præmeditatus quid sibi agendum esset, consensu ab ipso Abbate, & fratribus facillimè impetrato, inde discessit. Monasterio autem egressus, idoneum perfectæ vitæ magistrum sibi anxie quærit. Quem Deus, qui non derelinquit quærentes se, ad Marinum, qui in paludibus Venetiarum solitarius degebat, celeriter adducit. Erat autem Marinus vir miræ simplicitatis, sincerus, ac omni puritate præditus. Is hanc sibi viuendi formam præscripserat, vt tuguriolo

riolo luto calamoq; intexto contentus,  
 stramentis humi positus pro lecto utens,  
 vilissimoque bardocucullo coopertus,  
 in summa vitæ austeritate maneret.  
 Per continuum anni circulum, ieiunium  
 in pane, & aqua (præter paucos dies,  
 quibus pulmento, & modico vino ute-  
 batur) sibi indixerat, præter dimidium  
 panis, & pugillum fabæ, nihil in die su-  
 mens, singulis diebus integrum Psalte-  
 rium distincta voce pronuncians, reli-  
 quo temporis spacio operi manuum, &  
 orationi impartito. Vera profectò, li-  
 cèt brevis, Sanctitatis Regula. Nō utiq;  
 prurientes auribus magistros sibi quærit  
 Romualdus, qui magnifica loqui, aut  
 fimbrias dilatare sciāt, sed huic colum-  
 binæ menti, huic paruulo humilitate fa-  
 cto, huic denique innocenti viro, toto se  
 corde committit. Apud quem breui  
 tempore tanta virtute profecit, vt Ma-  
 rinus sponte paulopost è magistro, Ro-  
 mualdi sit factus discipulus.

ROMVAL-



## ROMVALDVS IN GALLIAM

peregrinatur, reuertitur, & Eremiticam vitam instituit.

## Cap. V.

**I**NTEREA, dum Sancti Dei homines inter arundineta, paludesq; latitare nituntur, fama sanctitatis eorum prorumpit foras, eosq; mundo inuitos manifestos facit. Vnde Petrus Ursioli Venetiarum Dux, relicto Ducatu per nefas, perque magnū delictū acquisito, cum Ioanne Grandenico eiusdem delicti socio ad eos se contulit, à quibus, vt melius propositum suum (sine ciuium suorumq; impedimento) exequeretur, in Galliam deducitur. Illic verò in quodam monasterio Sancti Michaelis, in quo Guarinus (vir quidem pius) præerat, Ursiolus, & Grandenicus monachi fiunt. Romualdus autem, & Marinus non lōge ab ipso monasterio, aptum recessum nacti, in solitudinem redeunt. At post annum Ursiolus, & Grandenicus iam Religiosis moribus imbuti, ad suos desideratos duces, in prædictam solitudinem veniunt,

niunt, qui vnà cum Marino Romualdi  
magisterio subduntur. Etenim tam san-  
cti Collegij curā suscipiens vir strenuus,  
arctam Marini Regulam nequaquàm re-  
laxat, immo sibi vni arctiorem multò  
obseruandam proponit, socijs quò ad  
victū, ni hil tunc in Marini ritu innouans.  
Huic per vnus anni spacium, pugillum  
ciceri infusi quotidianus cibus fuit: tri-  
bus annis sarculo, ac manuum labore,  
solo Grandenico adiutus, sibi & socijs  
victum quæsiuit. Postremò quò certam,  
durabilemque viuendi formam discipu-  
lis constituere possit, multas ieiunij spe-  
cies expertus est, è quibus honestiorem  
sequendam & verbo, & exemplo suos  
edocuit cõmitones. Vigiliis insuper,  
psallendi iustum modum, orandi perfe-  
ctam legem, atque corporalis exercitij,  
ne aliqua pretiosi temporis fieret amif-  
sio, discretam distributionem constâter  
ordinauit. Verùm quia de ijs omnibus,  
& singulis, inferiùs, vltimo scilicet tra-  
ctatu, ex professo tractabitur: hic eadẽ  
referre superfluum duximus, illuc lecto-  
rem cupidū remittentes. Sic ergo annis  
circiter



Circiter viginti in Gallia commoratus,  
 accepto nuncio, Sergium patrem ( iam  
 dudum Religiosum factum ) ad vomitū,  
 hoc est, in seculum redire velle, celeriter  
 reditum in Patriam parat Romualdus.  
 Ibi foeliciter in perseverantia confirma-  
 to Sergio, ipse iuxtà Classis paludem in  
 quoddam diui Martini sacellum secessit,  
 durior semper sui ipsius exactor. En il-  
 licò spargitur per Aemyliā tāti viri ce-  
 lebre nomen: quo audito, confluunt vn-  
 dique ( formicarum more ) homines, di-  
 uersis tamen intentionibus acti, sed om-  
 nes ab eo consolationem aliquā deside-  
 râtes. Inter eximias multasq; Romual-  
 di virtutes, hæc præcipua habebatur,  
 quòd nunquam ab eius præsentia tribu-  
 latus consultor, desolatus recessit, ser-  
 mone ac præsentia eius hoc ipsum diui-  
 nitùs operante. Vnde Otto Imperator,  
 & Enricus eius successor, sæpiissimè eū cō-  
 sulebant, quorū primus, nisi morte præ-  
 occupatus fuisset, Eremitam se futurum  
 viro Dei bona fide receperat. Tanta  
 insuper erat ei verborū vis, & efficacia,  
 — vt passim auditores suos absq; difficul-  
 tate

tate aliqua à vitio ad virtutem, à via peccati ad Religionem, à delitijs mundi ad pœnitentiam conuerteret. Huic rei testimonio sunt (vt interim vulgarium turbam missam faciamus) Dux Vrsiolus præmemoratus, Ioannes Grandenicus, Olibanus potentissimus Galliæ Comes, item Busclai Regis filius, & Guidonis Comitis puer: his adde Bonificiũ martyrem Regio sanguine satum, Tamnum Imperatori dilectissimum, cum magno Teutonicorum numero, qui omnes venerabilis viri hortatu mundum mirabiliter reliquerunt. Sequebantur tandem Romualdũ Italicæ nobilitatis innumeri iuuenes, è quibus præcipui extitere Ioãnes, & Paulus, qui postea glorioso martyrio coronati sunt. Stipatus ergo breui tẽpore discipulis sollicitus magister, coactus erat subinde locũ mutare, noua Eremitoria quærere, inuẽta erigere, diuersa Monasteria fundare, plura de manu largientiũ fundata suscipere. Ideoq; ædificasse, & oblata acceptasse Monasteria quẽdam legimus, vicissimq; Eremitoria non pauca erexisse, inter quẽ celebre —

Camal-



Camaldulum. Sed aduertendum valdè venit, quòd vbicūque loci opportunitas se offerebat, non longè à Monasterio, Eremus quoque condebatur. Vnde sepiùs in eius historia sub eiusdè nomine loci, nunc Monasterij, nunc Eremiti fit mentio. Vt in Sytria, Pereò, Bifurco, Parentio, & Valle de Castro. Ad quem autem finem hæc ita tunc à sancto viro fiebant, paulò inferiùs differemus. Quæ omnia quanto cum labore, atq; sudore in tanta paupertate perfecerit vir pius, quotusquisq; enarrare poterit? Sed tamen in omnibus strenuè se gessit, neque sibi pepercit vnquam, dummodo Christo suo lucrificeret animas, & viam salutis pœnitentibus aperiret, ac præpararet.

## CONSTANTIA, ET VIRTUTES Romualdi. Cap. VI.

**F**VIT præterea in homine isto mirabilis in laboribus constantia, in tentationibus resistendi vigor, in opprobrijs, iniurijsque tolerandis

randis patientia, necnon in miraculis operandis diuinæ prorsus gratiæ illustratio. Solent plerumque etiā præclarissimi viri à primo iuuentutis rigore quasi victores vitiorum facti, paululū deflectere, quod & Benedictus sanctissimus fecit. At nō ita Romualdus noster, qui constantissimè Eremiticum viuendi institutum ab initio cōuersionis assumptum (quod superiūs adnotauimus) donec illi vita comes extitit, ad vnguem obseruasse plenius comprobatur, vtpotè qui solis exemplis, nulla autem scriptura, semper discipulos edocuit. Et, vt semel dicam, ipse in victu ceteris parci-  
 or, in vestitu pauperior, atque in laboribus promptior esse voluit. En tibi post Gallicam peregrinationem nudis pedibus, ob patris salutem, Rauennam reuertitur. Deinde, vt suos apto valeret loco locare, qua sollicitudine tot monasteria, totq; Eremitoria constru-  
 curauit? Rursus ad eosdem inuifendos, consolandos, moribus componendos, inque disciplina retinendos, quoties à Parentio in Bifurcum (vt historiæ ver-  
 bis



bis vtar) Adriaticum fulcans, ab Aemy-  
lia in Dalmatiam, à Dalmatia in Pice-  
num, à Piceno in Hetruriam transcurris-  
se senem credas? Adde, quòd ad capi-  
tis sui imitationem incredibilia susti-  
nuit probra, pertulit irrisiones, atque  
durissima tum ab hominibus, tum etiam  
à dæmonibus suscepit patienter verbe-  
ra. Dum Balnei moraretur non longè à  
monasterio solus, nonnulli filij Belial  
furore maximo obcæcati in cellam eius  
irrumunt, eumq; intus verberibus cru-  
deliter efficientes, direptis omnibus, ac  
turpiter dehonestatum, de finibus illis  
eiecerunt. Alia vice quidam iniquita-  
tis minister, iusti senis correptionem nō  
ferens, proprijs manibus obstricto gut-  
ture suffocare voluit. Si contumelias  
hic, quas à varijs, ac diuersis hominibus  
sustinuit, omnes enarrare vellem, iustum  
libelli modum transcenderent. Certè  
nunquàm defuit aliquis Satane discipu-  
lus, qui eū de pessimis criminibus falso  
accusaret, iniuriasque illi cum turpissi-  
mis calumnijs inferret. Quid tandem  
non est machinata inuidorum, atq; dia-

boli inueterata malitia? Attamen fidelis Christi imitator hæc omnia non solum patienter ferre, sed etiam libenter amplecti, & gaudēs cuncta portare semper visus est, immò peiora, duriora que opprobria: quò Deo suo magis placeret, desiderasse sapius discipuli eius adnotauerunt. Porro nō cessauit antiquus hostis ab initio conuersionis eum varijs tentationibus, monstruosisq; vitiorum speciebus immixtis quotidie oppugnare, quibus & terramenta addebat malignis immania, vsque ad apertum certamen descendens. Sed omnia dulcissimo nomine IESV inuocato, vincere est solitus. Sic in atros aliquando ceruos, quandoque reterrimos Aethiopes, plerūque brutorum horribilia monstra cōuersos spiritus, Dei seruus fugabat. Iam, quæ alicui Sanctorum gratia fuit vnquam, quam non habuerit iustus iste? fuisse in eo sapientiæ, scientiæque sermonē, multitudo eorum, quos ad fidem, adque penitentiam, seu religionem cōuertit, plenissimè manifestat. Perfectionis donum, inclusus cellula in Eremitio Parentij, per  
 Spiri-



Spiritus sancti afflatum (Deo miserante) suscepit. Miracula, quæ Deus per ipsum operatus est, longum esset enarrare. Hic flagrantem succensa cella ignem, nullo naturali adminiculo, sola oratione meruit extinguere. Nauim seuiente turbulenta tempestate iam penè submersam oratione subleuat, atque velut in tranquillo mari recta via in portum direxit, nauigio, animabusque omnibus saluis. Rabidum dentis dolorem cuiusdam presbyteri tactu digiti illicò sedatum legimus. Ingens fagus abscissa naturali pondere super cellam, in qua ipse Sanctus inclusus manebat, magno impetu ex altiori loco ruens, iamque ferè ædificium attingens (res stupenda) signo crucis factò, quasi funibus, aut quadam violentia inde abstracta, super cellam transiliens, longè seorsum cecidit. Quid moror? infirmos curauit multos, non paucos liberauit dæmoniacos, ac tandem furentium mentes mirabiliter sanasse, eius historia plenissimè narrat. Vix denique aliquod miraculorū genus extat, in quo sanctissimi viri diuina virtus non

claruerit. Nonne & illud miraculum sapit, quòd cùm iuuenis rudissimus foret, senex Spiritu sancto illuminatus tantam scientiam adeptus fuit, vt Psalterium Dauidicum sublimioribus sensibus sit interpretatus? Præterea nec Prophetico Spiritu caruit, qui Imperatori ipsi propinquam mortem prænuntiavit; qui in absentia, seu in abscondito à fratribus gesta, & vidit sæpè, & prædixit; qui furem longè positam cellam frangentem, nocte fratribus fecit manifestum; sic Montem Amiatam multò antè suis obuenturum prænunciassè compertum est. Postremò sciendum est, obitum suum, & locum in quo erat moriturus, moriendi què modum viginti annis antè discipulis suis notificassè: quos in nullo fefellit vir sanctissimus. Obijt autem, vt prædixerat, in Valle Castrensi, inque solitaria cella reclusus, ac velut alter Paulus primus Eremita, emissis ad Monasterium Monachis, qui eum die illa visitauerant, solus (vt qui solus vixerat) beatam animam ad cœlos transmisit. Vixit verò beatissimus Pater centum viginti annis, viginti



viginti scilicèt in seculo, tres in Monasterio, nonagintaseptem in Eremitico proposito transactis. Obijt tandem decimotertio Kaléd. Iulias anno MXXVII. post Mundi redemptionem. Cuius sacratissimum corpus postmodum inde translatum est, & in Monasterium sancti Blasij Ordinis Camaldulensis apud celeberrimum Piceni Oppidum Fabrianū honorificè repositū, hodie summa omnium veneratione colitur. De cuius translatione, quia miraculosa fuit, specialis libellus circumfertur. Hæc itaque carptim ex plenissima, ac luculenta Petri Damiani de vita Romualdi historia desumpta referre statui, ne quid memoriæ dignum hîc deficere videretur: qui autem plura de tanto Sancto cognoscere desiderat, illuc faciendus recurrat, vnde abundantius haurire poterit.

VTILITAS EX ROMVALDI  
institutione secuta. Cap. VII.

**E**X præcedentibus siquidem constat, quis, qualis, & quantus extiterit Romualdus;

mualdus ; nunc quid, quantumve Ecclesiæ Dei profuerit eius virtus, labor, & industria ; nec non quid Monasticæ Religionis augmenti eius exemplum attulerit, breuiter aperiemus. Hic igitur primus Orientalium Anachoretarum perfectissimæ institutionis, in Occidentis regionibus fundator fuit: hic Benedicti regulam, iam pro Monachorum dissolutione penè antiquatam, multo cum sudore instaurauit. Huius exemplo, atque hortatu accensus Ioannes Gualbertus, qui & eiusdem discipulus fuit, Vallis vmbrosæ Congregationem erexit, anno MXVI. Huius nomine, ac victitandi modo auditis, Venerabilis Bruno ad eiusdē imitationem, suam condidit Cartusiam; vnde tam sancta, numerosa que proles exorta comprobatur. Quæ initiū habuit anno MLXXXVI. Beatissimus insuper Robertus toto Orbe celeberrimi Cistercij fundator, istorum exemplis animum suū ad tam mirabile opus suscipiendum, informasse meritò creditur. Quæ sanctissima cōuersatio cēpta est anno MXCVIII. Hinc lucidissima illa stella, Bernardus  
 Clara-



Claraualensis cum suo laudabili grege paulò pòst emanauit. In summa præter Eremitas sancti Augustini, quos vocant, De obseruantia, & Cassinenses, nec non Præmostratenſes fratres; reliquos omnes quocunque nomine appellentur, Religiosos viros, longo præcedit temporis interuallo, sanctissimi Romualdi veneranda proles. O ter, quaterq; beate Romualde Pater, cui te ego Sanctorũ similẽ faciã? Tentationibus, & pugnis demoniorum in nullo, Antonio magno cedis; nec quicquã ille passus legitur, quod tu durissimè non sis expertus. Hilario nem vicisti abſtinentia, & vitæ austeritate. Quid? in feruore charitatis, in proximi dilectione, in laboribus proximi sufferendis (audacter dicam) Doctori Gentium, Apostolica dignitate excepta, merito es conferendus. Nec immeritò cū eodem dicere poteris: Ministri Dei sunt, & ego, in laboribus plurimis, in carceribus reclusionum abundantius, in plagis supra modũ, ter virgis cesus sum, ter naufragium feci. Quid plura? tu in itineribus sæpè, periculis fluminum, periculis

riculis latronum, periculis ex genere,  
periculis in solitudine, periculis in ma-  
ri, periculis in falsis fratribus: in labore,  
& ærumna: in vigilijs multis: in fame,  
& siti: in ieiunijs multis: in frigore, &  
nuditate. Te tandem cum Paulo glo-  
riari oportet in tribulationibus tuis. Tu  
certè lac dedisti paruulis, escam tribuisti  
adultis: statuisti debilibus Monasticam,  
Eremiticam fortioribus, atque robustis  
proposuisti viuendi rationem. Quòd cū  
nullus huius disciplinæ magister hacten-  
us fecerit, equidem tu omnes longè es  
super egressus.

SACRAE EREMI CAMAL-  
dulensis, & Fontisboni hospicij  
ædificatio. Cap. VIII.

**I**NTER omnes Eremos, quas San-  
ctissimū Romualdū ædificasse legi-  
mus, præcipua fuit, primasq; semper  
tenuit Camaldulensis, quæ sacra meri-  
tò appellari solet, tūm quia solitudo illa  
ab initio Deo consecrata extitit, tūm  
quòd qui eam incolunt, sacri sint, & sa-  
crificia



crificia Deo iugiter offerant. Camaldulum autem ager syluester est, quondam cuiusdā Malduli nobilis Aretini, à quo & nomen ipsum (quasi cāpus Malduli) deducitur. Est itaque campus iste in vertice celeberrimi montis Appennini, intra fines Diœcesis Aretinæ, interque altissimos colles, quibus Hetruria ab Aemylia prouincia diuiditur, constitutus. Cuius quidem situs amœnitate rarus, vndique vernante abiete cinctus, manantibusque inde è fontibus septem saluberrimis aquis: ideoque à quibusdā (licet ambitu breuis, angustusque existat) campus spaciosus, mirabilis, atque amabilis non incongruè nuncupatur. Hanc Eremum ab ipso Romualdo ædificatam fuisse, Petrus Damianus inter narrationem miraculi ibidem facti nudis verbis affirmat: sed de modo, aut tempore, alioquin diligentissimus author, nullum verbum facit. Quòcirca nobis necessarium erit, gestorum narrationem altius repetere. Reuersus igitur è Gallia Romualdus, dum ad Classis paludem, seu in Sancto Martino in sylua (vt superius diximus)

ximus) moraretur, multis ad se venientibus, coactus est inde egressus alia loca quærere : utque eos ad Eremiticam, Monasticamque vitam valeret instruere, varia monasteria, necnon diuersa Eremitoria condere. Quod autem ex multis primùm erectum fuerit, non satis liquet, nisi ex historiæ contextu scripturæ seriem attendentes, Perei, vel certè Balnei ædificia tempore reliquis priora dicamus. Verùm cum hæc prioritatis quæstio nullius momenti sit, ad ea, quæ ad rem faciunt, prioritate relicta, accingamur. Inde fessus ergo Dei famulus, diligentissimusque in vinea Domini operarius, desiderans aliquem insignem ad Eremiticam vitam aptum locum, qui ab omni populo procul, & ab hominum cōcursu longè segregatus foret, quò potissimùm se verteret ad illud inuestigandum, diù deliberando cogitavit. Quo pijsimo desiderio affectus senex, anno millesimo duodecimo, ætatis verò suæ centesimoquinto, ab Adriatici maris oris, ab ipso patrio solo Tusciam versus iter concitus arripuit. Vidisses decre-

pitum



pitum senem iuuenili gestu gradientem, per Alpium profundas valles, per inuios saltus, per insuperabiles colles ceruis velocius transilientem. Non illum arduæ rupes, non peruia iuga, non fulta sylua, aut densissima rubus quicquam detinet: omnia calcit, ac transcendens cuncta superat vniuersa. Porro facta sunt ei aspera in vias planas. Recessus singulos intereundum considerat, valliculas quasque perlustrat, sagaciter attendens quæ sit cuiusque loci secundum suam intentionem commoditas. Tandem suprema Appennini iuga attingens, Camaldulum venit, vbi loci dispositionem, situsque; amœnitatem intuens, baculo (quæ manu de more gestabat) incumbens, paululum constitit, cunctaque diligentissimè rimatur. Tunc primùm itineris lassitudinem sentire cepit: tunc seniles ceperunt deficere artus: tunc debilia membra requiem postulant. Absidet super gramina senex, & protinus siue lassitudine, siue nimia inuenti loci delectatione affectus, obdormiuit. Et ecce in somnis vir Dei in Spiritu raptus, visionem videt,

videt, scalam scilicet, ad instar Iacob, coelos pertingentem, & per eam Monachorum multitudinem ascendere. Mox autem expergefactus, inque se reuersus, Nunc, inquit, scio verè hanc iucundissimam mansionem seruis suis præparasse Dominum. Qua de re gratias statim Deo suo egit: quibus necdum finitis, festinus de monte descendit, qua mons ipse in Tusciam declinat, Aretiumq; versus dirigit iter. Hoc in loco varij varia tradunt, qui certè parùm inter se constare videntur. Quorum alter Romualdum Aretij cōmorantem ab ipso Maldulo fuisse præuentum, eò quòd primus somnium de scala præfata somniasset: Alter & Romualdum, & Maldulum eundem vidisse visum affirmat. Alius eorum asserit monasterium Fontisboni, palatiū fuisse Malduli, & rursus Maldulū in ipsa Eremo habuisse facellum, in quo ipse cum paucis quibusdam socijs sæpe orabat: item quidquid ibidem Romualdus habuit ab ipso Maldulo, ei fuisse donatū. Nos verò præfatos authores in suo sensu relinquentes, veram, germanamque huius



huius facti narrationem paucis ostendere intendimus, quam authenticis ex ipsius Canalduli scrinio testibus adductis probare haud difficile erit. Principio itaque sciendum est, post scalæ visionem Romualdum Aretium recta petijisse, ac Præsulem ipsius Urbis rei gestæ manifestandi causa conuenisse. Erat autem tunc temporis Aretij Episcopus vir quidam magnæ æstimationis, in sacris literis apprime eruditus, timoratus, & verus Dei cultor, nomine Theodaldus. Hic cum Romualdum vidisset, senis abiectâ præsentiam, & sordidû palliolum, seu squallore foetentem cucullum, nequaquâ contempsit; neque horridam pauperis nuditatem abiecit. Sed eum Dei famulum reuera agnoscens, & libenter allocutus est, & honorificè tractauit. Quo tandem audito, laudauit senis propositû, illudq; vt prosequeretur, atque perficeret, summo perè hortatus, condendæ Eremitæ impensas se eidem ministraturum, animo pio recepit. Tali igitur impetrato auxilio, abiit impiger Dei minister, & omni sedulitate adhibita, breuius quàm credi

credi potest, templum non ignobile, & in circuitu eius quinque cellulas Eremitico more construxit. Ea tamen structura in cellis ædificandis vsus est, vt earum forma, humilitatem puram, nullam autem superfluitatem præ se ferre videretur, ita vt corpus ab aeris iniuria defenderet, nec animo elationis aliquod fomentum præstaret. Templum verò ab ipso Theodaldo Episcopo in honorem, subq; inuocatione Saluatoris nostri cōsecratum extitit. O sanctissima paupertas, cui cū nihil sit, nil deficit tamen: quæq; cū nihil habeat, possidet omnia. Non erat Romualdo vnde ista conficeret: & ecce paupertas protulit Thesaurum suū, & superabundarunt cum materia sumptus. Opere igitur perfecto, beatus Pater in singulis domunculis singulos collocauit socios Eremitas, cum quibus & ipse per annos aliquot cōmoratus perhibetur. Nec statim (vt quidam scribit) inde recessit: cū beatus Ioānes Gualbertus post annos quatuor (quemadmodum eius historia habet) ibidem Romualdum cum suis fratribus in pauperrimæ



perrimæ vitæ diftinctione degentem in-  
 uenerit. Nec deeft, qui affirmet, eum in  
 ea cella, quæ eius nomini dicata eft, per  
 annos aliquot manfiffe reclusum: cui &  
 Petrus Damianus ( in miraculo de fago  
 abfciffa ) aftipulari videtur. Dum itaq;  
 ibidem cum prædictis focijs moraretur,  
 eo viuendi genere utebatur, vt non folū  
 fuis difcipulis, fed etiam cunctis cernen-  
 tibus efferat admiratio. Ac proinde quo-  
 tidie ab incolis eiusdem regionis, quin &  
 ex longinquis oris venientibus, nimium  
 frequentabatur, quod ipfe femper ma-  
 ximè abhorruit. Solet namque ex hu-  
 iusmodi hominū frequentia magna spi-  
 ritualibus viris, mentis prouenire diftra-  
 ctio: & præfertim quia fine aliqua refe-  
 ctione aduentantes peregrinos dimitti,  
 inter Dei feruos nefas reputatur. Qui-  
 bus omnibus prudenter animaduertif,  
 nullatenus diftulit de opportuno reme-  
 dio prouidere. In inferiori montis par-  
 te, conuenienti fatis loco reperto ( quē  
 Fontem bonum appellant ) ab Eremo  
 mille paffibus, plus minus, diftante, do-  
 mum quandam conftituere decreuit. Ni-

D

mirum,

mirum, vt ibi veniētibus hospitibus opportuna, & necessaria, iuxtā paupertatis modū, refectio pararetur: sicq; eis in Eremo diutius manendi tolleretur occasio. Prætereā id actum est, vt omnis de rebus ad Eremi necessitates pertinētibus tractatio (ea namque est humana natura, vt sine hominum commercio sustentari omninò nequeat) remotiùs expeditur: quoque ipsa Eremus ab omni semper seculari strepitu immunis esset, sicque in ea morantibus libera Deo vacandi facultas daretur. Iam domo ipsa peracta, tres in ea statim fratres, vnum sacerdotem, qui præesset reliquis, & duos conuersos seruituti domus dictos, prouidus pater locauit: quos piè, ac diligenter edocuit quidquid ibidem essent acturi. Præcepit insuper Romualdus Priori Eremi constituto, vt ædificio Fontis boni Ecclesiam ad celebrandum adderet, quod & sic factum fuisse hodie apparet. Porro hæc est vera Camaldulensis Eremi fundatio prima, quam ex dictis beati Rodulphi, qui quartus ab ipso Romualdo Prioris authoritatem  
ibidem



ibidem obtinuit, quique primus omnium res Camalduli descripsit, veraciter exarauimus. Cuius venerabilis viri auctoritas utique modernioribus postponenda videri non debet, sed quò antiquior, eò veracior habenda est.

# ROMVALDVVS CAMALDV- lum relinquit. Cap. IX.

**P**OST QVAM ergo vir sanctissimus vltimam operi imposuisset manum, atque charissimos discipulos per annos aliquot Eremiticis moribus imbuisset, cōsiderans se eisdem nō esse deinceps ampliùs necessarium, sic domo, familiaq; dispositis (Spiritu sancto dictante) aliò, vbi maiorem Deo suo animarum lucrū parare posset, se transferre statuit. Sic equidem tot monasteria, totq; Eremitoria condidit diligentissimus minister: sicut tàm multos in religione retinebat, quia ab opere nunquā cessare consuevit. Veruntamen antequā inde proficisceretur bonus paterfamilias vocauit seruos suos, & tradidit illis

bona sua, vt ipso longè profecto sollicitè  
negotiarentur. Hi erant iuxta Rodulphi  
narrationem numero quinque, quorum  
primus vocabatur Petrus cognomento  
Daguinus, qui prudētia, & religiosis mo-  
ribus longè præstabat, eoque magistro  
charior semper habitus est. Secundus &  
ipse Petrus: tertius Benedictus: quartus  
Gissus: quintus verò Teuzus nūcupatus.  
Pusillus quidem grex, sed quibus placuit  
Deo dare regnum amplissimum: grex,  
inquam, humilis, obediens pastori, ac  
Deo deuotus. Hos erudierat spiritualis  
Pater spiritualiter viuere: hos Eremi-  
ticæ conuersationis regulam, non scri-  
ptis, sed exemplo docuerat, tradens illis  
discretum ieiunādi modum, silentij vir-  
tutem, & in cellis constanter residendi  
incomparabilem vtilitatē. Quibus tan-  
dem coram se constitutis, sic allocutus  
perhibetur: Quo animo in vos fuerim,  
quamdiu vobiscum versatus sum, filij  
charissimi, quia operibus vobis mani-  
festum feci, non existimo opus esse ver-  
bis ostendere. Nunc autem discessurus,  
ad Domini mei Iesu Christi exemplum,  
pacem,



pacem, & fraternam dilectionē vos semper inuicem habere paterno affectu moneo. Satis enim mihi videtur fecisse, si pro terrenis, caducisque bonis, quibus vos pro Dei amore carere suasi, preciosam hanc margaritam vobis relinquam. Quam si inuiolatam apud vos seruaueritis, nec corporalia alimenta, nec spirituale gaudium vobis deerit: nam diligentibus se, ac feruentibus, dixit Veritas ipsa, hæc omnia subijcientur vobis: & iterum, Vobiscum sum vsque ad consummationem seculi. Deus autem patientiæ & solatij det vobis idipsum sapere in alterutrum, vt vnanimēs vno ore honorificetis Deum: sit omnium vestrū anima vna, & cor vnum; & Deus pacis erit vobiscum; quem habentes, omnia possidebitis. Verū paupertatem sanctam tanquam sponsam habete, & obedientiam velut sororem cum perseuerantia vsque in finem. Me de cetero, dilectissimi, præsentem habere non potestis: aliò enim me vocat Spiritus, quid acturi sitis, apud vos manens, exemplis, ac frequenti exhortatione non negli-

genter vos docui. Exempla, quæ dedi,  
 æmulamini, & verba, quæ locutus sum  
 vobis, seruate. Iam ne sine duce ambu-  
 letis, Petrum ( licet non illum, quem  
 IESVS vniuersæ fidelium Ecclesiæ pro-  
 posuit ) sed hunc Daguinum, vobis præ-  
 positum relinquo : ipse prior, ipse dux  
 vester erit. Ipsum, tanquam me, audite :  
 eius præceptis obedire, eiusque corre-  
 ctiones benignè suscipere, tanquam fra-  
 tres charissimos rogo. Tu verò, Petre,  
 quem semper præ ceteris dilexi, pasce  
 oues, non meas, sed Christi : non quasi  
 dominans in eis, sed quasi forma gregis  
 factus ex animo : exemplo tuo eos in-  
 strue cum charitate, & patientia. Noli  
 animas eorum irritare, sed potiùs eos,  
 si aliquando confractos videris, quasi  
 fratres tuos dulciùs conforta : quod si  
 fideliter præstiteris, cū apparuerit Prin-  
 ceptis pastorum, percipies immarcescibi-  
 lem gloriæ coronam. Quibus dictis, &  
 singulis eorum spirituali osculo dato,  
 omnibus simul valedicens, inde recessit,  
 atque ad Eremum Vallis Castrensis, quæ  
 in Piceno est, se transtulit.

HOSPI-



HOSPICIUM FONTISBONI  
in Monasterium redigitur. Cap. X.

**P**ETRVS igitur Daguinus, optimi magistri diligentissimus imitator, tanta prudentia, atque discretione familiam sibi traditam disposuit, ac rexit; vt non solum vulgaribus hominibus, sed etiam primatibus esset admiratio. Vnde Theodaldus Episcopus quidquid Romualdo donatum fuerat, eodem Romualdo vita functo, eidem Petro, nouo instrumēto celebrato confirmauit: quibus & nouas possessiones, decimas, ac alios redditus non paucos adiunxit, ad sumptus, & alimenta Eremitarum ibidem cōmorantium. Quam obrem (omissis aliorum hac de re disputationibus) iuxta præfati contractus tenorē, omnia ab ipso Theodaldo Eremitæ sacre elargita videntur. Sed quid refert, si dicamus, Maldulum suum campum, Episcopum verò Ecclesiam, & reliqua esse elargitum? Etenim vtrumque Romualdo deuotum scimus, & ideò dicendum est, amborum elargitionibus

## EREMITICÆ HISTORIÆ

Eremum fundatam, atq; dotatam fuisse. Postremò ne quid hìc intactum relinquamus, sciendum est, Petro decedenti successisse Albizum, post quem Rusticus electus est; qui ambo & moribus, & vita claruerunt. Quartus autem à beato Romualdo sacrae Eremi prior extitit beatus Rodulphus, vir certè magnæ sanctitatis, & rerum gerendarum peritiâ apprimè ornatus. Hic optimo consilio noua super hoc constitutione lata, hospicium Fontisboni in Monasterium redegit. Nimirum quò ibi venientes nouitij per annum tyrociniij probati, & regularibus disciplinis instituti, postea (consensu maiorum obtento) ad Eremum ascenderent. Laudabilis profectò consuetudo: quæ tamen, experientia fortè docente, iam olim ab vsu recessit; ita vt nunc statim ad Eremum conuolèt nouitij, vbi vitæ austeritatis certius experimentum faciant. Rursus eadem cōstitutione cautum est, vt imbecilles, qui diutius Eremiticam austeritatem ferre non possent (ne ad vomitum seculi redire cogerentur) ad Monasterium descenderent:



scenderent: vbi cum reliquis Monasticam saltem regulam obseruantes, ad mortem vsque perseuerarent. Quæ sanctissima constitutio etiam hodie obseruatur. Tertiò prouisum fuit, vt Eremitæ infirmi illuc delati necessaria refectione confouerentur, necnon opportunis medicamentis à morbo ipso citius curarentur, ac conualescerent. Porro non modicæ vtilitatis fuit illa antiquorum Patrum ordinatio, cum inde in amplum Monasterium paruam domum deuenisse constet, in quo numerosa nimis seruarum Dei familia maiori obseruantia, quàm in alio quouis eiusdem Religionis Cœnobio, pijsimè degat. Vbi reuera multa pia, ac charitatis opera quotidie exercentur: qualia sunt infirmorum obsequia, hospitalitas peregrinorum, atq; in pauperes continua eleemosinarum largitas. Hoc tandem in constitutione illa additum est, vt & Monasterium ipsum, & qui in eo habitant, Eremitis in perpetuum subsint, & per Eremitas regantur. Quod hætenus ad vnguem obseruari, manifestè videmus.

PRIMA

EREMITICÆ HISTORIÆ  
PRIMA DISCIPVLORVM RO-  
mualdi institutio. Cap. XI.

**E**T si ab initio beatissimus Pater Romualdus ad antiquam sanctorum Patrum Anachoretarum religionem suscitandam contenderet, ne quis tamen vitæ austeritate à Dei seruitio excluderetur, sæpiùs in eodem loco & Monasterium, & separatas solitariorû cellas ædificare consuevit. Quo prudentissimo consilio robustos corpore, & animo feruentes, in solitudine: imbecilles verò ac debiles in claustrali, regularique obseruantia, sub Benedicti sanctissimi regula retineret. Vnde factum est, vt moriēs multa relinqueret (præter Eremos) Monachorum Coenobia. Quapropter apud Petrum Damianum, qui omnia diligenter adnotauit, plerumque idem locus modò Eremus, modò Monasterium appellatur. Porrò sic intelligendum illud est, quod idē author trigesimo capite scribit. Constructo scilicet, in Pereo Monasterio, præcepisse Romualdū Abbatī à se constituto, quatenus in Eremū secedens,



secedens per totam hebdomadam in cella confisteret, Dominicis autem diebus ad Monasterium rediens, Monachos visitaret : & nihilominus vigesimo sexto capite, de eadem Eremo tractans, nulla de Monasterio agitur mentio. Eodem modo factum fuisse in Sytria, valle Castrensi, Parentio, & alijs locis multis manifestum est. Voluit attamen vir sanctissimus, etsi diuerso ritu, & habitatione, utrosque Eremitas, & Monachos in unitate spiritus vnum & idem esse, inque substantia charitatis, regiminisque ratione, atque communitate vitæ unitos, indiuisos, & inseparabiles optauit. Noluit, inquam, inter eos aliquam apparere conuersationis differentiam, sed vtrisque in eodem loco commorantibus vna & eadem esset constans familia ; quæ ab vno, eodemque patre, siue prælato regeretur. Ad quem finem, diuino sanè instinctu, commune vtrisque insigne (vulgò arma) reliquit: duarum videlicet columbarum in eodem calice simul & semel bibentium. Sunt tamen qui dicant, post eius mortem miraculosè repertū, quod

quod si ita se habet, maioris confirmacionis prædictorum censetur. Ego certè idem insigne in quodam Monasterio ab ipso Romualdo constructo (nunc autem diruto) in superiori parte ostij in viuo lapide eiusdem structuræ sculptum vidi. Hoc denique communi signo ad vnitatē sui ipsius ostendendam etiam hodie vtitur Camaldulensis religio. Verùm quāuis Pater sanctus ratione charitatis, regiminis, & vnitatis eos vnum & idē corpus esse statuit, non tamen vtrisque eandem formam, seu viuendi normam tradidit. Nam Monachis regula beati Benedicti profitenda, & obseruāda perinde quò ad mores, quemadmodum quò ad victum, & vestitum, atque habitationē proposita extitit: ita sanè, vt regulari dispositioni nihil addidisse credatur, cū solis debilibus hanc indulgere sit solitus pijsissimus institutor. Sciens reuera præfata regulæ obseruationem illis sufficē-  
tissimam esse ad piē, sanctēque viuendū, necnon ad perfectionem, salutemque æternam consequendam. Eremitis verò, quorum propositum longè ab ipsa  
regulari



regulari institutione distat, nullam vnquam certam regulam, seu præscriptum statutū viuens proposuit, neque moriens reliquit. Certior vtique factus meliùs, atque præstantiùs esse assiduis sanctitatis exemplis, ac crebris salutiferis monitionibus, quemadmodum Christus fecit, discipulos instruere: quam præceptis multis oneratos sine typo rectè viuendi eosdem relinquere: faciliùs nāq; scriptam legem transgredimur, quàm salutifera exempla violamus, præcipuè si ea à nostris parentibus, aut optimis præceptoribus habere contigerit. Ad hæc alia potior ratio accedit: nimirum quia solitariorum viuendi ritus nō omnibus, qui in solitudine sunt, vnus & idem esse potest. Ecquis est, qui nesciat, vni sufficere paximacium octo vnciarum, & alteri nō satis esse duo? Rursus mihi aquæ potum salutiferum esse, tibi mortiferū? Quis ignorat, quosdam hebdomadas integras sine cibo alacriter transigere, cū alij multi ne vnicum quidem diem sine refectione possint subsistere? Videmus etiam alium in oratione iucundiùs pernoctare,

noctare, & è contrà alterum vnius horæ  
spacio orando deficere: sic mihi aspira-  
tiones crebræ, siue iaculatoriæ oratio-  
nes profunt: alijs verò iugis deprecatio  
vtilissima est. Nouimus quosdam, quos  
cilicino fago continuò indutos nil gra-  
uare, ne dicam nocere, scimus: & sunt  
qui laneam subuculam, seu si mauis, tu-  
nicellam pati non possunt: quod ex qua-  
litate, complexionisve corporeæ diuer-  
sitate procedit. Tandem iste super vda  
humo cubans, non modò sanus, sed & ro-  
bustus conseruatur: ille si blanda careat  
matta, cras infirmus erit: iste super duro  
lapide reclinat caput, & dormit, ac so-  
poratur: ille sine molli cervicali quie-  
scere nequit. Et ne hìc omnia pœniten-  
tiæ exercitia referre cogamur, non om-  
nibus eadem natura, non complexio, nō  
æqualis fortitudo, seu constantia data  
est: vt omnes æqualiter eandem absti-  
nentiam, similem rigiditatem, & alias so-  
litariæ vitæ asperitates potentes sint, si-  
ne magno & corporis, & spiritus detri-  
mento sustinere. Erant in illa pauper-  
rima (ideoq; sacrosancta Romualdi so-  
cietate)



cietate ) qui cum magistro leguminibus, oleribusve solis victitarent: & erant qui simul cum oleribus, & leguminibus, pane vescabantur: quin & duplicatam cuidam discipulo eius debili portionem panis legimus. Tum nonne aliqui eorum fodiendo, & alijs manualibus laboribus panem quærebant, & alij ociosi eundem panem manducabant? Postremò in solitudine vnusquisque in ea virtute se magis exercere debet, in qua magis præuallere dignoscitur. Quod maximè inter antiquos Anachoretas, in vsu fuisse, inficiari non licet. Non equidem ideò quis existimare debet, sanctissimum Archimandritam sine ordine, sineque aliqua instructione suos in Eremito continuisse discipulos. Docebat enim eos efficacissimis verbis quotidie ieiunandi modum, vigilandi, & psallendi rationem, silendi optimam consuetudinem, & in cella manendi stylum: insuper sua taciturnitate eos reddebat silentes, & abstinentes sua parcimonia; sua assidua oratione feruentes, & sua continua psalmodia psallendi formam illis tradebat: sua denique inuiolabili

uiolabili solitudine, illos in cella manere compellens : nudis item pedibus, & capite incedēs, eos nuditatis fecit amatores. Nec cessabat tentatos confortare, pusillanimes viriliter animare, & pigros, frigidosque, seu tepidos, ad pugnam nunc blandis, nunc acrioribus verbis exhortare. Virtutes prætereà quasi digito demonstrans, ad eas amplectendas, seu acquirendas monitis continuis eos informabat. Quid multis opus est ? ipse fratribus suis regula, ipse constitutio, ipse doctor, & magister, & exēplar, dux, & via. Nec profectò infrugifera fuit huiusmodi exemplaris institutio, cū eade discipuli tantam perfectionem vitæ adepti sint, ac sanctitatem : vt ex illa schola plures in Ecclesia Dei Sācti emicuerint. Quales fuere sanctissimus Bonifacius, Ioannes, & Paulus, Gaudentius, Gerardus, filius etiam Comitis Guidonis, & alij innumeri, quorum nomina ad manus non habemus. Postremò nonne Sanctos prædicat Petrus Damianus omnes Perei habitatores, ac Sytriæ cultores : nonne Sancti sunt quinque Eremitæ  
 Camal-



Camalduli à sancto Romualdo relictī? quinque, inquam, columnæ illæ, quibus suprâ tota religio nostra fundata manet? O utinam nos tot regulis, tot constitutionibus, ac ordinationibus onusti, dimidium sanctitatis eorum possideremus.

## DE LAVDIBVS SACRÆ

Eremitæ Camaldulensis, & cur tota Religio ab ea denominetur.

Cap. XII.

**O**RDO Camaldulensis tres continet Religiosorum species: ipsos, videlicet, Eremitas, qui in sacra Eremo resident: & Congregationem Monachorum sancti Michaelis Murani: necnon societatem Eremitarum sancti Romualdi Montis Coronæ, quæ anno MDCXX. initium habuit, de qua per tres libros sequētes differemus. Eremitæ itaque Camaldulensis ab ipso fundationis suæ principio in hunc vsque diem, in sua primæua institutione, iugi perseuerantia, constantissima mirabiliter per-

E mansit,

manſit, immò curſu temporis magis ac magis adaucta, roborata, atque ſtabilita dignoſcitur. Monachorum verò inſtitutio per varios ſtatus decurſa: hodie tandem in certam, eamque obſervantiſſimā cōgregationem redacta, maximè floret: & in dies monaſterijs, & alumniſ mirum in modum augeri dignoſcitur. Diximus ſuperiùs Romualdum ante obitum ſuum in ſymbolum vnitatis, ſuis commune inſigne reliquiſſe, quo vtraque familia Eremitica, & Cœnobitica perpetuò vteretur: nomen verò, quo eius communis religio nominaretur, minimè reliquiſſe: neque (quod mirum eſt) ſuperioritatis, regiminisve auctoritatem alicui locorū dediſſe, aliqua ſcriptura comprobatur. Nam illa, quæ apud Rodolphum eſt ſubiectionis conſtitutio, ultra Fontisboni habitatores non extenditur. Quam ob rem conſtitutionum Camaldulenſiū auctor in ſuo proœmio tacitè miratur: unde factum ſit, vt religio hæc Camaldulēſis vocetur: cūm Eremus, inquit, nec primitus ab ordinis auctore ædificata, nec in ea diutiùs, quàm alibi vixerit, nec in



ea diem clauferit extremum. Vnde sine  
 tergiuerfatione verum esse crediderim,  
 quod nobis audientibus, aliquando ve-  
 nerabilis quidam monachus Cassinensis  
 retulit. Is namque affirmabat se olim  
 legisse scripturam quandam antiquissi-  
 mam, in qua Vrfeoli, & Grandenici fie-  
 bat mentio, inque eadem scriptura, Diui  
 Romualdi Fratres, Romualdinos, non  
 Camaldulenses vocari. Soluunt quidam  
 dubitationem hanc, dicentes, Camaldu-  
 lensem Eremū sanctitate, integritateq;  
 & Eremiticarum constitutionum stricta  
 obseruantia, & nomen, & principatum  
 totius religionis promeruisse. Ad cuius  
 rei veram cognitionem opere precium  
 est scire, primos illos Eremitas, quos su-  
 præ memorati sumus, primam illam Ro-  
 mualdinam prolem, patre orbatam, &  
 quasi orphanam factam, parum profe-  
 cisse. Nam sine capite, sineque rectore  
 pauperes illi, Romualdo defuncto, rema-  
 nentes, magna illius ætatis bellorum tur-  
 batione subsecuta: quibusdam eorū de-  
 cedentibus, vel discedentibus, alijs verò  
 ad monasteria, ad suosque monachos

# EREMITICÆ HISTORIÆ

(quod illis licitum fuerat) transeuntibus, breui tempore defecerunt: quorū Eremitoria à multis seculis, non solum derelicta, sed etiam diruta iacent. Ideoq; ex omnibus Eremis ab ipso fundatore conditis, sola Camaldulensis integra, & florens superfuit: indiesque solitariorum numero accrescente, atq; vigente in ea rigidissima obseruantia, in maiori reuerentia, seu auctoritate ab omnibus tūmonachis, tūsecularibus habita est. Siquidem venerabilis Petrus Daguinus, quem Romualdus abiens, ibidem præpositum reliquerat, & quatuor eius obediētissimi focij, perinde optimi magistri præceptis inhæserant, vt facile diceres vnumquenque eorum, præceptoris sui (quemadmodum olim Eliseus) spiritū retinuisse. Manebant omnes pariter in innocentia sua, erat eorum omnium cor vnum, & anima vna, peregrinos hiliter recipientes, & cū interna iubilatione refouentes: tribulatos, qui ad eos confugiebant, blandis, ac spiritualibus verbis consolantes. Deinde rerum penuriā, loci angustias, & asperitatem, corporis denique



denique nuditatem, non solùm sufferre, sed etiam gaudentes amplecti visi sunt: manuum labori incumbentes, de fructu operum suorum victitabant: nunc sarculo fodere terram, nunc lapides scindere, & materiam ad opus structuræ præparare. Rursus iunco, seu vimine texere fascellas, cochlearia polire, scyphos ligneos, & alia vasa torno, seu adunco ferro conficere: tandem nulla tēporis pars otio reliqua erat. Prætereà erant in oratione feruentes, amabant prolixas vigili-  
 as, crebris ieiunijs corpora macerantes: biduana, & triduana in hebdomada, in solo pane, & aqua, celebrantes: reliquis diebus vnico pulmento contenti; in quibus ad finem vsque erant perseverantes. Nec his quidem acquiescentes, post Paschalem solēnitatem, Quadragesimas (vt eiusdem cohortis quidam strenuus miles scriptum reliquit) animo intrepido celebrabant. Tales vtique extitere preciosi lapides, quibus super sacra Camaldulensis Eremus fundata sedet: quibus in sanctitatis vita, ac perfectionis se assiduè exercentibus, tantum splenduit,

ac dilatatum est nomen Camaldulense:  
 vt nō Hetruscis modò hominibus luce-  
 ret, verū etiā è longinquis nationibus il-  
 luc mortales certatim confluērēt. Vnde  
 non pauci tūm nobiles, atque illustres,  
 tūm vulgares viri Spiritu sancto afflati,  
 reiectis secularibus curis, omnibusq; re-  
 nunciantes, Euangelicum cōsiliū secu-  
 ti, monasticum habitum de manu Petri  
 susceperunt. Non equidem quale depin-  
 git quidam somniasse Romualdum, sed  
 vile, & abiectum, quo vti verè pauperes  
 solent. Quorum multi se, & sua Deo vo-  
 uentes Eremum ipsam temporaliū bo-  
 norum donis non mediocriter locuple-  
 tarunt; quibus auxilijs magnum accepit  
 incrementum. Hæc itaque sanctitatis  
 tanti loci vulgata vbique terrarum opi-  
 nio, hæc religiosa illorum sanctōrū Ere-  
 mitarum conuersatio, illa rerum tempo-  
 ralium prosperitas, ac ædificiorum dila-  
 tatio, magnam sacræ Eremo acquisiuit  
 auctoritatem. Quam reliqui Romualdi-  
 ni, ac præcipuè Monachi, qui adhuc sine  
 capite, sine duce, sineque ordine, vel re-  
 gimine aliquo (quasi oues errantes) ma-  
 nebant



nebant distracti : sano quidem consilio,  
prudentiq̃ue deliberatione propriū cō-  
modum tam spirituale, quā tempora-  
le animaduertentes, libenter, & honori-  
ficum Camaldulense nomen susceperūt,  
& societatis dexterā Eremitis dedere.  
Atque sanctē postmodum considerantes  
Priorem sacrae Eremitae verē personā san-  
ctissimi Patris Romualdi vbique repræ-  
sentare : ideoq̃ue eidem tanquam prin-  
cipali, seu digniori religionis prælato,  
sponte sua se subdidere regendos : ean-  
dem insuper Eremum in caput, & Asylū  
totius ordinis simul vnanimēs constituē-  
tes. Quod tamen nemo existimare de-  
bet statim post mortē Romualdi factū;  
nō enim illico emicuere Camalduli vir-  
tutes; neque (vt quidam rati sunt) hunc  
Eremitae principatum per quandam con-  
suetudinem, atque conuiuentiam aliorū  
introducū, dici debet : cū neque per  
lustra quatuor, neque sine debito tracta-  
tu id ipsum fieri potuerit. Dicendum er-  
go est, à principio iustam conuentionē  
inter Monachos, & Eremitas interue-  
nisse, & omnia fuisse sapienter tractata,

# EREMITICÆ HISTORIÆ

& de cōmuni omniū cōsensu constitutū,  
atque conclusum. Nec refert, si de con-  
uentione hac instrū nō appareat; facile  
enim scriptura perit. Et tunc primū  
post huiusmodi conuentionem appro-  
bata, & confirmata extitit à sancta Sede  
Apostolica sub nomine Camalduli tota  
hæc religio per Leonem Nonum Ponti-  
ficem, qui fuit circa annum M L. & Ni-  
colaum Secundum, eius successorem;  
necnon Alexandrum Secundum, de cu-  
ius confirmatione, ac priuilegio etiam  
hodie constat rescriptum: in quo multa  
monasteria subiecta Eremo expressè no-  
minantur, qui fuit circa annum M L X X.  
Et sic postmodū in hunc vsque diem  
religio ista sub huius sacri nominis au-  
spicijs iustè, ac ritè ambulauit. Præter  
hæc abundè probari videtur assertio no-  
stra in priuilegijs Ottonis III. Henrici  
VI. Caroli III. & Sigismūdi, Imp̃atorū:  
In quibus expressè Eremo sacræ tanquā  
capiti totius religionis cōfirmantur Im-  
periali auctoritate quadragītaquatuor  
Monasteria, Ecclesiæ quadraginta, &  
Castella duodecim sibi iam olim subie-  
cta.



eta. Nec defunt aliæ multæ, diuerfisque  
 successiuis temporibus, atque à varijs  
 Pontificibus emanatæ Apostolicæ con-  
 firmationes hoc ipsum attestantes: quas  
 hic referre, superuacaneum, atque mo-  
 lestum nimis foret. His igitur considera-  
 tis, rectè in Procæmio Constitutionum  
 scribitur, Priorem sacrę Eremi, siue Ere-  
 mita, siue Monachus fuerit ( quia alter-  
 natim assumere consueuerunt ) eadē ele-  
 ctione, nō quasi noua dignitate, sed pro-  
 prio iure totius ordinis Generalem Pa-  
 trem, ac Rectorem semper, ad nostram  
 vsque ætatem, habitum fuisse. Quo & no-  
 uissimo, amplissimoque priuilegio Leo-  
 nis Decimi plenissimè cōfirmatū extat.  
 Magna ergo laude meritò extollēda est  
 Eremus sacra, quæ tam optimum initiū  
 habuit; quæ tam fortes, ac cōstantes cul-  
 tores semper aluit: qui per tot secula, cō-  
 tinua successione primum sanctorum Pa-  
 trum suorum institutum, inconcussè cu-  
 stodierunt; Petri Daguni, & sociorum  
 vestigia pertinaciter calcātes. Quæ, ob-  
 secro, est in orbe terrarum religiosa do-  
 mus, quę saltem vnaquaque ætate refor-  
 matione

matione nō eguerit? Aut quæ reperitur Monachorum familia, in qua aliquando innouare aliquid, mutare, aut corrigere non fuerit necesse? Sola equidem Camaldulensis Eremus per annos quingentos & sexaginta immobilis, constans, fortis, & integra in sua primæua institutione iugiter perdurauit. Vnde omni encomio digni videntur eius successione filij, qui vsq; in finem in solida arrepti semel propositi obseruatione perstiterunt. Ideoque licet in terris obscuri visi sint, atque abiecti, in coelstamen tanquàm lucidissima astra micant; quorum numerus præ multitudine, nobis innumerabilis factus est, & nomina incognita; quæ nihilominus in libro vitæ scripta manēt, Deoque benè sunt nota. Et quia omnes humiles, ac mites, deuoti, feruentesque in ieiunijs, & cilicijs castigantes corpus, ac iugi orationi Dei intendentes, vitam transegerunt; ideò nunc inter filios Dei computati sunt: nimirum Christi vestigia insecuti, eius cohæredes facti, modò in coelis cum ipso gloriosè triumphant.



## DE INITIO, ET AVGMENTO

Monachorum Camaldulensium.

## Cap. XIII.

**R**ATIO ipsa postulat, ne quid lectori scitu dignum desit, & ne historiæ tela alicubi abscissa, truncatave appareat; ut quemadmodum Eremitarum gesta, felicemque prouectum utcumque demonstrauius; ita nunc congruenti loco Monasticam beatissimi Romualdi familiam, qualiter à sua origine ad nostra usque tempora, processisse, ostendamus. Non enim silentio præterire oportet, laudabilem, ac semper venerandam eorum congregationem, quæ ubique cum maximo Dei honore, Ecclesiæque catholicæ laude, necnon sanctissimi fundatoris sui gloria se habuisse dignoscitur: quæque nunc maximè inter alias religiosorum cohortes, non minus Cœnobiolorum augmento, Monachorumque multitudine, quam sanctæ obseruantiae custodia floret. De qua sanè (ut verum fatear) plenior tractatum me daturum, fusiùsque eius laudes profecturum,

turum, apud me statueram : verùm cùm  
 nuper omnia, quæ ad ipsam pertinent,  
 venerabilis vir Augustinus, eiusdem con-  
 gregationis dignissimus Monachus, in  
 sua vulgata historia, eleganti stylo, sit  
 abundanter complexus : ideò nos ea tã-  
 tum, quæ iustam, eamq; breuem cogni-  
 tionem legentibus tribuere sufficiant,  
 quæq; ad nostrum institutum facere vi-  
 deantur, obiter perstringemus. Neque  
 enim Monasticã, sed Eremiticam, eãque  
 CORONENSIS Romualdinorum socie-  
 tatis, sumpsimus describendã. Satis igitur  
 plenè superiori capite tractatum est,  
 ex eodem fonte Eremiticam, & Mona-  
 sticam nostri ordinis ortam esse institu-  
 tionem; atque adeò quomodo semper  
 vnitas ab initio foundationis simul am-  
 bulasse, apertè explicuimus. Nunc verò  
 monendi sumus, Monasteria ab ipso Pa-  
 tre nostro Romualdo erecta, parua val-  
 dè, & ipsa pauperrima extitisse : erant &  
 situ nimis aspera, à populis valdè semo-  
 ta : in arduis scilicet montibus, profun-  
 dissimisq; vallibus, & inter densissimas  
 sylvas fundata. Nimirũ sanctissimus vir,  
 rigidi-



rigiditatis, ac omniũ rerũ penuriæ perpetuus amator, nunquã mollia, seu carnali cõcupiscentiæ cõmoda loca, opportunitatesve quæsiuit. Nihilominus fidelissimi discipuli, tanti patris, tamque pij præceptoris memores, per multorũ annorũ curricula, vim sibi inferentes, constanter in eisdẽ locis, & Monasterijs permanere enixi sunt: & semel susceptã magistri disciplinã viriliter adimplere non destiterunt. Atqui interim cùm propter ipsorũ locorũ incõmoditates, quæ non leues occurrebant, tũm quia necessaria ad victũ cibaria non suppetebant, nec facile poterant ex tam longa populorũ distantia parari: tũm etiã quia parua ædificia, numerosæ, seu sufficientis ad Cœnobiticã obseruantia familiæ erant incapacia; multa corporis simul, & animi detrimẽta passi sunt strenui Dei milites. Adde quòd passim vel ab ipsis rusticis, vel à grassatoribus, qui in montibus libenter latitant, durius, varijsque modis vexabantur: nec locorũ solitudo tot malis sine difficultate permittebat obuiare. Hæc itaque nimia locorũ rigiditas,

ac necessariorū defectus in causa fuit, vt paulatim humana habitantium fragilitas, horrida illa habitacula abhorreret: & quę sub tanti patris, optimique pastoris custodia, & cōuersatione humili gregi placuerant caulæ, eo defuncto, displicere ceperint. Adde, quòd deficiente Romualdi resplendentissima præsentia, nō ita ad eius mapalia currebant oues: non ita, inquam, deuoti homines deserta petebant. Accedit ad hæc cōmunis totius Italiæ illius temporis immanissima bellorum tempestas, schismatū deplorāda lues, atq; crebra ciuitatum seditio; quibus perinde vniuersæ eiusdem Italiæ regiones turbatæ sunt, vt extra vrbes, munitave oppida, statio tuta minimè daretur. Vnde tantorum malorum ingluuie, territa Romualdina proles, nec vtiq; tot incōmoditatibus agitata obseruantiam regularem adimplere potens; ampliora, atque cōmodiora loca quærere, vel coacta cepit. Data denique à fidelibus opportunitate, ac meliori fortuna adueniente, meliora quoque loca petierunt: paulatimque vel in vrbe, vel in suburbanis

Cœno-



Coenobia siue iam erecta acceptare, siue de nouo erigere non distulere. Nimirum ita factum est, vt relictis montium anfractibus, iuxta, vel certè intra vrbes, suas constituerint habitationes. Quod profectò non sine prudentissimo còsilio, ac diuina inspiratione actum putare debemus: cùm satiùs multò sit in planicie rectè ambulare, quàm in procliui cespitare, deque casu periclitari. Præterea, nemo est, qui nesciat, regularem obseruantiam non in asperitate loci (quemadmodum Eremiticam) neque in rerù penuria consistere; quæ potiùs in sanctitate morum, & diuini cultus pia, ac deuota frequentatione sita est: immò prudenti sententia creditur, religiosam obseruationem loci còmoditate, & alimonix sufficientia iuuari. Iam igitur idonea loca nacti Camaldulenses monachi, non segnes, sed studiosissimi sui instituti obseruatores deprehensi, omnisque perfectionis veri æmulatores ab omnibus cogniti, magnum sanctitatis foras effundebāt odorem. Qua sanctimonix, inconcussæq; obseruantix fama vulgata, ceperunt Impera-

Yperatores, ac Reges, alijq; Principes nō  
 solū antiqua monasteria nostris cōfer-  
 re, verū etiam ad noua condenda, ma-  
 gnifica liberalitate, ac largitate vti. Nec  
 sanē in hac parte minus officiosi fuere  
 summi Pontifices, qui florenti, ac feruēti  
 gregi suo, quò magis in dies augeretur,  
 auxilium, & opem ferre non cessabant:  
 ideoq; multa, ac magna monasteria huic  
 congregationi olim à Sede Apostolica  
 data leguntur. Attamen ne veritas oc-  
 cultetur, & laus sua cuique tribuatur;  
 opere pretium est scire, prædictas Cœ-  
 nobiorum, Ecclesiarumque largitiones  
 pro maiori parte sacræ Eremo fuisse fa-  
 ctas: solitosque Patres Eremitas illinc  
 & diruta instaurare, & noua erigere mo-  
 nasteria, necnon de suis conuentibus se-  
 lectas familias in illis collocare. Eo tan-  
 dem modo tantopere aucta, & propa-  
 gata est religio, vt non tantū Tusciam,  
 & Aemylia ornata Camaldulēsibus mo-  
 nachis fuerit, sed etiā tota propemodū  
 Italia impleta; nec mora vsque in Gal-  
 liam Cisalpinam, Mediteraneasq; Insu-  
 las, Sardiniam, & alias extenderit hæc  
 vitis



vitis sanctissima palmites suos. Itē Venetiarum præcellsum Dominiū non vno, aut altero Monasterio, sed tribus voluit suam amplissimā vrbem decorari. Reliqua, ne molestus esse cēperim, ex industria prætermittam. Tanta deniq; Deus omnipotens prosperitate, totq; beneficijs familiam istam suam intūs, & foris candidam, prosecutus noscitur, vt inter alias omnes religionum congregationes, nescio quid ampliūs sancti decoris habere videatur. In qua vitæ perfectione tanta fuit in ea constantia, seu perseverantiæ fortitudo, vt per annos quadringentos, aut eo ampliūs, laudabiliter, ac sine macula preuaricationis processerit, omnibus benè, recteq; viuendi exemplū præbens, & quasi lucerna ardens super candelabrum posita, omnes, qui hactenus in domo Dei fuerunt, suo splendore illuminans. Postremò, licèt transactis retrò temporibus, multos labores sustinuerit, & eam (Deo sic annuente) suis artibus cribrauerit immūds Satanās, nihiloseciūs hac nostra ætate, tanta pace, spiritualique quiete congaudet: tanta rerū

temporalium prosperitate vbiq; potitur, vt nunquā sanctior, nunquā fēlicior, vel gloriosior eius status à suo principio in hunc vsq; diem apparuerit. Nam præter multitudinem tū Monasteriorū, tū Monachorum, in ea multi viri nobiles, ac illustrissimi beatè viuunt: innumeri in ipsa scientia, ac scripturarū longa peritia florent: &, vt vno verbo dicā, vniuersa eius multitudo in vera, ac propria sanctitate perseveranter degit.

DE REGIMINE, AC SUPRE-  
ma Religionis huius Prælatura.

Cap. XIII.

**Q**UEMADMODVM superius (cū de excellentia, & virtutibus sacræ Eremi ageretur) incidenter adnotauimus, ab initio Religionis huius, omne regiminis, ac superioritatis pōdus penēs Eremitas Camalduli residentes perpetuò fuisse: ex eo nimirū quòd omnia Monachorum Cœnobia, Eremi sacræ tanquā excellenti, & eius Priori, quasi principaliori prælato, sese iā olim sponte



sponte sua subiecerint. Vnde consequenter actū est, vt ipse Prior Eremiti statim, vt electus extiterit, ipso iure absque alia noua electiōe Pater Generalis, totiusq; Ordinis caput, ac princeps sit habitus: idq; eodē modo in Monacho assumpto (alternatim enim assumebantur) quēadmodū in Eremita electo, sine exceptione aliqua obseruabatur, ita vt simul Eremiti Prior, & Generalis sit nominatus. Quę laudabilis consuetudo vsque ad nostra tēpora inuiolatē continuata extat: nec moror, si nuper hac de re aliquid parui momenti innouatum sit, quod rei ipsius substantiam non lædit. Neminem autē latere debet, olim huiusmodi Priores Generales perpetuos, hoc est, in vitā fieri assuetos, nunc verò ad trienniū creari, alternatim in eligēdo, vice vbiq; seruata. Fuisse quidē Religioni huic Generales perpetuos quadragintasex, quidā diligenter adnotarunt: quorum primus, Sanctissimus Pater Romualdus, Ordinis Fundator: vltimus verò Petrus Delphinus Venetus, monachus; de quo plura nobis suis locis dicenda restant. Inter hos

nonnulli fuere sanctitate perspicui, alij  
scientia præclari, multi regiminis peri-  
tia egregiè ornati: qui omnes frugi fue-  
runt, & religioni vtilissimi, vigilantes pa-  
stores, ac rectores discretissimi: quod sa-  
tis probare videtur perpetua, quam di-  
ximus, totius Ordinis perseverantia, ac  
propagatio. Veruntamen præcipui eo-  
rum, & qui ceteris præluxerunt, Petrus  
Daguinus, primus post Romualdum  
Eremi Prior: Rodulphus, qui primas  
constitutiones Eremiticas composuit,  
& ipsius Religionis exordia in scriptis  
redegit, quem libellum cōpilationes ei  
placuit appellare: Martinus tertius, qui  
beatus creditur, propter vitæ sanctitatē,  
& in religiosis statutis ferēdis reputatus  
insignis: Gerardus secundus diligens, ac  
peritus constitutionum lator. Item Bo-  
nauentura, qui prædecessorum suorum  
omnium scriptas institutiones ad quin-  
tum vsque librum non incongruè dilata-  
uit. Sequitur Ambrosius monachus Flo-  
rentinus; hic doctrina, linguarumq; pe-  
ritia, omnes prædecessores suos longè  
præcelluit: reliquit scripta multa, vel à  
se



se inuenta, vel à Græcis translata, quæ hominis ingenium, animumq; satis clarè detegunt, atq; demonstrant. Vltimus itaque perpetuus Generalis (sicuti dictū est) Petrus Delphinus monachus, & Abbas Sancti Michaelis Murani, qui anno MCCCCLXXX. Eremitæ Prior, Ordinisque totius Generalis electus est; vir sanè natura bonus, & prudens; & licet corpore parum venustus, animi tamen pulchritudine speciosus erat; benignus, & affabilis valdè, literarum egregiè peritus; lingua potens, ac Religionis vnicè amator: idque multorum testimonio, multisque eiusdem, & aliorum monumentis comprobatur. Huius pijssimi viri prælatura & diuturna fuit, & multorum laborū plena: inuenerat siquidem statim ingressus, non pauca in Religione sua, quæ nomen Camaldulense nequaquàm decebant: ideoq; ille eadem equo animo ferre, aut cum dedecore dignitatis suæ dissimulare nunquàm valuit. Permiserat etenim Deus, siue peccatis hominum exigentibus, siue quia inde maius bonum (prout reuera contigit) nasci oportebat, post

longam tranquillitatem, vel aliquantulā  
 oriri in Religione tempestatem: quo ni-  
 mirum nauicula Camaldulēsis fluctibus  
 agitata, exemplo Apostolorum disceret  
 auxilium à Dño postulare. Erant in Re-  
 ligione ista ( sicut & in alijs multis ) iam  
 ab antiquo quædam monasteria conuen-  
 tualium, quorum reliquiæ vsq; ad Pij V.  
 Pontificatum ( qui eos penitus extirpa-  
 uit ) permansere. Ij in tantum multipli-  
 cati dicuntur, vt bipartita in obseruan-  
 tes, & conuentuales Religio ipsa videre-  
 tur: quorum Prælati non pauci perpetui,  
 & monasteria eorum proprijs, ac multis  
 priuilegijs suffulta, priuatis legibus, sin-  
 gulariq; modo singula & viuere, & regi  
 inchoauerant. His tamen non obstanti-  
 bus, cum obseruantibus simul cōuenire,  
 superioribus magistratibus obedientiā  
 præstare, & ipsi ad regiminis prælaturas  
 quoque assumi consueuerant. Attamen  
 Delphini temporibus multi eorū & sub-  
 iectionis antiquæ iugum excutere, ac li-  
 berius agere pertentabant: nec vereban-  
 tur ad ea, quæ super eos erant, manus ex-  
 tendere. Mala autem, & incōmoda, quæ  
 inde



inde tam Eremitis,quàm monachis ob-  
 feruantibus euenerint, Venerabilis Au-  
 gustinus pleno stylo recenset: nos verò  
 ea consultò præterimus. Ex quibus mul-  
 tis vnum nobis adnotasse sufficiat: quòd  
 sacra Eremus, quæ semper integra in sua  
 simplicitate permāsit, quæq; tūc propter  
 instantem necessitatem frequentius ora-  
 tionibus, alijsq; pijs exercitijs vacabat,  
 nulla terrenorum attendens dispendia,  
 multa sacerdotia, ac monasteria amise-  
 rat: &, vt in procæmio priuilegij magni  
 Leonis X. legitur, caput Religionis iam  
 penè defierat haberi, nec sui ipsius qui-  
 dē patrimonij absolutā retinebat admi-  
 nistrationē, quæ ad alienos (nescio quo  
 fato) transisse perhibetur. Veruntamen  
 hīc, cū ista audis (candide lector) noli mi-  
 rari; sed obstupesce potius misericordiā  
 & bonitatē Dei, qui haud multò pòst di-  
 gnatus est, ex lapidibus istis suscitare fi-  
 lios Abrahæ. Iudicia Dei sunt hæc; noli  
 inquirere ea: nam, teste Apostolo, incō-  
 prehēnsibilia sunt: & per Prophetā, abyf-  
 sus multa dicuntur: noli scrutari, cur hæc  
 permittat Deus: quis enim nouit sensum

Domini? aut quis eius consiliarius fuit? Vides tu nunc inter spumantes vndas nauiculam hanc iactari; expecta parumper, & cernes tranquillum mare, & nauim in portu, pace summa, spiritualiq; gaudio plenam, atq; multis, magnisque piscibus onustam. Etenim tanta, & talia hinc orta sunt bona, qualia nunquam excogitasset homo. Oportet (inquit ille) hæreses esse; vt, qui probati sunt, manifestentur in vobis. In summa, si magna nauis vniuersalis catholica Ecclesia passim stridentibus vndis fluctuari cernitur: quæ admiratio est, si paruulæ eius scaphæ fluctibus aliquando vel modicum agitetur? Nūquid discipulus supra magistrum, aut seruus maior erit domino suo? Sed iam vnde digressi sumus, reuertamur. Interim, dum sic aberrant oues, pastor gregis Delphinus grauissimis curis premitur, suorum filiorum semper sollicitus, domusq; suæ ubiq; curam gerens. Cuius labores, dum deplorat Eusebius Priolus dignissimus Abbas, talia verba eleganter profert. Proximè applicuit animū, vt Religio hæc nostra in vnum corpus conglutinetur: videbat enim



enim ordinem hunc turpiter dilaniari, monasteria in dies defici, & varia incōmoda pati: nec quomodo illis se pro muro opponeret, satis sibi constabat: siue tēporum iniquitate, siue hominum defectu id ipsum euenerit. Non lassabatur bonus pastor, quin crebris literis, ac nūcijs ouilibus suis auxilio præstò esset: & ut res pro voto illi succederet, sumptibus non parcebat. Adire summos Pōtīfices, Cardinales, Duces, atq; Senatus, p̄ amissis monasterijs redimendis, proq; ceteris conseruandis sæpissimè haud veritus est. Et post multa: Tandem, inquit, quoties tædio affectus dignitati abrenūciaffet, nisi Senēsis Cardinalis suus obstitisset? Plures deinde hac de re conquerentes per eundem Delphinum habitæ sunt (etiam apud summos Pontifices) orationes; atque ad varios Cardinales, Principesq; descriptę epistolæ: quas in eius eleganti epistolarū volumine videre licet. Ad hæc igitur mala tollenda per annos multos laborauerat ille, sed in cassum ibant labores eius: immò quò magis remedijs adhibendis nitebatur, eò magis  
plaga

plaga videbatur intumescere: adeò vt de omni remedio bonus senex desperaret. Postremò, cū prædicta mala pateretur sacra Eremus, & in tanto dignitatis suæ discrimine verfaretur: clamantibus miseris, ad Deumq; suas querelas mittē tibus Eremitis, non distulit Altissimus opportunum eis mittere auxilium. Nam ecce tūc diuino spiritu afflatus, magniq; Delphini confortatus consilio (meritis beatissimi Romualdi sic exigētibus) Camaldulum venit Eremiticum habitū suscepturus Clarissimus vir Thomas Iustinianus Venetus. Quem sanè nō minimū, sed præcipuum instrumentū ad tantam scissuram resarciēdam fuisse, compertū est. Cui minimè difficile extitit conueniens remedium intentare, vtpotē qui literarum doctrina pollens, & Principū, magnatumq; familiaritatibus fuerat assuetus. Quis autem, & qualis Iustinianus iste fuerit, quantus inter Eremitas ipso sit habitus, quātumq; Religionem iuuerit ipsam, sequenti libro plenissimè tractabitur.

Finis Primi Libri.

RO-



ROMVALDINÆ,  
SEV EREMITICAE  
MONTIS CORONAE  
CAMALDVLENSIS  
ORDINIS HISTORIÆ.

*Liber Secundus.*

BEATI PAULI IVSTINIANI  
ortus, & iuuentutis studia. Cap. I.



AVLVVS Iustinianus Ere-  
mita Camaldulensis, ac  
fundator societatis Ere-  
mitarum sancti Romual-  
di MONTIS CORONAE:  
cui ante ingressum Reli-

gionis nomen erat Thomas: Venetijs  
anno ab orbe redempto MCCCCLXXVI.  
ex præclara Iustinianorum familia na-  
tus est. Patrem habuit Franciscum Iusti-  
nianum virum patritium, atque ab am-  
plissimo Senatu, ob inclyta gesta eque-  
stris ordinis, militiæq; insignijs magni-  
ficè

ficè decoratum : matrem verò Paulam de Maripetris, matronam nobilissimā, ambos Christianæ pietatis maximè cultores. Qui ab incunabulis ipsis magnum futuræ virtutis specimen ostendere cepit : eò præcipuè, quòd sola literaria tabella delectari solitus, vix fari peritus, elementa cuncta nouerat ordinatè pronunciare. Pueritiam autem in Grammatices rudimentis, ac Retorum figuris, ita grauitè consumpsit, vt nondum pubes disertissimus euaserit Orator : hinc latinis Græca coniungere sitiens, perinde se in eo ludo exercuit, vt non facilè discerneretur, latina ne, an verò Græca lingua in eo excelleret magis. Hæc dum domi paternæ agerentur, mirabantur domestici omnes, & in studijs diligentiam, & in factis pueri innatā modestiā : & quāuis natura hilaris, facetusque dignoscebatur, attamen cum discreto silentio, studebat grauitati. Foris cum coætaneis pueris, & modestè ludere, & aliorum moribus, honestate seruata, sese accommodare, non dedignabatur. Hoc certè in puero meritò diuinum existimatum est, quòd



quòd nunquàm lectulum ascendere, aut inde descendere visus est, quin genibus flexis, deuotè aliquantulum oraret: cibum capere manè, re sacra non audita, nunquàm ei persuaderi potuit. Parentibus obedientiam, magistrisque reuerentiam: fratribus, & ceteris omnibus gratum officium perpetuò libens præstabat. His demum naturæ, virtutisque dotibus præditus erat, vt futuræ virilitatis miranda opera clarè pueritia ipsa præmonstraret. Quam ob causam multi nō imprudenter considerantes, in eū, illud Evangelicum retorquebant: Quis putas puer iste erit? Decimo septimo ætatis anno, iam vtroque parente orbatus, nō lasciuientibus iuuenibus, vt fieri solet, se miscuit: non similis ætatis delitijs se dedit: sed potiùs domo, patriaque relictis, à Clarissimis fratribus, atque dilectis sororibus (habebat enim sex, & fratres duo) discedens, Patauium se contulit. Vbi per annos vndecim & Philosophicis, & Theologicis, in florentissima, totoque orbe celeberrima Achademia, studijs sedulam nauauit operam. Ita autem

tem scientijs perdiscendis animū applicuit, vt à virtutibus exquirendis nusquā auerterit: vitia fugere, frugaliter vivere, tempus studiosè redimere semper intentus. Eam tandem doctrinam sibi iuuenis comparauit, vt nulli ætatis suæ vel doctissimo viro extiterit secundus: cuius rei nobis satis plenum testimoniū perhibuit Delphinus libro Epistolarum decimo, Epistola quinta ad eundem, in hæc verba: Omni tempore, inquit, futura est tibi solatio diuina lex, meditati in ea die ac nocte: nunc ad latinos, nunc ad Græcos Doctores conuersus, atque alternis oblectatus congressibus, vel utilissimè, vel iucundissimè disponas otium. Idem testatur eod. lib. ad Cardinalē Volateranum scribens. Verū cū de eius documentis (quæ multa scripta, & nonnulla vulgata reliquit) agetur, plenius eius studia demonstrabuntur. In ipso studiorum suorum foelicissimo cursu multos habuit Paulus officiosos, summaque amicitia coniunctos socios: quorum tamen præcipui extitere doctissimus ille Paulus Canalis, & Gaspar Contarenus

vir



vir nobilissimus, & postea S.R.Ecclesiæ  
meritissimus Cardinalis. Verùm inter  
omnes Pauli amicos primas semper te-  
nuit Vincentius Quirinus & ipse patri-  
tius, qui deinde tam dilectum sodalem  
secutus, Eremita factus est; quiq̃ue Ro-  
mæ Cardinalis designatus, licet nondū  
insignitus, foeliciter obdormiuit in Do-  
mino. De quo infra latior fiet mentio.

PAVLVS IN PATRIAM RE-  
uertitur, ac dotes corporis, & ani-  
mi prænotantur. Cap. II.

**P**ATAVINIS itaque studijs de-  
bito tempore relictis, vigesimū  
octauum ætatis annum agens,  
domum reuertitur; non minori virtu-  
te, quàm doctrina imbutus. Et quāquā  
nobilitas sanguinis, ac scientiarum or-  
natus elationis fomentum ministrabāt:  
nihilominus ipse & inter æquales serua-  
to decoro, semper mitis, & apud infe-  
riores benignus apparuit. Hinc animos  
omnium ad se trahere, cunctos beneuo-  
los sibi facere, amicitia coniungere, ac  
populi

populi reuerentiam comparare . Erat quippe animo facilis , ingenio clarus , aspectu affabilis, sermone blandus, & cū grauitate iucundus . Quibus sanè & corporis delineamenta , per omnia correspondebāt : nam eius statura mediocris, corporis plena habitudo : erat facie venustus, grauis incessu, ac viribus robustus: per quæ exteriora figura, animi quoque celsitudo designabatur : nec sinebāt diuini ignis portionem in pectore latentem cernentibus occultari . Delectabatur frugalitate victus : gulæ, & ebrietatis maximus osor ; sicut sobrietatis, ac parsimoniæ impense amator . Inter omnes autem eius virtutes, modesta taciturnitas, diuinumque silentium mirabiliter præluxit : eoque libenter remota habitare loca, domesticorum colloquio, librorumque lectione contentus, assueuerat . Vnde inter familiares, & amicos, hoc frequentabatur dictærium : Thomæ Iustiniano (sic enim appellabatur) cubiculum cum pane satis est. Si quando domo egressus animi iustam recreationem quærebat ; non per vicos, & plateas, vagabundo



gabundo similis oberrare; sed Ecclesias, Religioforū Coenobia, aliave pia loca visitare, magis placuit semper. Præterea, lasciuias iuuenum conuersationes cautè declinans: maturis, ac sensatis viris, consilio, atque honestate pollētibus, auidissimè vsquequaque adhæsit. Quibus prudenter consideratis, multi aut filios, aut alios familiares, cognatosve suos dissolutioni deditos obiurgantes, illicò Thomæ Iustiniani exempla in medium proferbant, typum virtutis eundem appellantes. Iam cum multi ex nobilioribus eius amicitiam modis omnibus venerentur, non omnes ille admittere, sed paucos admodum studijs, ac moribus sibi consimiles elegit. Qua quidem in re stupendum ei semper fuit iudicium: nequynquàm aliquem in amicū habuit (quos suo loco recensebimus) qui aliqua præclara virtute non eluceret. Rursus fratres, & cognati eū hortabantur Palatiū frequentare; Senatorū animos, auresq; (vt fieri consuevit) demulcere; atque ad publica munera, quæ in illa Republica multa, & amplissima sunt, obeunda, aspiraret.

raret. At noster Paulus longè se aliter sentire, & potiùs fugienda, quàm amplectenda esse; labores eorum, qui talibus funguntur, considerandos, & animarum detrimenta, in huiusmodi negotijs, ponderanda, respondebat. Item desiderabilem animi quietem sollicitè quærere; pium, iustumq; otium, omni curioso commercio reiecto, sequi satiùs esse: necnon damnosam corporalium rerum sollicitudinem, cum vtilissima spiritualium delectatione sagaciter esse permutandam. Attamen cum nostri corruptissimi seculi deplorandus status ita se habeat, ut salutaria quæq; difficilè suaderi queât; & inter ciues, notosque nostros piè vivere, non satis liceat: cumque res humanæ ita videantur compositæ, ut qui sanctitatis opera inter suos exercere velit, exosus fiat; inde citiùs recedere cogitavit. Domum igitur, ac ciuium frequentiam fugiens, in suburbanum (cui Muranum nomen est) cum sola librorum suppellectili, recessit. Vbi in remota, propria tamen domo, satis solitarius, quemadmodum ipse in Epistola quadam



quadam testatur, prout optabat, tribus annis vixit.

PAVLVS STVDIA MVTA T;  
& Hierosolymam proficiscitur.

Cap. III.

**D**V M sic ab omni seculari strepitu segregatum se videt Paulus, noua aggredi studia, quæ scilicet, nō seculi rebus, sed spiritui prorsus conducant, animo statuit. Atque in primis se optimo, peritoque confessario visceribus patefactis penitus tradit; cuius consilio cuncta se facturū, proprièq; voluntati, quæ sæpe sensus nostros peruertere solet, iam tunc renunciare, firmiter proponit. Futuri autem operis hoc fuit stabile fundamentum. Temporis cuiusque diei diuisionem facere, vt futura exercitia, iusta distributione procederent; ne postea subsecuta confusione, laborū fructus impediretur. Deinde exercitia ipsa, quæ assumenda proposuerat, inchoare non distulit. Manè ac serò, eorum quæ noctu diuque acciderant, stri-

Et fiebat discussio; literarijs studijs certa temporis parte assignata, quod reliquum fuerat, totum orationi, ac meditationi cedebat. Veruntamen quia in his duobus hætenus parum, aut nihil versatus erat, utpotè totus in quæstionibus scholasticis, lectionibusque varijs occupatus, magno labore, vel modicum proficere poterat. Nitebatur nihilominus nouus tyro & mentē erigere, & fluctuantes cohibere sensus. Repugnantem carnem flagellis, cilicioque domans: necnō moderatis ieiunijs, carnales appetitus refrenans. Sed ecce, ut incipiētibus euenire solet, insurgunt perturbationum cogitationes pessimæ, immissiones scilicet per angelos malos. Adde quod quasi in Aegypto confusionum positus, linguam, quam non nouerat, audiuit: afflictiones nempe spiritus, quas nunquā expertus fuerat: nec sine magno labore nouæ artis principia superare valuit. Dum in hoc genere vitæ non infrugiferè perseueraret; accidit aliquando, ut dum salutariferam Christi passionem meditaretur, loca ipsa mente considerando discurre-

ret.



ret. Hic, nimirum, factus in agonia patrē  
 orabat Iesus: hic reliquerat Apostolos  
 sanctos: hic Petrus, & Ioannes cum Ia-  
 cobo, seorsum dormiebant: hic Iudas  
 proditor osculum dedit beneuolo magi-  
 stro: hic cecidere retrorsum perfidi mi-  
 nistri: hic comprehenderunt Iesum: hac  
 via ligatum funibus trahebatur: hæc est  
 Annę domus, quò ductus est primùm, vbi  
 alapam accepit: hæc Caiphæ Pontifi-  
 cis habitatio, ad quem postea missus est:  
 en tibi Pilati prætorium, vbi flagellis, &  
 alapis crudeliter cęsus, & inde foras ex-  
 tractus, nudus, plagatus, cum spinea co-  
 rona populo ostensus est: en palatium  
 Herodis, vbi illusus, & ad Pilatum inde  
 remissus. Hic crux ponderosa suis hu-  
 meris imponitur: hac porta onustus vr-  
 be egreditur: hac via in Caluarium va-  
 dit: hic Simon Cyrenęus angariatur:  
 hic ad mulieres lugentes consolandas  
 conuertitur. Ecce locus Caluarię: hic  
 cruci affigitur, affixus extollitur, pendet  
 in ligno iustus, & moritur. Deponitur, &  
 ecce sepulchrū, in quo sepelitur, ex quo  
 etiam gloriosè resurrexit. Hæc, & alia

multa similia, dū mente pertractat Paulus, tanto desiderio Hierosolymam peregrinandi affectus est, vt nullo modo ab eo, donec effectum est, euelli potuerit. Cumq; per annum, aut eò amplius rem differens; ex Deo ne spiritus iste foret, diligenter examinans; atque in dies magis ac magis in proposito cōfirmaretur, Confessario (cui se totum manifestaue- rat) approbante, Hierosolymam peregrinari statuit. Tandem anno M D V I I. ætatis suæ XXXI. nauim ascendens, fœ- lici satis nauigatione, breui temporis cursu, illuc incolumis peruenit.

PAVLVS LOCA SANCTA  
perlustrat. Cap. IIII.

**E**T S I Paulus ex Patria in Hiero- solymam literas cōmendaticias secum detulerat, quibus non mi- nimum sperabat fauorem: attamen id in diminutionem meritorum ratus, eas- dem apud se retinuit, donec inde reces- sit. Dicebat enim intra se, quid tu agis? ille, cuius famulus fieri cupis, Dei filius,  
ex



ex Regia stirpe natus: hic in proprio solo, interque cognatos, & notos, abiectus, contemptusque haberi spontè voluit; & tu vermis, & non homo, hominum gratiam quæres, qui tibi applaudeant, qui tibi inseruiant, qui te indignum honore afficiant? Humillimi Saluatoris vestigia inspecturus, venisti; & dedignaris inter pauperes, ac mites cõputari? Hinc omni spe humana reiecta, alijs etiam pauperim peregrinis se commisceri, eisdem obsequium, atque auxilium præstare; infirmos proprijs manibus attrectare, fovere, ac verbis, & opere summa cum benignitate consolari; in nullo se reliquis, diuitiarum, vel nobilitatis ratione, præferens; sed omnibus vtrò se subijciens. Loca autem mysterijs consecrata, quasi in singulis Christi vestigia impressa intueretur, tanta veneratione percolare curabat, vt ceteris peregrinis magna esset admiratio: vtque facilè agnosceres, non curiositate videndi, aut diuagandi gratia (vt multi solent) sed verè contemplandi, lachrimandi que causa, Hierusalem petiisse. Perquirebat tamen curiosè

omnia, quæ in præfata meditatione, mente conceperat; & multa, quæ conceptui conformari videbâtur, hominem in stuporem sæpius trahebant. In quibusdam ex locis, quæ communiter visitari, ac venerari assolent, ea cordis lætitia affici, agitarique sentiebat; vt à corporis gesticulatione (quod ipse propter aliorum præsentiam abhorrebat) vix contineri posset. Tria autem loca, non satis habuit semel, & bis visitare; Caluariæ, in quo crux erecta fuit, scilicet, Montis Oliueti, vbi vestigia pedum Christi ascendentis in coelum, impressa apparent: atque Sepulchrum Sanctissimum; in quibus præcipuam consolationem sentire aliquando confessus est. His, quæ Hierosolymis sunt, accuratè perlustratis, non satis habuit Paulus, nisi & sanctificatas Iordanis aquas videndo biberet, & sacri baptismatis mysterium, in proprio loco contemplaretur: nec hoc quidem contentus, transacto flumine, famosa deserta Iordanis adiacentia, sanctorum Patrū olim habitacula; &, vt quidam volunt, ad Synai vsque penetrauit. Ea autē vastæ



stæ solitudinis oblectatione captus, ac nimia affectione ductus, ad loca sancta Hierosolymorum, crebra visitatione, percolenda accensus; illic ad extremum vsque diem manere proponit. At cum omnium, quos de hac re cōsuluerat, opinio eius (et si piæ voluntatis) contraria foret, maluit aliorum consilio, quam proprio desiderio acquiescere. Non tamē prorsus inane fuit propositum illud, eò quòd ex illa die nunquam solitariæ vitæ desiderium animo excidere potuit; immò futurę electionis radix firmissima extitit. Sacris ergo locis animo impressis, quod tamdiu optauerat, Iudæam reliquit; & licet non sine laboribus multis, varijsque periculis, Patriæ tamen incolumis restituitur. Animus illi erat in solitam Murani habitationem reuerrere; ibique donec de eligendo futuræ vitæ modo plenè deliberaret, manere. Sed Deus, qui nouum militē instruebat, alijs exercitijs, primisq; multò contrarijs exercere destinauerat. Non etenim sufficit, in vno, aut altero genere pugnae expertum esse eum, qui aliorum dux, & magister

magister esse debet; sed oportet eum in varijs certaminum modis esse exercitatum, quò suos aliquando tyrones ad futurum prælium instruere sciat. Oportet, inquam, eum, qui Deo placere intendit, non semper suam, sed sæpe alterius facere voluntatem; nec suis semper cōmodis, sed plerumque alienis inferuire.

PAVLVS SPECIE RECTI  
deceptus, negotijs secularibus  
implicatur. Cap. V.

**C**UM primùm itaque Venetias appulit, fratres (vt par erat) sororesq; inuisere sollicitè curauit, qui omnes eum læto animo accipere, venientem desideratum diu fratrem astrictiùs amplecti; & quòad possunt penès se (etsi frustra) retinere nituntur. Erat illi soror præ omnibus dilecta, quæ cuidam nobiliori de Contarenorū præclara familia nupserat: quæque vicissim Paulum adamabat. Ad quam cùm diuertisset aliquando nouus hospes, mulieris manus, qui tot viris ipsum rogantibus viriliter



viriliter restiterat, non euasit. Sic namq;  
illa lachrymis admixtis agebat. Intelli-  
go, charissime frater, te iterum in tua so-  
lita suburbis cauerna velle abscondi;  
meque cum ceteris cognatis, atque dile-  
ctis tuis, quasi alienam relinquere; seu, vt  
melius dicam, quasi feram leenam fuge-  
re. Scio te sapientem, sed in hoc te deci-  
pi credam: vereorque ne dum tu Deum  
quærere intendis, eius præcepta contem-  
nas. En duo sunt tibi fratres, opera tua  
utique egentes ambo: sex sunt rursus ti-  
bi sorores; quarum duæ sine viro, sineq;  
parentibus manent: quæque à te vno so-  
latium sperant. Non tu illis frater, sed  
pater esse debueras: quæ te non vt fra-  
trem, verum plusquam patrem diligunt,  
ac reuerentur: in te miseræ omnē spem  
suam collocauerunt. Quid, nonne charis-  
simus frater tuus Iacobus moriens, duas  
tibi filias, quas orphanas relinquebat,  
summis precibus interpositis commen-  
dauit? nonne easdem puellas cum facul-  
tatibus suis tibi educandas, ac defendē-  
das liberè tradidit? At tu, dum labores  
vitas, dum ocium quæritas, dumque tuis  
inseruis

inferuis commoditatibus, hæc omnia mi-  
 sericordiæ opera prætermittis: hæc san-  
 cta exercitia conténis, ac parum sapien-  
 ter pro nihilo ducis. Sanè frater, nō iam  
 mihi pius, sed impijssimus esse videris:  
 tu Tigride immanior, ac crudelior Leo-  
 ne; quem nec fraternus amor, nec orpha-  
 norum desolatio, nec pupillorum neces-  
 sitas quicquam mouent. Iam si alibi for-  
 tass inter tuos habitare non placet, hîc  
 mane mecum: hæc tua domus sit, eadem  
 pro libito vtere: hoc mihi, hoc domino  
 maritoque meo (de cuius assensu ipsa lo-  
 quor) gratissimum erit. Memento tandē  
 pupillorum, ac pauperum suorum nobis  
 curæ esse, voluisse Christum; non autem  
 sibi soli prodesse. Hæc cū dixisset mu-  
 lier, in dubio audientis animus versatur;  
 nec quò potius se vertat, satis delibera-  
 re potest. Ponderat quanti momenti sit  
 animi iam aliàs gustata quies: vrget è  
 contrà charorum necessitas, ac pietatis  
 opus. Denique hinc inde multis ratio-  
 nibus, tacita lingua, mente pertractatis,  
 tandem vicit pium hominem fraterna  
 charitas; atque fratribus, sororibus, ne-  
 ptibusque



ptibusque pupillis subuenire potius duxit, quàm sibi vni tantùm consulere. Firmato itaque proposito in domo sororis suadentis manere elegit; ac deinde sororum, quæ sine viris erant, ac pupillarũ negotia gerenda suscipit; sicque secularibus curis pius homo immergitur. At dum ista peraguntur, incipit tepescere animus, frigescit spiritualis feruor, à diuinis mens pia distrahitur. Rursus temporalium rerũ sensim subintrat affectio; nascitur ob multa aduersa, carnalis passio: pullulat in corde iracundia: accenditur bilis; ex quibus & mentis cõsequitur perturbatio. In summa in tanta rerum occupatione, dimittuntur studia sacra; cessat oratio, & in actionẽ periculosam vertitur præterita cõtẽplatio. Adeò vt ipse alicubi, vicem suam dolens, apertè confiteatur, se dum talibus intentus esset, parum innocenter vixisse. Sanè in omnibus expertum seruum suum voluit Deus. Iam ferè biennium transierat, ex quo sic delusus detinebatur miser; nec volens, ac sæpe suspirans se inde extricare valebat: cùm ecce de repentè Deus eundem

eundem quasi è somno mirabiliter excitat. Residebat eo tempore in eadem vrbe Petrus Delphinus totius Ordinis Camaldulensis Generalis; vir & morū sanctitate, & doctrina clarus, ac rerum gerendarum longa experientia doctus. Cum hoc venerabili viro magna erat ei atque diuturna familiaritas. Hunc, vt sepe solebat, conuenit Paulus; cui quid ipse agat, quo in genere vitæ versetur, quo se immiscuerit periculo, quàm anxie viuat, ritè manifestat: necnon ab eodem cōsiliū salubre hos laqueos euadendi, supplex exoptulat. Cui senex: Nosti fili charissime scriptū esse; Qui tetigerit picem, inquinabitur ab ea. Si tu, quæ Mundi sunt, tractare velis, certè Mundi afflictionibus, passionibusq; inuoluaris necesse est. Equidem pium est quod agis; sed parum pium est te ipsum perdere. Nec te ignorare credam quàm periculosa sit nostris temporibus secularium rerum tractatio, cū vix iam sine fraude, atque malitia inter homines quicquam agatur. Et tamen, scriptura teste, Qui amat periculum, peribit in eo.

Parum



Parum profectò tibi proderit, si totum Mundum lucreris, animæ autem tuæ detrimentum feceris. Diuerte ergo à malo, & fac bonum; inquire pacem, & persequere eam. Quod, mihi crede, non facies, nisi opera ista tenebrarum abijcias; nisi seculum fugias, atque aliquam benè ordinatam religionem intres. Sunt autem hodie religiones multæ; sed quæ tibi earum magis conueniat, ego non dicam. Assiduè tibi orandum consulo, donec Deus quò sibi placuerit, te vocare dignetur: quòd si fortè certam spiritus electionem dederit, eam sequere. Veruntamen si te animi quies, ac solitudo (quemadmodum nobis aliquando insinuasti) tantopere delectat, nostrā Eremitum Camaldulensem tibi præ ceteris propono: sed cùm loci ipsius situs, atque viuendi modus rigidissimi existant; tibi plenius deliberandum censeo.

PAV-

EREMITICÆ HISTORIÆ  
PAVLVS SCRVTINIO DE  
quibusdam Religionibus factō,  
Camaldulum peruenit, & fit  
Eremita. Cap. VI.

**O**PTIMI Delphini consilio cō-  
fortatus, roboratusque animo  
Paulus, rem quàm citius ad ef-  
fectum perducere statuit. Eoque vrbe  
egressus varias Italię partes peragratur,  
variasque Religionum species maturè  
considerare voluit, ne temerè aliquam  
earum ingressus, postea cum dedecore  
inde recedere cogeretur. Cùm autem  
ad Eremum Camaldulensem ventum est,  
cepit & loci habitudo, atque Eremitarū  
ibi commorantium conuersatio mirum  
in modum homini solitudinis auido pla-  
cere. Postulat vir prudens ab ipso loci  
superiore, quatenus ibidem proprio ha-  
bitu per dies triginta, Eremitico autem  
more experiundi causa ei commorari  
liceat. Quod illi benignè concessum est:  
cui per idem tempus, vt Eremitæ om-  
nia, quę ad victus pertinent, ministraban-  
tur. Illeque vicissim nil eorum, quę ad  
obser-



obseruantiam pertinēt, prætermittēbat, quò minus obseruādo ad vnguem adimpleret. Ieiunabat, psallebat, vigilabat, orabat, & in iugi silentio manens, cuncta vt peritissimus Eremita, complere studebat. Mense tandem in hac sancta experientia faciēda transacto, Eremitam fieri, ibidemque habitum sanctum suscipere decreuit. Verùm antè quàm id fieret, domū reuerti, ac de rebus suis quasi tunc moriturus disponere voluit, ne postea aliquid impeditenti superesset, quo pium propositum impediretur; & facilius ab omnibus Mundi laqueis extricatus, ab omni que secularium rerum cura expeditus, nudus Christum sequendo illuc remearet. Qua de re, & quemadmodum illic præfato tempore conuersatus sit, his verbis Lucæ Monacho scribens, exponit Delphinus. Petis, inquit, fieri certior, placuerit ne Thomæ Iustiniano Eremini nostræ commoratio, & situs, per id tempus, quo ibidem cōmoratus est: adeò cordi fuit illi locus ipse, sic est ea solitudine, & vniuerso ritu oblectatus, vt non potuerit magis. Non est territus a-

H steritate

steritate Eremitici propositi, nō fractus  
ieiunio panis, & aquæ, nō fatigatus pro-  
lixitate psalmodiæ, atque nocturni offi-  
cij, non longa silentij custodia tædio af-  
fectus. Denique ita se gessit in Eremo,  
vt non minus ei locus satisfecerit, quàm  
ipse loco. Nam tanta ibi moderatione,  
& humilitate cōuersatus est, vt vno Ere-  
mitarum consensu summopere laudaretur,  
omniumque promeruerit gratiam.  
Nonus hic est dies quo abiit, rediturus,  
vt nobis constantissimè recepit. Hæc  
Delphinus. Ad suos itaque reuersus Iu-  
stinianus noster, quæ sibi agenda resta-  
bant, citiùs (sano tamen, ac prudenti cō-  
silio) expediuit. Constituit scilicet qui  
sororū, atq; puellarū curā gereret, & bo-  
na oīa, quibus iure obueniebāt, reliquit.

PAVLI ITER, ET RELI-  
gionis ingressus. Cap. VII.

**T**ANTI momenti futura erat Iu-  
stiniani nostri conuersio, vt siue  
Deo seruum suum probante, siue  
dæmone impediēte, sine magno labore,  
ac



ac difficultate fieri nequiuert. Quam ob rem non pigebit, summatim hîc ea referre, quæ ipse ad Quirinum, & Ignatiû scribit. Expeditus igitur, & rebus omnibus benè dispositis, nemine domesticorum conscio, famulo quodam familiarissimo secum assumpto, nomine Petro, die quadã ad Solis occasum nauim ascendit. Cùmque in ipso noctis crepusculo, silentio factò, nauis suauiter Hadriaticum sulcaret, per immissam illusionem à proprio sensu vir bonus abstrahitur. Videbatur sibi adhuc domesse, & coram se fratres, sorores, nepotes, domesticosq; omnes, atque amicos constitutos habere. Quorum alij eum discedere volentem amplecti, alij collû astringere, alij pedibus aduolui; & sentit voces dicentium; Quid nos deseris laborum nostrorum vnicum leuamen? quid in te peccauimus, vt nostrum sic fugias aspectum, nosq; tuo priuare velis? Audit coelibes sorores expostulantes: Si nos desertas relinquere decreuisti, frater, occide prius; ne quod superest vitæ, in desolatione transire cogamur. Ade-

rant astantes orphanæ puellæ prædefun-  
 cti fratris filiæ, cum singultibus vlulâtes,  
 vocesque præ ceteris extollêtes : O cru-  
 delis patruë, tu qui nobis futurus eras pa-  
 ter, cui nos genitor noster moriens, cum  
 tanta fiducia educandas, defendendasq;  
 tradidit : cui nos, quæso, dilaniandas,  
 bonaque nostra diripienda relinquis?  
 Hæccine est fides, quam fratri tuo dece-  
 denti dedisti? Etenim corripiet te Deus  
 de infidelitate tua. Erant & amicorum  
 voces varia acclamantes : & simul om-  
 nes eum, ne domo exiret, detinebant.  
 Hac illusione diu vexatus inexpertus  
 athleta, nisi præstò Dei auxiliū ei affuif-  
 set, proculdubiò pugna cessisset, seq;  
 hosti tradidisset cum magno dedecore vi-  
 ctum. Attamen paulatim respirans, ocu-  
 lis in cœlum conuersis : O bone Iesu, ait,  
 nonne tu dixisti : si quis venit ad me, &  
 non odit patrem suum, & matrem suam,  
 & uxorem, & filios, & fratres, & sorores,  
 non potest meus esse discipulus? Nonne  
 tu præ omnibus his diligendus es, atque  
 sequendus? Quis enim eorum pro salute  
 mea intolerabiles labores, verbera, &  
 tormenta



tormenta passus est? Quis eorum pro peccatis meis crucifigi velit? Porro nemo hæc mihi beneficia præter te præstare potest. Vnde meritò dixit quidam, neglecta matre, & calcato in limine patre, ad crucis tuæ vexillum esse euolandum: summumque pietatis genus esse, in hac re esse crudelem. His, & similibus scripturarum iaculis contra inimicum iactis, satis lætus nauigabat Paulus: cùm ecce de repente, siue ventorum sæuitia, siue nautarū imperitia, quibusdam scānis arenosis nauigium adheſit. Vnde nisi à piscatore quodā Simba extracti fuissent, actū erat de oībus, q̄ ī nauigio erāt. Rursus cùm per Aemyliam Camaldulū versus, iter agerēt, ad Bidentem rapidissimum flumen ventum est. Quem Petrus fidelissimus itineris comes, primus ingressus est, cuius equus aquarum violentia raptus, inuitus cum suo cessore trahebatur: dum autem periclitanti famulo opem ferre nititur herus, eodem gurgite inuoluitur: ex quo nisi à quodam paupe in ripa stante (qui se in flumen protinus deiecit) adiuti fuissēt, simul ambos

abforbebat vorago. Idē Petrus, nō multū inde progressis illis, ī profundā foueā niue plenam cum equo cecidit, & in magno periculo constitutus fuit: nec sine rusticorum adiutorio, multaq; difficultate inde extrahi potuit. Tandem cū iam arduos Alpium montes ascenderēt, quia ingelida niue iumenta pedem firmare non poterant, & passim offendendo cessores deturbabant, inexcessibiles colles, pedes ascendere coactus est Paulus. Res quidem illi insueta, & grauis: ideoque in sudorem versus, & intolerabili labore defessus, suggerente dæmonio, in varias, pessimasq; incidit tentationes, quas ipse refert, nos autem breuitatis causa omittimus. At dum inter has vndas tentationum agitaretur nouus miles, miserante Deo, illi in mentem venit præclara Apostoli sententia: Non sunt condignæ passionēs huius seculi ad futuram gloriam, quæ reuelabitur in nobis. Hæc, & similia mente pertractans viator noster, denique ad solis occasum, Musoleam (magnificam Camaldulensium domum) vix semiuiuus peruenit. In ip-



fa domo tunc Delphinus erat; qui, viso  
 Paulo, valdè gauisus est, eumque nocte  
 illa apud se retinens miro modo, & cor-  
 porali, & spiritali recreatione refecit;  
 crastina die, quæ 17. Decembris compu-  
 tabatur, ad desideratam sacram Eremū  
 eundem equis, & comitibus datis, emit-  
 tens. Quomodo autem ibidem habitum  
 sumpserit, & quando, in hæc verba ad  
 Eusebium Priolum scribens refert Del-  
 phinus. Quod igitur fœlix, ac faustum,  
 & salutare, tùm ipsi, tùm Eremo futurū  
 speramus; heri (erat enim Natiuitatis  
 Dominicæ dies) in Missa de Aurora, Iu-  
 stinianus conterraneus noster, iucundus  
 & hilaris, habitum Religionis de mani-  
 bus nostris accepit. Congaudentibus  
 omnibus de huiusmodi reuera mirabili  
 hominis conuersione: quòd in delitijs  
 enutritus, arduum hoc, atque asperum,  
 tùm loci situ, tùm vitæ austeritate, elege-  
 rit institutum. Et post pauca: Ad hoc  
 non ampliùs Thomam Didimum, id est  
 dubium; sed Paulum, mutato nomine,  
 placuit appellari: vt eius in aduersis, &  
 seculi varietatibus emuletur constantiā,

## EREMITICÆ HISTORIÆ

qui plus ceteris Apostolis, Apostolorum minimus laborauit. Vocatum est itaque ei nomen nouum, quod olim os Domini Saulo nominauit. Acta sunt autem hæc die Natiuitatis Domini m d x. ætatis verò recentis Pauli xx xiiii.

### PAULI NOVITIATVS, ET Petri Quirini conuersio. Cap. VIII.

SVS C R I P T O itaque Sanctæ conuersationis habitu, sine mora Paulus se totum Deo tradidit: Eremiticę obseruantię mirabili quodam modo mirabiliter incumbens: super omnia autē iugi orationi insistens. Sed hac de re iucundum est Delphinum iterum audire. Mirantur, inquit, omnes constantiā eius, deuotionem, humilitatem, charitatem, atque rerum omnium mundanarum contemptum: exemplo est omnibus religionis, & pietatis: nulli est in Eremiticæ districtiōis obseruatione secundus. Heri namque visitaui Eremum, & reperi Paulum exultantem in Domino, & non tantum corpore, quàm spiritu valentem.

Hæc,



Hæc, & alia multa de eius religioso ty-  
 rocinio bonus senex lib. 10. Epistolarum  
 enarrat. Etenim pulchrum erit hîc re-  
 ferre, perinde se à principio abnegasse  
 in Prælatorum manibus, vt nihil prorsus  
 sine expresso moderatoris consensu in-  
 tentare, aut vel minimam cogitationem  
 celare aliquando sit ausus. Vnde factum  
 est, vt etiam in ijs, ad quæ nimius feruor  
 (vti incipientibus accidere solet) eū im-  
 pellebat, summa vbiq̃ue cum discretio-  
 ne se haberet: eoq̃ue abstinentijs panis,  
 & aque, iusta moderatione vtens, nullum  
 ei detrimentū tale ieiunium aliquando  
 attulerit. Sic in vigilijs, disciplinis, &  
 alijs pijs exercitijs semper visus est pru-  
 dentissimus; in omnibus denique tem-  
 peratè agere nouit, oratione & silentio  
 exceptis, in quibus nec modū, nec tēpus  
 seruare poterat, quin semper, & vbiq̃ue  
 (nisi impeditus orare, vel loqui compul-  
 sus fuerit) mente orans, & ore clauso, in  
 cella manens, vel foris agens, incedebat.  
 Tentationes multas, ac magnas perpes-  
 sus, omnes facilè prudentia, opeq̃ue di-  
 uina superauit: tres autem earum longo  
 tempore

tempore ei infestæ fuere. Prima extitit recordatio pupillarum, quarum curam ipse domi agebat. Non enim poterat, pro innata pietate, non illis compati, & condolare: secunda curiosum desiderium erat (opus Satanæ) ut scilicet sacra Ere-  
mus lapideo muro stringeretur: quam Delphinus eidem scribens exprobrat, immissiones, inquit, per angelos malos. Tertia multo his durior, & tenacior visa est, quia maiori rationi nitebatur, plusque ponderis in se habebat: quæ quidem, si exitum consideremus, tentatio non erat, sed Dei inspiratio; quæ iam tunc velut semen futuræ segetis à Spiritu sancto, in nouali aruo ad hoc præparato, ferebatur. Porro hæc imaginatio quædam fuit, seu potius consideratio in intellectuali parte formata, vel certè ex rationali fundo procedens. Considerabat utique vir iste desideriorum, quàm sancta in se consisteret Eremitica institutio, quàmq; apta non solum ad salutem simpliciter post mortem, sed etiam ad perfectionem vitæ in terris consequendam: admiratus siquidem solitudinis  
 quie-



quietem, orandi opportunitatem, à populari tumultu sequestrationem, & seruorum Dei perpetuam conuersationis sanctitatem. Accedebant ad hæc mirabilis perpetui silentij obseruatio, ciborū parcimonia, nocturna pariter, atq; diurna diuinorum officiorum deuota melodia: stupebat in strictæ obseruantix generali custodia, in reuerentia omnium erga superiores, in mutua inuicem charitate, ac similiter in vigilantia, benignitateque prælatorum. Ex quibus facile sibi persuasum habebat, solitariæ Camaldulensium vitæ aliam institutionem similem sub Sole non inueniri. Econtrà animaduertens tam preciosum thesaurum in tam angusto vasculo concludi, & quod omnibus manifestum esse debuit, tam paucis innotescere, quodq; per totum orbem terrarum ob salutē animarum extendi oportebat, in vno Hetruriæ strictissimo angulo latere, magno cordis dolore afficiebatur. Inde animo concipiebat, hoc tam sanctum institutum ampliandum fore, vt multis prodesset, quod nunc absconditum vix paucos

cos iuuaret, magnumque inde vniuersitati fidelium prouenire damnum. Hæc sanè profunda cogitatio sæpius, perque multum tempus animo eius adhæsit, atque mentem quodam zelo pietatis nimium occupabat, quamque tam efficaciter imbiberat, vt nunquam à se potuerit profligare. Ac præter id, quod ad mores, & tentationes attinet, modis multis pij animi affectionem in suo nouitiatu ostendit: propterea quòd ex proprijs pecunijs cellam vnā, & aliud quoddā ædificium domui vtilissimum, construere voluit. Obtulit & quædam munuscula in templi ipsius ornamentum non minimi precij; & alia, quæ hîc non numerantur. Tanta prætereà erat in moribus modestia, & in conuersatione affabilitas, vt magnates multi, prælatique non pauci Eremum inuiserent, non ob aliud quiddē, quàm q̃ eius aspectu, dulciq̃ colloquio, vel modicum fruerētur. Inter quos Ioannes Medices Cardinalis, qui postea Papa Leo Decimus fuit: hic eius conuersatione adeò delectabatur, vt quoties Iustinianum nominaret, nostrum addere non



non pigeret. Iulio quoque Cardinali, qui deinde Papa creatus, Clementis nomen accepit, charissimus extitit: à quo & multa suo tempore priuilegia, & gratias amplissimas obtinuit. Possem & aliorum multorum nobilium, ac principum amicitias enarrare, quas tamen ex industria reticebo. Postremò non cessat interim diligens operarius suum Vincetium Quirinum, & alios compatriotas amicos literis crebris sollicitare, vt fallaci seculo relicto, eius exemplo in Ere-  
 mum confugiant: qua diligentia intra annum tres egregios viros, omnes patri-  
 tios Venetos in solitudinem traxit. Horum primus Quirinus: Hieronymus Georgius secundus: tertius Ioannes Baptista Ignatius fuit. Quem tamen Ignatium opere infecto, aut certè non incepto recessisse, compertum habeo. Erat autem Quirinus Hebraica, Græca, ac latina lingua peritissimus, haud vulgari-  
 bus legationibus in patria functus. Tales quippe ad se trahebat Iustinianus, qui frugi Religioni futuri essent. De istis tribus patriijs Venetis sic ad Cardinalem  
 Volter-

Volterranum scribit Delphinus: Agas Deo gratias, quòd suscitare dignatus sit de lapidibus filios Abrahe, qui sicut omnes vaticinantur, labenti, & cadenti Religioni dorsum supponere idonei sint futuri. Hoc idem sentit Eusebius Priolus, cùm ait ornatam fuisse tũc temporis Camaldulensem Religionem duobus luminaribus magnis, Petro Quirino, & Paulo Iustiniano. Venit siquidem Quirinus ad finẽ anni nouitiatus ipsius Pauli, vtpotẽ qui de manu eiusdem Generalis die Cathedræ sancti Petri MDXII. habitũ sumpsit. His tandẽ cùm in ipsa Eremo bienio summa cum omnium laude vixisset, Romæ Cardinalis designatus, nondũ insignitus, foeliciter obiit. Iustinianus autẽ tyrocinij anno transacto, iubilus vota emisit: qui post paucos menses simul cũ Quirino, sacris ordinibus decoratus est, Dei Sacerdos factus.

PAVLVS SACRAE EREMI  
defensorem agit. Cap. IX.

**D**V<sup>m</sup> in stricta tyrocinij solitariae  
militiæ disciplina, sub vigilantissi-  
mo



mo magistro continetur Paulus: nimirū  
 silentio, orationi, & Anachoreticæ perfe-  
 ctioni tantummodo intentus, quid foris  
 ageretur, quæ essent negotia domus, quid  
 sacræ Eremo vel boni, vel mali contigis-  
 set, penitus ignorabat. At professione fa-  
 cta, cum senioribus se colloquio misceri  
 cœpit, cū etiam conuentualibus capi-  
 tulis (quæ illic frequenter celebrari so-  
 lent) vocatus interuenisset; tunc primū  
 agnouit domum illam aduersa vti for-  
 tuna, ac varijs modis familiam sacram  
 aliunde vexari. Audit venerabilium Pa-  
 trum suorum querelas, & quā mutata  
 facie Camaldulensis Eremus incedat,  
 manifestè percipit; necnon tanti mēo-  
 ris causas animaduertit. Rem insuper ta-  
 citus considerans miratur valde, ac tan-  
 dem non potest concepti doloris non fo-  
 ris ostēdere signa. Hinc quasi aliud agēs,  
 quadam verborum modestia, Patribus  
 negligentiam, qua circa hæc vñ sunt, ten-  
 tabat obijcere; addebat & modos, ra-  
 tionibus adhibitis, quibus tanta iactura  
 vitari poterat, atque adeò acceptū dam-  
 num recuperari. Hæc vicissim audientes  
 supe-

superiores, & animi virtutem, & rerum peritiam in homine considerantes, conuocato capitulo eidem resistendi, & recuperandi prouinciam delegare decreuerunt, plena ad hoc auctoritate tributa. Quo nuncio audito, ingemuit pius homo, & ad genua Patrum procidens, copiosis lachrymis admixtis, supplex orat reuocari decretum; se nouum hominē, & in similibus inexpertū causans; addēs (quod eius animā magis angebat) quicquid in spiritali exercitio tāto tēpore, atque labore acquisierat, in puncto esse amissurum. Assurgunt Patres, nec satis eius verba attendunt, sed perseverantes ad patientiam eum hortantur, magnum obedientiæ fructum ei proponētes. Qui egressus exedra Ecclesiam intrat, & coram sanctissimo Sacramento singultis, & suspirijs Deum Opt. Max. orat, vt adiuuet mœrore affectum seruum suum, & quid sit factururus, inspiret. Causæ huius inquietudinis istæ præcipuè referuntur. Basilii quidā conuentualis, Abbas perpetuus Sancti Foelici Florentiæ, vir sagax, & humana prudentia maximè polens,



lens, lingua velox, animo intrepidus, & corporis viribus præstans : cuius gesta venerabilis Augustinus latè prosequitur : nos verò ( quia nostri instituti non sunt ) silentio præterire consultiùs duximus. Is in Hetruria vices generalis gerès cuncta agitabat; nec qui ei resisteret, facile erat inuenire: quem ne ipse quidem Generalis ( à quo eius auctoritas dependebat ) frènnare poterat, aut certè compescere non est ausus. Inter alia hic siue dignitatis nomine, seu fato ita permittète, Monasterium Fontisboni, & res omnes Eremitarum, præter ordinem, liberè administrabat. Nec his contentus, ad radices montis, domum quandam, siue palatium ( quod Musoleam vocant ) voluit ædificare : cuius fabricæ prætextu, multa in Eremum ipsam machinatū esse, etiam hodie perhibent eius cultores. Magnas in primis, excessiuasq; pecuniarum quantitates absumpserat, magnoq; ære alieno pauperes Eremitas grauare : item agros, & possessiones eorū alienare non verebatur : &, quod grauius erat, quasi ædificio necessaria prouidēs, abie-

tum syluas ( Eremi vnicum ornamentū,  
 atque solatium ) magna facta strage de-  
 uastabat . Tandem illi in mentem ve-  
 nit latissimum nemus, quod incolę Mac-  
 ciam vocitant, ad vltimam vsque abietē  
 abscindere: nimirum ratus ( vt creditur )  
 attenta lignorum multitudine, pulchri-  
 tudine, ac perfectione, inde multa millia  
 aureorum parari posse . Sciendum tamē  
 est, ex hoc pretioso nemore non tenues  
 quotannis ( selectis tātū excisis, super-  
 fluisq; arboribus ) Eremo ipsi redditus  
 prouenire. Audito ergo nuncio, ægrē tu-  
 lerunt Patres, Paulumq; illicò ad obuiā-  
 dum imminenti damno stimulant. Egre-  
 ditur foras nouus defensor, & dilectam  
 solitudinem derelinquit; remanet in ca-  
 cumine montis ociosa Maria, & sollici-  
 ta Martha cum eo ad ima descendit.  
 Conuenit Vicarium, & reuerenti saluta-  
 tione præmissa, eum blandē alloquitur :  
 cōqueritur de damnis Eremo datis, ex-  
 probrans agrorum, possessionumq; alie-  
 nationes : annumerat etiam contracta  
 debita, & sylvarum deuastationes deplo-  
 rat : & tandem imminensem magni ne-  
 moris



moris extirpationem, ei dissuadere co-  
 natur. Postremò, cùm addidisset prædi-  
 cta omnia illi in magnum dedecus ver-  
 ti, nec salua conscientia fieri posse: tunc  
 homo ferox toruo oculo, truci que vultu  
 hominem respicit, aspera q; voce hæc, &  
 alia sibi (nempè auctoritate vicarij suf-  
 fulto) licere asseuerat; maiora se de cæ-  
 tero factura comminans. Ad hæc Pau-  
 lus: Falleris Reuerende Pater, ait, si cre-  
 dis ad hoc tibi dignitatem istã, qua fun-  
 geris, esse collatam: data namque fuit nõ  
 vt destruas, sed vt ædifices; non vt euel-  
 las, sed vt plantes; non vt dissipēs, sed vt  
 congreges, cõserues, & defendas. In sum-  
 ma excõmunicationes, & grauiores cen-  
 suras priuilegiorũ, quæ multa & magna  
 habet domus illa, in eos qui domui sa-  
 cræ damnum inferunt, seu iniurias irro-  
 gant, plenius commemorat; eis se vsurũ  
 nisi à cẽpto desistat protestans. Quin et si  
 opus fuerit, summum Pontificem adire,  
 & alia quæcumque remedia opportuna  
 quærere comminatur. Erubuit vir aliàs  
 intrepidus, & magna iracundia accensus  
 cum frẽmitu discedēs, querulum paupe-

contra  
 extirpa  
 X  
 bonor

rem irrefolutum reliquit. Tandem tanta fuit in eo pertinacia, vt non solum deuastationi solitæ insisteret, sed & alia hæc nus non cogitata nouiter intentaret. Ex aduerso Paulus literis crebris, ac nuncijs cum Delphino Generali expostulat, & omni submissione seruata, de damnis, & iniurijs acceptis conqueritur: sed cum nec inde debita emanaret prouisio (etenim senex aduersus vicarium ne mutire quidem audebat) Romam se confert, ac summo Pontifici, longa elegantiq; oratione coram eo habita, infortunia omnia, quæ sacra Eremus sustinebat, exponit; eius auxilium humiliter exposcens. Profectò hæc dum audit Basilius, mirum in modum excruciat; audit, & contristatur Delphinus: non enim existimarant eòvsque expostulationem venturam. Scribit statim Paulo Generalis, & quasi derelictæ solitudinis eum arguens, pulchrè vt ad illam redeat, Roma relicta, nititur suadere. Atqui Patres, qui durius Camalduli vexabantur, eundem ad perseuerantiam hortantur: immò timentes, ne in tanto conflictu deficeret, aut in gratiam Delphini,



Delphini, infecto negotio curiam desereret, eidem Petrum Quirinum in sociū, & adiutorem mittūt, Quo audito, senex vtrisque simul scribit, eundem ferè sermonē repetēs: Epistolis 70. & 73. lib. 10. Nihilominus illi constanter perseverantes, donec vicarius prohibitus, & sacra Eremus à vexationibus liberata est, cepto in opere viriliter persistunt. Breui denique tempore, perfectō negotio, ad optatam solitudinem, victoria parta, redeunt; vbi cum magno Patrum iubilo recepti sunt.

## DELPHINVS, ET PAVLVS de congruo Religionis remedio deliberant. Cap. X.

**P**ER aliquot menses in sancta solitudinis quiete, iuxta desiderium suum, post reditum à curia comoratus Iustinianus noster: ecce à Petro Generali tunc in Fontebono cōmoranti die quadam accersitur. Descendit obediens filius, & post mutuos amplexus cubiculū senis ingressi, per lōgum tempore

ris spacium inuicem confabulantur; inter loquēdum de misero Religionis statu incidit sermo. Multa hinc inde proferuntur, atque vtriusque desiderium ad vnum eundemq; effectum tendebat, idq; erat, vt per generale Capitulum inueterato morbo mederetur. De modo autē, quo id ipsum pertractandum esset, nō satis inter eos constabat. Senex vtique longa in his experiētia pusillanimis factus, sine strepitu inter eos orationibus, & validis persuasionibus ad potentiores Religionis p̄latos factis, censebat agendū: iuuenis verò solito animi vigore actus, præter illa, Pontificū, Principūq; auctoritate vtendum, & nolentes etiam cogen dos esse, existimabat. Timebat etenim ille, sicut aliàs expertus fuerat, ne pertentato, nec succedente negotio, foris scandalum generaretur: iste verò considerās non in paucis, sed in multis, diuersiq; ingenij, ac proprijs cōmodis intētis viris, qui nec forsità vocati vēturi erāt, rē cōsistere: propterea sine supremo imperio id minimē fieri posse iudicabat. Re igitur ad maiorem deliberationem relicta,



etia, cū vidisset senex iuuenis animum,  
 ac zelum domus Domini, & eū ad futurū  
 negotium idoneum, non tunc primū,  
 sed iam olim agnouisset; quasi hominem  
 iuxta cor suum inuenisset, letatus est val-  
 dē. Etenim per annos triginta remiga-  
 uerat Delphinus quò nauiculam suam ē  
 fluctibus eriperet, sed frustabantur la-  
 bores eius; immò quò magis ille labora-  
 re nitebatur, eò minus proficiebat. Hanc  
 ergo occasionem nactus, quicquid illi in  
 votis erat, Paulo aperire non differt: quē  
 & sibi socium ad opus peragendum (fide  
 mutuò data) assumit. Et hoc erat, quod  
 iam aliquot mensibus elapsis eidem scri-  
 bēs, dixerat: ego nihil magis cupio, quā  
 vt mecum sis, mecumq; labores: paucis  
 sanè verbis magnum opus significans:  
 quia tunc sic loqui oportebat. Huius ve-  
 rò consilij Quirinum quoq; participem  
 fuisse, quidam affirmant. Ideoque de his  
 duobus praestantissimis viris sic agit Eu-  
 sebius Priolus. Hij vbi inspexerunt na-  
 uiculam hanc Benedicti procellis agita-  
 ri, ac fluctibus obrui; induxerūt sibi iam  
 semipeditæ Religioni succurrēdū fore.

Interim dum hæc apud eos cunctando aguntur: ecce Romanus Pontifex Iulius Secundus moritur, in cuius locum Ioannes Cardinalis Medices suffultus est, Leo Decimus dictus: homo sanè vtrique eorum (vti sepe retulimus) magna amicitia coniunctus. Tam læto, ac prospero nuncio audito, Delphinus qui tunc temporis Florentiæ agebat, Paulum confestim ad se venire iubet: quò cùm ille nō piger peruenisset, magna inuicem gratulatione peracta, paucis concludunt nouū Pontificē præfati negotij causa sine mora esse adeundum, & eius auctoritate omnia fieri debere statuunt. Mittitur Romā Paulus, qui prius Iulianū Medicē Pōtificis fratrem conuenit, qui etiam semper & Patres summoperè dilexit, suamq; operam in rebus Eremiti libentissimè impendit: cuius fauor, ac potentissima auctoritas non parum ad hoc opus perficiendū profuit: deinde summi Pontificis pedes osculaturus accedens, omnia quæ in mādatis habebat, eidē humiliter exponit. Quo audito, benignè Pontifex petitioni annuit: vt qui cuncta Religionis incommoda



moda iam antea intellexerat; nec quid fieri opus esset ad eius reformationem, ignorabat. Expedito igitur de more curiæ mandato, omnibus simul cuiuscunque classis Camaldulensis Ordinis religiosi generalis conuentus Florentiæ assignata in literis die celebrandus indicitur.

Cōgregatis tandem ad destinatum locū omnibus tam conuentualium, quàm obseruantium, necnon Eremitarum Prælati; multa consideratione, longoq; tractatu (prout res ipsa postulabat) ad debitum denique finem generale Capitulū deductū est: mense Maij anno M D XIII.

In quo, præter ea quæ de reformatione tractantur, actum est: vt sacra Eremus in suum pristinum præeminentiæ statū restitueretur, sicut reuera restituta fuit, & in suam naturalem dignitatem redintegrata, inq; religionis totius caput denuò erecta. Rursus ex conuentualibus (licet non omnibus) & obseruantibus, vna & ipsa obseruantissima facta est congregatio: quæ vnita cum sacra Eremo capite suo, in vnum corpus redacta est Camaldulensis Religio. Ideoq; doctissimus Pe-

trus

trus Bembus, qui tunc Pontificis à secre-  
 tis erat, & postea Cardinalis factus est,  
 in principio priuilegij Leonis ad Camal-  
 dulenses, hæc dirigit verba. Attendite  
 quàm piè sanctissimus Pontifex religio-  
 nem vestram restaurare, ac decorare stu-  
 duerit, separata, & dissipata penè, atque  
 à capite suo Camaldulensi Eremo diuisa  
 membra redigere, & capiti suo vnita, ad  
 vnā cōgregationem reducere curauit.  
 Similiter prouisum est, ne de cetero ge-  
 neralatus perpetuus foret, sed triēnalis:  
 quodq; alternatim ex Monachis, & Ere-  
 mitis prior Eremi, hoc est, Generalis eli-  
 geretur. Præterea, cū constitutiones  
 Eremi præ vetustate, temporūque di-  
 uersitate, atq; auctōrū varietate vix iam  
 inter se præ confusione cohærerēt, obq;  
 multitudinem quid obseruandum esset,  
 nullo modo constaret: ordinatū extitit,  
 vt chaos illud in iustum opus, & certum  
 ordinem redactum foret. De quibus la-  
 tius in dicto priuilegio num. 222. appa-  
 ret. Hoc itaque insigne munus, immò ve-  
 riùs grauissimum onus humeris Pauli im-  
 positum fuit, atque ei tanquàm fidelissi-  
 mo,



mo, idoneoq̃ue Religionis ministro totius negotij substātia commissā est, cum plena tollendi, mutandi, corrigendi, addendi, & iuxta arbitrium suum reformādi auctoritate. Quod prolixum, difficile, ac laboriosum opus, post longam recusationem, omninò inuitus suscipere à superioribus cogitur. Quo tamen suscepto, multa diligentia, atque labore ex infinitis determinata collegit, ex barbaris dedit latina: varia ac dissona, concordātia fecit: ex multis denique vnum, certūq̃; mira arte coadunauit opus: quod quidē ex alienis, proprium suo iure reddidit. Opus, inquam, quod nec grauitate Hieronymo, nec facundia Augustino, nec facilitate Gregorio cedit; in quo & auctoris ingenium, artificis peritia, scientiæ magnitudo, & omnia pietatis dogmata relucet. Porro cū Delphino, bonisq̃; omnibus mirum in modum placuisset libellus, eundem non constitutiones simpliciter, sed Eremiticæ vitæ regulam appellari voluerūt: cuius originale manu eiusdem auctoris scriptum, in sacrae Eremiticæ MONTISCORONAE bibliotheca custoditur.

ditur. Gaude interim tu Eremus sacra  
 Camaldulensis, quæ tantum alumnum  
 habere meruisti, cuius diligentia & ope  
 iam iam peritura, instaurata es, & in tuâ  
 primæuam dignitatem restituta. Gaude  
 rursus, ò fortunata Eremus, quæ cū præ  
 cōfusione veterum statutorum certo ca-  
 reres ordine, nunc eiusdem studio tā cer-  
 ta, mirabiliq; regula Eremitici ritus do-  
 tata es: qua quidem maiorem, neq; me-  
 liorem à tua ipsius fundatione in hunc  
 vsque diem non habuerunt præteriti tui  
 cultores. Gaude tandem & tu venerabi-  
 lis Muranensis congregatio, quæ ab illa  
 sanctissima reformatione in tantum re-  
 gularis obseruantie augmentum deueni-  
 sti, atq; tantoperè & monasterijs, & Mo-  
 nachorum numero es locupletata: adeò  
 certè vt te hodie neque sanctior, neque  
 amplior alia Monachalis societas  
 inueniatur. In qua prosperi-  
 tate Deus Optimus Ma-  
 ximus te semper  
 conseruare  
 dignetur.  
 Amen.

LABO-



## LABORES, ET PRAELATVRA

Pauli. Cap. XI.

**M**ORTALIVM natura, humani cordis sensus, & cogitationes ad malum prona esse, sacra scriptura testatur; atque rectos virtutis tramites abhorruisse semper, experientia optima rerum magistra quotidie docet. Gaudet siquidē infelix homo iuxta proprium sensum, etsi corruptum, liberius oberrādo ambulare; ac monita sancta prudentum vbique respuens, fidelem doctorem contemnit, adulatorem autē pessimum in suam perniciem sequitur, & iniquum diligit consultorem. Vnde verissimum esse Comici poetæ dictum cōperimus: Obsequiū amicos, veritas odiū parit. Porro ex his, quæ suprā retulimus, multi tam Monachi, quā Eremitæ Paulum magis ac magis diligētes, summoq; amore complectentes, patrem ac defensorem eum vocitabāt. Etenim Religiosi omnes, & sanctæ obseruantie amatores, eius opera, seu virtute considerata, hominem Dei & religionis zelum habentē suspi-

suspicere, continuisq; verbis laudare nō  
 cessabant, intelligentes quanti boni fue-  
 rit auctor. At ex aduerso multi eorum,  
 qui comitia celebrata ægre ferebant, eò  
 quòd suis illicitis commoditatibus pri-  
 uati existerent, regularis quippè obser-  
 uantiæ ofores, in eiusdem obseruantiae  
 protectorem magno odio exarserunt,  
 procacibus verbis eum lacerare nō ces-  
 santes. Remanserant vtique non pauci  
 in sua conuentualitate, in qua perseuera-  
 uerunt vsque ad Pontificatum Pij quin-  
 ti: qui Tridentini Concilij decreta inse-  
 quens, eos, sicut & in alijs Religionibus  
 fecit, radicitus extirpauit. Istos, inquam,  
 benignissimum Iustinianum, tanquā sui  
 fundi calamitatem existimantes, multis  
 modis clām insectasse compertum est.  
 Attamen Paulus, cui pia mens semper  
 inerat, eorum omnium certior factus, pa-  
 tienter ferre, bonū pro malo eisdē red-  
 dere, pro persequentibus se incessanter  
 orare; & tanquā surdus, non audiens, &  
 mutus non aperiens os suum, æmulum  
 insanias summa cū benignitate diutissi-  
 mē supportauit: cuncta propter Deum,  
 quasi



quasi stultus factus, dissimulans. Memor profectò illius, qui dixit: Beati qui persecutionem patiuntur propter iustitiam, quoniam ipsorum est regnum cœlorum. Atqui hæc mala eum parum aut nihil afficiebāt, vt qui patientiæ assuefactus modicum quid etiam in magnis aduersitatibus vix sentire poterat: immò ipse solitus est dicere, tunc non benè cum Dei seruo agi, cùm omnia ei arridere videntur, & secundùm votum succedunt: sed tunc rem illi prosperè contingere, cùm vndique eum aduersa circundant, & dolore vrgente præmunt, iuxta illud: Tanquàm aurum in fornace probauit illos, & quasi holocausti hostiā accepit illos. Reuersus itaque vir Dei in Eremum, externis negotijs omnibus reiectis, iterum solitæ domunculæ possessor factus, secū negotiari cœpit, & quid foris boni egerit, quidve mali admiserit, iusta trutina examinat: de bono gratias agens Deo, de malis, si quid erat, graui censura corpus affligens. Certè hoc illi familiare erat, nullum vel minimum erratum impunitum relinquere, propriæ scilicet carnis

nis sæuissimus ultor. Reuertitur insuper ad pristinam orationis frequentiam: reasumit secreta poenitentiae exercitia, & quasi mundo exul effectus, omnis eius conuersatio in coelis erat. Hoc eodem loco, & tempore, in hac assidua mentis in Deum eleuatione (sicuti postea suis narrare consuevit) passim occurrebat illa amplianda Eremiticæ conuersationis diuina inspiratio: quæ iam à principio in ipso Religionis tyrocinio eius menti (vti diximus) inhæserat. Verum cum ipse seniorum dissuasionem eandem tamquam suspectam totis viribus ei iungere tentaret, tunc illi tenacius insidere visa est. Quæ res quandoque, dum libens in illa cogitatione moraretur, consolatio magna: sed quoties eam à se abdicare niteretur, toties cordis dolor, & mentis atra consequebatur turbatio. Præterea, tanta ipsius diebus abstinētia utebatur, ut ministri, qui cibos Eremitis quotidie per singulas cellas ministrare solent, mirarentur; quibus rem superiori nunciandis, actum est, ut iussu maioris maiorem portionem alimenti sumere cogeretur. Sacrum item silentium nunquam violare visus



visus est, nisi interrogatus: ita vt intuentes in admirationem adduceret. Postremo, omne tempus, quod peractis diuinis officijs, supererat, absorbebat lectio cū oratione: quibus eo modo se applicuerat, vt videntibus stupidus, ac sui absimilis appareret. Si aliquādo syluas ingressus animi recreandi causa, prout illic fieri solet, deambulare; statim in aliquam non momentaneam meditationem inducebatur: quò per ea, quæ facta sunt, vt Apostolus ait, inuisibilia Dei intelligere posset. Sic vtique die quadam dum inter abietes, & fagos versus Eremum nouā, vt vocant, solus speculando pergeret, scalam obedientiæ excogitauit: de qua postea elegantem libellum dedit. In cuius principio, ipsemet hoc ipsum cōfiteretur. O quàm dulce cōmercium, ò quàm fœlix occupatio, ò quàm suavis cōuersatio illi contigerat: si tamen diù in ea manere potuisset. Hæc sanè operabatur in seruo suo diuina bonitas, quò postea cū sibi benè visum fuerit, à tanto ocio ad maiores labores eū arriperet, sic eundē exercens, vt suo tempore actioni simul, & cō-

K

templa-

templationi esset idoneus: nec ociosam tantum, aut laboriosam, sed mixtā perageret vitam. Vnde illi contigit, quòd vix per semestre gustata dulcissima quiete ad exteriora iterum negotia egredi cogeretur: cùm enim experientia didicissent Patres, quanta in eo esset rerum peritia, alium necessitate occurrente mittere, ne cogitabant quidē. Nec illi quicquam profuit magna, qua vsus est, apud superiores excusatio: quòminus perseuerantibus in pposito Patribus, obedientie iugum ferre cogeretur: quam ipse etiam proprio sensu repugnante, semper libentissimè amplexus est. Hinc factum est, vt sine mora foras egressus, amata solitudine relictā, ad populares tumultus accederet: factus quippè quasi mollis cera ad omnem formam recipiendam aptus. Dum igitur extra cellā, immò extra Camalduli fines versatur; dum secularia inter seculares homines tractat, quot labores, quanta incōmoda passus sit, nō est meum explicare. Vnum hoc tacere non debeo, quòd scilicet quodocunque vel in cubiculo, vel alio quouis loco solus manere



manere ei datum est, toties (eius comite  
 testante) suspiria emittere, & lachrymis  
 abundare non cessaret, dilectæ cellulæ  
 amissum solatium deplorans. Neque hîc  
 silentio prætereundum est, quòd vltra  
 eius socius referre solebat, nunquam vi-  
 delicet vidisse se Paulû aliquod negotiû  
 tractare cepisse, nisi longa oratione præ-  
 missa: quò fieri, sicut in se existimabat, vt  
 cuncta incredibili temporis breuitate,  
 mirabiliq; facilitate perficeret. In his er-  
 go negotijs, quæ multa ac difficilia tunc  
 temporis in illa domo fuerant, propter  
 quædam sacerdotia in vim vnionis factæ  
 recuperata, ferè biennium consumpsit,  
 vix tertium quemq; mensẽ in Ere-  
 mo agens. Cruciabatur miser tot laboribus,  
 itineribusq; fatigatus, nunc Romã, nunc  
 Florentiam, Senas, Aretium, & alias ciui-  
 tates frequentans: modò Cardinales,  
 modò Episcopos, ac seculares Principes  
 interpellans. In summa, Deo dante, ab  
 omnibus extricatus in solitudinem re-  
 uertitur: sed proh dolor, dum pòst lōgũ  
 tempus relicta pia exercitia resumit,  
 quod difficile est, dum celestis roris pri-

ma libamina degustare incipit : ecce anno M D X VI. quarto nempè à professione sua, maior Eremi factus est : quæ prælatura apud Eremitas prima dignitas existit, cui nō solū totius familiæ spiritualis cura, sed etiam totius patrimonij incumbit conseruatio, atq; defensio. Quē magistratum ea diligentia, & rectitudine administravit, vt omnium, qui tunc illic degebant testimonio, nunquā meliūs, neque vtiliūs sacra Eremus tam in spiritualibus, quā temporalibus gubernata fuerit. Multa, dum Maior esset, memoriæ digna gessit, quæ autem hīc referre prolixum foret: inter alia tamen opere pretium est scire, brachium vnum Sanctissimi Patris Nostri Romualdi ad Eremum deportasse, quæ tanto tempore, hoc est, per annos quingentos, vel circa, sine aliqua Sanctissimi fundatoris sui reliquia manserat. Quod quidem mirabili quodam modo obtinuit, nec sine miraculo ex sacro eius corpore extraxit : de quo alibi latius. Finito autem eiusdē prælaturæ cum summo Dei honore, Religionis decore, & vtilitate, triennij tēpore,



pore, cùm ipse viam vnitiuam, seu contemplatiuā experiri vnicè desideraret, humiliter, loco & tempore debito reclusionem sibi per annum concedi petijt. Est enim reclusio apud Camaldulenses in quadam cella ad hoc ipsum coacta, ad vitam, vel ad certum tempus sese includi: vnde intra præfinitum tempus exire non licet: de qua tamen alibi ex professo tractabimus. Hæc nihilominus gratia tanto desiderio, & affectione petita, non solum non fuit illi concessa, sed etiam reclusionis loco, Romam cuiusdā gratiæ impetrandæ causa statim missus est: vbi coactus & per menses aliquot residere. Addam, quòd Camaldulum reuersus, non defuerunt illi occupationes, & distractionis fomenta: quam ob rem tanquam puer ab lactatus, seu à lacte depulsus, quietis priuationem æquo animo ferre amplius non poterat: animaduertēs omnē viam spiritualis ocij, quā ipse tantoperè anhelabat, prorsus sibi fuisse cōclusā. Quib⁹, & alijs multis iustissimis cōsiderationib⁹ verèq; Religioso dignis diu vexatus vixit pijs̃simus Dei seruus.

EREMITICÆ HISTORIÆ  
VETVS DESIDERIVM ERE-  
mitici instituti dilatandi, matura  
deliberatio. Cap. XII.

**M**EMINISSE oportet nos in ipso  
operis frontispicio, Paulū Iu-  
stinianum, secūdum Romual-  
dum nominasse: quod quidem hac vna  
in re satis comprobatum extat, quòd ab  
initio conuersionis suæ vehementer eū  
optasse manifestum est, vt Eremitica Ca-  
maldulensis proles (quæ vno semper ni-  
dulo contenta fuit) latius propagaretur.  
Quod similiter Sanctissimo Romualdo  
semper placuit: vtpotè, qui per totā vi-  
tam nouas Eremos condere, & suam re-  
ligionem dilatare anxie innituit: & vt  
Petrus Damianus autumat, Mundū vni-  
uersum in Eremum, & omnes homines  
in Eremitas conuertere anhelabat.  
Ideoq; hoc ipsum fieri nostro Iustiniano  
desideranti semper displicuit cōmunis  
boni viam mortalibus claudi, necnō ani-  
mas lucrandi occasiones tolli. Vt autem  
quæ diximus, rectiūs intelligantur, scire  
oportet inter Eremitas Camaldulenses  
hoc



hoc antiquissimum, & quasi sacratū institutum esse, ne Eremitica familia extrā vnicam illam Eremum dilatetur : & qui inter eos de alio solitario recessu querēdo verba facit, quasi perfidus reputatur. Quæ superstitiosa obseruatio quasi Dominicæ manus abbreviatrice, cū Paulo, tū etiam alijs multis meliora sentientibus viris parum æqua visa est. Ecōtrā, non deficiunt argumenta, quibus opinio illa defendatur: aiunt namque multa cōdidisse Romualdum Eremitoria, quorū hodie nullum extare vidēt, eò quòd difficile sit institutum hoc in multitudine, maxime in diuersis locis constituta, obseruari : & alia, quæ breuitatis causa omittimus. Quæ omnis simul disputatio vno verbo satis dissoluitur, si dicamus : eandem rationem retinendæ obseruatiōis in singulis ( licet pluribus ) locis haberi posse, quæ in vno tantū habetur, quòd numerosa aliarum Religionum Cœnobia nos docēt. Nec obstant deserta Romualdi Eremitoria, quæ defectu rectoris, & bellicis illius ætatis tumultibus infestata defecerunt. Sancto igitur zelo

plenus Paulus noster nō desierat coram Delphino, & alijs coeremitis suis, hoc ipsum proponere, & iustis rationibus honestum, vtileq; futurum ostēdere: à quibus tamen eius sententia longè semper reiecta fuit: eòq; iam ei superflua videbatur omnis de hac re tractatio. Veruntamen non ideò cessabat pia intentio: quinimmò Sancto suggerente Spiritu, in eo magis ac magis augebatur, velutque parturiens impellebatur ad effectū properare. Quæ res (etsi sancta) non minimū ei ad suam desideratam animi quietem præstabat impedimentū, atque frequenter mentem à diuino abigebat cōsortio. Huic alia potentior, magisque molesta iungebatur perturbatio, perpetua videlicet exteriorū rerum cura, negotiorūq; cōtinua occupatio: quæ nō erat in breui finem habitura, sed potius in futurum augenda censebatur. His conflictationibus oppugnatus spiritualis miles valdè cruciabatur: nec mirum profectò, cum à die professionis suæ nunquàm ab aliquo graui Religionis munere (vt sæpe diximus) vacauerit. Quot labores, & animi molestias



stias, vt Eremum à direptionibus, sylvarumque annihilatione liberaret, pertulit? Ad generalem conuentum congregandum quomodo insudauit? In constitutionibus conscribendis quot dispēdia spiritualis boni sustinuit, quotq; vigilias egit, insomnesque noctes pertransijt? Rursus in maioratu suo quantis occupationibus, curis, & anxietatibus præssus, & angustiatu extitisse, putādu est? Itinera, incommoda, difficultates, contro- uersias, & animi cruciatus, in tot negotijs peragendis, quis valebit annumerare? Quid moror? Nunquā sine graui rerum agendarum pondere Camalduli vixit: &, vt semel dicam, ex Eremita factus est negotiorum gestor. Hæc dum secum cogitat Dei seruus, stultè se agere sentit: frustra patriam, domumq; paternam reliquisse: frustra vrbes, ac populares homines fugisse: sine causa in solitudinem venisse, & tandem in vanum se ipsum, suosq; abnegasse, luce clarius agnoscit. Hinc Deum, quem ipse quærebat; & Mundum simul, quem fugerat, amisisse: atque in profundum perturbationū,

tempe-

tempestatū, negotiationisq; barathrum iterum incidisse, sibi (non sine ratione) penitus videtur. In summa cū prædictis de causis sese à diuinis commercijs alienum penitus, & quasi à Deo separatū perpenderet: cepit de opportuno remedio cogitare. Qua in re cū diū, multūq; detineretur, inter cogitandum (mirabile dictū) non amplius laborum præteritorum recordabatur, non molestiarū supradictarū meminerat: nec aliud in mentem venire solebat, quàm quòd conceptum viriliter prosequeretur, & sanctum propositum ad effectum niteretur perducere. Et cū ipse propter Delphini (quē semper magnificat) & aliorū sententias, quodāmodo hæsitaret: ecce alia ex aduerso continuò ratio exurgens ad hanc apud se pertractanda, vi quadam, cōpellebat. Quis, aiens, rationabiliter dubitabit, plures saluari posse, si plura ad hoc loca præparentur? An non duplici rete plures capiuntur pisces? An solius Camalduli Deus: aut inter abietes illas tantū habitantibus diuinæ infunduntur gratiæ? Absit à nobis tam absurda cogitatio.



tatio. Prætereà non tanti facienda est  
istorum auctoritas, vt eam Benedicti, aut  
Romualdi consilio anteponamus. Qui  
sanctissimi viri vsque ad vltimum vitæ  
in Coenobijs, Eremitorijsq; ædificâdis,  
atque fratrum familijs duplicandis, sine  
intermissione desudarunt: quod & om-  
nes Religionû fundatores fecisse in con-  
fesso est. En quot millia discipulorum  
Benedicti in Catalogo Sanctorum rela-  
ta leguntur; nunquid omnes Cassini sal-  
ui facti sunt? Multa insuper millia Ro-  
mualdinorum beatas possident sedes:  
nunquid omnes ex Malduli agro illuc vo-  
lauerunt? Atqui ne Romualdus ipse il-  
lic obiit: nō beatus Bonifacius; non san-  
cti viri Ioannes, & Benedictus; neque alij  
multæ huius gregis discipuli, qui nec for-  
sitam Camaldulum viderunt. Quos tamē  
scimus inter electos Dei triumphare.  
Iam si laudanda est Eremus ista Camal-  
dulensis ratione integritatis, & obseruā-  
tiæ: an aliam, vel etiam alias multas si-  
miles nequit dare Deus? Illud profectò  
valdè mirandum venit, quòd præfatum  
desiderium, seu verius, vt credendū est,  
diuina

diuina inspiratio, non erat in Italia, neq;  
 in Europa remanendi: sed ad Indos, atq;  
 Antipodas nouiter repertos, aut in terrā  
 sanctam; denique ad infideles nationes  
 Anachoreticum institutū transferre ani-  
 mus dictabat. Memor equidem beatissi-  
 mos olim Antonium, Hilarionē, & alios  
 sanctos solitarios multū exemplo, & in-  
 stituto illo nascētem tunc Ecclesiam iu-  
 uisse: similiq; modo existimans hodie in  
 India, vel in Orbe, vt vocant, Nouo plu-  
 rimum profuturum solitudinis proposi-  
 tum ad infideles illos conuertendos.  
 Dum ergo in hac deliberatione per mē-  
 ses aliquot dubius versatur animus, plu-  
 rimæ illi occurrunt hinc inde tum op-  
 portunitates, tum etiam difficultates ad  
 huiuscemodi rem peragendam. Quam  
 ob rem ipse ad aliorum consilium, ora-  
 tionesque multorum confugit, à qua ne  
 ipse quidem vel momento vacabat; ie-  
 iunia astrictiora addens, & alijs spiritua-  
 libus secretioribus exercitijs non par-  
 cens. Quò, videlicet, dubietatis certi-  
 tudinem à Patre luminum obtinere me-  
 reretur.

BEATVS



BEATVS MICHAEL CONSV-  
litur, & respondet. Cap. XIII.

**C**OMMORABATUR tunc téporis  
in sacra Eremo Eremita quidā  
nomine Michael, qui per an-  
nos, vt ferunt, circiter viginti, secundū  
Religionis huius morem in quadam cel-  
la seorsum inclusus manserat, vir magnæ  
sanctitatis, & cui Deus de thesauris gra-  
tiarum suarum quinque talēta tradidit:  
quibus ipse negotiari, & alios multos di-  
tare abundē valeret. Fuit in primis mi-  
ræ abstinentiæ, parcimoniæq; raræ pos-  
sessor; silentij, ac solitudinis impensè  
amator; cilicio, & nuditate singulariter  
est delectatus; in tétationib<sup>9</sup>, & spiritua-  
libus pugnis, quæ illi multæ fuere, fortē,  
atq; inuincibilem se vbique præbuit:  
feruentissimæ orationis assiduus conser-  
uator: visiones, & crebra diuina collo-  
quia, quæ illi Deus cōmunicare dignatus  
est, quis enarrabit: extitit & miraculo-  
rum operator, & prophetiæ spiritu mi-  
rificè dotatus. Iste est, qui coronam Do-  
minicam, quam hodie Patres nostri tot  
indul-

indulgentijs ornatam, benefactoribus, & fidelibus quibusque deuotis tribuere solent, in eadem reclusione primus excogitauit. Huic sancto viro cū Paulo magna fuit semper spiritualis animorū coniunctio, sancta q̄; amicitia : cui & aliquādiu confelsarius extitit. Quorū mutua beneuolentia ex hoc satis manifesta fiet : quòd requisitus beatus Michael per excellentissimum Urbini Ducem, quò sibi tunc in lucem æditum filium de sacro baptismatis fonte leuaret, impeditus reclusionis lege illuc ire ; Paulū Iustinianū ad tam sanctum, honorificumq̄ue opus sibi substituere voluit. Hunc ergo præcipuū habuit Paulus pro facti sui certitudine habenda intercessorem ; seu, vt veriùs loquar, vnicum consultorem : quā cū nō raro īterrogaret, quò eius super hac re sententiam intelligeret, hunc ferè in modum semper solitus est respondere. Quod tu mente concepisti, Pater mi, nec laudare, nec damnare audeo : sed cū res magni ponderis videatur, orationibus insistere, iugique mentis intentione Deū compellare tibi suadeo. Quadam autem  
vice



vice magna instantia, precibusque multis à Paulo quasi adiuratus, post quoddam ex intimis emissum suspirium, sic ait: Velle te memoré esse quātus fuerit meus semper erga te amor, quantumq; te in visceribus Iesu Christi dilexerim: hæc eadem fidelis dilectio me retinet, quòminus ꝑ tua ista peregrinatione, ex corde puro Deo preces effundere valeam. Desiderās vtique, dum vita comes tibi fuerit, te hic apud nos manere. Noui enim (etsi in hoc voluntario carcere clausus) quàm utilis sit, tūm domui, tum paruulo gregi isto præsentia tua: nec ignoro quantum incrementū domesticis rebus dederit prudentia, qua dotatus es. Et quod plus ceteris animum meum mouet, satis mihi notus est feruidus zelus, quem tu circa Eremiticam obseruantiam perpetuò in pectore isto accensum geris: quo certè non vni, aut alteri, sed vniuersis recessicolis nostris plurimū prodes. Nec te latere debet, quousq; accreuerit in hac sacra familia tuis monitionibus, ac regimine, Eremiticæ obseruantix rigor; tuo exemplo, ac vigilatia, religiositatis norma;

ma; & tua sana doctrina ipsius veritatis lumen. Quid multis opus est: omnes te vnum suspiciunt, omnes reuerentur, omnes denique te libenter audiunt, & correctiones tuas cum gaudio amplectuntur. Omnes seniores tibi gratulâter deferunt: iuuenibus tu pater; tu dux, & auriga: & quo vno verbo cuncta complectar, ex te tota hæc sancta familia pendet. Nunc è conuerso cogita, quæso, quantam mestitiam discedens cogeris in corda nostra, qua afflictione afficies omnium nostrum animas, perpède qualis in sacra Eremo tui causa fiet perturbatio. Sanè cōcidet iuuenum feruor, senes contristabuntur, & omnes, te recedente, animum despondent. Hinc Mala tasca (sic enim ipse appellabat dæmonium) insurget & tentationes prauas immittet, eò quod perturbatos inueniet Eremitas tuos. Iam si lucrum animarum mihi obijcere velis, ego persuaderi nō possum, te alibi (quocunque ieris) plures acquisitum, quàm in hac lata Dei officina Christo comparare potes. Atqui tu iam mente peragrafti orbem, iam transacto mari penetrafti Indos,



Indos, iam infideles, Barbarasque nationes ad Christi fidem conuertisti; & tandem iam illic mille condidisti Eremos. O quàm facile, Pater mi, rerum idæas in intellectu formamus, sed easdem ad veram essentiam perducere, hoc opus, hic labor est. In summa, ne te suspensum diutius teneam: præstare quidem potest Deus, si pergas, vt aliquid proficias; desiderium autem tuum omninò non implebis. Ex his itaque ambiguis sancti viri verbis incertior multò, quàm antè fuerat, redditur desiderosus consultor: ideoq; suspensus multa apud se, ac varia cogitatione anxiabatur; constanter nihilominus expectans Dei, iuxtà suum beneplacitum, dispositionem, renuntiàs ex animo, cuncta Altissimo disponenda.

# PAVLVS ITERVM EREMI

Maior eligitur, & priuilegium Eremitici instituti dilatandi à Sede Apostolica obtinet. Cap. XIII.

**E**T SI animum Pauli ad præfatū negotium pertentandum, Spiritus sanctus (vt creditur) secreta inspiratione  
L                      urgebat:

vrgebat: attamē aliquid temerē aggredi  
 valdē vir prudentissimus ueritus: iuxtā  
 Euangelicum consilium, sedens, sedu-  
 loq; sumptus computans, perspicuē in-  
 telligebat Dei opus, non hominis esse,  
 tam excelsam Turrim ædificare. Dum  
 itaq; in hac perplexitate versatur, ecce  
 iterum Eremita Maior creatur: quam di-  
 gnitatem cū ipse valdē recusaret, nec  
 quicquam renitēdo proficeret, visus est  
 præ dolore deficere. Veruntamen cū  
 Patres in electione persisterent, coactus  
 est obedire; & propria volūtate calcata,  
 vel inuitus ponderosum onus portare.  
 Suscepto autem magistratu, incipit quæ  
 sui muneris sunt, perlustrare: atque com-  
 positis primitus quæ ad obseruantiam  
 Eremitarum, & Fontisboni pertinebat:  
 egreditur foràs membra (vt vocant) lo-  
 ci, ecclesias, ac possessiones, vt fieri solet,  
 visitare. Inter hæc in villam quandam  
 Eremita, quam Vineam vulgariter vocāt,  
 descendit, colonos & quæ ibi agebantur,  
 recognoscere volens: cumq; illic in cu-  
 biculo quodam solus horarias preces  
 persolueret, ecce tres famosissimi illius  
 regionis



regionis grassatores ( vulgò Banniti )  
domum ingressi, vbi sit hypocrita ille, fu-  
ria inuecti, clamitant, ac domus inferio-  
res mansiones furore magno intrant, ei-  
dem insidiantes. Quibus, nisi Frater eius  
socius prudenter obuiasset, proculdubio  
vir Dei gladijs impiorum occubuisset.  
Cuius verò impulsu, seu quo dæmone  
agitati infelices illi tantum facinus per-  
petrare voluissent, non satis compertum  
habeo: neque vulgatas huius facti suspi-  
ciones propalare fas est. At vir pius tã-  
tũ vitæ discrimen Dei prouidentia eua-  
fisse recognoscēs, ad orationem se illicò  
conuertit: in qua gratiarum actione dũ  
feruenter instaret, in longum mentis ex-  
cessum rapitur. In eo verò excessu, sicut  
quĩ cum ( discipulos ædificandi causa )  
referentem audierunt, affirmāt: penitus  
in suo peregrinandi proposito est confir-  
matus: ita quidem vt nulla in eo reman-  
serit ambiguitas, sed firma exorta est in  
ipso dubiorum omnium resolutio. Vnde  
in se reuersus, & animi libertate perspe-  
cta, diũ quasi admirans quid hoc esset,  
longa quę ipsius nouę mutationis discuf-

sione habita, in hæc verba prorumpit.  
 Magna est misericordia tua Domine: tu  
 enim eruis sperantes in te: ecce eruisti  
 me de laqueo venantium foris; & intus  
 liberaisti ab omni anxietate cor meum:  
 nunc demum volūtatē tuam, ni fallor,  
 manifestū intuens; facile & quid mihi  
 faciendum sit, intelligam. Ecce ne am-  
 pliūs titubaret animus, causam disceden-  
 di mihi dedisti. Non enim frustrā dixit  
 Veritas ipsa: Cū persecuti fuerint vos  
 in vna ciuitate, fugite in aliam. Ne vide-  
 licet, nostrę ipsius ruine simul & alterius  
 ansam præbeamus. Tu, inquā, ista super  
 me euenire permisisti, quò ego fugiens,  
 tuam sequar voluntatē. Sed vndiq; mihi  
 angustię sunt: nam si discedens, sacram  
 Eremum deseruero, ac Patres venerabi-  
 les, fratresq; meos dereliquero, hominū  
 indignationem incurram, atq; conuicia  
 multa non effugiam. Tū labores, qui  
 me in arduo negotio, tamq; longa pere-  
 grinatione expectant, nō parum terrent  
 animum meum. Veruntamen si propter  
 ista, sanctam inspirationem sequi contē-  
 psero, Spiritui sancto resistere videor,  
 ideoq;



ideoq; iudicium Dei non effugiã: atqui melius est, inquit scriptura, in manus hominum incidere, quàm in Deum, qui bonus est, peccare. Restat equidem, vt ad sanctorum Patrum nostrorũ, Benedicti, & Romualdi exempla confugiam: qui similes ob causas & prælaturas deposuerunt, & peruersos homines fugientes, locum mutare consueuerunt. An quod sanctissimis viris licuit, mihi non licebit? Cur ego, quorum discipulus esse glorior, imitator non ero? Nunquid Sanctos errasse dicemus? Absit. Iusti enim spiritu Dei aguntur. His denique rationibus, alijsq; multis ritè consideratis, Sanctorum vestigijs inhærendo, Camaldulum relinquere, & furentibus aduersarijs cedere decreuit. Verùm antequàm quicquam inciperet, volumen Constitutionũ, quod iam excussum habebat, vulgauit. Deinde Romam Leoni summo Pontifici omnia, quæ facere decreuerat, manifestaturus, se conferre decreuit: quò cum peruenisset, ab ipso Pontifice benignè acceptus, eidem mentem suam fideliter exponit. Re audita, gaudis val-

dè Pontifex verbis multis deuotum ora-  
 torem hortatur, ne à cepto desistat : &  
 quicquid per ipsum petatum fuit, liben-  
 tissimè confirmat. Immò in hoc saltem  
 à Deo inspiratum Pontificem apparet,  
 quòd cum Paulus petita vltra mare tan-  
 tum sibi licere postulasset, ille proprio  
 motu clausulam adiungi iubet : vt, scili-  
 cet, cōcessione hac specialiter in Italia,  
 & generaliter vbiq; terrarum liberè vti  
 posset. Summa autem concessionis hæc  
 est : vt liceat Paulo, & socijs ei adhæren-  
 tibus institutum Eremiticum Camaldu-  
 lense in Italia, & vbique terrarum, citrà  
 & vltra mare, ad Indos vsq; siue Antipo-  
 das ad libitum dilatare : noua Eremito-  
 ria condere, erecta suscipere, seu de ma-  
 nu largientium acceptare. Item venien-  
 tes ad se nouitios recipere, & habitu in-  
 duere, eorumq; professiones admittere :  
 necnō omnia sibi benè visa tam in victu,  
 quàm vestitu statuere, ordinare, corri-  
 gere, restringere, atq; mutare ( dummo-  
 dò à substantialibus Regulæ non deuie-  
 tur) plena sit ei, ac suis in perpetuum fa-  
 cultas. Quibus addita est ab omnibus  
 Prælatiis,



Prælatiſ, & ſpecialiter eiufdem ordinis  
 Camaldulenſis, ac ſuperioribus quibuſ-  
 cunque pleniffima exemptio. In eodem  
 Diplomate Congregatio hæc, ſocietas  
 Eremitarũ ſancti Romualdi ordinis Ca-  
 maldulenſis nuncupata extitit. Cui inſu-  
 per ſocietati à ſancta Sede Apoſtolica  
 omnia priuilegia, & indulgentiæ ſacræ  
 Eremitæ, ac totius Religionis: atque adeò  
 priuilegia, & immunitates cuiuſcunque  
 alterius Religionis, ſine exceptione ali-  
 qua, benignè conceſſa fuere. Acta au-  
 tem, geſtaque ſunt hæc Romæ 22. Au-  
 guſti, M D XX. Taceo hîc breuitatis cau-  
 ſa, quanto fauore eandem ſocietatem  
 proſecuti ſunt Adrianus Sextus, Clemēs  
 Septimus, & Paulus Tertius, Pontifices  
 Maximi. Qui eidem quicquid alijs qui-  
 buſcunque congregationibus, pijs locis,  
 aut etiam priuatis perſonis à quocūque  
 Pontifice, & quocunque tempore con-  
 ceſſum reperitur, largiffimè ſunt impar-  
 titi. Quæ omnia in ſuis reſcriptis plenius  
 videri poſſunt.

EREMITICÆ HISTORIÆ  
DEPOSITA MAIORATVS DI-  
gnitate, Camaldulum relinquit.  
Cap. XV.

**E**RVNT fortassis, qui hîc vniuersa  
tâm priuilegia, quàm indulgen-  
tias, & immunitates prædictas  
desiderent ad verbum expressa: quod no-  
bis non expedire visum est: tùm quia tot  
instrumenta rescribere molestum foret,  
tùm quia legentem inaniter nimis occu-  
paret. Sanè nos satis vniq; sufficere exi-  
stimamus, si quæ ad plenam cognitionē  
rei, de qua agitur, simpliciter fuerint  
enarrata. Re igitur in vrbe tanta feli-  
tate, ac facilitate peracta, tot etiā (Deo  
preordinante) gratijs momēto vno ob-  
tentis, inque suo saluberrimo proposito  
fortiùs confirmatus optimus Pater, Ca-  
maldulum reuertitur. Quò cùm primū  
venit, Patres de more, loco solito cōgre-  
gari iubet: quibus in pleno conuentu  
quicquid absens gesserat, sigillatim enar-  
rauit; discedendiq; animum aperto ore  
exponens. At ne quid impedimenti su-  
peresset, dignitati Maioratus, quo funge-  
batur,



batur, intrepidus renunciauit. Nec certè causas, propter quas abscederet, illis voluit occultare: ex quibus plenè cunctis patere potuit sui discessus ratio. Postremò de facultate sibi à Sede Apostolica circa ampliandam Religionem attributa, omnes palàm reddit certiores: nimirum vt eis scientibus, nec quicquā ignorantibus, opus suum inchoaret. Atq; de his omnibus per ostensionem supplicationis firmatæ, riteq; more solito curiæ expeditæ, plenā eisdem auctoritatis suæ fidem fecit: ne vtique quis eum temerè arguere, vel impedire tentaret: re tandè corā omnibus vulgata, scinditur incertū studia in contraria vulgus. Nam eorum quidam rem summoperè approbantes, laudant sanctum viri propositum: quidā hominem stulto similem reputantes, opprobrijs afficiunt, atq; irrident, eiusque inceptum, tanquàm temerarium condēnant. Veruntamen ex vtraq; classe, haud multò pòst, nonnulli fuerunt, qui relicta Camaldulensi Eremo, eundem libenter secuti sunt: cui dexterā dantes, associati in omnibus, & per omnia ad finem vsque adhæse-

adhæserunt. Inter quos vitæ, & morum integritate præcipui, Augustinus Bassanensis, & Nicolaus Triuisanus Venetus, Eremitæ ambo Sacerdotes: necnō Oliuus Conuersus fidelissimus, ei deinceps in omnibus laboribus, & ærumnis indiuiduus comes. Ij omnes postea in noua societate fideliter perseverantes, suis sanctis exemplis multos ad conuersionem, & conuersos ad perseverantiam excitauerunt: quorum tamen laudes suis in locis patefient. Peruenit utique ad aures Delphini huius facti non piger nuncius, quo accepto, quanto dolore affectus fuerit senex (valde enim eū diligebat) satis ipse duabus Epistolis, ad Iustinianū Bergomensem Eremitam datis, ostendit: in quibus mirari, ac de præfata mutatione sui Pauli dubitari nō cessat; & quodāmodo præ nimio affectu rem improbare videtur. Non tamen molestè ferenda sunt verba eius, cū sapiēter more suo, duobus verbis cuncta moderetur; dum euentum rei expectandum esse dicat. Siccine Delphine bone, siccine cum dilecto tuo agis? Expecta, quæso, euentū vt promittis:



tis: quo agnito, haud quicquam dubito,  
 te palinodiam recantaturum. Nondum  
 certè obieras diem, cùm Paulus multo-  
 rum Eremitarum Pater factus est; adhuc  
 in viuis agebas, cū tu simul & Camaldu-  
 lenses vniuersi eum cū omnibus suis vo-  
 bis socium fieri voluistis. Nō amisisti lo-  
 quelam profectò, donec illaudatum, ite-  
 rum ad plenum laudaueris: displicuit ti-  
 bi discessus eius pro tua in eū charitate,  
 sed scimus minimè displicuisse profectū,  
 dū quasi ex abscondito fonte (vt tu alibi  
 ais) in plateas, iuxta scripturæ verba,  
 vberremos cernebas emanasse riuos. Sed  
 iam ad eum, qui iter facturum est, reuerta-  
 mur: mansit enim die illa cum sequenti  
 nocte in Eremo non ociosus. Quidā vi-  
 delicet, eum priuatim conuenientes, be-  
 nignis verbis beneuolentiā suam ei ostē-  
 dentes retinere pertentabant; alij rem  
 apertius intelligere cupiētes, varijs que-  
 sitis sciscitātur, quid nam esset facturum.  
 Cumq; ille in Hispaniam primū se naui-  
 gaturum; ac deinde, reliētis Herculis co-  
 lumnis, in Indiam, aut (quò Deus dedu-  
 xerit, transiturum planis verbis nuncia-  
 ret,

ret, stupebant omnes tantæ nouitatis motum in homine pio pariter ac doctissimo audientes: atque rem altiùs considerantes, sic apud se aiebant: Aut hic insanit, aut spiritus Dei in eo latet; & nobis ignorantibus, aliquid magni per eū operari intendit. Alios, quos Paulus mestos agnoscebat, blando sermone, quo ille singulariter dotatus erat, cōsolabatur. Et sic vnicuique prout melius poterat, satisfaciens, diem illam non sine fructu consumpsit. Nocte verò sequenti lectum non ascēdit, quinimmò in propria cella in oratione pernoctans, se totum diuinæ voluntati resignauit, omnia quæcunque acturus esset, eidem dirigenda liberè relinquens, protestatus sæpe se nihil secundum propriam voluntatem agere, neq; cogitare velle. Postera autē die ad ortū Solis, re sacra peracta, ad suum Michaele reclusum solus se confert, qui iam omnium conscius, primus satis alacri vultu venientem salutauit: quod non sine admiratione animaduertens Paulus, ait. Existimabam ego te grauiùs ceteris casum hunc laturum, quē tamē lætabundo similem



similem aspicio. Ad quem Michael: Si  
 carnis affectum sequerer, te lachrymis  
 libenter redimissem, sed spiritus de tuo  
 isto dono tibi congaudere iubet. Cū ve-  
 rò instaret Pater, vt manifestius dictum  
 suum faceret: obmutuit ille, nec amplius  
 locutus est verbum. Tandem mutuis am-  
 plexibus, osculisq; datis, ab inuicem nō  
 sine dulcissimis lachrymis recedūt. Inde  
 Pater assumpto sibi in socium Oliuo cō-  
 uerso, cuius suprà mentionem fecimus,  
 ad ostium Eremiti discessurus tendēs, ec-  
 ce obuiā ei quotquot erant in domo illa  
 Fratres, quem hinc inde circundantes,  
 hic manum apprehēdit, ille collum am-  
 plectitur; alter fletibus, alter vocibus, &  
 singultis omnes vno ore conclamant, ne  
 sese deferat, neve suo aspectu, suaq; san-  
 cta conuersatione priuet. Luxit & ipse,  
 alioquin vir fortis, tanta filiorum suorū  
 charitate victus; atque præ dolore con-  
 cepto, ne vnum quidem consolatorium  
 verbum eis dicere potuit: sed benedi-  
 ctione data, ostij limen transiit. Deniq;  
 multa Patrum instantia deprecatus, vt  
 apud Fontem bonum equum cū famulo  
 quodam

quodam assumeret; ipse omninò recusans, baculū manu tenens, pedes ad montem Aluerniæ, octo passuum millibus distantem, in domum beati Francisci, illa die se contulit.

## ALVERNIAE IN SACELLO

beati Francisci orat. Cap. XVI.

**I**N SACRO Aluerniæ monasterio novus peregrinus noster à Patribus illis, quibus ipse benè cognitus erat, (nō sine admiratione, eò quòd pedestrè viderant venientem) multa benignitate recipitur, ac summa charitate tractatur. Ultrà cōmunem Ecclesiam per loca devota, quæ illic multa habentur, à duobus senioribus comitantibus deducitur, qui eum de omnibus, quæ ibidem singulis in locis olim contigerant miraculis, pijs-  
 mis verbis instruebant. Pòst varia devotissima oratoria, criptas, & miraculosam illam ipsius montis scissuram, tempore Passionis Christi factam, diligenter perlustrata; ad sacrum sacellum, in quo sanctissimus Dei servus Franciscus semper

vene-



veneranda viuens stigmata, hoc est, vestigia clauorum Crucifixi suscepit, ventum est. Vbi cum paulisper ( vt ferè fit ) simul orassent, venerabiles illos senes rogat, vt discedentes, se ibi aliquantulum solû dimittant. Factus itaque voti compos feruentissimus vir, excluso quoque Oliuo foràs, genibus flexis ad sacras Crucifixi, & orantis similis Francisci effigies oculos, modò ad illam, modò ad istam cõuertit. Perpendit totis animi viribus nudum in cruce pendentem Iesum, & ferè nudum videt ante eum orantem Franciscum: cõsiderat vulnera pendētis, & stigmata cõtemplātis intuetur: stupet misericordiã Saluatoris, nec capit mens humilis supplicantis feruorem. Accensus denique meditationibus istis in quodam mentis excessu supra se eleuatus immobilis ad mediam vsque noctem permansit: inde quasi in alium virum mutatus egrediēs. Quid interim viderit, quidve illic didicerit, nescimus: hoc vnum saltem, senioribus nostris referentibus, nouimus: ex illa videlicet oratione tantum paupertatis, ac nuditatis amorem imbibisse, vt nunquam

nunquàm, dum illi vita comes fuit, eius  
fit oblitus, nec alia magis re delectatus.  
Factus utique non solum veræ paupertatis  
amator, verum etiam constâtissimus  
nuditatis cultor, atque vtriusq; tenacissi-  
mus obseruator. Adeò certè, vt manè fa-  
cto, post Missarum solènia, cùm egressus  
Cenobio, de monte Perusium versus de-  
scenderet; ad suum itineris comitè ver-  
ba dirigēs, per duarum horarum spatiū  
de virtutibus, bonisq; paupertatis, deq;  
diuitiarum incōmodis continuò sit locu-  
tus. Cuius sermonis tanta fuit spiritualis  
virtus, & efficacia, vt ipsum auditorē mi-  
rum in modum ad eam adamandam in-  
flammeret, & eiusdem perpetuum custo-  
dem efficeret: quod quidem non illi in-  
frugiferum extitit, cùm in posterum spi-  
ritu pauper factus, feruentior multò, quā  
antèa fuerat, euaserit: immò ex oliuo, seu  
potiùs ex oleastro amaro, in speciosam,  
atque fructiferam in domo Dei oliuam  
penitus sit mutatus. Rursus opere pretiū  
est scire, neque magistrum, neq; discipu-  
lum vsque in illam diē paupertati fuisse  
addictos: qui licet diuitias nō affectarēt,  
nihilominus



nihilominus rerum cōmoditatem libenter vbique amplexi sunt. Prætereà in ipso montis descensu contigit, vt Paulus (cui res insolita erat pedibus iter facere) sæpius vbi opportunitas dabatur, vel lapidi affideret, vel baculo innitens præ lassitudine pausare cogeretur. Quod animaduertens socius compassione motus, cū oppido (quod plebem Sancti Stephani appellant) appropinquarent: O Pater, inquit, quā difficile me sequaris video; ideoq; satius erit equū, vel aliud iumentum hīc cōducere, quo veharis. Ad quem Pater: Et vnde tu mercedem vecturæ solues? Meum, ait ille, subridens, erit iumentum conducere; tuum verò, conductionem persolvere. Mihi sanè, respondet, Pater, neque pecuniæ sunt, neq; crumena: pauper Christi sum, in eum curam iactaui meam, ipse me enutriet, atq; deducet. Et nunc scito, frater mi, si mecū pergere velis, te pauperem vitā acturū: necesse enim est nos in posterum multas corporis necessitates pati, multosq; tollerare labores: quæ cōditio, si tibi forsan non arridet, à me (quod non spero) di-

M

scedas

scedas oportet. Ego, inquit Oliuus, à te  
 discedam? egonè te deseram, Pater mi?  
 profectò semel pollicitus sum, & nunc  
 iterum tibi coram Deo pollicitationem  
 confirmo; perge quò vis, semper me (dū  
 tibi gratum fuerit) indiuiduum comitē  
 habebis. Tunc Pater valde gauisus est, &  
 ad perseuerantiam, patientiamque eum  
 longa oratione hortatus, multa de æter-  
 na retributione, quæ à Deo sustinentibus  
 se parata est, verba fecit. Inter hæc Oli-  
 uus sciens eum ante Eremi discessum ab  
 œconomo domus sacculum pecunijs re-  
 fertum, se vidente, accepisse; mirabatur  
 quomodo tam constanter attestaretur  
 se nummos non habere. Tunc demum il-  
 li in mētem venit, ficta causa, se in ipsius  
 diei crepusculo ab Ecclesia ad interiora  
 Monasterij à Patre missum cuidā seniori  
 nescio quid parui momenti, dicturum.  
 Ex quo plenius intellexit, se absente, pe-  
 cunias vel pauperibus (quorū illic copia  
 esse solet) vel certè ipsi mendicantium  
 Ecclesiæ simul cum crumena erogasse:  
 quod ita reuera factum extitisse, haud  
 multò pòst ex alia coniectura certior fa-  
 ctus,



aus, exploratū habuit. Denique his mutui, sanctique amoris, ac veræ dilectionis colloquijs inuicem consolati, per decliua montis descendentes, læti ad ima peruenerunt.

MIRABILE QUID PAULO  
contingit, & ab idiota docetur.

Cap XVII.

**R**ELICTIS ergo Alpium collibus, trāfactoq; Thyberis aluo, in cāpestribus positi, læti ambulabant peregrini nostri: atq; inuicem confabulantes, sine tædio iter, & tempus pertranseūt. Interim Paulus animo quæ ad futuram peregrinationem necessaria sunt, qua via, quibusve medijs tam præclarum facinus peragēdum sit, cogitare cepit: quæ dum mente peruoluit, tanta illi facilitas in rebus agendis se offert, vt nullo negotio iam peracta vniuersa censerentur. Nil ei amplius obstare, nedum eum impedire, quò minus ad ea, quæ semel apud se destinauerat, pertingeret, videbatur. Prospicit intuitu mentis ( vt

M 2 sape

tæpe nobis cogitantibus cōtingit) Tirrenum mare tranquillum : cernebat pōst tantum interuallum nauem, siue trirēmē qua illud transfrētaret, non solum paratam, sed etiā eum in portu Genuensi expectantem. Rursus Hispaniā saltu transilire, & Lusitania iā à tergo relicta, Oceanum fulcans, appropinquat ad Indos. Nihil ei obuiam, nullum obstaculum occurrit : sed omnia plana, & expedita fallacis imaginationis luce apparent. Nec desinit interdum tantæ excogitatæ felicitatis sociū participem facere; & omni fiducia, animositateq; adimplere. E contra simplex Oliuus ei omnia laudare, cuncta sine syllogismis probare pergit : & etiam aliquid de suo quadā simplicitate addere audet. De qua tandem ficta prosperitate inuicem sermocinantes, diem illam satis iucundè transiisse, vnusquisq; existimare potest. Sequentis verò diei hora meridiana, vltra ciuitatem Castellī, iuxta flumen iter agentes, non longè ab oppido, quod Fractā incolæ vocant, itineris labore fessi, & Solis ardore estuātes, sub quadam frōdosa quercu, paululū  
à via



à via semota, quietis causa assident: ubi  
 sopore grauat<sup>9</sup> vterq; eorū obdormiuit.  
 Non puto mysterio vacare, propter ea  
 quæ sequuntur, in prædicto loco eos à la-  
 bore quieuisse: cū ex eo Mons Corona  
 inde per tria milliaria distans, oculis in-  
 tuentium totus à radice ad cacumē vsq;  
 aperiatur, nec aliunde melius conspici  
 possit. Neq; absurdè à senioribus nostris  
 dictum existimo, voluisse Deum in cōspe-  
 ctu illius Montis eos soporari: in quo no-  
 ua Pauli Congregatio in posterum fun-  
 dari, sedere, atque in perpetuū quiescere  
 debuerat. Iam ergo somno refectioni itine-  
 rantes expergefatti assurgunt, & iter suū  
 reasumētes ibant: cū ecce repētē, quasi  
 turbine, quodā casu, inuolutus Paulus,  
 turbatur, atque agendorum mentem in-  
 uasit obliuio. Vnde quò præcipuè tende-  
 ret, quidve sibi magis expediret ita dubi-  
 tare cepit, vt nulla ei certa determina-  
 tio occurreret. Hoc vnū immobile apud  
 se cōtinuò mansisse referēs ipse aiebat:  
 indestinato semel opere constanter esse  
 perseuerandum, modo & loco operandi  
 mente elapsis. Sic equidem solet Deus

multa Sanctis suis inspirare, quæ tamen  
 non vult modo, quo ipsi desiderât, adim-  
 pleri. Hinc negatum est David vehemē-  
 ter desideranti, templum Domini ædifi-  
 care. Disposuerat Paulus ille magnus do-  
 ctor Gentium, & ministeriorum Dei di-  
 spensator, atq; Archanorum conscius, in  
 Hispaniam prædicandi Euangelij gratia  
 proficisci: sed tamen aliò impulit eum  
 spiritus, & uinctus ductus est Romam:  
 Hispaniam vidit nunquàm. Labet hîc &  
 nostri sanctissimi Patris Romualdi exem-  
 plum referre; qui ad fines vsq; Pannoniæ  
 uenit, infideles ad fidem conuertendi, ac  
 martyrij suscipiendi ardentissimo desi-  
 derio flagrans: nihilominus tamē manu  
 Dei tactus, ac dira febris correptus, inde  
 regredi, & in patriam, quā ipse fugiebat,  
 reuerti coactus fuit. Non aliter sanè agit  
 cum nostro Iustiniano Omnipotens: qui  
 Spiritu suo sancto eum vltra Sauroma-  
 tas, trans Gades, vltra Herculis colūnas:  
 tandem ad recenter inuentos Antipo-  
 das in fide docendos, diuino igne inflam-  
 mauit: quò postea ire non permisit. Cur  
 ita cum seruis suis se habeat Deus, non  
 ego



ego perquiram, ne mihi responsum illud Prophetæ meritò obijciatur: Vir, scilicet, inscipientis non cognoscet, & stultus non intelliget hæc. Erat eodem tempore in suburbanis Eugubij in monte, qui Caluus dicitur (quæ ciuitas ad radices Appennini, vbi mons ille Vmbriæ iungitur, in ingressu angustissimæ vallis fundata iacet) solitarius quidam, nomine Thomas, Fabrianensis patria: vir tertij ordinis beati Francisci professor, in tantæ sanctitatis opinione apud vulgus; vt à multis, propter quædam prænunciata, & subsequuta, spiritum Propheticum habuisse crederetur: homo literariæ peritiæ rudis, naturali verò ingenio, atque materna lingua satis ornatus. Inter hunc, & nostrum Paulum vetus fuerat amicitia contracta; eaque non in vanitate seculi, sed in charitate Christi ab initio fundata: & ob id nunquàm excidere potuit. Dum itaque Paulus hac mentis confusione vexatur, manenteq; diuinitus immisso dubio: cū id in cogitationē venisset, nec longè ab itinere aberrandum esset; hunc inuisere statuit. Quem in as-

fueta solitaria habitatione incolumē, vt  
 optabat, inuenit. Salutat hilariter, & ab  
 eo incredibili charitate ipse suscipitur.  
 Sacellum ambo orandi (vt assolet) causa  
 ingrediuntur: oratione facta, in mutuam  
 congratulationem diffunduntur: deinde  
 domunculam ingressi, reficiuntur simul:  
 refecti, gratias Domino ꝑ beneficio red  
 dunt accepto. Tunc demum senior; vn  
 de, inquit, te habemus ò Paule; quisve  
 spiritus te huc venire coegit? Mihi qui  
 dem cogitabundus videris, mestiorque  
 solito: pedester accedis, & alius quodā  
 modo factus appares. Dic sodes, quid te  
 negotij angit? Cui ille, quicquid in vo  
 ris erat, seruato ordine, plenissimè expli  
 cuit. Deinde narratione absoluta, cun  
 ctisq; attento auditori ritè explanatis;  
 senex grauitate quadam in hunc sensum  
 allocutus perhibetur. Compellunt me,  
 dilectissime in Christo, diuturnæ inter  
 nos amicitiaē necessitudo, syncera bene  
 uolentia, Religionis vinculum, ac mutua  
 charitatis obligatio: ne quid consilij,  
 quod (largiente Deo) mente concepe  
 rim, te celare ausim, nec possim. Eremi  
 ticam



ticam vitam, sanctissimumque beati Romualdi institutum latissime amplificare velle te, magnoperè laudo: ad Indos, siue Antipodas transfretare, omninò laudare non valeo. Idque maximè, tùm propter innumera, ac nimis certa pericula, passim tibi imminèntia: tùm etiam propter difficultatem, incertitudinemque, quam in se ipso negotium afferre videtur. Putas ne, venerande Pater, misterio vacare, quod te iam ad iter accinctum consilium, vt refers, inopinatè deseruerit? Proq; consilio mentis ambiguitas, ceù caligo quèdā sit subsecuta? A Dño hoc factum esse, nulla me dubitatio tenet. Etenim in vitis Patrum inter legendum, relatum reperij, magnum Heliscū, cui in spiritu ferè oīa arcana patebāt, veniente ad se Sunamitide, dixisse: anima eius in amaritudine est, & Dominus celauit à me. Beatissimus Pater meus Frāciscus, qui aliud iam præter Deum, nec scire, nec cogitare potens erat, iustus scilicet, & spiritu Dei actus; cùm in solitudinem ardore animi duceretur, ita mente confusus est, vt quid sibi agendum, quòve

quòve eundum foret, penitùs ignoraret.  
 Quæ nebula tam diù ipsum obtenebra-  
 tum tenuit; donec longissima sua, & suo-  
 rum oratione, ad prædicationem se fuif-  
 se electum, audire diuinitus meruit. Sic  
 Deus electos suos aliquando dubios red-  
 dit, ne proprio sensu, siue industria freti  
 pro libito currant, sed semper cum ti-  
 more eius voluntatem perquirant. Sic  
 tibi temperandus erat nimius peregrin-  
 andi ardor: ne spirituali zelo baccha-  
 tus ad impossibilia tendas. Plura tibi  
 exempla recensere, vtpotè in sacris, San-  
 ctorumque omnium scripturis peritissi-  
 mo, superfluum esse reor. Si tamen ver-  
 bis meis aliqua est adhibenda fides, ac-  
 cipe pauca, quæ pro modulo ingenioli  
 mei proferam. Non est bonum sumere  
 panem filiorum, & dare canibus; nec sunt  
 ponendæ margaritæ ante porcos: non  
 ad Barbaros, non ad indomitas nationes  
 te mittit Deus: ad quas transeundû, ex-  
 cessus pij amoris parùm discretè te inui-  
 tat. Moderare pauxillum istam tuâ, etsi  
 sanctam, cupiditatem: & noli ambulare  
 in mirabilibus super te; sed humiliter il-



la tantum, quæ verissimiliter potes, ag-  
gredere. Ea igitur, quæ in Capharnaum  
facere paras, fac prius hîc in Patria tua.  
Forssitan Italia, quæ certè latissimè pa-  
tet, incapax est propositi tui? Minimè  
quidem. Vbi namque terrarum plura,  
aptiora quæ loca deserta inuenies? vbi  
plures, aut faciliores ad ea incolenda  
reperies? Postremò non tam utilis tu  
Indiæ populis, seu Antipodum gentibus  
futurus es, quàm Italis, non solum pro-  
futurus, sed etiam necessarius existis.  
Quantò siquidem tēporibus nostris dis-  
solutiùs viuitur; tantò magis qui ad pe-  
nitentiam, non verbo (cùm hodie tot  
Prædicatores non capiant Vrbes) sed  
exemplis, atque operibus homines re-  
uocet, desideratur. Restat nunc, vt vi-  
cissim tibi animum meum paucis ape-  
riam. Si longiùs eas, pro absente (si ta-  
men oratio nostra aliquid momenti  
apud Deum habet) orare non desinam:  
si verò remanens, consilio meo acquie-  
scas, scito me tibi & socium, & adiuto-  
rem esse futurum: nisi fortè Dei volun-  
tas contraria dicet. Nam, vt verum fa-  
tear,

tear, hìc iam dudum inuitus habito :  
 putà frequentia secularium infestatus :  
 atque adeò propter deprauatos quorũ-  
 dam mores, penè corruptus. Ac proin-  
 dè te duce, aliò pergere non dubitabo :  
 quod solus facere non sum ausus. Tunc  
 Paulus assurgens, lachrymis præ gaudio  
 perfusus senem iam silentem amplecti-  
 tur, ei que gratias tum de sano, salubriq;  
 consilio, tum de societate promissa agit  
 ingentes. Et quanquàm non à primo cõ  
 filio prorsus mutatus, neque pij amici  
 nō inculto eloquio omninò acquiescēs :  
 nihilominus mallens alterius sentētiam  
 sequi, quàm propriæ voluntati pertina-  
 citer inservire, Thomę fideliter suadēti  
 humiliter adhæsit. Hijsdem tempori-  
 bus in Monasterio quodam Oliuetano-  
 rum sancti Secundi, quod extrà mœnia  
 Eugubij positum est, vir quidam Cardi-  
 nalis Vrbinatis nepos, cui nomen erat  
 Galeatius, ex nobili familia de Gabrie-  
 lis, Fanensis ciuitatis, quietis causa ma-  
 nebat. Qui cùm natura mitis, animoque  
 pius esset, Mundi facinora abhorrēs fra-  
 tribus, familiaribusque suis; eò quòd in  
 iurgijs



iurgijs multis, inimicitijs, & factionibus malis continenter versabantur, commisceri noluerat, sed in remotis locis solus agere Deo deuotus, maluit. Hic consolationis, ac cōsiliij causa frequenter Thomam solitariū inuisere solebat: cui nec rarò solitudinis amorem, quem habebat, verbis ostenderat. Sed cū diues esset (possidebat enim titulo commendæ Abbatiam sancti Saluatoris Montis Acuti, diœcesis Perusinæ, cum alijs non nullis beneficijs) non poterat adhuc nudum sequi Christum. Hunc itaque simul cum Paulo adiit Thomas: cui, cū rem inter eos gestam manifestasset, sibi placuisse & verbis tunc, & postea operibus satis abundè comprobauit. Nimirum eos hortatus est, vt intentum prosequerentur: inuentoq; loco, si perseverarēt, se pro facultatibus illis non defuturum. Addidit præterea, quòd si aliquando à negotijs seculi se Dei munere extricaret, eos, omnibus derelictis, se esse secuturum: quæ omnia plenius quàm promisit, occasionem ex voto consecutus, vt fidelis sponsor, adimpleuit: de quo  
tamen

tamen suo loco pleniori stylo tractabitur. Præsenferat ista, quæ diximus, frater quidam nomine Raphael, natione Hispanus, ordinis Prædicatorum: qui tunc in conuentu Sancti Dominici eiusdem vrbs religiosè degebat: vir Theologica doctrina non mediocriter ornatus; morum integritate clarus, concionandi gratia mirabiliter dotatus:

qui cum Patribus colloquio

habito, & per aliquot

temporis spatium

re maturè cō

fidera-

ta,

tandem eisdem

associatus

est.

FINIS SECVNDI LIBRI.

RO-



ROMVALDINÆ,  
SEV EREMITICAE  
MONTIS CORONAE  
CAMALDVLENSIS  
ORDINIS HISTORIÆ.

*Liber Tertius.*

PAVLVS EREMVM CVM  
socijs intrat. Cap. I.



TSI in omnibus operi-  
bus suis mirabilis sit  
Deus: attamen in San-  
ctis suis, propter stupen-  
da, quæ in eis operatur,  
mirabilior existit: nam  
dū eos leuiter errare permittit, rectiùs  
dirigit: dumque tentari finit, altiùs pro-  
uehit: atque omnia eis, nempè diligen-  
tibus se, in bonum cooperari facit. Per-  
mittit etenim sepe numero dilectos suos  
falli, & ab ignorantibus doceri: finit eos-  
dem in varias tentationes incidi, & ple-  
rumque

rumque ab impijs corripi: necnon ab ærumnis suis, si quas aliquando patiuntur, à simplicibus, rudibusq; viris subleuari: quod proculdubio magna Dei providentia fit; ne magnitudine gratiarum, spiritusve cœlestibus donis sublatis, in superbiam incidant; sed potius propriam agnoscentes miseriam, coram Deo suo prostrati, toto corde prorsus humilientur. Hinc est, quod in Exodo legitur, magnum Dei amicū Moisen in populi regimine errasse: ideoq; à Ietrone cognato suo homine barbaro reprehensum, edoctumq; fuisse. Hinc Gentium doctor Cephæ Principi Apostolorum in faciem restitit, & aliter esse in lege Domini ambulandum ostendit: dum ipse gentiliter viuens, cogeret Gentes iudaizare. Quid ergo mirum, si Deus Iustinianum nostrū à vetulo, ignaroq; Thoma corrigi, & instrui voluit? Tali vtique modo sanctissimum opus, hoc est, Religionis fundandæ negotium, iuxta Dei voluntatem, initiū sumere oportebat. Iam igitur quatuor vnus voluntatis, in Spiritu sancto cōgregati, atq; coniuncti, in solitudinē tendūt.

Inter



Inter Appennini colles, quâ ex Piceno  
 in Vmbriam trāsitus datur, vallis quædā  
 est, cui immanissima rupis imminet, ex  
 alto emittens aquæ præcipitem riuum;  
 qui vallem ipsam murmure quodam nō  
 iniucundo complet. Sub rupē ipsa antrū  
 apparet, in quo est antiquissimum facel-  
 lum diuo Hieronymo dicatum. Antrum  
 verò olim luporum receptaculū fuerat,  
 vbi foetus suos edebāt, & catulos ex præ-  
 da vicini pecoris alere consueuerant.  
 Vnde antiquitus vallis illa ab indigenis  
 Pascilupum appellata est: quod nomen  
 & vallis, & viculus quidam ad vallis ima-  
 situs, in hunc vsque diem retinent. Ante  
 cauernam hanc, triginta passuū plus mi-  
 nus interuallo, rupis in planum, inq; ar-  
 cus modum protrahitur, rursus in abru-  
 ptum declinans. Ac licet locus iste ar-  
 duus, inuiusq; existat, tamen ad octo mil-  
 liaria populosam habet Saxumferratū  
 Bartoli Iurisconsulti Patriam. Et ex alia  
 parte Fabrianum inclytum oppidum,  
 sanctissimi Patris Nostri Romualdi se-  
 pulchrū. Ad has cauernas vnicus datur,  
 secundū vallem, iuxtaq; descendentes

20. l. m.

N

aquis,

aquas, arduus, atque horridus ascensus. Reliquas verò partes præalta nudi saxi rupis concludit. Locus iste ex luporum fouea, in latronum speluncam iam olim fuerat conuersus. Factum est autem, vt id temporis, seu paulò antè ex eadem spelunca eiectioni fuerint violenter nonnulli facinorosi homines falsæ monetę fabricatores; eò quòd essent pastoribus, & cunctis circum circa habitantibus infestissimi. In hunc ergo locum Thomas, & Paulus cū socijs, nempè Raphaele, & Oliuo, primò deueniunt: quo vacuo reperto, sese (vice expulsorum) in latebris illis locant. Cepitq; res ista tandem per vicos, pagosq; vicinos, fama volante, vulgari: quin & intra dies paucos ad vrbes, & castella peruenit rumor. Confluunt illuc vndiq; homines, quasi Angelos è cœlo dimissos, nō sui similes mortales visuri: quorum multi non vacui apparebant in eorum cōspectu. Nam quidam panes, nonnulli vinum, plerique legumina: nec deerant qui arboreos omnis generis fructus Dei seruis cum charitate deferrebāt. Interim nō dormit Leuiatan, vt Dei famulos



mulos etiam à ferarum criptis sua malitia, hominum ministerio expellat. Nunquàm proprium dominum nouerat sacellū Hieronymi, vtpotè nihil in redditibus habens; & ecce tūc presbyter quidā Pascilupi plebanus ferox, cōsurgit furore maximo, contra pauperrimos viros inuectus; ac propriæ Ecclesiæ quodā antiquæ vnionis iure prætenso, tanquàm è propria domo eos deijcere tentat. At Paulus ad Leonem Pōtificem properat, qui re audita, eidē & socijs in perpetuū capellam, cum ambitu suo concedit; & plebanus assensum præbuit: tunc etiam nouæ societatis priuilegium in forma breuis à curia obtinuit Pater, quod hactenus in sola supplicatione habuisse superiùs diximus. Iam de loci dominio securi noui possessores, manus licèt insolitas haberent, ad laborem se accingunt: nam & latibula rupis claudere, & cauernæ foramina in habitacula sibi conuertere (quibus imminens saxum pro tecto est) proprio labore, atque industria nituntur. Cùmquē illic ligna tam ad ædificandum, quàm nutriendum ignem deessent,

sent, certior factus de vita, & necessitate  
 eorū Dux Vrbinas (ī cuius ditione rupis  
 illa cōtinetur) eisdē cēdēdi ī p̄pinq̄iori  
 mōtis parte liberū vsū cōcessit: similiter  
 & Pascilupi habitatores magna cū cha-  
 ritate fecerūt. Talibus adiuti noui Chri-  
 sti tyrones, aliquātulū cōmodiūs neces-  
 saria vitæ sibi parabant; faciliorq̄; spiri-  
 tui vacandi præbebatur occasio, quā ipsi  
 tantoperè sitiebant. Sed (proh dolor)  
 his foelicissimis initijs inuidia plenus nō  
 cessat obuiare Satan. Paulus namque cū  
 vidisset & loci commoditatem, & socio-  
 rum animos ad solitariam vitam aptē  
 conuenire: cūmq̄; animaduerneret eos  
 omnes sibi vni spontē subijci, suisq̄; mā-  
 datis vltro parere; nactus opportunita-  
 tem regularem eius vitam sub vno habi-  
 tu, & vnius Religionis, nimirum Camal-  
 dulensis, iuxtā præfatum priuilegium, vo-  
 to cōmuniter amplectendam proponit.  
 Sex iam tūc erant, quorum quatuor sine  
 mora eius verbis annuerunt, ad cuncta  
 parati: solis Thomæ, & Raphaeli durior  
 visus est sermo: qui nec habitum muta-  
 re, nec votis se alicui submittere, igno-  
 rante



rante Paulo, iā ab initio apud se statue-  
 rant; quibus nihilò feciùs placuit; omniū  
 regimē penes vnum residere: cuius nutu  
 fierent cuncta. Causa recusationis huius-  
 modi ī eis diuersa fuit: senior enim rerū  
 proprietatē affectabat: Raphaelē deci-  
 piebat concionandi ambitio. Tantū ex  
 hac sociorum dissonantia in Paulo inua-  
 luit primæ intentionis radícula illa, quæ  
 post senis primam exhortationem in eo  
 remanserat; vt parum abfuerit, quin lo-  
 co deserto in Hispaniam arriperet iter.  
 Maturiùs tamen agens, vt illi semper de  
 more fuit, ad salubrius consilium, ac ora-  
 tiones multorum piè viuentiū confugit;  
 vbique prudenter cum domesticis agēs,  
 dissimulataq; displicentia concepta, pa-  
 cis legem sincerè obseruans. Vnde sic re-  
 bus stantibus in communi, ad duas cœli-  
 bes sorores, quas habebat, Epistola ab  
 eo missa hæc protulit verba: Octo ferè  
 sunt menses, ex quo locum mutaui, sed  
 non habitum, neque viuendi modum;  
 immò locum abiectionem, magisq; soli-  
 tarium, in maiori paupertate, cum soda-  
 libus paucis habito. Sum equidem cor-

pore sanus: nunquā mihi mens letā magis fuit. Attamen vnamquamq; vestrum nunc pro me ad Dominum orare, quā maximē precor; vt ille me illuminare dignetur ad suam sequendam voluntatem. In maximo enim dubio versor, debeāne in Italia remanere, an potius Hispaniā versus pergere; inde ad Indos recenter Christianos factos nauigaturus. Nollē sanē hoc in facto errare: ideoq; ad multorū preces, & p̄cipuē ad vestras cōfugio, vtpotē certior, quia cum omni affectione orabitis, præ mutuo inter nos amore. Idem ferē scribit ad Magnificū Petrum ciuem Florentinum.

QVANTA DILECTIONE PATRES Camaldulenses Paulum persecuti sunt. Cap. II.

**B**ENE poterat progenitor noster cum Propheta dicere: Ego autē mendicus sum, & pauper: Dominus sollicitus est mei: nā cū in deliberatione moram faceret, & nouellus grex non modicum adauctus esset, non erat custodi locus ad eum retinendum sufficiens,



ciens, neq; pascua suppeditabantur, quibus tot oues pascere valeret. Nimirum numerosum armentum Pascilupi mapalia nō capiunt: neq; aspera vallis necessaria alimenta producit: quæ res satis anxium optimi Patris animū reddebat: & ecce statim Dei prouidentia præstō fuit. Nam ille, qui solus bonus est pastor, qui dat iumentis escam ipsorum, & pulis coruorum inuocantibus eum: cuiusq; sunt oues, & boues, & vniuersa pecora campi, non distulit de loco, & pabulo opportunè prouidere. Etenim Dei negotiū agebatur, ideo non poterat ipse agēti seruo suo deesse, & necessaria abundantiū non præbere. Quando namq; fidelibus suis defuit Dominus? Eodem igitur tempore inquirentes diligenter pijssimi Camaldulēses, quid de Patre suo absēte actū esset: hincq; intelligētes in rupe Pascilupi eum prædicto modo detineri, sapiūs aliquos, qui illi noti essent, clanculū mittere conabantur, quò ei ad Eremum reuerti prudēter suaderent. Quibus Camaldulum vacuis redeuntibus, intelligebant difficile futurū, quod ipsi optabāt:

his tamen non obstantibus, considerātes loci angustias, rerum inopiam, ac soli illius sterilitatem : inito consilio, quandā inter se sanctam, atq; misericordia plenam astruunt astutiam. Tentantes, scilicet, vt sagaces piscatores, modica esca hamum ambientes, pastorem cū ouibus capere simul. Quis enim eorum non vehementer optabat amissi Pauli videre præsentiam? Quis non desiderabat tantam Eremiti iacturam refarciri? Erant profectò inter Camaldulenses Patres nō nulli, qui eum ex animo, sineque fictione diligerent: quiq; discedentem acriter luxerant: nec inter eos inuentus est, qui ei non benè cuperet. Vnde in prima cōuentus celebratione actum est; vt illi, & socijs suis locus Criptarum Massacij, qui de pertinentijs sacrae Eremiti tunc temporis erat, ad habitandum cōcederetur. Haud multò pòst, quò maiorem in eum beneuolentiam, mutuaq; charitatem ostenderent, ipsum cum suis (Criptas habitantibus) de familia sacrae Eremiti esse voluerunt: quos in ea annumeratos, & constitutos eiusdem conditionis cū constituen-



stituentibus esse decreuerunt: ac ne no-  
 mine tantum Eremitae participes existere  
 viderentur, quandam eis pecuniarum quan-  
 titatem, quasi suppetias mittentes, pro  
 victu necessario in annos singulos assi-  
 gnarunt. Cuius rei extant etiam hodie  
 acta capitularia (sic enim vocant suas or-  
 dinationes Camaldulenses) quorum al-  
 terum vndecima Ianuarij; alterum verò  
 tertia Iunij, M D X X I. Quo beneficio cum  
 gratiarum actione per Paulum accepto,  
 ipse cum Oliuo (reliquis cum debito or-  
 dine Pascilupi relictis) cōfestim ad Cri-  
 ptas se cōtulit. Vbi tunc temporis Elias  
 Mediolanensis Sacerdos, & Antonius Ra-  
 chenas conuersus Eremitae Camaldulen-  
 ses, Paulo iam olim Camalduli notissimi,  
 commorabantur. Quem sanè venientem  
 magno cordis iubilo suscipiunt; & bra-  
 chijs charitatis amplectentes, tanquam  
 antiquum Patrem suum reuerenter ve-  
 nerantur; eidem libenter se subiicientes.  
 Est autem locus iste in arcta, profundaq;  
 valle situs, intra fines dioecesis Esinae, ab  
 oppido Massacij duobus passuum milli-  
 bus distans; Criptarum verò nomen for-  
 titus,

titus, eò quòd super terram nulla essent  
 ædificia; sed in rupe ipsa effossa habita-  
 cula, foramina veriùs, quàm cellæ, nuncu-  
 panda. Quæ quidem non adæquata solo,  
 sed ad cubitus viginti eleuata in medio  
 rupis, quò triginta graduum scala, aut eo  
 ampliùs, ascenditur: neque certè adhuc  
 rei facies mutata est, cùm & cellulæ, &  
 oratorium etiam nunc in sua forma ma-  
 neant: licèt hodie satis adornatus fabri-  
 cis, & alijs commoditatibus nobilitatus  
 locus appareat. Nihil habebat in redi-  
 tibus, solo hortulo & fonticulo ditatus:  
 tales quippè decebāt Eremitas sanctos  
 diuitiæ, in quibus pauperes Dei valdè  
 delectati, ac recreati censentur. Nunc au-  
 tem vallicula illa non parum dilatata,  
 multisque, ac pulcherrimis cellis, atque  
 necessarijs officinis adiunctis, numerosæ  
 Eremitarum familiæ capax reddita est:  
 necnon oratoriolum illum primum in  
 maiorem formam redactum, & ab Efinę  
 vrbis ciuibus, mira loci, habitantiumq;  
 deuotione incitatis, decentibus picturis  
 illustratum: cõmunis Ecclesia habetur.  
 Accessit & industria Patrũ loci pulchri-  
 tudini



tudini alterius copiosissimi fontis saluberrimæ aquæ vena, quæ latè patentes hortos hodie irrigat, & domesticis rebus abundantes suppeditat aquas. Torrens postremò, qui medius rapax, & infestissimus decurrebat, præparata priùs illi noua fossa; ad aliud latus procul eiectus inauditus pertransit. Tandem profunda, arctaq; illa vallicula olim, in eam hodie formam mutata se offert, vt pulchrior, & ad Eremiticum propositum aptior non facile reperiatur. Veruntamen hanc ipsius siti dilatatione, domuncularum augmentum, & aliorum ædificiorum ampliationem non pecuniarum vis effecit, sed continuus Eremitarum labor, ac sudor elaborauit, cum aliquo piorum fidelium auxilio. Interea (vt ad rem redeamus) ibidem in tanta quiete comorantibus illis, sanctitatis odore commoti, certatim hinc inde illuc confluebant homines, quorum multi eorum consortium expectantes difficile inde recedere sunt visi. Tunc etiam ex sacra, altissimaq; Eremita ad humilissimam valliculam hanc nonnullos descendisse compertum est, tantæ  
foeli-

foelicitatis cupientes fieri participes. E  
quibus præcipui fuere venerabiles viri  
Augustinus Bassanensis, & Nicolaus Tri-  
uifanus Venetus, ambo Eremitæ Sacer-  
dotes, & magni sanctitatis amatores, qui  
tamen consensu, & benedictione maiorū  
suorum obtentis, aduenerant. Eodem  
quoque tempore ad Criptas venit Hie-  
ronymus Sueslanus, homo sanè omni  
scientia ornatus, sed medica arte excel-  
lēs, sacri Palatij, viuēte Leone Decimo,  
protophiscus: qui multò nobilior, atq;  
perfectior ex religione factus, mira san-  
ctitatis opera, dum viueret, ostendit.

MONASTERIVM SANCTI  
Leonardi de Volubrio, & Eremus  
Sancti Benedicti vltro, Patri  
offeruntur. Cap. III.

**Q**UANTA fuerit recentis Chri-  
sti familię in speluncis illis ha-  
bitantis vitæ perfectio, san-  
ctitatisq; apud omnes opi-  
nio, hinc intelligi facillimum est: quòd  
per vnus anni spacium eò vsque accre-  
uerant



uerant discipuli Pauli, vt nec eos torrentis angustia capere, nec parum referta penùs sustentare idonea esset. Extendebatur quippè suprà modum (vti res nouæ solent) inauditæ rigiditatis, insuetæque austeritatis vulgatum nomen: & spiritualement progressum mirabantur omnes: vnde factum est, vt nouus paterfamilias vbi nouiter aduentantium multitudinem locaret, aut vnde illis ministraret panes, non satis sciret. Veruntamen non dormit pijsissimus homo, sed ad solitum suum orationis refugium se totum conuertit, id ipsum suis omnibus facere longa exhortatione suadens. Quæ certè illorum oratio adeò grata Deo extitisse constat; vt sine mora, quod iustè petebatur, obtentum sit. Ecce enim eodem tēpore Galeatius Gabrieliſ illuc diuinitus inspiratus aduenit, qui pauperū indigentiam erogatis pecunijs suppleuit, & loci angustias dilatauit. Nam Monasterium sancti Leonardi de Volubrio, quod ipse in cōmendam possidebat, Paulo, & socijs ad habitandum concessit: quod haud multò pòst in fauorē societatis liberè

berè resignauit. Est autem Volubrium mons immēse magnitudinis sub diœcesi Firmana: in ea autem Piceni parte, qua ipsa prouincia à Nursiæ montibus diuiditur, iuxtà oppidum Montis Fortini, Teneæ fluminis caput, & origo. Locus igitur iste valdè excelsus est, atq; ab omni humana conuersatione longè segregatus, eoque solitariæ vitæ apprimè idoneus: ad quem nostri celeriter accedentes, magna cum spiritus hilaritate ibidē habitare ceperūt: sed de his alibi latiùs. Hijsdem diebus Desiderius quidam Monachus Cassinensis in Eremitorio sancti Benedicti Montis Conari, seu Anconitani cum quibusdam socijs solitarijs cōmorabatur; soluto tamen more, ac sine aliqua obedientiæ obseruatione. Vnde conscientia reclamante, audito quid in Criptis Massacij ageretur, illuc se contulit: qui re ipsa visa, & prudenter considerata, præsentia, & sermonis suauitate ipsius Pauli permotus, & se, & socios vnà cum loco ipso eidem tradidit. Hic autē locus situ mirabilis est, vtpotè in procliui montis suprà ripam maris Adriatici  
posi-



positus; in superiori parte eiusdem promontorij arduam celsitudinem: in inferiori verò abscissæ rupis inaccessibilem anfractum ad mare vsque protensum habens: cuius radices perpetuò maris abluit vnda. Sed quanquàm situs angustissimus videatur, nihilominus solitudini aptissimus habetur: quem mirum in modum fultissima ilicum sylva perornat, aquarumque latissimus aspectus, cum nauigiorum continuò transeuntium frequentia lætissimum reddit. Hoc item mirabile reputatur, quòd cum reliquam montis partem hyemali tempore bruma dēfissima quotidie infestare soleat, Benedicti tuguria ne appropinquat quidem. Denique Eremiticæ conuersationi alia aptior statio non facilè reperitur. Iste locus quondam spelunca ferarum, hodie ipsa spelunca oratorium facta, Diuo Benedicto sacrata est. In eadem specu olim muliercula quædam, Nicolosa nomine, per annos multos solitaria latitauit: quæ quia ibi cum magna pœnitētia, animiq; constātia vixit, inter beatas animas reputata comprobatur. Huic filia eiusdem  
 nomi-

nominis erat, quæ post mortem matris  
 maternam habitationē laudabiliter per  
 annos aliquot sola incoluit: quæ tamen  
 decrepita facta in urbem se recepit. Res-  
 vtiq; nostris temporibus inaudita: nem-  
 pè tantæ solitudinis mulieres esse capa-  
 ces. Post mulieres prædictas eiusdem re-  
 cessus habitator factus est beatus Hiero-  
 nymus Anconitanus; qui sacello, & cel-  
 lula fabricatis, valdè locum decorauit:  
 vbi annis quindecim adeò solitarius vi-  
 xit, vt nunquàm urbem ipsam viderit.  
 Obijt cum magna sanctitatis opinione,  
 ideoq; vulgò Beatus appellatur, & habe-  
 tur. Iam vt ad rem redeamus, locis, ac di-  
 scipulis ditatus vltra opinionem suam  
 Paulus, velut diligentissimus Archiman-  
 drita, cuncta componere, ac iusto ordine  
 disponere non cessat. Cuius curas, & ani-  
 mi charitatem ex quadam eius Epistola  
 liquidè intueri valemus: quæ sic habet.  
 Euenit, inquit, vt dum à facie Domini fu-  
 gere tento, quò nullatenus ire volebam,  
 me peruenisse sentiam. Nam alijs ad me  
 accedentibus, alijs me ad se vocantibus,  
 in hac Marchiæ Anconitanæ prouincia,

in



in quatuor solitarijs valde locis circa viginti quinque fratres habeo Eremitas. A quibus discedere; etsi solitudinis, quā à iuuentute mea semper quæsiui, amor suadeat; fraternæ tamen charitatis necessitas non permittit. O beate Pater, legitimè dicere poteris, cū venerit Dominus tuus: quinque talenta tradidisti mihi, ecce alia quinque superlucratus sum. Non deerit tibi profectò iustum responsum: sed audies; euge serue bone, & fidelis, quia in pauca fuisti fidelis, suprā multa te constituam, intra in gaudium Domini tui. En tu in tanta paupertate, in tanta locorum angustia, ac rerum necessitate constitutus, vno anno viginti quinque filios acquisuisti: & nos in sufficientia victus, in omni habitationum commoditate, vix quinque singulis bienijs retinere valemus. Quod quidem nō aliunde provenire crediderim, quā ex abundantia charitatis tuæ, & nostrorum omnium tepiditate: sperabas tu in Domino Deo tuo, & ipse faciebat; iactaueras super eum cogitatum tuum, & ipse te, & tuos enutriebat. Nos verò in industria

stria nostra ( nisi superbia potiùs dicenda sit ) nimium confidimus, vnde nobis meritò contingit sterilitas ista. Postremò omnibus sapienter collocatis, ac rebus stabilitis, ad Criptas reuertitur Iustinianus noster, vbi aliquandiu quietus cum suis permansit.

SPELVNCAE MASSACII

Paulo, & socijs in perpetuum renunciantur. Cap. IIII.

**V**ENERABILES Patres Augustinus, & Nicolaus Sueffanus, & alij, qui in Criptis morabatur, quasi paternæ mentis conscij, optimum Patrem continua instantia stimulare non cessabant: quo nouo instituto initium daret, atque ad hoc vltrà humiles preces, se ipsos in socios ac subditos offerentes. Quam ob rem Pater, ne in solo alieno ædificaret, coactus per litteras à Patribus suis Camaldulensibus locum ipsum sibi, & suis in perpetuum conferri, petere decreuit. Quod faciliùs dictu impetrare potuit: tum quia omnes  
ei



ei propitij extiterant : tum quia inde sacra Eremitus nullum prouentum recipere, sed potius aliquod damnum sentire solita est. Prima igitur Capituli celebratione (quæ fuit 26. Iunij, M D X X I I.) liberè in fauorem nouæ congregationis locus ipse renunciatus fuit, cum expressa segregatione, ac separatione ab ipsa sacra Eremita: tantaque vsi sunt erga suum alumnū Patres illi benignitate, vt præter hæc, primum ipsius victus subsidiū non solum non reuocarent, sed etiam de nouo extiterit ab eisdem confirmatum. Quæ omnia præter capitulare decretum (vt fieri solet) solenni contractu, manu Fratris Lazari Boemici Miniati, die & anno prædictis confecto, roborari iusserunt. Cuius instrumentum authenticum non solum apud nos, verum etiam in archiuo sacrae Eremitæ hodie conseruatur. Rursus & alia multa nostris concesserāt (de quibus in prima parte actorum constat) quæ hic exprimere non est necessum. Postremò hæc, & plura fecissent Patres, vel vt suum Paulum iterum ad Eremitū traherent: vel certè ne prorsus amit

O 2 terent.

terent. Nec mirum profectò, cùm esset vir ille religiosissimus, intus ac foris purus, ac mundus; inter subditos minimus, ac mitissimus; inter Prælatos peritia & auctoritate præcipuus. Vnde non immeritò aliquis eorum dicere consuevit: qua die Paulus Appenninum reliquit, Eremus nostra quasi vidua facta est, & filij eius orphani reputati. Siquidem gratissimi Patres, quanta bona ministerio, industriaque eius suæ Eremon obuenissent: quomodo ab angustijs eam liberatam, & in suam honoris dignitatem restitutam, non meminisse non poterāt. Demùm laude dignissima est eorum liberalitas, quæ tanti boni extitit causa, nunquàm satis commendata charitas, quæ futuræ Religioni fortissimum præbuit fundamentum.

NOVI INSTITVTI PRIMA  
exordia. Cap. V.

**H**Ac itaq; Patrum suorum benignitate, largitateque deuctus nouus Religionis institutor, tunc primùm Dei voluntatem cognoscere



gnosceret cepit, tunc dubitandi confes-  
quitur finis, atque omnis peregrè abeun-  
di aufugit cupiditas: necnō in Italia ma-  
nendi firmatur propositum, & agendorū  
ratio stabilita quieuit. Eadem die illi in  
mentem venit obscurum illud beati Mi-  
chaelis reclusi responsum: neq; ampliūs  
eiusdem vera eum interpretatio latuit.  
Sic enim habet: Præstare quidem potest  
Deus, si pergas, vt aliquid proficias; desi-  
derium autem tuum omninò non perfici-  
es. Ecce iam aliquid, immò multum  
proficit Pater, dum instituit societate:  
transmarinam autem peregrinationem,  
quæ illius animo semper adhæsit, non  
perfecit. Talibus ergo initijs in propo-  
sito confirmatus, atque animo conforta-  
tus dux noster, solitariae militiæ insignia  
tyronibus suis sine mora tradere statuit.  
Atqui neminem latere debet, à prima  
die, qua sancti Hieronymi latibula in-  
gressus est, ad se veniētibus habitum de-  
disse Paulum, & eorum professiones ac-  
cepisse: sed vtrumque imperfecto quo-  
dam modo, habitum in solo cucullo, &  
professionem in perseverantia tantum

statuens. Etenim incertus prudentissimus homo, maneret in Italia necnè, non est ausus aliquid innouare, nec aliquem solenni voto astringere: vnde etiam nūc quorūdam eorum, qui primi ad eum accesserunt, professiones in libellulis, quibus asseruantur, duplicatas seu iteratas legimus: quarum vltima solennis cum tribus votis more nostri ordinis solito emittebatur. Nunc autem solidam, in perpetuumq; permanfuram institutionem statuere intendens: certam, atque immutabilem iuxta animum suum, habitus formam, ac tria substantialia vota profitendi solennem, perfectumq; modum secundum Camaldulensis ordinis statuta tradere studuit. In primis itaq; sciendum est, habitum Camaldulensem in hoc vno consistere: vt album, strictūq; cucullum, quo caput tegitur, scapulario confutum deferamus: & ipsum scapularium (quod vulgò Patientia dicitur) ab <sup>essentia</sup> scapulis, siue ab humeris, antè & retrò <sup>scapulis</sup> super candidam tunicam, ad talos vsque pendentem, laneo cingulo astringamus. Hæc est vera forma, essentiaque habitus  
ordi-



ordinis nostri : extrà quam quicquid induimur siue pallium , siue latum Monachalem cucullum ( candido nitore seruato ) nihil penitus refert : nec habitus qualitatem in aliquo mutat , alterat , aut lædit . Noua igitur nouæ societatis fundamenta iacturus Pater , nouamq; viuendi recenti familiæ normam traditurus , quid aut quomodo fieri debeat , diù priùs voluit pensitare . Manebat alta mēte repositum paupertatis , nuditatisq; desiderium illud , quod in sacello beati Francisci Aluerniæ animo conceperat : nec ille feruor imminutus aliquatenus fuerat , sed potiùs sensim magnum sumperat augmentum . Ideoque attenta facultate sibi in rescripto Apostolico circa victum , & vestitum concessa , ab ipsa nuditate incipere decreuit . Demum die secunda Iulij , & ipsa Dominica , in qua etiam solennitas Visitationis sacratissimæ Virginis Mariæ ad Elisabeth , celebrabatur ; existentibus in præfato oratorio Criptarum nō paucis secularibus , qui vel deuotionis causa , aut certè rem sacram audituri venerant : coram omni-

bus, modo quo sequitur ornatus hora  
 Tertiæ comparuit Paulus. Reiectis nem-  
 pè quæ antè deferebat indumētis, proq;  
 eis birrea (vulgò Grisea) rudi, videlicet,  
 hirsutaq; tunica ad carnes sine tunicel-  
 lo indutus, habitum superiùs additum  
 ex leuidensa dalmatina (quam rasciam  
 Sclauonicam appellant) confectum: nu-  
 dis pedibus, solo calopodio, seu ligneo  
 focculo subtus munitis, in publicū pro-  
 dijt statim celebraturus. Mirantur om-  
 nes monstruosam, nouam, & insolitam  
 vestem: irrumpunt in cachinnos quidam  
 ipsorum, alij prudentiores lachrymis  
 perfunduntur, in asperitate illa signum  
 rigidissimæ poenitentiae perpendentes.  
 Cum verò ad Offertorium Missæ vêtum  
 est, ecce quatuor nouitij (quorū primus  
 Hieronymus Sueffanus) ante altare ge-  
 nibus flexis assistunt: ad quos conuersus  
 Pater, & debitis, solitisque ceremonijs  
 vsus, eosdem blandè interrogat: an idem  
 quo ipse indutus est, tegumentum susci-  
 pere, perpetuoque deferre velint? Qui-  
 bus spontè velle respondētibus, subinde  
 eos ad carnes denudari iussit: & manibus  
 quæ



quæ iuxtà præparata erant indumenta  
 suscipiens, illos etsi animo feruentes, ta-  
 men prospecta rigiditate in se horrêtes,  
 summa cum aspectantium admiratione,  
 sanctissimæ paupertatis ornamentis de-  
 coravit. Postremò his, quas descrip-  
 simus, vestibus palliolum ex eodem griso  
 ad genua vsque protractum, ligneoque  
 globo ad pectus coniunctum, pro Mona-  
 chali amplo cucullo addidit. His deniq;  
 positis fundamentis, ad habitationes si-  
 mili paupertate componendis se vertit:  
 in quibus solis tabulis super humo loca-  
 tis, iunco, seu paleis superius stratis, pro  
 lecto noui milites utebantur: quibus sin-  
 gulis singula sclauonica villosa adapta-  
 uit opertoria. Cibus insuper illis siccus  
 panis, & sæpe mucidus: brassica, & olus,  
 quandoque tenue legumen pulmentum  
 erat: vinum autem rarò bibere vsi sunt,  
 quod ne illis quidem tertio quoque die  
 ministrabatur. Tempus prætereà sic di-  
 stribuerat diligens Pater, vt præter mo-  
 deratum somnum, diuinum officium aut  
 manuale opus totum penitus consume-  
 ret. Diuisis interim iuxtà consuetum or-  
 dinem

dinem diei, noctisque horis: tùm ad ho-  
 rarias preces persoluendas, tùm ad ora-  
 tionem, lectionemque peragendam, tùm  
 etiam ad seruitutis, domusve munera  
 necessaria adimplenda. Sed hæc per trā-  
 sennam hīc adnotasse sufficiant: quia vl-  
 timo libro ( qui de ritu, & institutione  
 agit ) eadem adamussim examinantur.  
 Prætereà opere pretium est intelligere,  
 quanta hīc in angustia degebāt Dei pau-  
 peres: de qua in hæc verba ad quendam  
 scribit Pater. Vbi nunc sum, nihil habeo,  
 & vtinam vna mihi saltem cella esset:  
 vtinam, vt melius dicam, spelunca vna  
 mihi vni: fuisset sanè Crasso, & Midā  
 ditior. Sumus autem in duabus criptis  
 quatuor, &c. In summa dum in hac stri-  
 cta valle, inque magna rerū penuria mo-  
 rarentur nostri progenitores, venerabi-  
 les Patres Augustinus Bassanensis, & Ni-  
 colaus Triuisanus, qui licet animo sem-  
 per in societate manere decreuerant:  
 nihilominus adhuc solitū amictum de-  
 ponere, & nouū assumere propter eiuf-  
 dem asperitatem formidabant: quos ta-  
 men Paulus ob eorum auctoritatem ad  
 hoc



hoc cogere, vel persuadere minimè ausus fuerat. Atqui paulatim tanto aliorū sanctitatis exemplo compuncti, & inter pauperes, ac nudos cum diuersitate vestitium, decenter ornati cōuersari erubescētes: assuetis tādē vestibus reiectis, rude illud indumentum sponte sua sumpserunt. Et ita vniuersa Dei familia vnius habitus, vnius moris, atque vnius spiritus facta; vnanimiter de cetero in Dei honore mirificè cum omni perseuerantia ambulauit.

## DE ELIA, ET ANTONIO

primis huius loci habitatoribus.

Cap. VI.

**S**ENEX venerabilis Elias, quem cum Antonio conuerso in Criptis à Paulo repertum fuisse diximus: circa victum, ac vestitum, eiusdem voti cum reliquis nō erat: nam perpetuæ abstinentiæ rationem admittere, & birreū opertorium humeris suis recusabat imponere. Nec mirum profectò, senuerat enim valdè; quam ob rem tantæ rigiditatis

tatis onus debile corpusculum minus poterat sustinere: & sancta illa, qua diu vsus fuerat libertas, iterum graui strictę obedientię iugo collum submittere non sinebat. Quare ne socijs tædiosus fieret, aut inter obseruantissimos viros singulariter viuens, illis aliquod ministraret offendiculum; inde recedens Camaldulum, vnde exierat, reuerti satiùs duxit. Antonius verò, qui his, & durioribus pugnis resistere assueuerat, nouæ militiæ ascribi, griseoq; sago indui summoperè anhelabat. Veruntamen Eliam, cui tam diu obediens fuit, quasiq; officiosus filius tot charitatis impenderat opera, contristare non audens, solum inde abire non permisit. Sed euntem illum, vti fidelissimus comes secutus ad sacrā vsq; Eremum fideliter comitatus est: qui tamen discedens Paulo bona fide recepit: se, relicto prius Elia in domo sua, statim ad Criptas reuersurum. Atqui itineris labore confractus, vel aliquo corporis accidente nouiter exorto, adhuc in via malè habere cepisse, fertur. Denique Camalduli constitutus, febricula quadam affectus,



affectus, per menses aliquot infirmus iacuit : & tandem quadam die Dominica, vt accepi, obdormiuit in Domino. Libet ergo corpore demortuum, spiritu autē æternaliter viuentem, paucis laudare; ne tam salutari huius sancti viri exēplo lector noster defraudetur. Antonius igitur iste Rechenati ortus in ipso iuuentutis flore vxorem duxit; quam postea in adulterio deprehensam ab eodem occisam, fama vulgauit. Sed cū esset Antonius natura mitis, & animo pius, licet terrenum iudicem ei formidandus nequaquā veniret: nihilosecius tremendum Dei iudicium non poterat non timere. Quam ob causam diræ faciendæ poenitentiae se subinde tradere statuit: ac primum tertij ordinis sancti Francisci factus professor, in sanctis suæ professionis exercitijs piè detinebatur. Postmodum verò hoc ipsum, feruore crescente, parū aut nihil reputans, solitudinis auidus ad Criptas Massacij, cuius loci modò abūdè locuti sumus, se congeffit. Vbi deinde solitariam vitam summa cū austeritate agens, proprijs laboribus, ac sumptibus,

incul-

incultam vallem non mediocriter reddidit ornata. Nam iuxta suam cauernam, aliam non sine multo sudore effodit: necnon ad ipsius rupis radices graciles sibi parauerat hortulos, vnde posite à olera, dulcesque herbulas legebat. Viuitandi modus talis fuisse fertur: quotidianus panis, quo vesceretur, decem vnciarum pondus, eo tamen vel sicco, vel biscocto utens: cui pauca brassicæ folia, alteriusve oleris pulmentum adiungere; aut certè leguminis pugillum, idque multoties solo sale, sine oleo conditum in cibum sumere solitus est. Carnes, seu oua, neque lactaria, ex quo speluncam ingressus est, gustauit vnquam: à vino similiter quasi abstemius ferè semper abstinuit. Oderat supra modum ociositatem, nutricem peccati eam appellans: erat in oratione continuus, & in lectionibus frequens, ita vt ne punctum quidem temporis sine fructu transire permetteret. O felix homo, qui sine regulari disciplina tam prudenter vitam nouerit regulare. Prætereà, licet quidam quod sequitur eius mitissimæ naturæ ascribant, ego acquisitæ  
virtuti



virtuti attribuere non dubitem: hoc est, quod nunquàm etiam in multa occasione, vel minimum irasci visus sit: mirum in modum certè humilis, ac patiēs, pius, deuotusque eius animus extiterat: sed hæc omnia superabat castissimus Dei timor, quo vniuersa vincere ei difficile nō fuit. Postremò, cū ibidem prædicto modo esset commoratus per sexennium & vltrà, audiens aliquos referentes speluncas illas ad Patres Camaldulenses spectare; delicatæ cōscientiæ stimulo actus, sine alia veriori facti informatione, Camaldulum se contulit; illicq; statim Patribus illis, & locum, & quicquid in eo factum fuerat, spontè renunciauit; tantūmodò supplex nouam eiusdem loci habitandi concessionem petendo. At Patres, qui & locum, & ius (si quod erat) in eo habentes prorsus ignorabant; immò secūdum quosdam, quibus & Delphinus astipulatur, hæc prima loci huius acquisitio fuit: ideoq; facilè petitis annuerūt. Dum hæc Camalduli agerentur, Antonius (Deo sic disponente) in manus Pauli incidit, qui eundem perbellè cōduxit,

vt

vt Eremiticum habitum indueret, sub  
 obediencię iugo viuere vtilius ei futurū,  
 benignè suadens. Cū itaq; ei salubre  
 consilium placuisset, suscepto conuerso-  
 rum habitu, post annū professionē emi-  
 sit: & paulò post adepta Criptas iterū  
 habitādi noua licentia, cū præfato Elia  
 Sacerdote sibi socio à superioribus da-  
 to, illuc reuersus est. Vbi sanè ambo si-  
 mul per annos ferè septem summa cum  
 charitate, ac mutua dilectione, fideliter  
 Deo seruientes perseuerauerunt. Iam  
 non est hīc silentij occultanda Antonij  
 non vulgaris sanctitas, quæ ex duobus  
 præcipuis exemplis satis apertè intueri  
 volentibus clarescere poterit. Non erat  
 ibi oratorium aliquod ab initio, quæ res  
 illi propter necessitatē satis molesta effi-  
 ciebatur: neq; ipse illud facere tentabat,  
 eo quòd esset in solida petra duro ferro  
 concauandū, nec erat pauperi vnde ex-  
 pensas persolueret. Et ecce nobilis qui-  
 dam Efinus illuc veniens, re audita, eum  
 vt opus incipiat, vehementer hortatur,  
 se omnes fabricæ sumptus facturū pro-  
 mittens. Nec mora, vocātur lapidicidæ,  
 & cepto



& cepto opere ad finem vsq; operarij nõ cessant. Requisitus autem nobilis sponfor vti operarijs mercedem solueret, noluit ille stare promissis. Tunc Antonius illusum se vicens, lectuli opertorium, & paucos libellos, quos habebat, vendidit; seu veriùs pignori dedit: cùmque id dimidium pretij non adæquaret, ad orationem solitum sibi remedium confugit. Dum ipse seorsum secretò oraret, vltima operi manus imponebatur: & factũ est, cùm vltimus angulus cauernæ poliretur, aperta est rimula quẽdam pecunijs repleta. Moneta verò Anconitana antiquissimæ signaturæ: quæ tantula fuit, vt solutis operarijs, ad pignora redimenda & ad ea paranda, quæ ad oratoriũ exornandum necessaria esse solent, abundanter sufficeret. O quàm benè exclamat ille: Omnipotens oratio, cuncta per te fiunt; tibi nihil impossibile datur: quia, teste Iacobo, multum valet oratio iusti assidua. Rursus cū aliquando ita ægrota-  
ret Elias, vt ī agonia mortis versaretur, & Antonio eidem ministranti deesset panis, neq; infirmus in tali statu solus relin-

P quendus

quendus ei videretur; ad Deum suū con-  
uersus, more suo ex alto auxiliū quærit.  
Et ecce adhuc eo orante, à coruo ibi in  
ripa nidum habente ( & ipsis pijs homi-  
nibus diuturnitate temporis familiari  
facto ) panis recens ponderis duarum li-  
brarum allatus est. Res quidem mira, &  
nostris temporibus inusitata, credituq;  
difficilis: de qua tamen ego nihil dubito,  
qui hæc omnia propria Pauli manu, lin-  
gua licet vulgari, obiter annotata inter  
eius scripta reperi. His ergo præclarif-  
simis gemmis illuc accedentes nostri,  
incultum natura locum, ornatum, atque  
nitentem inuenerunt.

QVAEDAM IN PAVLVM, ET  
socios obiecta diluuntur.

Cap. VII.

**E**T SI ex præcedentibus fatis ma-  
nifestum omnibus esse putamus,  
nostræ congregationis fundato-  
rem in cunctis actionibus suis legitimè,  
ac laudabiliter processisse: attamen ne  
candida eius societas alicunde maculā  
contra-



contraxisse videatur, opere pretium du-  
 ximus quibusdam ex aduerso obiectis  
 breuius respondere. Modernus igitur  
 quidam, alioquin grauis, ac disertissimus  
 auctor, in suis monumentis nuper in lucē  
 æditis post pauca (licet eleganter) in lau-  
 dem nostri optimi parentis prolata, hæc  
 nescio quo spiritu adiecit. Nempè occa-  
 sione conuersionis Petri Fanensis (olim  
 Galeatius Gabriellus) quæ fuit anno  
 M D X X I I I I. Patres Camaldulēses tūc  
 primū exploratum habuisse Grotarū  
 (sic ipse loquitur) abdicationem: & Pau-  
 lum suam peregrinationem in erectione  
 nouæ congregationis terminasse. Quod  
 grauiter accipientes, quasi à sacra Ere-  
 mo rebellasset, lite mota habitu Camal-  
 dulensi, vel omni eius congregationi in-  
 terdixisse. Et alia quædam his similia,  
 quæ tanquā superflua omittimus. Ista  
 sanè omnia ex his, quæ suprā cap. 3. di-  
 ximus, stare non posse, satis elucidatum  
 manet. Quī enim fieri potest, post qua-  
 driennium exploratum habuisse, quod  
 ne vna quidem die ignorauerūt? Siqui-  
 dem in sacra Erema libellus quidam cu-

stoditur, cui titulus est, Prima pars actorum, ex quo obiecti criminis plenissima defensio assumi potest; in eo, scilicet, omnia Patrum Eremitarū decreta annorum vigesimi primi & secundi exactè notata etiam hodie leguntur, quibus sole clariùs apparet veritas ipsa. Hoc est, eodem tempore, iisdemq; annis semper venerandos illos Patres sola charitate motos præfatas Criptas primò ad habitandum Paulo, & suis concessisse: deinde prius in sua familia eis computatis, annuam quandam pensiunculam pro victu esse elargitos: ac tandem anno *xxii*. vigesima sexta Iunij, renunciatione, separationeq; præmissis, locum ipsum eisdem benignè mediante contractu dedisse. Adde quòd Elias, & Antonius primi loci habitatores sine Prælatorum suorū mandato nostros venientes admittere: aut certè maioribus rem celare non potuissent. Prætereà Delphinus totius ordinis generalis lib. 12. Epist. 77. scripta 15. Iulij, eiusdem anni, de prædicta segregatione grotarum certior factus, sic Camaldulensibus loquitur. Congratulor pluri-



plurimum vobis, quòd malè copulata, & coniuncta haud multò antè sacræ nostræ Eremitæ antra deserti Piceni penitus repudiaueritis. Conferet vobis separatio ista ad quietem vtriusq; hominis, &cet. Et in Epistola 86. eod. lib. ad Iustinianũ Bergomensẽ scribens. Putavi ego, inquit, abiisse te in Picenum à Iustiniano altero accersitum; sicut mihi retulerat Vicarius vester. Quid? non ne venerabiles viri Augustinus Bassanensis, & Nicolaus Triuisanus iam à principio (quod & ipse auctor fatetur) ad nostros in speluncis Massacij habitantes venerunt? Accedit ad hæc vnio quædã inter nostros, & Camaldulenses in ita anno vigesimo tertio, quæ per annos duos sequentes vtrinque obseruata, authentico contractu probatur: de qua paulò inferius plenum tractatũ dabimus. Ex his ergo manifestum restat ab initio ad vltimũ vsq; diem nouam congregationem Camaldulensibus fuisse notissimam: quin & eisdem semper fuisse propitios, & fautores: tantũ abest dicere, contra filios suos lite mota contendisse. Vtiq; Patres Camal-

dulenses charitate feruētes nil grauiter  
 ferre possunt, patiētes enim sunt, & equo  
 animo ferunt omnia : non æmulantur,  
 neque inuident alterius bono ; non sunt  
 ambitiosi, neque litigiosi : non quærunt  
 quæ sua sunt, multò minus repetunt quæ  
 semel dederunt . Ad habitus præterea  
 interdictionem ex dictis suprâ cap. 2 . sa-  
 tis responsum puto. Nam si anno *xxii*.  
 cū Sueffanum , & alios noua veste in-  
 dueret, & ipse Pater prius sibi eadē assū-  
 pfit : qui nudus, & ex calciatus, rudissima  
 tunica, immò asperrimo pœnitentiæ sa-  
 go indutus apparuit ; necnon sponte sua  
 honorabilem, ac delicatam Monachalē  
 superiorem vestem, quæ de substātia ha-  
 bitus minimè est, in vilissimum pauper-  
 tatis palliolū mutauit : certè non video,  
 quomodo trāfacto post hæc biennio, ha-  
 bitu Camaldulensi priuari queat . Sed  
 quid ego in hac defensione oleum (vt di-  
 ci solet) & operam perdo ? Nonne sem-  
 per Paulus, & socij eius habitum Camal-  
 dulensem detulerūt ? nonne nos indigni  
 filij eius hodie eundem gestamus ? nōne  
 & qui futuri sunt nostræ congregationis  
 filij,



filijs, Deo annuente, ipsum in æternum portabunt? Iam ad eos stylū vertamus oportet, qui contra præfatum auctorem sentientes Paulum malè egisse etiam hodie clamitant, & sui ordinis corruptorē non cessant appellare: eò quòd Monachali amictu relicto, pallium assumpsit; comminantes insuper nos ad eum resumendum esse cogendos. Quos ego certè parū in historia sanctissimi Patris nostri Romualdi versatos crediderim: vellēq; eos antiquorum eiusdem sancti discipulorū paupertatē, ritus, ac mores didicisse, prima Daguini, & sociorū eius meminisse idumēta: atq; adeò diligēter legisse beati Rodulphi (quas vocant) compilationes. Quibus benè consideratis, forsitan palinodiam recantantes Paulū Iustinianum verum sancti Romualdi, & discipulorum eius imitatore, & antiqui eremitici rigoris restauratorem extitisse, fatebuntur. Profectò apud præfatos scriptores pelliculas, birrum, cilicium, vilissimas pariter, atque asperrimas vestes, nuditatem, & squalorem lego: nullū autem illorum Sanctorum mollibus in-

dutum reperio. Cur ergo, quæso, eorum  
 æmulatorem Paulum reprehendemus?  
 cur illi, & socijs eius, quod virtutis est, vi-  
 tio vertimus? Nunquid perperam ege-  
 runt gloriosæ Capucinatorū familię prin-  
 cipes, qui nuditatem, ac sanctissimā pau-  
 pertatem; & tandem vilissimam, rudis-  
 simamque beatissimi Patris sui Franci-  
 sci vestem, iam olim sepultam suscitaue-  
 runt, & suscitata induerunt? Sed vae il-  
 lis, qui dicunt malum bonum, & bonum  
 malum. Nunc denique me necessitas co-  
 git ad te optime Delphine mea dirigere  
 verba, qui dilectum alioquin filium tuū  
 leuitatis quodammodo notare non de-  
 sijsti. Ais siquidem non alibi eum sua-  
 uiorem panem reperturū, quàm in Ere-  
 mo Camaldulēsi: an nescis illas esse sua-  
 uiiores escas, quæ magis palato placent?  
 Non triticeos quærit iam panes (vt tuis  
 vtar verbis) sed ordeaceos inquirat;  
 sciens vtique talibus olim Dominum fa-  
 tiasse turbas in deserto: non esurit am-  
 plius terrenas epulas, sed spirituale ne-  
 ctar sitit. Ecce descendit ex Alpium (vt  
 ais) altitudine; verum sanè, atque abiit  
 in



in locum, quem monstravit ei Dominus: descendit in vallis ima non ignorās scriptū esse, Omnis vallis implebitur: & vales abundabunt frumento. Item, Qui se humiliat, exaltabitur. Iuit tandem in vineam patrisfamiliās, ne staret tota die ociosus, sed operaretur vsq; ad vesperā, tunc denarium diurnum accepturus. Cupis præterea fieri illi aspera in vias planas. Quid, quæso, planius illi contingere potuit, quā in suavisima lege Dei sui, inq; via mandatorū, atq; perfectionis semitis ipsū suauiter ambulare, multosq; instruere, & deducere? Crede iam Delphine venerande, prout te crediturū promittis, hanc fuisse mutationem dexteræ excelsi: quia ita probavit à te expectatus euentus. En vidisti euentum (non enim diem obieras) euentū, inquam, quē optabas: vidisti sterilem peperisse plurimos, multosq; esse filios desertæ, magis quàm eius, quæ habebat virum. Lætare igitur vir pijssime, & in perpetua pace quiesce: quia ante obitum tuum, quæ de filio tuo dilectissimo desiderabas, cum magna iucunditate vidisti.

DE

EREMITICÆ HISTORIÆ  
DE PRIMA CAPITVLI  
celebratione. Cap. VIII.

**I**AM igitur in quatuor Eremos dilata-  
tata noua societas, & ī quatuor par-  
tes diuisus grex, nō ita facilē ab vno  
pastore, licet vigilātissimo, potuerat cu-  
stodiri; aut iusto moderamine quadri-  
partita familia regi: vtique vnamquāq;  
domū suum rectorem desiderare in con-  
fesso est. Quod si in priuatis secularium  
ædibus ita se rem habere videmus, quā-  
tō magis in religiosis cœnobijs eadē ra-  
tio militare debet? quandoquidem ad-  
uersarius noster serpēs antiquus religio-  
sis viris semper insidiatur, cui iugiter  
magna cura, ac vigilantia resistere est  
necessum? Verū istud fieri nequit, nisi  
idoneus, peritusq; custos vnicuique gre-  
gi præponatur: qui eum in temporalibus  
regat, in corporalibus naturali alimēto  
pascat, & in spiritualibus incessanter do-  
ceat; & tandē in omnibus fideliter, cau-  
teq; ducat. Præterea quemadmodū vna  
quæque Respublica suis legibus, & statu-  
tis regi solet: vt qui præsumt ciues in iu-  
stitia,



stitia, & rectitudine morum contineant,  
 & illi facilius suum pensum adimpleant:  
 ita quamcumque religiosorum congrega-  
 tionem, suam certam regulam, suasq;  
 constitutiones habere oportet; quibus  
 & subditi quæ acturi sint, addiscant; &  
 prælati quæ illis imponenda veniunt,  
 quæve præstanda non ignorent. Quæ sa-  
 nè omnia prudenter animaduertēs Pau-  
 lus noster, tanquàm huius militiæ exper-  
 tissimus miles, immò peritissimus dux,  
 vtrumque præstare, suamq; societatem  
 & iusto regimine, & scripta lege munire  
 diutius non protraxit: sed continuò om-  
 nes, quos ætate prouectos, scientia orna-  
 tos, aut experientia edoctos nouerat, vo-  
 cari iussit. Quibus in vnum congregatis,  
 iuxtà facultatem Apostolicam, capitulū  
 consueto religionum more, debitīs mo-  
 dis ac forma seruatis, celebrare ceperūt.  
 Ac licet congregatio ipsa tunc pauco-  
 rum, tenuisq; fuisse noscatur: nihilomi-  
 nus tamen conuentus iste nec sine debi-  
 to decore, nec sine multa prudentia ha-  
 bitus est: ideoq; meritò primū genera-  
 le societatis capitulū meruit nuncupari.

Quam

Quam ob rem quæcunque in eo statuta, sancitave fuere, in perpetuum observata manent: necnon ordinationes, & constitutiones tunc æditæ, seu approbatæ, vniuersalis legis vigorem obtinuerunt. Quales fuerunt constitutiones viginti sex, quas Paulus iam antè cōfecerat, sed eis vti noluit, donec iustis solēnitatibus, ac ritè cōfirmarentur; quas nos propria eius manu vidimus scriptas. Multa etiā ibi ad regularem, Eremiticamq; vitam instituendam; multa de regimine, & familijs componendis; atque adeò ad necessaria negotia peragēda sapienter, prudenterq; scita fuerunt. Et, vt semel dicā, hinc primam, certam, regulatamq; viuendi formam cepit habere religio nostra. Huic memorandæ primi capituli celebrationi locus Criptarum, tanquā eo tempore primus, & aptior reliquis, deputatus est: definitores verò comitorū extitere peritissimi Augustinus Bafsanensis, & Nicolaus Triuifanus, ambo veterani, atq; similibus assueti. Hieronymus item Sueffanus, qui licèt in religione nouus, longa tamen experientia ac doctrina



ctrina grauis, & cordatus semper est habitus. Aderat & venerabilis Desiderius qui in his summa peritia callebat, vtpotè qui Cassinensium negotijs diù interuenerat: & sæpenumero Decani officio, & alijs muneribus fuerat functus. Eorū tandem præsidēs Paulus, qui & totius societatis Maior (hoc est) Generalis factus est: & licèt quasi naturali iure, ac summa ratione electus videretur, nihiloseciùs libenter ab ea dignitate abstinuisset. In summa ex prædictis diffinitoribus singulis locis, seu Eremis Priores designati sunt, ac dedicati. Vnde suis pedibus ab illa die incedere, & iusto ordine ambulare cepit nouella cōgregatio; ac deinde semper in melius cū obseruatiæ ratione, tū locorum, personarumque augmento, Dei Optimi Maximi beneficio, mirabili modo accreuit.

PATIENTIA PAULI IN  
aduersis. Cap. IX.

**I**NTER ea, quæ suprà tam prosperè gesta retulimus, non defuerunt pissimo Patri & multa aduersa; eò quòd  
(diuina

(diuina bonitate annuente) eum tanquā  
 verum Christi discipulum Satanās cri-  
 brare non cessauit: quæ omnia ea patiē-  
 tia tollerare consueuerat, vt lætior mul-  
 tō in tribulationibus, quā in prosperi-  
 tatibus sit semper agnitus. Solitus equi-  
 dē dicere, Sine cruce non verē sequimur  
 Christum. Post Leonis Decimi obitum  
 diū Romanam curiam vacasse, eò quòd  
 Adrianus Sextus eius successor tunc in  
 Hispania ageret, non est qui ambigat.  
 Hinc multis, maximè discolis, quidlibet  
 audendi data est occasio: quod non pa-  
 rum nostris, & omnibus bonis nocuisse,  
 compertum est. Morabantur itaque in  
 superiori parte Montis Anconitani Ere-  
 mitæ quidam, soluto more, sineq; certa,  
 vel approbata regula degentes: qui no-  
 strorum vicinum consortium æquo ani-  
 mo ferre non poterant; timentes vtique  
 ne istorum laudabilis conuersatio, eorū  
 dissolutæ cupiditati aliquod afferret no-  
 cumentum. Quæ abomināda æmulatio,  
 seu radix omnium malorum auaritia,  
 perinde animos eorum agitauerat, vt  
 veluti furentes, in pauperes Christi ir-  
 ruere



ruere non dubitarent. Ac primùm minis eos irritare tentantes, & nihil proficientes, cogitauerunt miseri illi, si aliud non valerent, saltem eos terrere, quò formidine ipsa pellerentur: atq; ad id hac arte utebantur. Mittebant nimirum ex eminentiori loco in inferiora nostrorū latibula immania saxa, lignorumq; ponderosos truncos magnum stridorem mouentia, quo latitantium animos ingenti terrore concuti credentes, totas ferè in hoc diabolico exercitio consummabāt noctes. Quam ob rem cum lamentatione, venienti quandoque ad se visendos Paulo trepidantes pauperes, suas non proponere querelas non poterant. Quibus ipse sua solita alacritate: an ignoratis filioli, naturale esse post tonitrua ex alto decidere grandinem? necesse est præcedentes cōminationes quodammodo subsequi facta. Sed vos nolite expauescere, territamenta sunt hæc, quæ vobis nocere non possunt, qui Deum in defensorem habetis: sustinete modicum, & orate pro persequentibus vos, & statim tonitrua cessabunt, & grando rigida  
in

in mollem pluuiam conuertetur. At ob-  
 cecati illi quandoquidē hac via nil pro-  
 ficiebant, aliam aggrediuntur: Cardina-  
 lem, videlicet, Anconitanum adeuntes,  
 tot calumnijs, falsisque suggestionibus  
 apud eum contra Dei seruos egerunt, vt  
 magno impetu vicario suo demandaret;  
 quatenus & Paulum, & vniuersam eius fa-  
 miliam extra fines Anconitanæ diœce-  
 sis sine mora expelleret. Veruntamen vi-  
 carius sapientiùs omnia considerans, &  
 iusta inquisitione persequentium mali-  
 tiam, & eorum innocentiam sagaciter  
 rimatus, noluit tantæ iniquitatis fieri au-  
 ctor. Vnde maiori furore accensi diabo-  
 li ministri, ad Marchiæ Legatum tendūt:  
 quid illi dixerint nescio; hoc autem vnū  
 scio: de mandato Vicelegati pauperes  
 nostros ex omni territorio iurisdictioni-  
 nis eius crudeliter fuisse eiectionis: capitur  
 Paulus quasi malefactor, & Maceratæ in  
 carcerem conijcitur: ita denique per-  
 cussus est pastor, & dispersæ sunt oues,  
 exulant sine causa dilecti filij, & amāti-  
 simus Pater clausus custoditur. O quantū  
 potest iniquorum hominum nequitia:  
 ò quan-



ò quantum nocet inconsiderati iudicis  
 temeritas. Infamatur sine crimine vir  
 purus infamia facti: expoliantur causa  
 incognita pauperes possessione sua; ex-  
 pelluntur, inquam, de nidulis suis, & eij-  
 ciuntur ad exterarum caulas. Atqui beni-  
 gnissimus Pater tanquam surdus non au-  
 diens, & tanquam mutus non aperiens  
 os suum in ergastulo iacet: sed nō ideo  
 cessat omni sollicitudine discipulos suos  
 crebris literis confortare, & ad animi  
 constantiam exhortari. Etenim extat  
 adhuc quædam eius epistola ex carcere  
 ad suos missa, unde hæc verba desumpta  
 sunt. Paulus victus Iesu Christi charis-  
 simis Hieronymo, & Desiderio, vniuer-  
 sisque socijs eorum, Salutem in Domi-  
 no, & pax in Spiritu sancto. Et post pau-  
 ca. Non equidem mihi carcer molestus  
 est, sicut vos existimatis: quos nec con-  
 tristari ob hanc causam velim, sed po-  
 tius congaudere mecum: quia dignatus  
 est Dominus omnipotens me indignum  
 seruum suum alicuius portiunculæ pas-  
 sionum dilectissimi filij sui facere parti-  
 cipem. Vnum tantum mihi & vobis cō-

Q

dolen-

dolendū censeo: quòd ego reus, & peccator meritò hæc, & si grauiora fuissent, sustineam: ille autem innocens, & immaculatus iniustè pro me passus sit. Et infra. Mementote, quæso, scriptum esse: Si cõpatimur, & congaudebimus. Quid? nonne ipsa Veritas ait: Beati eritis, cùm persecuti vos fuerint homines, & exprobrauerint, & eiecerint nomen vestrum tanquàm malum mentientes propter filium hominis. Et quid addit Euangelista? Gaudete in illa die, & exultate: ecce enim merces vestra multa est in cœlis. Et ego cum Apostolo dico vobis fratres mei dilectissimi, constantes estote, & immobiles, abundantes in opere Domini semper: scientes quòd labor vester non est inanis. Iam ergo cum eodem Apostolo dicamus omnes simul: Quis separabit nos à charitate Christi? tribulatio, an angustia, an fames, an nuditas, an persecutio, an gladius, an vincula? Sanè hæc omnia delitiæ sunt, solis charissimis Dei amicis reſeruatae. Et in fine. Oratio, inquit, fiat ab omnibus vobis pro me ad Dominum, vt ex hac me carceris



ceris custodia liberare dignetur. Tandē post dies sexdecim certior factus, & in se reuersus furibundus iudex, eum extrahi, & ad se adduci iubet: cui iam appropinquant, Parce mihi, ait, ò Pater: nō enim noueram te, nec tuos audieram. Et Pater ad eum, Parcat tibi Dominus: nam ego quid tibi remittam non habeo, conscius te nil in me facere potuisse, nisi quatenus fuerit à Deo præordinatum. Tales utique, ac multi extitere eodem tempore optimi Patris labores: tantæ siquidē molis erat Eremiticam condere gentē. In optimum denique finem desijt turbulentissima tempestas: ita ut verissimū sit, quod Propheta canit: Clamauerunt iusti, & Dominus exaudiuit eos: & ex omnibus tribulationibus eorum liberauit eos. Sed è conuerso fucati illi Eremitæ, qui iustum persequebantur, citò præcedentem versiculum eiusdem Psalmi lugentes, atque gementes decantauerunt: Vultus, scilicet, Domini super facientes mala, ut perdat de terra memoriam eorum. Nam post menses paucos primus eorum, & qui magis in sua malitia exar-

Q 2      serat,

ferat, dira febris correptus, in frenesim  
 lapsus, sese de fenestra quadam præcipi-  
 tem dedit: & sic iuxta peractam vitam  
 exitus eius. Alter verò persecutor, dum  
 scalas quasdā ascenderet ligneas, offen-  
 dens pede, è sublimi ad imum deturba-  
 tus, crure per medium fracto, vix semiui-  
 uus à concurrentibus leuatus est. Iacuit  
 diù prostratus in lecto, ita vt de eius  
 vita prorsus desperaretur. Verùm cùm  
 hæc audisset Paulus, valdè contristatus  
 est, & pro eo sine intermissione orans,  
 per dies quindecim in pane, & aqua iei-  
 nauit: vnde non immeritò eius precibus  
 infirmus curatus creditur. Non aliter  
 certè vindicauit olim Dominus Beati  
 Benedicti iniuriam, atque hodie Pauli  
 calumnias: morte punitus fuit mirabi-  
 liter malus presbyter Florentius; mor-  
 te quoque pœnas luit Patris nostri per-  
 secutor; cuius nomen ex industria  
 occultamus, nolentes notissi-  
 mam, ac claram fami-  
 liam, vnde ortus  
 erat, læde-  
 re.

DE



## DE MORVM RIGIDITATE,

atque celeri augmento congregationis nouæ. Cap. X.

**E**X TINCTIS itaque Dei beneficio malitijs omnibus, plenaq; pace fruente<sup>s</sup> Eremitæ nostri, atque à tumultu perturbationum vacâs noua congregatio, tota ad obseruantiam regularem Eremiticam stabiliendam conuersa est. O, si ea esset nobis describendi facultas, si tanta facundia, aut eloquentia; vt ad plenum eorum virtutes exprimere possemus. Sed præstat æquidem tacere potius, quàm imperfectè de tantis viris, deq; illorum eximijs animi virtutibus perperam tractare. Ibi namque inter eos pax summa, animorum vnitas, & charitas perfecta: ibi simplex humilitas, cordis puritas, & promptissima obedientia: ibi ieiunij continuatio, ciborum parcimonia, & strictissima abstinencia: ibi ardentissima deuotio, spiritualis feruor, & iugis oratio: ibi discreta taciturnitas, nulla verborum superfluitas, sed perpetuum silentium. Ibi de-

mum nuditas, rerum omniū necessitas; vera, ac sacrosancta paupertas, certantes inuicem quis studiosior foret: reuerentia, & honore se inuicem præuenientes. Atque adeò, quòd omnia superat, Paulus omnium maior, factus est omniū minister, & inter pauperes semper pauperior ipse visus est. Iter factururus, pedester; ita vt qui iuuenis absq; nauigio, aut equo ne miliarium quidem pedibus cōficere poterat, senex ieiunus ( vt ipse in Epistola ad Marcum Antonium Flaminium testatur ) viginti miliaria ambula-  
bat. Erat certè in se ipsum adeò crudus, vt tunica, quæ asperrima simul, & strictissima ambitu erat, aliquando in itinere ex eius nudistibijs sanguinē, rupta pelle, eliceret. In summa in infinitum tendere diceret, si cuncta eius strenuè facta enumerare vellem. Diulgabatur interdum seruorum Dei mirabilis conuersatio: ideoque vndique ad eos confluebant homines religiosum habitum auidius exposcentes. Venit tunc temporis ad Criptas Innocentius quidam Florentinus genere: vir iam dudum solitarię vitæ deditus, sed



sed obedientiæ inexpertus, habitū sumpsit, & in humili subiectione didicit obedire. Obtinuerat Innocentius in Apulia à Lacinensi Episcopo Ecclesiam Sanctæ Mariæ de Spiritu sancto nuncupatam, sitam in asperrimo monte, locoq; deserto, in qua ipse per annos aliquot habitauerat. Eandem Patribus vnâ secum obtulit vir bonus: eòq; idem illuc cum socijs paucis mittitur, quò & eundem locū Eremitico more construat, & alia Eremitoria, si Deus dederit, alibi erigat. Quod tanta diligentia, ac sedulitate fidelis Dei seruus adimpleuit, vt duas præter hanc, Eremos in breui obtinuerit in patria illa, & mirabili compendio temporis habitandas dederit. Vnde nostri in Apulia tria loca possederunt. Innocentius iste oblatum clericatum renuit, libenter in conuersorum classe abiectus laicus Deo seruire eligens. Miserunt ergo Patres ad singulas Eremos, quosdam de fratribus societatis, inter quos fuerāt venerabiles Sacerdotes Romualdus, & Zacharias, quorum alter Fabrianensis, alter verò Siculus, probatæ sanctitatis

ambo . Sed de successu istorum inferiùs  
 latiùs differendum erit. Pòst Innocentiũ  
 præfatum accessit venerabilis Romual-  
 dus Fabrianensis, qui intuitu virtutis ma-  
 gis quàm peritiæ factus est sacerdos. Ho-  
 mo natura blandus, & quietus: mundanæ  
 sapientiæ penitùs ignarus; spiritali au-  
 tem sapientia plenus : omnis terreni cõ-  
 mercij inexpertus ; quia omnis conuer-  
 satio eius in cœlis erat . Semper in casto  
 Dei timore manens, cordis sui custodiæ  
 incessantèr intendebat ; quare tantam  
 carnis puritatem adeptus est, vt nunquã  
 sit cum mulieribus coïnquinatus . Quãta  
 rursus in homine humilitas desiderari  
 debet, in ipso proculdubiò fuit: ore taci-  
 tus, mente quietus, corde semper in Deũ  
 eleuatus , mortalem maculam nunquàm  
 sciens contraxisse creditur. Tãta insuper  
 simplicitate præditus, vt cum Paulo illo  
 magni Antonij discipulo meritò veniat  
 comparandus . In laboribus, & ærumnis  
 vsquequaque patientissimus, adeò vt se-  
 mel ex Apulia in Picenum rediens à la-  
 tronibus in itinere captus, inq; mediam  
 syluam deductus, & arbori cuidam alli-  
 gatus,



gatus, ne minimum quidem mēstitiæ signum ostenderit: quin & bis baculo percussus, in sua spiritali alacritate immobilis permanfit: cū tandem astricto ense prædones illi mortem comminaretur, intrepidus persistens: facite, inquit, quicquid vobis ex alto permissum fuerit, mihi enim nihil interest cras, vel hodie mori: nam quod Deus cras daturus est, dabit & hodie. Prætereā in oratorio diuinis officijs continuus etiam decrepitus vsque ad vltimum diem (nisi infirmitate prædeditus) tenaciter perstitit. Semper in Psalmis, meditationibusque occupatus, vix momento ab oratione vacabat: facies eius nunquā perturbata visa est, sed semper hilari vultu cunctis apparuit, ex ore sacro quasi tacitū risum ac tenuem producens. Quod ei adeo assuetum fuit, vt etiam moriens ridenti similis absq; dolore, vel horroris signo, spiritum afflaret. Obijt autem beatus iste nonagenarius, post annum 56. conuersionis suæ in Monasterio Sancti Saluatoris Montis acuti MDLXXIX. Iisdē ferē temporibus ingressus est Religionē

hanc

hanc Placidus conuersus ex Fracta Urbini ortus, vir quadam naturali grauitate dotatus, statura procerus, corpore robustus, & laboriosus, promptus, & fortis, literarum rudis, sed ingenio sagax, ac iudicio clarus. Legalis, ac fidelissimus in omnibus actionibus suis. In solitaria cella silens, & abstinentissimus: obedientiæ, & regularibus obseruantijs iugiter incumbens: ad exteriora negotia (sine quibus Religio stare non potest) diligentē, atq; vtilissimū semper se præstitit. Vnde per annos multos œconomus cōstitutus totum patrimonium Abbatiaē sancti Saluatoris tanta diligentia, ac rectitudine administrauit, vt ea in re nec hætenus parē habuerit, nec habere speretur. In hoc autem mirabilis fuit: quòd siue iter faciens, siue manu laborans, domi vel foris agens, regularia ieiunia, Eremiticasque panis & aquæ abstinentias nūquā prætermisit. Denique in controuersijs componendis speciale donum à Deo habuisse, omnes qui eum norunt, autumant: ideoq; quoties inter paganos illos Fractenses aliqua de rebus rusticis orirētur iurgia,



iurgia, seu quævis dissidia nascerentur: adeamus, aiebant, Fratrem (sic eum per Antonomasiā vocabant) & quicquid ipse dixerit, sequamur. Vixit annos 78. in Religione verò 55. Obijt circa annum MDLXXX. Quantum iste religioni profuerit, si plene ostendere velim; nouo, ac longo tractatu opus esset.

VNIO QVAEDAM INTER  
nostros, & Camaldulenses inita, &  
Iustiniani Bergomensis ingressus. Cap. XI.

**N**E QUID narratione, cognituq; dignum negligere videamur, non erit abs re hęc quandam vnionem inter nostros, & Camaldulenses initam paucis adnotare: quò plenius totius ordinis animus erga societatem hanc dignosci queat. Dum igitur prædicto modo dilataretur, eaq; prosperitate frueretur noua Romualdi progenies: dum, inquā, in tanta quiete agerent Patres nostri, ecce ad Criptas missi sunt venerabiles Bernardus Pistoriēsis,

&

& Ventura Heluetius totius ordinis Camaldulensis illo anno visitatores: quò, videlicet, cum Paulo de cōiungenda sibi noua congregatione tractarent. Quod quidem negotium haud difficile fuit: eò quòd ab vna, eademque radice vterque ramus procederet: nec in substãtia professionis aliqua esset differentia. Paciscitur ergo, vt noua societas in suo maneat & conseruetur statu, ritu, & eēremonijs: saluis quoque sibi cunctis priuilegijs, ac facultatibus suis: manente etiam auctoritate celebrandi capitulum, prælatorumque eligendorum plena potestate. Item vt dilatari ad libitum possit, & quęcunque opportuna, ac benè visa in augmentum, vtilitatemve eiusdem facere: veluti nouas Eremos erigere, constitutiones cōdere, & omnia necessaria adimplere. Et tandem vt suo naturali nomine (hoc est) societas Eremitarum sancti Romualdi nominaretur. Econtrà sacrae Eremo hoc solummodò reseruatum fuit, vt in suo capitulo generali quotannis Maior nouæ societatis eligeretur: & per visitatores ordinis singulis triennijs no-



ui Eremitæ visitarentur. Et quædã alia,  
quæ in eiusdem vnionis instrumento la-  
tiùs apparent: quod actum est Fabriani,  
vndecima Decembris, M D X X I I I. con-  
firmatũ per Reuerendos Patres Cypria-  
num Abbatem Vallis Castrẽsis, Paulum  
Laudensem vicarium generalem, & Vi-  
sitatores præfatos: Paulo Iustiniano pro  
societate agente. Inter alias cõditiones  
hæc præcipua fuit; vt in sequenti capitu-  
lo generali omnia prædicta confirmarẽ-  
tur: quod actu, ficta que intentione factũ  
fuisse, rei euentus probauit. Quod cùm  
de eiusdem vnionis rescissione agetur,  
manifestiùs demonstrabimus. Ex hac ni-  
hilominus concordia magnum bonum  
societati euenisse in confesso est; nã eius  
occasione (quia ea vnione stante ab Ere-  
mo sacra ad nostros, & è contrà transitũ  
facere cuique licitum erat) aliqui Ca-  
maldulenses in Picenum ad Paulum ve-  
nerunt. Quorum insignior Iustinianus  
Bergomas, vir doctrina eximius, eloquẽ-  
tia rarus, naturali ingenio clarus, mori-  
bus ornatus, ac religione pius: de quo  
Delphinus pluribus in locis plenum, ac  
pul-

pulchrum reddidit testimoniū . Hic primò Monachus Benedictinus, postea Eremita factus, per annos octo, vel circiter Camalduli vixit : vbi cum nostro Iustiano magnam contraxit in Spiritu sancto necessitudinē . Vnde iam à principio optauerat ipse ad Criptas descendere, sed sua prudentia, ac maturitate vtens, honestam causam id faciendi voluit expectare, quam adeptus statim arripuit. Iuuit etiam hoc pium desiderium, quod ipse nuper strictioris vitæ cupidus reclusionem à superioribus humiliter petierat, quæ penitus ei fuerat denegata. Quātus hic in religione nostra fuerit, quantumq; ipsam iuuerit, & auxerit, suis in locis apparebit : nunc autem hoc vnum dixisse sufficiat, quia per annos triginta, aut eò ampliùs societatem laudabiliter rexit .

## DE CONVERSIONE Galeatij Gabrielij Fanensis. Cap. XII.

**G**ALEATIVS Abbas, cuius non semel retrò mentionem fecimus, per annos quatuor, post primā eius promissionem



fionem, quia diues erat, suam conuersio-  
 nem protraxit: qui tamē anno **xxiiii**.  
 prudenter religionis successu considera-  
 to, ac penitus à thecnis, tricisq; Mundi  
 extricatus, se ipsum Deo dare non con-  
 tentus; sua etiam omnia, tam ecclesiasti-  
 ca, quam secularia bona vnà secū dedit.  
 Habitum namq; Eremiticum susceptu-  
 rus, ita se Deo vouere voluit, vt nihil om-  
 ninò ab Apostolica conuersione discre-  
 paret. Cuius vtique ingressus plenissima  
 religionis huius confirmatio extitit: pu-  
 tà, quia ab eo vnde sustentaretur, acce-  
 pisse exploratum est. Idcirco meritò illi  
 nomen Apostoli Petri in conuersione  
 sua datum est: pro cuius Simba, ac rete,  
 beneficia, & patrimonium reliquit; vt  
 Christum expeditus, nudusq; sequeretur.  
 Diximus superiùs hunc obtinuisse,  
 præter alia beneficia, Abbatiam sancti  
 Saluatoris Montis acuti diœcesis Peru-  
 sinæ. Monasterium hoc, ordinis olim Ci-  
 sterciensis, antiquissimum est, quantum  
 ex consecratione Ecclesiæ percipitur;  
 quæ facta est anno ab Incarnatione Do-  
 mini **mcv**. ditissimum olim non solum  
 pos-

possessionibus, sed & vassallis, villis, & castris; necnon iurisdictionibus, & dominij; quod latius apparet in quodam vetustissimo instrumēto; cuius transumptū in archiuo MONTISCORONÆ custoditur: reperto mirabili modo in Monasterio sanctæ Columbæ Perusij. Quæ omnia elapsis temporibus, ingruentibus Tyrannorum bellis in Hetruria; dissipata, direpta, atque vsurpata fuere: & quod durius est, ipsius Monasterij ædificium dirutum; nunc autem à Patribus appositè reparatum. Nam præter claustrale ædificium, in quo multæ ac perutiles tam infirmis, quàm bene valentibus mansiones resectæ, nouiterque fabricatæ hodie cernuntur: templum quoq; non mediocriter ornatum conspicitur. Templum verò istud magnitudine rarum; vetusta structura magnificum, operis artificio mirandum. Nimirum latitudine, longitudineq; spaciosum, ac mira profunditate sublatum, cuius pauimētum in duas figuras diuisum constat: quarum altera humilior, defunctorum sepulchra continet: altera fortissimæ testudini imposita altior



altior habetur, quæ in tria spacia, seu ambulatoria mediantibus columnis sub nouis testudinibus posita diuiditur: in quorum medio maius altare pulcherrimum, ad cuius posteriora Chorus, dum hæc scribuntur factus, materia, & arte pulcherrimus. Sub inferiori testudine, quæ multis columnis innititur, sacellum Beatæ Mariæ sacratum, miræ deuotionis continetur. Est autem Monasterium hoc non longè ab oppido Fracta, quæ Perusina dicitur, fundatum in calce Mōtis Acuti, à Tyberi amne notissimo vix centum passibus distans. In plano iacet, ad orientem torrētem quendam habēs, à cuius aquis statim in Tyberim defluentibus, ædificij fundamenta continuo abluuntur. Ante hostium non paruæ magnitudinis ager aperitur, ab utroq; latere iuxta fluminis ripam in longum prætensus. Est & molendinum ad fines agri positum: sunt & vineæ, & multæ vlmis coniunctæ vites: sunt castaneta, ac fructu plura: necnon trans Tyberim latè patet patrimonij territorium. Vnde non exigui fructus quotānis prouenire solēt.

Ex aduersa prædicti torrentis ripa, qua Orientem respicit, Mons quidam infurgit, cui Coronæ nomen indiderunt antiqui: mons, inquam, non modicæ celsitudinis, nec paruæ latitudinis. Ab Oriente Tyberis vnda, siue alueo per duo miliaria circūcinctus: à meridie torrente concluditur: ab Occidente tandem valles habet duas in primum torrentem decedentes. Ab alijs quibuscumq; montibus longè distinctus, ac separatus sedet, propter plures ac fultissimas sylvas visu pulcherrimus; castaneis, malorum copia, alijsq; omnis generis fructibus abundās, lignorum abundantiam, & olei copiam cultoribus præbens, nec pascuis carens. Talem quippè locum futuris seruis suis iam olim Deus præparauerat. His ergo beneficijs simul cum Galeatio, Dei prouidentia acquisitis, Patres quasi plenum prouectum, ac stabilitatem nouæ societatis cernentes, incessanter vigilabāt meliori quodam, ac perfectiori ordine in dies cuncta disponere.



DE RECISIONE PRAECE-  
dentis vnionis. Cap. XIII.

**C**VM de quadam vnione, siue cō-  
cordia inter nostros, & Camal-  
dulenses inita ageremus, hanc  
conditionem contractui quadam sancta  
astutia appositam, dixisse memores su-  
mus: vt, videlicet, in primo generali ca-  
pitulo omnia pacta, & conuentiones no-  
uam confirmationē accipere deberent,  
quo res ipsa suum robur, atq; firmitatē  
adipisceretur. Id autem quam ob cau-  
sam factum fuerit, ex subsequētib; fiet  
manifestum: finis tamē eorum optimus.  
Cuncta etenim excogitata fuerant, quo  
abolito nomine nouæ societatis omnes  
eius colonos ad se traherent, & vniuersa  
in eorum commodum verterentur: nam  
tunc temporis sacra Eremus penuria ho-  
minum satis laborabat. Quam penuriā  
non parum augebat discessus eorum, qui  
illinc ad nostros in dies descendere cer-  
nebantur: quod inconueniens radicitus  
tollere, illis visum est necessarium. Ac  
proinde Capitulum, quod sequenti anno

celebrandum erat, in alium sequentem, ut nostros quadam molesta expectatione afficerent, præter morem & consuetudinem protractum est. Rursus, dum dilatio ista prolōgatur, multa per Camaldulenses Patres contra pacta, & cōventiones innouata fuere, quæ vix honesta, nedum iusta censebantur. Tandem aderat tempus, quo Camaldulenses Patres ad generale Capitulū conueniebant, quod celebratum est in monasterio Classensi anno M D X X V. Quam ob rē ut inchoatæ concordia, siue vnioni vltima imponeretur manus, venerabilis Paulus cum Hieronymo Sueffano illuc properare coactus est. Et ne in ratiocinijs hinc inde in Capitulo super hac re deductis tēpus superuacue conteramus, cōclusionē facta, Patres Diffinitores Paulo suadere conantur, ut nulla concordia mentione habita, se, suosq; Camaldulo subdere non recuset; obijcientes ei pauperimæ vitæ labores, ac nimiam in ea perseuerandi difficultatem; sicq; sacra Eremiti opes societati suæ lucri facturum se, eoq; in æuum permanfuram, alioquin in breui



breui finem habituram eius religionem:  
quod si facere recuset, annullandas esse cō-  
ventiones omnes cū Visitatoribus olim  
initas. Quibus auditis, virili vultu, vt ei  
de more erat, Paulus in hunc modum re-  
spondit. Ego Patres, ob spiritualia bo-  
na, non propter temporalia commoda  
in vnum vobiscum conuenire optabam,  
simulque conuiuere: temporalis autem  
vtilitatis ratione subiectionem, quā ex-  
poscitis de nouo facere, neque ratio po-  
stulat, neq; charitas patitur. Is ego sum,  
qui nunquā de misericordia Dei despe-  
rauerim; sciens Dominum mendicorum  
ac pauperum suorum esse sollicitum; vt  
potē, qui non derelinquit quārentes se.  
Quod sanē non solū sacrarum scriptu-  
rarum testimonijs didici, verū etiam  
re ipsa plenissimē sum expertus. Ecce ab  
hīnc annis quinq; ex vestris Alpibus de-  
scendens, cum baculo (velut alter Iacob)  
transiui Iordanem; & nunc cum turmis  
Fratrum reuertebar ad vos. At pasqua  
ouibus meis defutura nihil vereor: ille  
namque, qui producit in montibus fenū,  
& herbam seruituti hominū; ipse dabit

& gregibus meis (quorum indignum me  
pastorem fecit) vberima pabula. Non  
magnis opibus egent, qui leuissimo cibo  
ac parco, qui vilissimo ac rudi tegumē-  
to contenti sunt. Has tandem diuitias,  
quas nobis offertis, vobis in pace habe-  
te: nos in paupertate nostra latantes  
permanebimus. Quod de dissoluendis  
conventionibus locuti estis, non displicet,  
dummodò alio nouo instrumēto di-  
stractus fiat, in quo primus contractus  
perfringatur. Hæc itaque cū vtrinque  
placuissent, facta est noua scriptura, quā  
authenticam apud nos habemus, stipu-  
latam in eodem monasterio per Fratrem  
Parisiū Capituli Scribam, die decima  
Maij M D X X V. qua primus vnionis con-  
tractus recisus est.

DE PRINCIPIO CAPPVCINI-  
norum. Cap. XIII.

**P**RÆDICTO modo sopito ne-  
gotio, dūm Paulus ad sua reuer-  
sus in Eremo Criptarum, in ca-  
uernis illis, optatam duceret quietem:  
ecce



ecce sequenti anno **xxvi.** duo Fratres ordinis sancti Francisci de obseruantia ad eundem veniunt. Ij Fratres germani erant, patria Foro Semproniani: quorū alter Ludouicus, alter Raphael nuncupatus. Ambo (res mira) Spiritu Dei agebantur nescientes: nam cum Apostolica licentia à propria religione discesserāt: ac proinde vagātes Italiam circumibāt, quò tenderent, aut quid quærerēt, prorsus ignorantes. Audita deniq; Pauli suorumq; pia conuersatione, quasi curiositate quadam ducti, illuc accesserunt; vbi per dies aliquot commorati, solitariae vitæ amore capi, atq; tale institutū laudare ceperunt. Veruntamen cū Dei voluntas, cui resistere nemo potest, aliò eos vocaret: vtriusq; animus, immò diuinus spiritus manere ibi non permittebat. Postremò de se ipsis piè propter mentis instabilitatem conquerentes, ruboreq; perfusi erubescences inde discesserunt, in patriam reuertentes. Erat tūc temporis quidam Frater eiusdem ordinis, nomine Matthæus à Bacio, qui simplici licentia Papæ habitum, quo nunc

vtuntur Cappucini, primus omnium induerat (quo tamen nō semper utebatur) sicque indutus sine certa sede per varias Italiæ prouincias discurrendo (passim infernum conclamando) æternas poenas peccatoribus sine arte aliqua sola vociferatione comminabatur: in quo exercitio & vitam consumpsit, diesque suos Venetijs clausit. Erat & in territorio Carraceti quidā Frater Franciscus Eremita ætate decrepitus, infirmus, sui præ senectute impotens, vita præclarus, atq; Prophetiæ spiritu dotatus. Hic præfatū Matthæum monstruoso habitu indutū (per biduum antequam accederet) ad se venientem in visione vidit. Ecce venit equidē Matthæus, vt senex prædixerat: quo viso, exultauit animo infirmus, & illum esse verum, natiumq; Diui Frācisçi habitum pronunciauit. Iisdem diebus, dum Matthæus illic ageret, ad sanctum Eremitam visendum, non sine Dei operatione, accedunt Semproniani Fratres. Qui cū Matthæi nouum indumentum conspicerent, audissentq; ab ipso sene illam propriam esse beati Francisci vestē, non



non dubitarunt, assuetis vestimentis re-  
 iectis, illam sibi assumere gaudentes. Illo  
 igitur nouo, & nondum perspecto habi-  
 tu induti ad nostrum Paulum in Criptis  
 adhuc agentem reuertuntur. Cui mirāti,  
 causasq; tantæ mutationis perquirenti,  
 rem, vt gesta est, gestientes præ gaudio  
 narrāt: cūmq; instaret Paulus quid inde  
 agere cum nouo habitu intenderent: se  
 penitūs nescire, quadam erubescencia,  
 fatentur. O quàm incōprehensibilia sunt  
 opera tua Domine: ò quàm inexcruta-  
 biles sunt viæ tuæ. Relinquunt primam  
 Religionem; habitum mutant; huc, atq;  
 illuc cursitant, quid sibi expediat, delibe-  
 rare nullo modo queunt: ignari prorsus  
 quid ista parturiant. Atqui non dormit  
 interim Satanas, timens sagaci coniectu-  
 ra id, quod postea secutum est: eòq; il-  
 lorum præpedire vias non cessabat. Fa-  
 ctum est siquidem, vt dum apud Paulum  
 modicam capiunt refectionem, à curiæ  
 secularis ministris inuasi raperentur, &  
 vincti ducerentur in carcerem Massacij:  
 & hæc facta sunt instātibus Franciscanis.  
 Paulus contra tantam iniuriam Deo pri-  
 mum,

mum, deinde sibi ac Religioni simul, ob  
 sacri loci violationem illatam dissimu-  
 lare non potuit. Captos pauperes viri-  
 liter repetit contra renuentes captores  
 (in vim priuilegiorum suorum) fulminat  
 excommunicationem. Quo factum est,  
 vt cuncti seculares ministri ad Patris pe-  
 des reuoluti restituerent captos. Qui ne  
 alia noua malitia vexarentur, statim no-  
 ctu per nostros ad Pascilupi rupes trans-  
 missi sunt. Hinc post dies paucos, quasi  
 oues aberrantes, Camerini proueniunt.  
 Ciues ridiculos cucullos aspicientes ir-  
 rident homines: pueris post eos accla-  
 mantibus, Cappucinos, Cappucinos: ex  
 qua acclamatione tale illis nomen re-  
 mansit: & ex ore infantium perfecta est  
 laus. Narratur Ducissæ quasi inaudita vi-  
 sio: iubet illa accersiri homines: veniunt  
 in Ducale Palatium viri. Quibus visis, nō  
 risit, sed obstupuit nobilissima mulier.  
 Hæc Genuensis erat, Catherina de Cibò  
 vocata. Percontatur diligenter ab eis  
 quid sibi velit monstruosæ vestis forma,  
 quò tendant, quæ eorum religio, quidvè  
 facere intendant? Tunc primū apertum  
 est

*Cappu-  
 ci nomen*



est os illorū, & locutus est Spiritus in eis: quid pectore gerant pleno Ducissæ intiment sermone. Illa diuinitus afflata, sine mora ad Clementem Septimum, qui tūc Petri clauēs tenebat, scribēs misit; à quo sine difficultate aliqua, plenissimū indultū pro fundatione Regulæ Cappucinarum obtinuit, & iuxta urbem eis monasterium ædificauit: quod primum huius religionis fuit. O ineffabilem Dei sapiētiam, quā suauiter omnia per te disponuntur. En tibi optime lector, quomodo tāta, tamq; sancta religio incepta sit. En quā pauperes, quā simplices habuit auctores. En denique quale principium eius, & quā miraculosum extitit. Hoc præterea sciēdum est ex illa prima cum nostris Eremitis breui cōuersatione semper inter vtramq; religionē, quādam radicatam mansisse mutuam charitatem, & sanctissimam amicitie coniunctionem. Item à nostris quædam peculiariter sibi communiter seruanda sumpsisse: quale est, barbam oblongam deferre: necnon sine cantu, solaq; distincta pronuntiatione diuinās laudes persoluere

uere, & quædam alia minuta. Quemadmodum postea hæc eadem Cappucino-  
rum religio per Franciscum Astensem,  
& Bernardum Eginensem, & alios reli-  
giosos viros ampliata fuerit, non est no-  
strū pertractare: quamobrem ad ea, quæ  
dudum reliquimus, redeundum est.

PAVLVS PRAEVIDET IN-  
fortunium venturum. Cap. XV.

ÆQUVM esse duximus, ne aliqua fan-  
cti viri virtus occulta remanere cō-  
tingat, præiūsum ab ipso infortunium il-  
lud, quod Romæ simul cum Petro Fanēsi  
inuitus expertus est, succinctè exarare.  
Sciendum igitur Abbatiam sancti Salua-  
toris, in renunciatione ab ipso Petro fa-  
cta, non fuisse in perpetuū societati vni-  
tam, sed ad vitam ipsius renunciantis tã-  
tū. Quam ob rem nostrates omnes Pa-  
trem stimulare non cessabant, vti viuen-  
te Clemente Pontifice, illi, societati quæ  
propitio, perpetuam vnionē obtineret.  
Ea igitur die, qua vnà cū Petro iter factu-  
rus erat, aurora illucescente (re sacra  
peracta)



peracta) titubare, seu veriùs timere agnitus est: cui Petrus; cur Pater ad iter non accingimur? Ego, ait ille, timeo frater, ne citiùs quàm oportet, Romam perueniamus: sentio enim aliquid nobis aduersi imminere. Cùmq; omnes eū alacriter ad iter verbis multis impellerent, nec esse imaginationibus vanis credendum affirmarent: vtinam, inquit, fallar ego, dummodo vos veraces dicere possim. Sed ne animos vestros contristare videar, ibo: sciens utiq; nullibi nos manus Dei posse effugere, vel eius reniti voluntati. Et baculo assumpto, viam qua iturus erat, Petro sequente, ingressus est. Cùmq; vix triduo Romæ cōmorati essent: ecce de repentē furia illa infernalis: Dux, inquam, Borbonius cū exercitu suo eandem urbem inuasit, quæ (vt nota est historia) capta, direpta, & miserè depredata extitit. In ea direptione nemini parcitū est, nec etiā Papæ: sed vt alios missos faciamus, Patres nostri per manus Teutonicorū capti, captiuatiq; sunt: & cū eis vir clarissimus Ioannes Petrus Carrafa Episcopus Theatinus, qui postea

stea Cardinalis factus, & deinde in Papā assumptus, Paulus Quartus dictus fuit. Etenim ij cū alijs multis ad Ecclesiam sancti Iacobi, quæ Hispanorum dicitur, confugerant. Sed (vt Horatius ait) cantabit vacuus coram latrone viator; videbant eos milites in habitu pauperrimo, nihilque habere intelligebant; quocirca eosdem illæsos dimittere non sunt diū tergiuersati. Dimiserūt quoq; Carrafam prædictum, pauperrimū tunc temporis virū. Ij tres simul, ne iterū in manus militū inciderent, ad mare currunt, inde nauicula vecti in Tusciā deducūtur: hinc denique Venetias terrestri itinere pergere decreuerūt. Vbi relicto Carrafa, Patres ad sua festini per Adriaticum sinū remearunt Eremitoria. Ferunt per eundē Carrafam, dum illa vice Venetijs ageret, cœnobium sancti Nicolai Teatinorum fundasse. Extat præterea Epistola quædam propria manu scripta, ex qua ostēditur eundem Carrafam voluisse cū quibusdam socijs simul cum Paulo Eremitam fieri; sed ad aliud maius à Deo vocatus, nō potuit desiderium adimplere.

Belli-



Bellicum illud flagellum secuta est, haud multò post, atrocissima pestis, quæ non vnâ, aut alterâ urbem, sed vniuersam infecit Italiam. Hæc epidemiæ lues nesciens parcere bonis, nec Paulum piissimū Dei seruum immunem euadere permisit; immò eum in inguine crudeliter percutiens, ad vitæ discrimen vsq; perduxit: qui tamen Dei beneficio, & suorum Fratrum assiduis precibus, paulatim declinante morbo, non sine magno, diuturnoq; labore, saluti restitutus fuit. Vix cicatricis cute obducta, Romā redire necesse habuit: quo simul duobus Fratribus Camaldulensibus, sibi nimia charitate iam olim astrictis, eius apud Pontificē intèrventione egētibus, subueniret.

DE MORTE PAVLI, ET LAV-  
dibus eius. Cap. XVI.

**I**Taque cū primū Romam venerat Pater, pedibus oscula daturus ad Clemētē ingressus: Abbas quoq; sancti Pauli extra urbem ordinis Cassinensis præsens aderat, qui tali nomine  
Eccle-

Ecclesiam sancti Siluestri montis Soractis possidebat. Senferat iam aliàs Pontifex hūc locum à Paulo desiderari, adq̃; solitariā vitam esse valdè idoneum: cūq̃; ambos coram se aspiceret, ab Abbate consensu habito, Paulo dictam Ecclesiā cum suo Monte, aut certè parte illi contingenti concessit. Verūm dum hoc negotium agitur, dumq̃; in liberandis Fratribus prædictis Romę detinetur Paulus, dolore capitis, leuiculaq̃; febri laborare cepit. Sed ne charitatis opus infectum defereret: donec Fratres liberaret, sustinuit. Febricula igitur illa affectus, ad Montem Soractem, viginti passuum millibus ab vrbe distantem, se (vt melius potuit) confert: vt Romam nondū peste purgatam fugeret, ac salubriorem aerē, qualem Mons ille habet, sibi comparatū experiretur. Veniens tandem illuc ab habitatoribus charitatiuè suscipitur, ac benignè tractatur. Verūm crescente per singulas horas radicata semel febre, breui temporis spacio ad mortis articulum senex deuenit. In extremo hoc, cū periculosum videret eum Cōuersus itineris comes



comes (cui Iacobus nomen erat, patria Eugubinensis) in lachrymas prorupit. Quod sentiens pius Pater: quid, inquit, luges frater? Cui ille: Lugeo optime Pater, videns te morti propinquum, nec est qui te exeuntem pijs verbis (vt fieri solet) consoletur: meque tuo dulcissimo aspectu priuari, & omnium fratrum meorum carere auxilio concernens. Ah modicæ fidei, infirmus ait, nunquid deerit nobis Deus? & si ille nobiscum est, alterius auxilio non egemus. Bono animo esto, non deerunt nobis consolatores, aderunt & adiutores tibi: cuncta Deo remitte, disponat ipse secundum voluntatem suam. Ecce vix vnus horæ spacio transacto, cellam in qua languens iacebat, ingreditur venerandus Pater Gregorius Bergomensis Eremita: qui & Maior sacre Eremitæ Camaldulensis; & circa annum M D X I. Prior quoque fuit generalis, vt quodam publico instrumento constare vidimus. Erat autem alio Sacerdote, & Commisso quodam comitatus. Apud quem Paulus semper in magna veneratione fuerat. Cum itaq; Gregorius

præfatus Romam iter faceret, negotia  
quædam suæ Eremitæ expediturus: dumq;  
in quodam ex hospicijs illis, quæ ad ra-  
dices eiusdem montis sunt, reficeret: nar-  
ratum illi est in Eremitorio sancti Silue-  
stri quendam sui ordinis Eremitam gra-  
uiter infirmari: ille de corporis habitu-  
dine & indumentis certior factus, plenè  
cognouit infirmum Paulum Iustinianum  
esse. Nec mora, relicto itinere, festinus  
Soractem Montem ascendit: & vt dixi-  
mus, ad cellâ morientis amici peruenit.  
Viso autem infirmo simul cû lachrymis  
hæc verba effudit. Nosti optime Pater,  
me tibi semper fidum fuisse in Christo  
fratrem: nec ignoras quanti semper fe-  
cerim salutem non corporis, sed animæ  
tuæ. Ecce Dei prouidentia factum est, vt  
hac transitus tui hora ego adesset tibi;  
qui eodem fidelitatis zelo, quo hætenus  
tecum egi, te ad foelicem exitum bona  
firmaq; fide suscipiendum exhortarer.  
Et hinc exordium sumens ex literis sa-  
cris, ac Sanctorum optimè dictis docu-  
mēta multa, ac salutiferas doctrinas ad-  
ducens, in longum protraxit sermonem:  
quo



quo propter eius efficaciam, morientis animam contra vim morbi in corpore retinebat. At eo modicū loqui cessante, respirans Paulus exclamat: Suavis Dominus vniuersis, & miserationes eius super omnia opera eius. Non mei meriti fuit, sed diuinæ miserationis opus: vt tu charissime frater & Pater mihi emigrāti assisteres, meq; catholica exhortatione morientē in fide confirmares. Qua de re Deo meo primū, ac deinde tibi gratias ago ingentes: oroq; supplex, vt sicut lætatus sum in his, quæ dicta modò sunt mihi: ita Dominus concedere dignetur, animam serui sui lætantem ire in domū suā supernam, eiusque pedes stare faciat in atrijs coelestis Hierusalē. Adesto tu iam mihi, ò Iesu bone, vnica spes mea, sola salus mea; cui soli vixi, cui vni morior: & suscipe in misericordia tua spiritū meū, quem in manus tuas commendo: quia tu redemisti me Deus veritatis. Quibus sic dictis in bona pace quieuit, die 28. Iunij, vigilia Apostolorum Petri & Pauli, anno vt diximus, M D XXVIII. ætatis sue quinquagesimo secundo. Venerabilis autem

Gregorius Pater indenō recessit, donec defuncti corpus debitæ sepulturæ datum est: & foeliciter emigratæ animæ iusta persoluit. Exultate ergo in Domino, o vos foelices tanti viri discipuli, ex præ-narrato fine certiores facti, fidelissimum Dei seruū fuisse magistrū vestrum: qui in pauca fidelis repertus, suprā multa à Domino constitutus, atq; in gaudiū Domini sui ingressus, iubilo plenus regnat in coelis. Lætare & tu Eremus sacra Camaldulensiū, quæ tam præclarū Mundo, Deoq; dedisti alumnum: à quo vicissim tam scita dogmata, tamque multa bona recepisti: quiq; pro reformatione, siue tui instauratione tam multos pertulit labores. Venerare eum, cuius miraculosa opera tu brachiū sanctissimi Romualdi decorata, ornataq; possides: quo per annos quingētos carueras. Iubila tu quoq; tātō auctore fata, vltima Romualdi proles, vniuersa Eremitarū Montiscoronæ societas: iubila, & gaude tanti syderis illustrata fulgore, omniumque mirabilis progenitoris tui virtutum ditissima hæres.



VIRTUTES, ET OPERA PAULI  
describuntur. Cap. XVII.

**Q**Uis quæso, eius animi dotes,  
 quis charitatis ardorem, quis  
 integerrimæ vitæ sanctita-  
 tē, aut proprios perfectio-  
 nis in eo gradus adnumeret? Hic verè  
 Israelita, in quo dolus non est inuentus.  
 Hic lucerna accensa sub modio non ab-  
 scondita, sed posita super candelabrum,  
 vt religionem ingredientiē lumen vide-  
 rent: nec habuit innam à Domino sibi  
 traditam, repositam in sudario: quinim-  
 mò sanctè negociando, eius mna decem  
 mnas fecit. Hic verè diuitiarū osor, qui  
 semel & iterū possessas opes contēplīt:  
 religiosæ obseruatiæ vnicum exemplar:  
 austeritatis Eremiticæ perpetuus vin-  
 dex: in laboribus perferendis strenuus,  
 & infatigabilis. Hic doctrina plenus, ver-  
 bo potens, calamo facundus, atq; luculē-  
 tus. Nec vacua fuit in eo gratia Dei; cū  
 multos à via peccati conuerterit, quos  
 secum ad Religionem traxit: plures vel  
 alibi, vel domi piè viuere edocuit: innu-

meros à blanditijs seculi ad durissimam  
 poenitentiam, viuo sermone, operibus  
 exhibitis transire compulit. Scripsit  
 prætereà ( vltra sæpe commemoratas  
 constitutiones Eremiticas, seu regulam )  
 opuscula multa, & præclara, è quibus ex-  
 cussa publicè circumferuntur nunquàm  
 fatis laudatus libellus, cui titulus est,  
 Tractatus obedientiæ. Necnon & alter  
 libellus sub nomine Epistolæ ad Mar-  
 cum Antonium Flaminium virum do-  
 ctissimum missæ: vbi vera hominis fœli-  
 citas, seu beatitudo, quæ sit, fusiùs pe-  
 rindè ac disertè demonstratur. Necnon  
 alius de officio Pontificis ad Leonem  
 Decimum. Item extat tractatus de de-  
 cem gradibus amoris Dei perutilis, atq;  
 elegantissimus: qui licèt suis partibus  
 absolutus, tamen neglectus iacet. No-  
 uissimè composuit tractatum de poeni-  
 tentia; quam ipse propria experientia,  
 nedum longa lectione didicerat. Alte-  
 rum conscripsit de contemplatione ex  
 varijs auctoribus relictum: cui ter-  
 tium addidit de Eucharistia. Reliquit  
 & non pauca opuscula, nimirum morte  
 præoc-



preoccupatus imperfecta: quæ omnia simul cum supradictis sparsa, & dissipata, puluereq; obrita hæctenus reperiuntur: eademque cõmemorat in quodam memoriali inde confecto venerabilis Pater Iustinianus Bergomenfis: quæ centenarium numerum superant; vbi videas. Miracula fecisse absolutè non affirmabo, sed miraculosè quædam eum operatum fuisse dicere ausim: è quibus præcipua saltem referre non pigebit. Ac primum cum ei à presbytero quodam muliercula tertij ordinis Sancti Francisci tanquam sancta laudaretur, talemque propter eius mirabilem vitam, propterque eius miranda facta, ab omnibus haberi, ac reputari asseribat presbyter: propterea quòd quotidie communicabat, & futura prædicebat, & sæpe hostia è manibus presbyteri in os eius communicantis per se euolabat. Ostende, inquit Paulus, & mihi mulierem istam; & secutus presbyterum ad mulierem peruenit. Quam statim vt vidit, non est Dei spiritus eius, ait, sed fraus inimici latet in ea. Obstupuit Sacerdos,

& qui cum eo erant, in verbis istis: & quasi delirum irriserunt Patrem. Atqui ante decimum quintum diem decepta femina in furiam conuersa, palàm ostendit quid gerebat in pectore; atque detecta est antiqui serpentis malitia. Est in Monasterio sancti Blasij apud Fabrianum (vt primo libro diximus) sancti Romualdi sepulchrum: quod duabus feris diuersarum clauium obseratur: quarum vna apud Abbatem, altera verò penès populi rectores custoditur. Illuc Cardinalis quidam magnæ auctoritatis venit, desiderans sibi aliquam sacratissimi corporis reliquiam habere. Referatis itaque vtrisque feris, multisq; secum fortissimis viris innitentibus, lapidem monumento superpositum (qui valdè magnus, grauissimusque existit) nunquàm leuare potuit. Qua de re obstupescens, & intimò Cardinalis timore percussus, re infecta recessit. Ad idem sepulchrum accessit Paulus noster, qui vna tantùm ex feris duabus referata (nā ad hoc populares consentientes non erant) vnico Monacho adiutus, eò usq;

mau-



mauseoli grauiſſimum opertorium eleuauit, vt facilè immiſſa manu, dexte-  
rum brachium ſacri cadaueris inde ex-  
traheret : quod ſecum decenter in qua-  
dam theca Camaldulum (erat enim tūc  
ſacræ Eremi Maior) detulit. Qua pre-  
tioſa gemma Eremus ipſa ornata hodie  
coruſcat. Poſtremò, nonne myſterium  
ſapit illud ſupradicti perſecutoris eius,  
qui fracto ſemore ſine ſpe aliqua iam iā  
moriturus, ieiunio & oratione Pauli ſa-  
natus eſt ? At longum nimis eſſet, ſi ſin-  
gula, quæ mirabiliter geſſit, hīc exarare  
velimus. Satis, abundeque ex prædictis  
conſtare debet beati Patris ſanctitas, &  
ſuprànaturalis operatio eius : ipſe ſibi  
teſtis idoneus innocentia ſua : accla-  
mantibus omnibus, qui nouerant ipſum.  
Vale ergo beatiffime Paule ; & quia cum  
eo, cuius nomen in terris adeptus es,  
bonum certamen certasti, & curſum fœ-  
liciffimè conſumaſti, fidemque ſeruaſti :  
cum eodem corona iuſtitia fruere in cœ-  
lis ; quæ tibi olim repoſita, hodie au-  
tem reddita à Domino iudice iuſtiſ-  
ſimo.

QVAN-

## QVANTAS PERTVRBATIO-

nes passa sit post mortem Pauli congregatio. Cap. XVIII.

**S**I QVANDO, quod sæpe vsu venire videmus, numerosæ familiæ patrem, qui suos benè alat, ritè, prudenterque gubernet: morte, vel casu è viuis emigrare contingat: turbatur vniuersa domus, in planctum prorumpit derelicta vxor, orbatì liberi lugent, lachrymas effundunt ancillulæ, famuli tristantur: abijciuntur lètitiæ vestes, induuntur lugubres: domus ornatus tollitur: &, vt poeta canit, vbique luctus, vbiq; mœror, & plurima mortis imago. Porro non aliter affecta est, tanto duce, tantoq; parente priuata, Eremitarū noua congregatio: parente, inquam, pijsimo, atque omnibus benefico: duce vero, prouido, prudente, doctissimo, ducere ac docere perito. Ecce quasi temone amisso, fluctuatur nauicula ista, velutque inter tumentes vndas derelicta agitur. Despondent animum pusillanimes, ac nullum sibi adiutorium ampliùs suspersisse



peresse credunt: desperant contristati,  
 nec alium dari de cetero consolatorem  
 sperant. Alij maiori anxietate præmun-  
 tur, existimantes in tanta paupertate, fa-  
 me, laboribusque attritis fratribus non  
 esse futurum æquè sollicitum altorem.  
 Dubitabant multi de regiminis defectu,  
 & instigante Satana, nō solū de disces-  
 su cogitabant, sed etiā secum alios tra-  
 here nitebantur. Quid plura? incipiunt  
 sine pastore aberrare oves: ac quasi ve-  
 niente lupo terrentur agni, maleq; irri-  
 tatus grex abhorret ouile. Attamen se-  
 niores, & qui meliori utebantur consi-  
 lio, grauiori pede incedentes aliter agē-  
 dum sentiebant: remq; maturiūs pon-  
 derantes, modum sedandi agitados ani-  
 mos excogitant. Congregantur igitur  
 seniores Patres in vnum, atq; hinc inde  
 singulorum collatis votis, imminenti-  
 tibus malis mederi prudenter statuunt:  
 præcipuè tamen de confirmandis fratri-  
 bus satagentes, quomodo id salubrius  
 fieri queat, sagaciter pertractant. Ad  
 hoc non minus difficile, quàm vtile ne-  
 gotium, Venerabilem virum Danielelem  
 Vene-

Venetum in locum demortui Pauli substituant; omnē potestātē in eū cōi voto cōferentes. Erat autem homo iste naturali grauitate mirabilis, verbo potens, & apprimè doctus: atque, quod rarius est, in consolandis afflictis speciali gratia dotatus. Discurrit hic per Eremos singulas, & ad instar strenui ducis, in perturbata acie, hos blandè monet, illos acriùs redarguit; indulget istis, illis verò resistit: sicq; mirabili modo cunctos in disciplina retinebat. Venerantur omnes Venetum, quasi in eo resuscitatum Paulum intuentes, cuius monitis confortati, omnem timorē deponentes, in proposito prorsus stabiliti sunt. Dum hæc itaque modo prædicto peraguntur, adest legitima Capituli celebrandi dies, in quo (præter multa ad bonum Religionis statum à Patribus instituta) Augustinus de Bassano, qui primus omniū ex Eremo Camaldulensi ad Criptas Massacij, Beato Paulo perpetuò adhæsurus venit; Maior totius cōgregationis creatus fuit. Daniel verò in Apuliam missus est, vt sicut in Piceno, & Tuscia fecerat, illic



illic quoque contracta fame, & penuria, Eremitarum loca, dissipatosque fratres consolidaret. Veruntamen cum cognovisset postea Augustinus non esse opus unius, neque in solis verbis consistere illius provinciae malum: & ipse quoque illuc pergere decrevit. Eodem tempore quo Pater in Apulia agebat, epidemiae morbus, qui biennio ante exortus erat, uniuersam Italiam inuasit: atque in illis regionibus in tantum defecit, ut Augustinum cum Daniele, necnon maiorem Eremitarum partem crudeliter extingueret. Unde iterum sine capite, sineque pastore grex & ouile remansit. Quo nuncio allato, Patres qui in Piceno commorabantur, qui que ab eadem peste grauiter vexati erant, valde turbati sunt: & conuocato consilio, quid agendum foret, deliberant. Perpensis itaque causis, rationibusque multis in medium adductis, Eremitoria illa Apuliae deserta relinquere; & paucos, qui superstites erant, Eremitas in Picenum reuocare statuunt. Ad hoc maximè seniorum animos mouit gentis illius naturalis ferocitas, prædonum,

num, seu grassatorum agmina, passim solitarios infestantia; atque cōmunis charitatis defectus. Accedebat insuper, quòd paulò antè Zacharias Siculus venerandus Pater, cum Ioāne Maria socio capti à Turcharum piratis, captiui ducti sunt: necnon pijsissimus Pater Romualdus Fabrianensis, sicut dictum est, cū suo comite à prædonibus in itinere deprehensus, & ad arborem alligatus gravissimè cesus extiterat. Derelicta sunt etiā nonnulla Eremitoria per Italiam propter Fratrum imminutum numerum; inter quæ solennis illa Montis Soractis Eremus. In medio igitur tempestatum harum, in tantorum malorum procella, Magnus ille Iustinianus Bergomensis (de cuius ingressu superiori tractatu plenè differuimus) Maior creatus est: vir sanè qui & propter eximiā doctrinā, & propter vitæ integritatem, secūda post Beatum Paulum Religionis huius columna dici meritò potest. Qui quantum utilitatis Religioni diligentia sua attulerit, sequenti libro patefiet.

FINIS TERTII LIBRI.

RO-



ROMVALDINÆ,  
SEV EREMITICAE  
MONTIS CORONAE  
CAMALDVLENSIS  
ORDINIS HISTORIÆ.

*Liber Quartus.*

SOCIETAS STABILITVR, ET  
Eremus Montis Coronæ fun-  
datur. Cap. I.



ICVR in Euangelio sa-  
cro legimus Apostolorū  
nauculam, absente Iesu,  
fluctibus agitatam, tem-  
pestateq; magna iacta-  
tam; sic quippè sepe vi-  
demus Religiones sanctas aduersitatum  
ventis, malorumq; procellis grauissimè  
concuti, ac penè confringi. Nec non sicut  
olim discipulos in remigando laborātes  
præterire voluit Dominus: ita plerūque  
seruos suos in tribulationibus, afflictio-  
nibusq;

nibusq; laborantes dissimulare videtur. Quod & in nostra societate defuncto Paulo contigisse perspicuum est. Sed tandē in fluctuantem nauiculam suam venit, misericordia motus, in quarta vigilia noctis, in fine, scilicet, laborum, quos patiebatur, quam per suam visitationē ascendens, imperavit ventis, & tumētes equorū vndas placavit. Et, quod optimū fuit, eidem peritissimum dedit nauclerum, qui navis clauum regere, ac socios in tēpestate confortare sciret: quod sanē fideliter præstitit ipse, atq; in nouo exercitu ducendo extremū se ducem semper gessit nouus electus. Celeberrimus ergo vir Iustinianus cū primū Maior nouæ cōgregationis factus est; sua magnanimitate animum ad Religionem hanc in perpetuum stabiliendam viriliter applicuit; friuola, temporanea q; remedia contemnens. Vnde eodem suadente, multa ausi sunt Patres, à quibus iam dudum animum auerterant, quasi impossibilia eadem existimantes: quæ tamen postea tanto pastore freti, facilia reputarunt. Ac primū, sequenti generali Capitulo,

actum



actum est, vt Eremus aliqua ad instar Camalduli erigeretur : quæ velut arx, caputq; totius cōgregationis foret. Quod præcipuè ad hoc decretū extitit, vt Eremus ista multos insimul haberet Eremitas, in qua maiores, senioresq; Patres commodè, fixa q; sede commorarentur : apud quos ceteros omnes regendi maneret auctoritas. Volentes insuper cetera loca, seu Eremitoria inde tanquàm subiecta, inferiora q; membra; & consilium, & auxilium, necnon regiminis præcepta suscipere. Hac denique determinatione facta, de idoneo loco aliqua insurgit difficultas, eò quòd ex Patribus quidam Eremo Criptarum, tanquàm antiquiori ad hoc iam olim deputatæ; honorem hunc, quasi defuncti Pauli voluntatem insequentes, deferendum censebant. Econtrà, erant qui non quid factum, sed quid cōuenientius, expediensq; magis videretur : nec præsens modò tēpus, aut Religionis statum, sed futurum potiùs prospiciendum suadebant. Post multa tandem præualuit, quæ nunquàm confundi solet, iusta ratio : sicq; conclu-

T                      sum

sum fuit Coronam Montem Criptis esse  
 præponendum : non solùm loci aptitu-  
 dine, temperieq; aeris consideratis : ve-  
 rùm etiam soli illius amenitate, atq; ne-  
 cessariarum rerum abundantia, commo-  
 ditateq; recte ponderatis. Mouebat itē  
 multum propinquitas, seu opportunitas  
 Abbatiaē sancti Saluatoris ( cuius plenā  
 descriptionē superiori libro dedimus )  
 ex qua, videlicet, ad Montis radices po-  
 sita, cum facilitate quotidiana possent  
 ad Eremitas in superioribus cohabitan-  
 tes alimenta transmitti. Attendebatur  
 insuper ibidem sine Eremitarum per-  
 turbatione peregrinos aptius hospitari  
 posse : necnon & infirmos commodius  
 tractari, atq; senes impotentes, & debi-  
 liores, & quocunq; casu inutiles effectos  
 curari, foueri, & iuxtā cuiusque qualita-  
 tem remedia adhiberi. Qua conclusione  
 firmata, ad inchoandum opus sine mora  
 accincti sunt viriliter omnes. At ne quid  
 cognitu dignum intactum relinquamus,  
 sciendum est, Montem hūc habitare ce-  
 pisse Patres eodem anno, quo Petrus de  
 Fano, olim Galeatius, habitum Eremi-  
 ticum



ticum sumpfit : quanquàm non in eo loco, seu parte, in qua postea confederunt, aut quam modò incolunt . Est siquidem in medio ascensu montis vetustissimum oratorium Beato Sauino martyri consecratum, cuius situs, etsi brevis, iucundus fatis, ac fonticuli salubri aqua dotatus . Hìc igitur primùm ex luto, saxiq; per eosdem Eremitas vtcunque cellulis cõpactis, per quinque, aut sex fortè annos detenti sunt . Quod oratorium cum cellulis prædictis, & hodie cernere licet, nullo in eisdem diruto, vel immutato : cuius loci aspectus suauis delectatione non caret. Confitus nimirum ab eisdem olim Patribus, varijs ac fructiferis arboribus; addita vinea, tùm delectabilis visu, tùm fruitione vtilissima. Sed quia minùs aptus, capaxq; ad destinatum finem cognoscebatur; coacti sunt in eodem monte commodiorem, amplioremque locum, seu situm perquirere . Vnde diligenter perlustrato monte, nullibi conuenientiùs Eremum desideratam fundari posse sano iudicio, vel certe diuino spiritu dictante existimatum est, quàm vbi

fundata nunc manet. Erecta est igitur Eremus ista in summitate montis eiusdem, cuius loci habitudo ab utroque latere procliuis: sed quā ad meridiem respicit, procliuior multò. Verūm utrinque; nemorum miræ densitatis amænitas, arduum collem, reddit iucundissimum: quin & assiduo, improbroq; Fratrum labore, quod natura deuexum dederat, planum, atque spatiosum magna ex parte effectum conspicitur. Propterea loci prospectus latior, aut delectabilior vix inueniri potest. Ad orientem namque Tyber famosissimus amnis, cum tota simul Spoletana valle, per triginta ferè miliaria, intuenti apertissimè patet. In eadē valle Foliuij, seu si mauis Foligni ciuitas, ac diui Francisci patria Afsisium distinctè cernuntur: necnon Nursiæ provinciae Beati Patris nostri Benedicti alūnæ, excelsi montes latissimè apparent. Rursus ad meridiē Perusij inclitæ Tuscię vrbis, à qua p decē miliaria locus iste distat, ferè totū dominiū, siue ditionem cū suo famosissimo lacu intueri licet. Ad occidentē verò, & Septētrionē, Fractę Perusinae



finæ peruetusti oppidi iuxtà flumen Tyberis positi, pulcherrimū territoriū videbis. Itē Sinnæ tortuosi fluuij gurgites, Appēnini valles multas, fultosq; colles: necnon antiquā Eugubium, magni Vbal di vetus domicilium, perspicere datur. Erat collis, vt diximus, supra modum asper, & solis feris peruius, nec humano vestigio calcabilis: atqui industria, nimioq; Eremitarum sudore in eam formam redactus est; vt, in quantum Eremiti tractus distenditur, equi cum curribus percurrere facilè possent. Quatuor enim præcipuæ viæ aperiuntur, quæ totam Eremum deambulantī patefaciunt; quarum duæ quasi cingulum ab utroque latere iuxtà fossas (quibus Eremiti ambitus de Eremitarum more clauditur) vniuersam Eremum circumcingunt. Aliæ verò duæ recto tramite ab Ecclesia ad extrema vsq; clausuræ, altera in summitate collis, altera inferiùs à latere, protendunt. Spacia quidem inter vias prædictas posita, nemoribus fultis, arboribusq; fructiferis cum innumeris cupressis, ac nonnullis abietibus occupantur.

# EREMITICÆ HISTORIÆ

Ad extrema in super vbi viæ ipsæ coniunguntur, affixæ sunt lignæ cruce, intuentes ad orandum inuitantes. Postremò sepe sentibus vepribusq; fulcita, atque mira arte contexta (cui fossa perpetua cohæret) tota clauditur Eremus: nec alicubi ad eam ingressus, præter vnicum, ac commune omnibus ostium datur. Est autem ostium istud venientibus ea parte, qua recta à prædicto monasterio sancti Saluatoris ascenditur. Etenim intrantibus è vestigio, platea quadam mediante, se offert templum, seu communis Ecclesia: opus & magnitudine, & arte commendabile; elaborato ad psallendum Choro, & alijs ornamentis decoratum. Quod sub inuocatione Saluatoris nostri anno M D L V. 14. Octobris consecratum fuit. Adhærent eidem orientem versus Capitulum, vt vocant, culparum, cum pulchro satis sacrario: supra quæ, duo ædificia, Definitorium, exedra scilicet, ad Generale Capitulum quotannis celebrandum: necnon bibliotheca multis atque optimis codicibus referta. Ad occidentem verò plateam habet, in cuius



cuius medio effossa cisterna latitudine,  
 ac profunditate mirabilis, aquarum in-  
 credibilem multitudinem continens.  
 Iuxtà cisternam porticus est, cui iungun-  
 tur infirmorum cellulae. Refectorium  
 quoq; pulchrum, cui coquina adhæret:  
 subter quibus, benè accommodatum  
 (commune suis adaptatis vasibus) laua-  
 torium cum sua cisterna aptè locatum  
 iacet. Haud procul ab ostio principali  
 peregrinorum hospicium est, iuxtà loci  
 facultatem satis appositè constructum,  
 Eremiticoq; more benè ornatum. In in-  
 feriori verò parte, ab omni Eremitarū  
 commercio femota suis cellulis, ac re-  
 bus necessarijs instructa domus nouitio-  
 rum sedet: in qua ipsi cum suo Modera-  
 tore in perpetuo silentio segregati ma-  
 nent. Iam ad Montis cacumen reuerta-  
 mur: secus vias, quas modò descrip-  
 simus, & quæcunque earum domunculae,  
 siue solitaria Eremitoria, ab inuicem tri-  
 ginta plus minus passibus distantia, con-  
 spiciuntur: quas inhabitant seniores Pa-  
 tres; & qui maiori quiete, solitudine vè  
 delectantur. Interponuntur inter easdè

hortuli singuli singulis : in quibus iidem habitatores excolendis proprijs manibus exercentur. Manent itaque hodie in Eremo ista triginta sex, vel plures Eremitæ satis commodè, in nullo se vicissim impediētes.

QVANTA DIFFICVLTATE  
ædificata sit Eremus ista.

Cap. II.

**Q**UANTQVAM nos plenam loci descriptionem dare conati sumus : non tamen existimari debet vno die tãtam, tamq; diuersam machinam leuiatã fuisse : quin potiùs sciēdum est, per quadraginta annos, aut eò ampliùs in ea elaboratum esse, nec dum vltimam operi manum extitisse impositam. Nam circa annum trigessimum duo tuguria rem tentãtes erexere Patres : quibus oratoriolum ad sacra peragenda addiderunt : tintinnabulum in magna quercu appendentes. Paulò post humilem admodum sibi casulã venerabilis Petrus Fanensis construxit :  
nempè



nempè ad inferiorem Eremi sepem, vbi nunc cisternula cum eiusdem casulę fundamentis apparet. Nitebantur profectò pauperrimi Dei serui, quod in se erat, viriliter præstare. Veruntamen non habētes vnde fabricę sumptus suppeditarent (nā præfatę Abbatię redditus nimis tennes tunc temporis erant) operi etiam nolentes superfederunt. Obstitit quoq; huic rei non parum mulier quædam Perusina, quæ ius in solo illo, quo ædificabatur, licet iniustè, prætendebat. Hęc in Montem veniens, oratorium dum alter ex Patribus celebraret, ingressa est: admonita blandè, vt inde (quia mulieribus nostras non licet habitationes intrare) exiret: quasi furia agitata pauperes homines mille iniurijs clamitans affecit, nec locum, nec præsens sacrificium attēdens. Quos & crastina die in ius vocare non erubuit: cui Patres ne litigijs, iurgijsq; intendere, & pacem cordis contra professionem suam amittere cogerentur, pecuniolas, quas ad fabricandum summa cum difficultate præparauerant, dederunt. Quibus tempestas illa sedata est.

est. Post hæc aliud maius dispendiū est subsecutū, hoc est, quòd Clemens Septimus Pontifex Maximus memor sui dilectissimi Pauli, sciensq; desiderium, & indigentiam nostrorum circa Eremi erectionem, quasdam ad id sufficientes pecuniæ quātitates promiserat: quas morte præoccupatus præstare minimè potuit. Vnde Patres sine alio adiutorio, quotidianis manuum exercitijs lapides effodientes, & arenam cumulantes, magnos materiæ accervos ad opus præparauerunt, qua paulatim facellum, quod hodie Capituli exedra est, construxere. Quo pro communi Ecclesia vfi sunt, donec templum perficeretur. Veruntamen eodem tempore & omnis ædificatio, & omnis corporalis exercitatio diū cessasse noscitur: eò quòd anno x l. die 20. Maij, facta sit cum Camaldulensibus vnio quædam (quæ secunda dicta est) hæc vtrunque per biennium obseruata, magnas distractiones pepererat: nostris nempe Camaldulum, & Camaldulensibus ad nos frequenter conuolantibus. Quæ obseruantia dissolutio, & deuotionis



uotionis dissipatio in causa fuit, vt mutuò adhibito cōsensu, Patres ab vnione discederent, & quique eorum ad sua remearent. Et sic societas in suam naturam reuerfa est; & ad pristinos ritus, seu mores non sine difficultate reducta. Reuerfi igitur in vnum Patres, Templum paulò superiùs plenè descriptum, erigere instituunt: & quia illis non erat vnde sumptus tanti operis præstarent, habito Apostolicæ Sedis consensu, quædam ad hoc possessiunculæ distractæ fuere. Ab illa tandem die ad nostra vsq; tempora, ab opere manus vix sublata extitit: paulatim nunc hoc, nunc illud agendo. Si hîc sudores, atque algores per deuotos Eremitas in effodiendis faxis, ripis atq; deuexis explanandis, inque materia ad opus deportanda, ceteris deniq; exercitijs ad hoc necessariò faciendis, vel summatim percurrere velim: alium seorsum ac grandiore possem libellum conficere. Attamen sufficere cuique debet, iuxtà breuitatem, qua vtimur, prædictarum rerum satis plenam cognitionem habere. Perspicuè etenim ob oculos cuiusque

iusque posuisse credimus, Eremitum, quæ deagitur : quæ etsi secundum designationem sui adhuc finita non sit, in eam tamen formam ( quam suprà ostendimus ) deuenisse constat. Resident autem in ea summi Patres totius Religionis rectores : nempè Maior, Visitatores, & loci eiusdem Prior, penès quos totius regiminis dignitas consistit. Seniores itè, qui diuturnæ perseverantiæ experimento, alios & verbo & exemplo ; necnon consilio docere, instruere, ac in strictiori vita retineri nouerint. Vnde fit, vt ex optimo, prudenti, expertoq; capite, cetera Religionis membra iustè, sanctè, ac piè in rigida regulari Eremitica obseruantia perseuerent. Quod sanè in causa est, vt in tanta quiete, inque tanta animorum vnitate, atque tranquillitate hodie in hac sancta societate commoretur :

sic Deo Optimo

Maximo per  
suam

misericordiam  
annuente.

DE



DE MORTE PETRI FAN-  
nensis. Cap. III.

**D**I X I M V S suprà Clementē Pō-  
tificem quandam non modicā  
pecuniarum summam in opus  
fabricæ Eremitæ Montis Coronæ eroga-  
re voluisse: quo nuncio accepto, Petrus  
Fanensis tremestri antè Maior societa-  
tis factus: de consilio Patrum Romam  
perrexit, à Pontifice idem subsidium re-  
cepturus. Et ecce urbem ingressus, Cle-  
mentem grauitè infirmari ei nunciatū  
est: cuius rei euentum ibidem expecta-  
re decreuit Pater. Feruebat equidem  
tunc temporis æstiuus calor: nimirum  
regnante Canicula. Intra paucos ergo  
dies dum Clementis salutem præstola-  
tur, & ipse febricitare cepit: atque inua-  
lescente deinde morbo, in breui viam  
vniuersæ carnis ingressus est. Cū autē  
piorum exempla frequenter nobis corā  
proposita in salutiferam doctrinam ce-  
dere soleant: opere præcium erit tanti  
Patris foelicem exitum paucis enarrare.  
Is cū iam morti appropinquasset, vo-  
ce

ce omninò vi morbi priuatus, per biduū obmutuit. Interim vrgentissimis animi passionibus, ac dæmonum tentationibus per immissas illusiones cruciatur: coactus passim gemitibus atque suspirijs dolores intrinsecos exterius manifestare. Interrogabant eum Cappucini Patres (apud quos ægrotare ei contigerat) quibus ne idoneis saltē signis respōdere valebat. Tandem cū iam iam spiritum exalare vellet, ecce repētè os eius apertum est: & exclamans exultantis modo, ter hanc vocem repetitam emisit. Ego vici, ego vici, ego vici; Te Deum laudamus, te Dominum confitemur: tunc sequentem versum suscipientes Fratres, totum canticū alternatim dicentes persoluerunt: quo finito, foelix eius anima ad coelos migravit. Obijt verò in sancta Eugenia, vbi tunc Patres Cappucini habitabant: quiq; de tam beato defuncti sine plenum testimonium præbuerunt: qui etiam ibidem eius corpus honorificè sepelierunt, anno M D XXXIII. mense Augusto, die sancti Augustini. Nec est, quod dubitemus preciosam fuisse in cōspectu



ſpectu Dei mortē Sancti huius : qui vē-  
rē non ſolūm præcepta, ſed & conſilia  
Euangelica adimpleuerat. Qui dum di-  
ues eſſet, vt pauper in plena iuuentute  
vixit : inter rixas, & controuerſias fra-  
trum, conſanguineorumque ſuorum, ab  
intima cordis pace non diſceſſit : iuue-  
nis, & potens illecebris mundi nunquā  
ſe miſcuit : tandem vt Chriſtum nudus  
perfectē ſequeretur, omnia quæ habe-  
bat, reliquit : & religioſus factus in ſtri-  
ctiſſima obſervantia perfectiſſimē de-  
gens, exultando moriens, animam Dei  
laudibus inuolutam emittere meruit.  
Quæ nunc in cœlis, vt piē credendū eſt,  
cum Chriſto manens, ſine fine regnat.

DE HIERONYMO SVESSANO,  
& Rhuæ fundatione. Cap. IIII.

**E**X GEMMIS, quæ noſtram Ere-  
miticam religionem illuſtrarūt,  
duas pro ingenioli noſtri viri-  
bus, hætenus demonſtrauimus : nunc ve-  
rò tertia nobis detegenda occurrit.  
Hieronymus, inquam, Sueſſanus præ fo-  
ribus

ribus adest, qui merito suo, optimoque iure intromittendus est in aulam istam: quò omnes inhabitantes in ea religiosi fratres, ipsum videant, sciant, & reuelata facie contèplentur. Is de primis Pauli socijs extitisse, ex præmissis cognoscitur: qui sicut rigiditate vitæ, & regulari obseruantia nemini coætaneorum suorum secundus haberi potest: ita veræ paupertatis virtute ceteris iure anteponi debet. Abhorruit namque non solum rerum proprietatem, verum etiã quamcunque rerum abundantiam: idq; tam ratione priuatæ ipsius commoditatis, quàm communis totius Religionis vtilitatis. Qua de re nunquàm aliter docuit, quàm ipse ad vnguem obseruauit: vnde factum est, vt in propria cella nullum vas superfluum, aut quid aliud vel minimum spontè retineret. Apud eum nulla vestimentorum duplicitas; & ea, quibus utebatur, indumēta vetula semper, ac sæpe in dorso eius contrita cernebantur: quin & sub tali veste asperrium latebat cilicium, ab humeris ad poplites vsque descendens. Necnon plerumque



rumque lumbis admotam plumbi laminam detulisse, verissimo Patrum testimonio compertum habemus: & quod maioris admirationis est, cum his omnibus à corporali, seu manuali opere statutis horis nunquam abstinuit. De ieiuniorum obseruantia superfluum est dicere, cum tota eius vita perpetua abstinentia extiterit. Oratio illi perpetuus comes semper & vbique fuit: vtpotè qui nusquam non mentem in Deum eleuatam gerebat. Sed inter omnes suas pias actiones, præcipua in Virginem matrem ignita deuotio. Quid moror? nullam Eremiticæ virtutis proprietatem scimus, quam in eo inuenire non posses: nil solitario viro competit, quod ipse non abundè possederit. Hoc insuper in homine admirandum venit; quòd quantò erga se austerior videbatur, tantò in alios ostendebatur benignior. His ergo moribus ornatus, cunctis (inuidis exceptis) magna erat admiratio, maximè considerantibus eum in mollibus ab infantia fuisse educatum, atque in delicijs enutritum. Anno igitur M D X X X V I I. cum decre-

V

uissent

uissent Patres in Venetiarum partibus Eremum quandam erigere, ne sui alumni Pauli Patria illa digna memoria careret; quæ pia pijs semper esse consuevit: hunc præclarum virum ad tantum opus perficiendū destinarunt. Qui Arsenio Conuerso itineris comite assumpto, sine mora ad iter accingitur: atq; diebus paucis Venetias, quò missus fuerat, peruenit. Vbi omni sollicitudine, multisq; adiutoribus adhibitis, locum ad suam intentionem aptum inuestigare nō cessat. At per dies multos in simili inuestigatione defatigatus, videns non prodesse laborem; dum nil reperiri sibi vacuū experitur; in Istriam, quasi in desertiorē regionem, nauigare statuit. Sed ecce nauigantem eū, subita tempestate immissa, illò ire prohibuit Deus, atq; in urbē redire coegit. Tunc demum mutata sententia, Hieronymus & Arsenius Bononiam ituri celeriter arripiunt iter. Quade re certior factus Clarissimus Franciscus Iustinianus Beati Pauli ex fratre nepos, eos velociter insequitur, atq; consequitur: hortatur, & orat, per diem saltē

eos



eos in vrbe detineri, partim vt maturiùs rei deliberatio fieret, partim vt Generali Camaldulensi eosdē videre cupienti satisfaciant. Vt ergo tanto viro, tāq; impensè roganti complacēat, Venetias reuertuntur. Erat tunc temporis Camaldulensis ordinis Generalis D. Mansuetus Bergomensis, vir non aspernandæ auctoritatis: qui cū audisset aliquādo hoc genus Eremitarum ordinis Camaldulensis sui gregis non esse, gestiebat eos tanquā oues errantes, noua q; monstra videre, non tamen quòd eis aliquid dare, aut beneficium conferre intenderet. O altitudo diuitiarum sapientiæ, & sciētiæ Dei, quā incomprehensibilia sunt iudicia eius, & inuestigabiles viæ eius. Tanto tempore anxius quæsierat Hieronymus optatum locum, nec inuenerat; & ecce discedenti, nec ampliùs quærenti, quod sitiebat, vltro offertur. Generalis quid ageret, nesciebat: Dei seruus quid ageretur, ignorabat. Atqui benè nouerat Deus quid esset ipse factururus: nimirū antiquissimam in honorem excelssæ genitricis suæ olim dicatam do-

mum, præque vetustate ad fundamenta  
 vsque dirutam, eoq; penitus neglectam,  
 in pristinum statum restituere, melio-  
 rem vè facere intendens. Ad quod præ-  
 clarum opus, Hieronymum fidelissimū  
 eiusdem Deiparæ famulum ipse elege-  
 rat. Porro in Patauino agro, interque  
 Euganeos colles mons quidam præaltus  
 insurgit, quem indigenæ olim Rhuam  
 appellauerunt: cuius magnitudo nec  
 minima est, nec situs iniucundus. Rhuæ  
 autem significatio, apud Hebræos, vt  
 Diuus Hieronymus, & Beda super Ioan.  
 c. i. testantur, Spiritū sonat: vnde lati-  
 nè Mons, seu locus spiritualis non incō-  
 gruè dici potest. Cuius profectò nomi-  
 nis impositio, spiritualis vitæ in eo fu-  
 turæ, quasi prognosticon fuit: de quo &  
 poeta Altanus pulchram dedit cantile-  
 nam. Mons verò iste, etsi inferior am-  
 bitus eius arduus nimis, obruptusq; vi-  
 deatur: attamen quò magis extollitur,  
 inuenitur amenior: inq; summitate eius  
 collis apertus, & vndiq; patens cernitur.  
 Hinc etenim & Euganei colles omnes,  
 quibus adhæret, & quicquid terrarū est  
 vsq;



vsq; Venetias, sinus quoque Adriaticus  
vsq; ad Istriæ oras, visu valentibus per-  
spicua fiunt. Tum meridiem versus Lon-  
gobardiæ fertilissimi soli, quantum hu-  
mani oculi acies extendi potest, tantum  
planissimi agri prospicienti aperitur.  
Urbes item non paucas, inde cernere fas  
est: quarum præcipua Venetiarum to-  
tius Italiæ nobilissima, atq; populatissi-  
ma ciuitas. Insuper & literarum studijs  
celeberrima, antiquissimaq; Patauium,  
quam ceteris viciniorem habet. Viden-  
tur deinceps in planicie ipsa aquarum  
fluenta (Canales incolæ vocant) navi-  
gabilia, nec paucæ lacunæ piscibus abun-  
dantes. Tandem latior, delectabiliorq;  
prospectus difficilè dabitur. Iam vnde  
digressi sumus, reuertamur. Summitas  
Montis huius, vertex scilicet ipse, saxo-  
sus, Solisq; sentibus gignendis aptus,  
ad trium iugera terræ; de patrimonio  
Monasterij Sancti Matthiæ de Murano  
erat; vnde tamen vllum aliquando sen-  
serat emolumentum. Cùm igitur pau-  
peres Eremitas vidisset Generalis, in  
colloquio Hieronymi spiritu calefa-

Etus, mente penitus mutata, eosdem mi-  
 ro modo venerari cepit: & ultro illis  
 Rhuam (locus qui pro derelicto habe-  
 batur) pollicetur se daturum. Eunt de-  
 nique, veniunt, & vident horribile mon-  
 strum; nullum ibi edificium, nulla arbor,  
 nullum viride arbustum, sola saxa, & ci-  
 neres, nuperrime exusti à pastoribus lo-  
 ci, conspiciunt. Inhiabat ibidem sub  
 terra os antiquę dissipatę cisternulę: ap-  
 parebantq; adequata solo parui facelli  
 fundamenta. In summa horrebant in si-  
 mili spectaculo videntium membra.  
 Hoc tantummodo solatij restabat mise-  
 ris, quod Montis habitudo solitarię vi-  
 tę aptissima apparebat: ac præ se ferens  
 quendam sanctitatis odorem: qui spiri-  
 tus eorū quadam dulcedine inflamma-  
 bat. Quod quidem & Hieronymus pro-  
 pria scriptura testatur, & mihi sæpe nar-  
 ravit Arsenius. In summa ad Generalē  
 redeunt, & cum consensu Conuentus,  
 medio publico instrumento, desertum  
 agellum acceperunt. Et ecce sine mora  
 idem Iustinianus & sufficientem illis su-  
 pplementem, & generositate quadam de-  
 om-



omnibus necessarijs prouidet : En Bal-  
thassar Morus & ipse patritius, qui & va-  
lidus exhortator fuerat, scirpeas mat-  
tas, & alia ad Dei seruos in deserto loco  
fouendos desiderata, Rhua mittere nō  
distulit. Iam dum noui cultores Rhux  
prima tentoria figunt, sibi que tuguriola  
ex storeis, seu virgultis astruunt: repertū  
est antiquissimum diploma Apostolicū,  
in quo Benedictus Papa Duodecimus  
quasdam concedit indulgentias Fratri-  
bus Ioanni Veronensi, & Antonio Albi-  
gnascio Eremitis Sanctę Marię in Rhua  
ordinis Camaldulensis. Ex quibus loci  
proprietas sine dubio ad Monasterium  
Sancti Matthię præfatum peruenit: nā  
& illic Eremitę Camaldulenses tunc tē-  
poris habitabāt: vt ex alio instrumento  
Patauij acto anno m c c c x x x. (quod  
ipsis oculis vidimus) plenius cōstat. Vi-  
des nē quemadmodū Deus quod haec-  
tenus occultē gesserat, manifestē aperire  
voluit: & oblitam penitus Virginis ma-  
tris deuotionem in eodē loco, per eiu-  
dem conuersationis homines, hoc est,  
Eremitas Camaldulenses instaurarit?

Vnde factum est, vt prædictus Balthassar Morus ligneum oratorium, cum deuotissima sacratissimæ Virginis imagine, præter alias largitiones, illuc mandaret. quæ imago vsque in hodiernum diem manet, in qua pij Dei homines cœli Reginam, tùm visitationibus crebris & orationibus deuotis, tùm donis & muneribus venerantur. Per quam & Deus omnipotens non pauca miracula operatus est, quòd & tabellæ inscriptæ, circumq; altare, de more, appensæ testantur. Cùm itaque sic sub storeis, & tugurijs ex virgultis contextis manerent; magna se offerebat difficultas in his, quæ mittebantur, ad tantam montis ardui altitudinem conuehendis. Sed ille, qui omnia potest, cuius etiam opus agebatur, tanto deuotionis ardore vicinos Toriliæ, & Garcignani populos, qui ad montis radices iacent, inflammauit; vt inter se pugnare viderentur, quis eorum erga nouos Rhuenfes officiosior ostenderetur; nec solum iumentis, sed etiam proprijs humeris onera imponentes. Adeò vt quidam Iacobus Pragassus, noua via in inuio facta, boues



boues cum curribus onustis (mirabile opus) Rhuam primus ascendere faceret, oratorium præfatum cum imagine Virginis portantes. Post hæc insurgit nobilis vir Galeatius Bigolinus Patauij ciuis, qui ad finem vsq; proprijs pecunijs, & aliunde collectis, multisq; laboribus, ac proprio sudore in tantum nouæ Eremitæ erectione iuuuit: vt sæpe diceret Suesfanus, Bigolini ope Rhuam fuisse erectâ. Qui pijsimus vir finito tēplo, cuius structuræ ipse præcipuè intendebat, statim obiit. Fœlix profectò homo, qui breui tempore longioris vitæ delicta, tam scitè redimere nouit. Habuit equidē Suesfanus & alios complures feruentissimos, magnanimosque fautores: ac præcipuè Venetijs Cornarum domus semper fautrix fuit, neq; hodie cessat huic sacrę domui impensè fauere. Item Contarenorum, & de Priolis. Patauij verò etsi plures extitere benefactores, quos longum esset recensere: nemo tamen nobilissimos Hieronymum, & Albertū Candios superauit: quos & hodie eiusdem domus successores summa cum charitate imitantur.

tantur. Tandem in præsentiarū Eremus  
 ista multis, ac magnificis ædificijs nobi-  
 litata est: nam præter magnum, ac pul-  
 cherrimum delubrū Beatæ Virgini cō-  
 secratum, artificiosè elaborato orato-  
 rio, sacrario, ac decenti exedra, ac capi-  
 tulum celebrandum ornatum: diuersæ  
 sunt etiam domunculæ seorsum singulæ  
 more Eremitarum separatae: & vnicuiq;  
 earū suus hortulus adaptatus. His om-  
 nibus additæ fuere officinæ necessariae,  
 atque opportunæ: necnon cisternæ duæ  
 multarum aquarū capacissimæ. Primus  
 quidem, qui proprijs sumptibus ibi ædi-  
 ficare cepit Venerabilis Aurelius Scapi-  
 nus, qui iam olim sacristis honestam ca-  
 meram Ecclesiæ adiunxit. Nuper verò  
 admodum Reuerēdus D. Ludouicus Za-  
 barella Ecclesiæ Paduanæ dignissimus  
 Archipresbyter magnificam solitariam  
 cellam cū suo deuoto oratorio constru-  
 ctam dedit. Nouissimè autem D. Federi-  
 cus Cornarus Cardinalis amplissimus,  
 atq; Patauij Episcopus, non ignobilem  
 domunculam, cum suo sacello, alijsque  
 mansiunculis, & amœno hortulo prædi-  
 ctis



ctis addere dignatus est. Quibus ædificijs mirè Eremus ipsa illustrata redditur: qui etiam magnanimi viri, præter hæc, magnis ac crebris eleemosynis, atq; continuis fauoribus Eremitas adiuuare non desistunt. Ornatur insuper mirum in modum Eremus ista latis, & planis semitis, vijsq; circumcincta: & à meridie innumeris cupressis, castaneis, vitibus, fructiferisq; arboribus vbertim ab ipsis Eremitis confita: & proprijs eorū manibus vndiq; diligenter exculta. Sic ergo locus olim spinis, sentibusq; oppletus, amœnus ac fertilis factus est, & omnibus videntibus non mediocri admiratione iucundus. Veruntamen hæc pauperrima domus nunquā agros, aut possessiones habuit, nec illi aliqui redditus aliquando fuere: vnde eius pia familia semper ex largitionibus fidelium vixit. Pane, qualis à deuotis largitur, siue recens, siue siccus, triticeus, vel furfureus, cum iucunditate vescens: quod & de vino quoque, alijsque quibuscunque alimentis censendum est. Non est hic silentio prætereūda magna charitas, simulq;  
libe-

Liberalitas excelsi Venetorum domini,  
 cuius inclytus Senatus quotannis largas  
 pecuniarū quantitates Eremicis mit-  
 tere non desistit. Tanta siquidem Cla-  
 rissimis illis cura est, quid pauperes Rhu-  
 enses manducent, seu induantur. Nec ali-  
 ter certē facit nobilissima Patauina cō-  
 munitas, quę indies magis ac magis in  
 eleemosynis Rhuę mittendis abundat.  
 Accedit ad hęc quorundam Monaste-  
 riorum pietas; quale est sanctę Iustine  
 Paduę, Praięque veneranda coenobia,  
 quibus non minor cura est circa nostros  
 in sanitate alendos, quā infirmos cu-  
 randos: alimenta, scilicet, valentibus;  
 medicum, & medicinas aegrotis benignē  
 ac gratis largiendo. Venda quoque, quę  
 sacra domus propinquior Rhuę existit,  
 largitatem suam nostris quotidie osten-  
 dere non dedignatur. Particulares, seu  
 singulos tam nobiles, quā populares  
 benefactores describere speciatim, opus  
 esset infinitum. Sciendum tamen est,  
 nunquā illis defuisse alimenta: sed  
 semper Dei beneficio, & pia benefacto-  
 rum largitate, necessaria victus sufficien-  
 ter



ter suppeditata sunt. Quod profectò admirans, magis admirari non cesso: tam magnificum templum, tot pulchra edificia, solis eleemosynis tãta celeritate esse confecta: necnon huius Eremiti cultores ab initio vsque in hodiernum diem sufficienter ex eisdẽ vixisse: benefactores benefactoribus in dies magis, Deo Optimo Maximo inspirante, succedẽtes. Quę res me persuasum facit, Rhue paupertatem Deo gratissimam esse: quam ipse sic semper conseruare dignetur. Hęc de Rhua, dũ Rhue essemus, breuiter exarauimus.

## HIERONYMI SVESSANI

virtutes, ac sanctitatis signa.

Cap. V.

**N**VNC autem tempus est, vt ad ineffabiles virtutes, finemque gloriosum Suessani sanctissimi demonstrandum, totis viribus accingamur. Principio vir iste verè Apostolicus prædicandus venit: qui relicta Regia aula, hoc est, Pontificis palatio: vbi protomedicus

medicus erat : & insuper patrimoniali-  
 bus renunciatis totum se paupertati sine  
 fictione tradidit. Vnde non paucas nimis  
 copiosas eleemosynas viriliter refutan-  
 do : pauperibus, qui se magis indigebāt,  
 dandas suadebat. Rursus cuiusdam Pata-  
 uini Antonij Musati nomine, possessionē  
 oblatam ad radices montis positam ac-  
 ceptare noluit. Sed quid ego minutula  
 quæro? Paulus Papa Quartus (dictus  
 Carrafa) Neapolitanus, ideoq; eius cō-  
 terraneus, & à pueritia amicissimus, an-  
 no primo promotionis suæ Hieronymū  
 ad se accersiri iussit. Venit Romam vir  
 obedientissimus, ac læto vultu à Pontifi-  
 ce suscipitur, eumq; osculo pedum præ-  
 misso, sic alloquitur Papa: Quale tegu-  
 mentum istud Hieronyme (erat enim vi-  
 lissimis & asperis tunica & pallio indu-  
 tus) seu quæ austeritas ista? Nimis durè  
 tecum agis: dimittas ea oportet. Cui se-  
 nex: His indutus sanctissime Pater, expe-  
 ditiùs inter quercus & arbusta incedo:  
 nec alius, ni fallor, habitus poenitentem  
 decet. Nam qui mollibus vestiuntur, nō  
 in deserto, sed in domibus Regum sunt.

Nec



Nec tu (inquit Pontifex) ampliùs in deserto eris, sed manebis hìc nobiscum: nec de cetero Eremitam te, sed Cardinalem volumus. Quo audito, statim cecidit pronus in terram senex: multis etiam lachrymis profusus, cùm diu in refutando dignitatem oblatam persisteret, vix tandem breue tempus ad deliberandũ obtinuit. Quo finito, ad Pontificis pedes reuolutus, humiliter petijt ad suum Eremitorium remitti, affirmans nullam dignitatẽ sibi chariorẽ esse, quàm verẽ penitentiæ sanctissimum statum: neq; alicubi delicias sibi futuras extra solitudinem. Ex his cùm intellexisset Pontifex piam ac sinceram viri Dei voluntatem, noluit eum cogendo contristare: sed totam rem in ipsius arbitriũ contulit. Quã desideratam optionem adeptus Hieronymus, elegit abiectus esse in domo Dei sui. Sic tandem recusata, immò liberè sprete dignitate, ad suum desideratum reuersus est Eremitorium. O miserrime Munde, heu quàm paucos possessores habes, qui sic cõcupiscentiæ, ambitionisvè laqueos effringere norint. Omnes etenim

nim post aurum, postq; diuitias abierūt.  
 At tantæ virtutis, tantiq; meriti longè  
 non distulit Deus promissum præmium.  
 Nam confestim exeunti à pugna dedit  
 triumphum; redeuntem à victoria coro-  
 nauit gloria. Si quidem in Eremū Mon-  
 tis Coronæ cū peruenisset, intra dies  
 paucos febricitare cepit: crescenteque  
 in dies morbo, foeliciter tempore breui  
 migravit ad Dominum. Nec certè mi-  
 sterio vacat, quòd nō in Eremo ipsa, sed  
 in tuguriolo sancti Sauini ( quod vt dixi-  
 mus, in medio Montis ascensu est ) mori  
 voluit vir per omnia pius; vt, scilicet,  
 qui verè pauper fuit, de pauperrimo lo-  
 co ad ampla cœli palatia trāsiret. Obijt  
 autem anno M D L V I. mense Martij,  
 feria quarta cinerum, vt verè pœnitens  
 in maximo pœnitentiæ die suam finiret  
 pœnitentiam. Sepultum verò in Capi-  
 tulo Montis Coronæ corpus eius requie-  
 scit. Cuius quidem vita non sine sancti-  
 tatis expressis signis, nec sine diuinæ vir-  
 tutis demonstratione præterijt. Conti-  
 git etenim cū aliquando in Criptis  
 Almasaccij Prior esset, vt de mense Ia-  
 nuarij



nuarij niuium abundantia obrueretur vallis illa, ita vt per dies quindecim illinc quis exire, aut aliunde illuc ingredi prorsus prohiberetur. Vnde factum est, vt fratribus victui necessaria in totū deficerent (fidelium enim largitionibus vivebatur) eoque cellerarius Constantius nomine apud eundem quæreretur: quasi fame atque inedia Fratres perituros timens. Cui fidelis Pater: O Constanti, inquit, fili tu fidē non habes: putas quia deseret Deus seruos suos? Ipse dixit, & non mentietur: Nolite solliciti esse quid manducetis, aut quid bibatis: qui pascit coruos, non dabit escas famulis suis? cōfide, & ora, & non deerit tibi, nec Fratribus in crastinum opportunus cibus. His, & alijs multis hominem consolatus, Ecclesiam ingrediens ante altare prostratus humi (qui mos illi frequens erat) in multam noctem orationem traxit. Ceperat eadem ferē hora tenuis, paulisper mitigato aere, imber defluere; qui paulatim in abundantem pluuiam creuit. Ecce manē factō, dum Prima in Choro de more diceretur, ostij tintinnabulum

pulsatur : illuc properè currit Constantius, ostiario non expectato, ac foribus patefactis, hominem & iumentum pane & alijs alimentis onustum coram se stare videt. Nihil tanto gaudio plenus interrogat, sed veloci cursu ad Ecclesiam redit; & quasi diuino stupore attonitus, Agite clamat Patres, agite gratias, mandauit Deus cibaria nobis : quod per Patres actum est. Erat autem homo ille ex domo sanctæ Lucæ de Ficano : qui cùm durante pluuiâ magna venisset (mirabile dictu) pluuiam non sensisse asseruit; nec eius palliũ, aut etiam sarcina in aliquo madefacta fuere reperta. Hęc referente eodem Constantio fidelissimo Dei seruo, exarauimus. Quod quidem miraculosum factum nostri Hieronymi orationibus non immeritò attribuitur. Est Patauij nobilissima mulier atque honestissima quondam Galeatij Bigolini nurus, quæ per annos decẽ, aut eò ampliùs in matrimonio suo sterilis processerat. Hęc cùm aliquando obuiam habuisset Hieronymum; O Pater, ait, Pete à Domino pro me filium, ne sine sobole moriar.



riar. Cui annuit Pater se facturum : nec à die illa promissum præstare, hoc est, summo cum feruore pro re petita orare cessauit. Concepit mulier intra menses paucos, nec vnicum partum tantum enixa est ; sed annuatim parere assuevit. Iam tandem plures dilecto marito genuerat liberos ; cum casu contigit Dei seruum in eius domum venire : in cuius conspectu omnibus (quos pepererat) infantibus positis : Quid agis, inquit subridens mulier, ò Pater, guttam aquæ vt peteres rogavi ; tu verò copiosam pluuiã impetrasti mihi ? Desine iam pro fœcunditate mea orare ad Dominum : satis enim superq̃ ; sunt mihi hæredes. Porro tanti beneficij immemor non extitit femina ista : neque filij eius idem beneficium recognoscentes ; qui frequentes, largasq̃, quotidie ad nostros Eremitas solent eleemosynas mittere. Multis demũ exemplis, ac plurimorum testimonio huius sanctissimi viri perfectio comprobari facile esset, nisi superuacaneum videretur. Quam ob rem vnus magnæ auctoritatis viri assertionem ad id præstandum

dumtaxat utar. Abbas quidam Oliuetanus conuersationis vitæq; honestæ, nomine Cornelius Vendæ præpositus, cum in eius præsentia quidam prudētia, atq; longa experientia ornati viri, de corruptela, item virtute ætatis nostræ sapientissimè differerent; hanc protulit in medium sententiam. Et si modò ætas hæc nostra deprauata funditus existat, vnum attamen perfectum virum hodie inueniri mihi persuasum habeo; Hieronymum, scilicet Sueffanum Rhuxæ fundatorem Eremitam Sancti Romualdi: de cuius integritate comperta mihi sunt nonnulla indicia adeò singularia, ut ausim sciens, prudensq; eundem inter Sanctos referre. Iam tandem, ne prorsus de eius scientia fileamus, studiorum labor in eo in utroq; viuendi genere inanis nō fuit. Scripsit etenim, dum medicum ageret, latina lingua eiusdem facultatis volumen quoddam in quatuor libros distinctum: ex varijs Phisicorum auctoribus extractum. Item Eremita factus de statu religionis tractatulum vnū: cui Decora columba titulum inscripsit, liber sanè cum

propter



propter sermonis elegantiam, tùm materiæ dignitatem, minimè contemnendus: sed incuria nostrorum neglectus hactenus iacet. Ferunt & alia quædam medicinæ opera iuuenem cōscripsisse, quorum cognitio ad me non peruenit.

DE EREMO MONTIS ANCONITANI. Cap. VI.

**O**PPORTVNE nobis, vt gestorum narrationi debita quoque temporis adhibeatur obseruatio, Montis Anconitani acquisitio tractāda occurrit: quæ non modicum religioni augmentum allatura, euidentibus signis speratur. Principio igitur sciendum est, Eremitas de Gonzaga obtinuisse in prædicto monte monasteriū quoddam diuo Petro consecratum. Actum est deinde, siue Dei iudicio, siue alio quocūq; casu, vt ijdē Gonzaguitæ penuria stipati, omniq; consilio destituti, deserto loco, fortuitò incendio combustam Ecclesiā ordinario restituerēt. Anno igitur MDLXI. Vincentius Anconitanus Episcopus, in

cuius manibus Ecclesia renunciata extiterat, pia consideratione motus, idē monasterium nostris ad se vltro vocatis, liberē (cum nouo renunciantium consensu) canonico institutionis atque concessionis titulo tradidit. Iusta deinde atque pacifica possessione adepta, Patres breuissimo tempore dirutum templū in pristinam formam, testudine facta, instaurarunt. In quo non minoris magnitudinis, quā difficultatis opere, nimium argenti pondus consumptum fuit: & ideo religio magno ære alieno grauata. His itaque immoderatis sumptibus territi Patres, inopia cogēte per annos aliquot operi superfederunt. Verū cursu temporis oneribus illis aliquatenus alleuiati, religionisq; conditione meliori facta, nouissimē fabricari ceptum est, & opus hodie omni diligentia profequitur. Mons autem iste, de quo agitur, Anconitanus (ab inclita, scilicet, vrbe Ancona, eidem ad septem milliaria appositus) vulgò nuncupatur: nonnulli verò latini moderni scriptores, corrupto, ni fallor, vocabulo Conerum dixisse videntur. Plinio



nio verò lib. 3. Cumerum promontoriũ  
est, apud antiquos vtiq; celeberrimum.  
Quod nomen ab arbuto, græca voce co-  
maro, quæ arbor ibidem plurima gigni-  
tur, deductum crediderim. Est autem in  
ea Piceni parte, quæ ad Septentrionem  
expectat in ipsa Adriatici sinus ripa, in-  
traq; fines ditionis, diœcesisvè Anconi-  
tanæ constitutum, ex aduerso Dalmatiæ  
litus habens. Radices verò ipsius latè di-  
stenduntur in circuitu: sed paulatim in  
altum erecti colles ad vnũ cacumen om-  
nes contendunt: cuius summitas in pla-  
niciem quandam terminata ostenditur.  
Quæ quidem tùm frondosæ ilicum syl-  
uæ circumcincta corona, tùm prati non  
exigui viriditate ornata, mirã præ se fert  
expectantibus pulchritudinẽ. Hinc pro-  
spectus quoquò te vertas, in immensum  
protenditur. Septimo ab ipsa Ere-  
miliario, in amplissimo, ac florido Pice-  
ni campo, ter venerandum quasi ob ocu-  
los, mirabili instructura cõsurgit, ac mi-  
cat Loreti templum. Nimirũ domus,  
in qua Gabriel Angelus ad Virginẽ mis-  
sus est, in qua Verbum caro factum, in

qua denique nostræ redemptionis opus  
 sumpsit exordium . Ab utroque latere  
 quantum humani oculi acies penetrare  
 valet, tantum maritimi litoris intuenti  
 patet: quæ ora maritima visu pulcher-  
 rima est, ac multarum urbium frequen-  
 tia decorata . Denique ad Aquilonem  
 Adriaticum mare iacet, cuius vnda ma-  
 ximam promotorij partem abluit . Nec  
 rara est intuentibus delectabilis navium  
 triremiūq; hinc inde nauigatio . Introi-  
 tus ipsius loci spaciosus valde, magnum  
 ostium, antè & post ingressum latis pla-  
 teis coniunctum, habens: hospicium itē  
 peregrinorum, non contemnendæ stru-  
 cturæ, statim introeuntibus se offert. Post  
 quem opportunæ ipsius domus officinæ  
 contiguæ sequuntur, quibus in superiori  
 parte infirmorum cameræ additæ sunt:  
 vnde prospectus mirabilis datur, & infir-  
 mis iucundissimus sacre Lauretanæ do-  
 mus intuitum perspicuum præstans .  
 Prætereà antiqua Ecclesia, quæ ibidem  
 reperta fuit, tantæ artis in se ostensionē  
 habet: vt prorsus priscae architecturæ  
 nobis specimen, atq; perfectionem de-  
 monstret.



monstret. Nam præter extremorum parietum, quadrato lapide instructorum perpolitam effigiem, ac solidam firmitatem: triplici testudine, altis, firmissimisq; rotundis columnis innixa, totum cooperitur ædificium: iisdemq; columnis distinguuntibus in tria deambulatoria, seu atria, diuiditur pauimentum. Chorus item, & maius altare suprâ paululum eleuatam testudinem sedent: sub testudine verò deuotissimum facellum est, beatissimæ Virgini consecratum. Manet iuxta idem templum veteris claustri vestigium, in medio cuius cisterna est magnam aquæ quantitatem, eamque salubrem continens. Pòst Ecclesiam, & claustrum oriẽtem versus læta planicies datur, in qua solitariae cellæ, nondum tamen ad iustum numerum deductæ, cum suis hortulis situatæ existunt: ad cuius extremum sacrum diuo Nicolao facellum, venustum opus, situm apparet. Inter hæc lætæ ac longissimæ viæ, quæ etiam in magnum nemus ambulantiem introducunt, non sine magno Eremitæ decore extenduntur.

DE

EREMITICÆ HISTORIÆ  
DE VITA IUSTINIANI BER-  
gomensis. Cap. VII.

**P**OST acquisitionem Eremitæ præ-  
fatae tertio, ni fallor, anno suc-  
cessit magni Iustiniani Bergo-  
mensis obdormitio: nostræ etiam reli-  
gionis præclarissima gemma, atq; fulgi-  
dum ornamentum. De quo quanquam  
in præcedentibus, cùm de eius ingressu  
agebamus, quædã adnotasse recolimus:  
non tamen hoc loco vberiori vena innu-  
meras ipsius virtutes, laudabilemq; vite  
cursum tractare pigebit. Hic non igno-  
bilis genere, nobilior tamẽ virtute fuit:  
ab infantia literarijs studijs totus inni-  
xus, breui tempore in philosophicis, ac  
theologicis literis euasit doctissimus: do-  
ctrina imbutus confestim se Deo dedit  
per religionis (quæ vera salutis via habe-  
tur) ingressum. Exercitatio literaria Pa-  
tauij potissimùm fuit: vbi & primũ reli-  
gionis habitũ Benedicti sanctissimi mo-  
nasticum in Monasterio Sanctæ Iustinae  
sumpsit. Vigesimo secundo ætatis anno,  
vt de virtute in virtutem ambulando,  
subinde



subinde gradum quoque perfectionis altioreni ascenderet, ex Monacho Eremita factus perhibetur: idq; Camalduli, vbi per annos octo mirabiliter conuersatus, cūctis suauissimus sanctitatis odor extitisse, vel Delphino teste, comprobatur. Aiebat namque senex ille, quibus de Iustiniano sermonem facere contingebat: si perseuerauerit, quis putas iunior iste erit? tantæ profectò opinionis apud eundem Iustinianus fuit, vt nulla inueniatur ad eum data epistola (quarum multe libro xij. insertæ leguntur) quæ nō summas eiusdē laudes contineat. Erat huic cū Paulo Iustiniano, dū ambo Camalduli viuerent, summa, sed in sanctitate fundata familiaritas; eoq; statim vt nouam fundatam, stabilitamq; nouit societatem hanc, ipsum secutus est. In qua quidem congregatione, quasi lucerna omnibus, qui in domo sunt, ardens, mirabili quodā progressu per annos quadraginta vixit. Quid iste in agris ampliandis, redditibusvè augendis operatus sit, non inuenio: quantus è contrà in obseruantia regulari Eremitica adimplenda,

plenda, atq; tuenda fuerit, crebra fratrum cum gemitibus recordatio superabundè testatur. Quò enim magis secularia negotia, ac forenses strepitus odio habuit; eò magis pietatis, sanctimoniæq; exercitiū adamasse cognoscitur. Simili modo perindè terrenas opes per totam vitam abhorruit, atque animi delicias dilexit: semper & vbique perfectionis iter mordicus, sine intermissione, tenens. Adeò vt septuagenarius factus, nihil de stricta sui ordinis obseruatione (quod sæpe senioribus indulgeri assolet) remissit. Quid quòd hoc ipsum facere aliquādo à Patribus rogatus, eò quòd propter necessitatem eum longæuum optarent; hunc in modum respondisse fertur. Tādiū, obseruādiffimi Patres, me vobis vtilem futurum existimate, quādiū solitaria, seu Eremiticæ vitæ obseruatorē habebitis. In multis insignis fuit homo iste, sed in quatuor mirum in modum excelluit. Hoc est, in studio literario priuato: in diuinorum officiorum deuotione: in solitariæ quietis, silentijq; mirabili obseruatione: atque in secreta contemplationis



tionis indeficienti feruore. Quę vt debito ordine digesta dare valeamus : principio sciendum est , in religione ista nullum fuisse studiosiorem , seu scientiarum cupidiorē . Vtique nullo non tempore vitę suę sacris , pijsq; lectionibus summa cum diligentia , & affectione vacauit . Labores autem eius infructuosi neutiquam extitere : etsi non omnes fructus illius radicis ad nos redire potuerunt ; Deo eisdem nos vt indignos priuare volente . Scripsit itaque vir ille doctissimus opuscula multa , ex quibus pauca supersunt hodie : eò quòd paucissimis ante mortē annis propria cella ( in qua cuncta eius scripta custodiebantur ) fortuitò incendio , seu ab inuido quodam , noctis medio dum nocturnis vigilijs ipse assisteret in communi Ecclesia , combusta fuit . Sic , proh dolor , sudores , vigilię , & algores optimi Patris periere : & tanto temporis interuallo summo labore parata , paruo ( vt ita dicam ) momento consumpta sunt . Quam tanti thesauri iacturam , qui norint , sine lachrymis recordari , aut referre nequeunt ; magnum , scilicet , lucubra-

brationes illas Ecclesię Dei lumen allaturas fuisse, & hæresum modernarum tenebras detecturas affirmantes. Superfunt tamen de tàm multis tria, vel certè quatuor opuscula arte & doctrina miranda. Hoc est, liber vnus siue dialogus de vera, & falsa amicitia; & alter de huius seculi contemptu: vterque literis aureis adnotandus. Quos Patauij, dum Monachus Cassinensis esset, adhuc iuuenis cōscripsit. Reperti sunt insuper tractatuli duo, alter de differentia peccatorum; & alter de scandalo: ambo profectò fideiū conscientijs perutiles, ac valde necessarii. Alium prætereà vidimus libellum De oratione prenotatum: in quo orandi exercitium in artem quandam deducitur: per regulas procedendo. Veruntamen hucusque nihil horum typis excussum vidi, sed aliena manu notata legi: fide dignorum testimonio compertū habeo, inter combusta opera fuisse quoddā opus, cui titulus erat: Difficiliū scripturæ sacræ locorum elucidatio: in quo quicquid in auctore doctrinæ, ingenijq; fuerat, penitùs elucebat. Ita officiosè  
 san-



sanctorum Patrum vitas legebat, vt dicere consueffet : Vellem volumen hoc mecum vnà sepeliri , vt etiam post mortem solatium ex eo haberem. Rursus tāta ei ad opus Dei persoluendum fuit animi affectio : vt dum in Eremitio esset, nunquā siue noctu, siue die, intermissionem Chori admiserit . Vbi rectus complicatis manibus stans, plena voce, qua dotatus erat , tanto cum decore Deo laudes reddebat : vt aliquando ( dum alium ad hoc ipsum inducebat ) affirmaret : se ne verbum quidem , ne dum versum per inaduertentiam amittere. Quoties Maior aut Prior eligebatur ( quorum altero, licet inuitus ferè nunquā carebat ) strictè ostiario præcipere solitus est, ne dum in Choro laudes Altissimo redderet, sibi aliquid cuiusuis momenti foret, nunciaret . Neque interuentu alicuius magnæ personæ, vt fieri solet, licet Cardinalis existeret; se interpellare præsumeret. Solitariæ quieti incredibile videtur, quā ardentem incumberebat : eò quòd pluries in priuata cella de more Eremitico inclusum mansisse, manifestum est : manifestetq;

setq; in vitam libenter, nisi eum tanquā religioni vtilem, ac necessarium, prohibuissent Patres. Nec quicquā antiquius illi contingere poterat, quā absq; aliqua perturbatione liberè ad Deum mentem, animumq; iugiter intendere. Quoties credas in diuinis meditationibus occupatum transisse sine cibo diem? quoties sine somno noctem? Iccircò sæpe dicere solebat: cibi, somnivè memoriam, in mente benè in Deum eleuata, tardiùs occurrere. Porro non in solo pane vivere hominem, experientia longa didicerat. Ante Matutini signum assurgens, diuinas laudes meditando expectabat. Tandem anno MDLXIII. cū ipse in prædicta reclusione maneret, Patribus Capitulum generale celebrātibus visum est summoperè religioni conducere, eū in Maiorem eligere. Id cū præsensisset timoratus Dei seruus, Epistolam, quam oculis nostris vidimus, veluti vltimum vitę suę testamentum ad Patres Diffinitores scripsit. In ea cum omni humilitate eosdem deprecatur, vt animi sententiam mutare non dedignentur, vel quia



res ipsa iuxtà eorum vota successura nō fuisset. Non equidem quia ipse obedientiam recusare, aut laborem fugere vellet: sed quia vltimus vitę suę finis instaret. Addens, ex tali electione euenire nō posse, quàm studiorum suorum inutilem finem, ac Patrum desiderij acceleratam frustrationem. Quibus non assentiente Capitulo, è cella extractus, & Maior factus est. Tertio verò ab illa electione mense febris correptus lecto prosternitur: atque paulatim in crudecente morbo ad mortis articulum deducitur. Aderant frequenter capiti infirmi seniores nostri: quibus semel eundem bono animo mortem suscipiendam hortantibus, vt in similibus fieri assuetū est: sic respondisse fertur. Ego Patres, licèt non meis meritis, fide non dubia, speq; firmissima, atque misericordia fretus Altissimi: mortem, quasi virgo sponsum, expecto. Quibus, & alijs verbis mirabiliter dictis, in pace quieuit, die sancti Laurëtij, decima Augusti. O foelix non iam Iustinianus, sed iustus Eremita, & Dei seruus; qui ab exiguo rugurio ad ampla Sanctorum palatia

latia trāflatus es: ab stricta cellulæ clau-  
sura ad latissimas cēlorū plateas deam-  
bulandas peruenisti: qui tandem pro ie-  
iunijs, silentio, & corporis maceratione  
immensam Dei gloriam es assecutus.

Quis enim dubitabit inter Dei electos  
regnare eum, qui in spiritu vitæ suæ finē  
adhuc viuens tam perspicuē viderat?  
Summæ præterea perfectionis eius mul-  
ta possent verè afferri indicia, quorum  
præcipuum patientia: in qua temporibus  
suis similem non habuit. Quod plenius  
ostendit illud, quod furibundo incendio  
perempta dilectissima sanctorū  
librorum suppellectili, omnibus ab eo  
diuturno labore, compositis libris in cinerem  
conuersis, vix mœstitiæ signum  
expressit. Immò hoc ipsum suadentibus  
ei Patribus, voce affabili respondit: tam  
infausta laborum, tantiq; boni amissione  
inopinatè conspecta affectam fuisse  
carnem, atq; crudelissimi incendij ardore  
paululum accensam: sed Dei beneficio  
spiritum ruina illa in nullo læsum  
exultare intus, atque gaudere. Intelligēs  
nimirum, hanc carnalis desiderij iacturam,  
ram,



ram, sibi in futuræ gloriæ accessurâ augmentum. Vnde non immeritò quidam Cardinalis magna, scilicet, Ecclesiæ sanctæ columna, cui notissimus erat, sæpissimè etiam cum gemitu dicebat: O vtinā cum Eremita Bergomenfi animam hāc permutare possem.

I AM his paucis de tantis, actā multis Patris nostri virtutibus breuiter exaratis: ad vos venerādi Patres, iure meo, nouissimum conuertam sermonem, atq; libentiùs commonefaciam, ne vnquām è memorijs vestris decidant ponderanda illius verba, quibus vos crebrò hortari ad obseruantiam solita anxietate solebat. Nolite inquit, Patres mei, ac fratres, quod semel benè, piè, ac sanctè institutum est, destituere: nec maiorū vestrorum ob vestram parandam quietem intollerabiles labores despicere. Si augere sanctæ congregationis nostræ perfectionē vitæ non valetis: nolite, obsecro, dissolutionis esse auctores. Et rursus: Seruate, mordicusq; tenete primam seruorum Dei (qui vos præcesserunt) iustissimam simul, ac discretā viuendi rationē:

nam secunda æquè bona, eadem amissa, non dabitur. Et iterum: Frequentiùs pugnemus pro Eremitica obseruantia, pro re augenda minimè satagamus. Porro tantus vigit semper in homine Dei religiosæ pietatis zelus: qui nec aliter vixit, quàm docuit: nec monuit aliud, quàm quod ipse impleuit. Attendite ergo, per viscera Christi, pijsissimi Patres: ne vobis viuentibus, regentibusvè, sanctissimi Romualdi pereat institutio: quin potiùs vigilate, ne in aliquo minuatur antiquissima sanctorum Patrum indefessa, iugisq; obseruatio: sed cum omni diligentia si quid inuenitis relaxatũ, restringite, dissolutum colligite, cõfractum summopere consolidare studete. Vtique in tremendo iudicio, coram Iudice Magno (quem venturum fideliter creditis, ac sancto timore expectatis) de locis multiplicatis, seu locupletatis; de bonis, siue redditibus adauctis, vel non adauctis, parua & fortassis nulla erit quæstio: at benè ecõtrà de votis emissis, deq; institutis Eremiticis; de moribus, & consuetudinibus sanctis, prætermisissis, contemptis, vel



vel derelictis, strictissima (mihi, immò  
Euangelio sacro credite) discussio fiet.

## DE ACQUISITIONE EREMI

Sanctæ Mariæ Coronatæ.

Cap. VIII.

**I**AM DVNDVM proposuerant Patres  
noua loca de cetero non acceptare,  
neque nouas Eremos denuò conde-  
re: eò quòd vitæ huius Eremiticæ au-  
steritas, experientia docente, non facile  
à multis etiam volentibus, capi possit.  
Idque maximè hac nostra ætate, in qua  
nil præter lautissimas epulas, delicatas  
vestes, ac perniciosas delicias homini-  
bus placent. Veruntamen Dei voluntas,  
ac pia fidelium charitas fecit: vt illa pa-  
rum æqua, ac diffidentia plena Patrum  
determinatio, his propè lapsis diebus,  
infringeretur, sicut sequenti narratione  
docebimus. In ea itaq; parte regni Nea-  
politani, quæ principatus citrà dicitur  
(bellicosus olim Samnitibus patria) inq;  
diocesi Beneuentana, mons celeberrim-  
us est, quem indigenæ Virgineû, Latini

verò Virgilianum appellant. Mons, in-  
quā, ob sui magnitudinē incircūscriptæ  
molis, & propter Deiparæ nobile facel-  
lū, ab vniuersis regnicolis mirū in modū  
frequentatus. Montis autē huius quædā  
přecipua pars, sibi seorsūm constans,  
Chiaia vulgò nuncupatur: quę intra fi-  
nes Baronie Sancti Angeli de Scala (in-  
clytę Carrafeę domus antiquissimū pa-  
trimoniū) ac sub eius iurisdictione, & do-  
minio continetur. In eodē quippè loco  
viri duo religiosi in summa vitę austeri-  
tate, ac laudabili perseuerantia, per an-  
nos viginti duos solitarij vixerunt: quo-  
rū alter Iulius origine Nardonensis, al-  
ter verò Hispanus Ioānes nomine. Quos  
etsi ortus extraneos inuicē dederat, Dei  
nihilominus sincerus amor, perfecta quę  
charitas fecerat esse germanos: quorum  
salutiferum sanctitatis exemplum mul-  
tos ad inculti loci deuotionem, atq; fre-  
quentationem induxerat. Inter quos pře-  
cipuè extitere Illustrissimi viri D. Anto-  
nius Carrafa Marchio Montis belli, &  
D. Alfonsus Carrafa Montorij Comes,  
eiusdem ex fratre pronepos (qui nuper  
casu



casu è viuis sublatuſ eſt ) quorū primuſ  
 veneranda ſenectute plenuſ totiuſ Car-  
 rafeorum familiæ ( quæ latiffimè patet )  
 vnicuſ decuſ . Alter verò licèt impubes  
 adhuc , ob generoſæ tamen indoliſ ſpe-  
 cimen , quod oſtendere ceperat , vniuerſe  
 nobilitatiſ , atque virtutiſ merito , repu-  
 tabatur exemplar . Attamen nemo erga  
 locuſ ſanctuſ , pioſq; Dei ſeruſ maior  
 deuotione fuit Illuſtriſſima Dña Laura  
 Brancaccia præfati Marchioniſ dilectiſ-  
 ſima coniux . Hæc namque requiem ani-  
 mæ ſuæ non dedit , donec ibidem templū  
 non ignobile , & commoda habitantibuſ  
 manſio conderetur : fabricæ de proprio  
 maxima ex parte ſumptuſ miniſtrando ,  
 nec uſquam propriiſ manuū etiā ſuarū  
 laboribuſ parcendo . Non eſt equidem  
 Illuſtriſſima Dña Cornelia Carrafa præ-  
 dicti Comitiſ mater ſua laude fraudan-  
 da : quæ , vt fertur , huic tantæ rei initium  
 dedit : licèt poſteà viro defuncto , aliò  
 migrans , ab opere cepto manuſ abſtra-  
 xerit . Templuſ autē illud ſacraſſimæ  
 Virgini Mariæ Coronatæ dicatuſ fuit :  
 eò quòd Virginis ſimulachruſ perpul-

chrūm, Regiaq; corona ornatum, à No-  
 lanis ciuibus diuinitus inspiratis (quæ  
 vrbs viginti miliaribus ab ipso loco di-  
 stat) illuc cum magna deuotione, atque  
 solenni processione quondam deductū,  
 & in sacello illo in perpetuum locatū ex-  
 titerit. In hanc tandem ampliorem (quā  
 prædiximus) formam, redactum locum  
 cū vidissent Ioannes, & Iulius; pleniorē  
 quoque ibidem Deo Optimo Maximo  
 seruitutem atque honorem reddi oport-  
 ere, piē considerantes; Ecclesiam ipsam  
 alicui probatæ Religioni subdi, & se sub  
 regulari obseruātia in posterum viuere,  
 toto corde anhelabant: quod Ioannes  
 opere adimpleuit; Iulius verò inde rece-  
 dere maluit. Modum autem, quo id re-  
 ctè fieri possit, aut cui potius congrega-  
 tioni subijci debuisset, penitūs ignoran-  
 tes. Veruntamen Deus, à quo negotium  
 istud emanasse certum est, & modū agen-  
 di, & religionem sibi placitā, & quicquid  
 opus erat, dedit. Accidit nimirū, vt oc-  
 casione nacta iidem Ioannes, & Iulius Il-  
 lustrissimo D. Antonio Carrafa Sanctæ  
 Romanæ Ecclesiæ Cardinali amplissi-  
 mo



mo animum suum manifestarent: quod quidem pijsimo viro summoperè placuit, & sanctum eorū propositum collaudans, vtque citiùs proficisceretur sedulā se operam daturum, eisdem recepit. Cū deniq; Cardinalis sancto zelo accensus summum Pōtificem Gregorium XIII. de congregatione Cassinensi consuleret: Non Cassinenses, Pontifex ait, sed Coronenses, hoc est, Eremitę Montis Coronę vocandi sunt: eò quòd & ipsi deserta inhabitent, & solitariam vitā sub obedientia ducant. Hoc verò responsum, quasi diuinum oraculum ab ore Dei prolatum fidelissimus Cardinalis suscepit, neq; vterius de alia religione quærenda cogitare voluit. Sed statim, nuncio misso, Patribus nostris notum facere curauit: qui intelligens rem ipsam circa acceptationem aliquam difficultatem pati, ad Montem Coronam, nulla proprij laboris ratione habita, vir tantus, quo Dei negotium perficeretur, personaliter accedere non recusauit. Cuius sanè præsentia meritò potuit, omni difficultate reiecta, renuentes Patres ad acceptādum flecte-

re,

re, necnon ad eius sanctissimum desiderium amplectendum prorsus inclinare. Fuit ergo acceptata Eremus illa 22. Septembris, M D L X X V I I. ad quam statim missi sunt Fratres numero quinque, qui & futuræ fabricæ debitum ordinem, & loci obseruantia optimum initiū darent. Cuius Ecclesiæ licet ab initio doctenus extiterit, attamen postea paulatim largitate dictorum Illustrissimorum Dñorū honestè adaucta videtur: ac præcipuè beneficio Illustrissimi Cardinalis, qui vltra centum tumulos frumenti annuos, sacerdotium non minimi valoris cū vnione perpetua adiunxit. Quæ quidem licet magna existant, maiora tamen multò in posterum à tam præclaris viris, tãq; Magnanima Dña Laura, secundum eorum in religionem deuotum ac feruentem animum, sperantur. Nunc tandem pauca de situ ipsius Montis, ac loci adnotare oportet. Est itaque Mons iste latissimus, cuius circuitus ad decem milia passuum se extendit: varijs collibus, valliculisq; multis constans. Celsitudo eius immensa, cuius cacumen ad duo miliaria



liaria, aut eò ampliùs ad Occidentem, & Septentrionem se extollit : Orientē autem & meridiē versus suauiter declinās. Vnde fit, vt ascensus ipse non grauis, aut nimis arduus ascendentibus se offerat : sed facilis, atque amœnus vbiq; reddatur : vtpote viridi sylua, varijsq; virgultis ascensionis viam vtrinque exornatā habens. Præterea Mons ipse quātus quātus est, densissimis fagineis nemoribus, alijsq; diuersi generis arboribus cōsitus vbiq; locorum vernans apparet. Valles verò quasdā ad Montis radices sitas castaneta fructifera occupant. Sciendū vtique est, Eremum, qua deagitur, nō inter altiora montis iuga sitam esse : vbi niuium rigiditas, vel aeris intemperies humanam conuersationem non admittunt : sed ascensionis medio condita est, vbi vallicula quædam Paradiso similis inuenitur : vernantibus fagis, alijsq; arboribus oppleta. Cum igitur ad summum ipsius ascensus ventū est, via quædam lata, & amœna recta te ad ostiū Eremiti ducit : intus autem ingressus mediāte platea quadam, quæ ad dexterā abscissa  
rupe,

rupe, ad sinistrā valido muro cincta est,  
 magnificum Sanctę Marię delubrū ante  
 oculos habes: quod fanè non sumptuo-  
 sa, sed vtili structura fabricatum extat,  
 ea magnitudine, qua maior in illa solitu-  
 dine desiderari non debeat. Cui etiam  
 adherentia ædificia decentis sacrarij, ca-  
 pituli, atque elaborati oratorij magnū  
 decorem præbent: sed super omnia ve-  
 nerandum simulachrum Deiparę deu-  
 tionis plenum, ac multis miraculis in-  
 signe, ipsum & ornatum & deuotissimum  
 reddūt. Contigua insuper Ecclesię, me-  
 dia parua plateola, domus nō paruę ma-  
 gnitudinis eleuatur, in qua omnes offici-  
 nę, puta cella vinaria, lignile, lauatoriū,  
 penus, culina, refectorium, & alię oppor-  
 tunę cum duobus puteis aquarum mul-  
 tarum, continentur. Post hæc ad occidē-  
 tem spaciosus campus extēditur, in quo  
 domunculę solitarię seorsum singulę se-  
 paratę, de more Eremitarum sedēt: quę  
 ibi pulchriores, cōmodioresq; quàm in  
 alia quauis Eremo nostra habētur. Sunt  
 & quædam vię inter densissimas syluas  
 ad recreationem Eremitis præparatę,  
 quę



quæ non minimam deambulantibus per  
 eas iucunditatem præbent. Postremò li-  
 cèt locus iste ab initio asper, & incultus  
 nimis fuisse dignoscatur, ac futuræ ma-  
 chinæ incapax à multis iudicatus: attamen  
 breui tempore, liberalitate Domi-  
 norum, diligentia Eremitarum, atque  
 abundantia rerum, adeò planus, & amē-  
 nus, necnon perinde dilatatus est, vt nūc  
 aptior, capaciorq; nequaquam desidere  
 tur: factus quoque suppellectili diues, &  
 Ecclesiasticis ornamentis, sacrisq; argē-  
 teis vasculis locuplex, atque præclarus.  
 Opere pretium est scire vltra hæc, quæ  
 modò exarauimus, quoddam esse extra  
 Eremum ad anteriorem partem ad or-  
 tum Solis promontoriolum (quod inco-  
 lę propter similitudinem castellulum vo-  
 citant) specula nempe eminentissima,  
 vnde in Apuliam vsque totum oculis in-  
 tuentium detectum solum ostenditur.  
 Conspiciuntur & vrbes non pauce, qua-  
 rum prima antiquitate nobilissima (in cu-  
 ius diœcesi locus iste manet) Beneuentū:  
 item Velinum, seu si mauis Abellenum:  
 his adde Tripallum, Montem fuscum, &  
 alia

alia complura nobilissima oppida: quorum proximius pulcherrimū Sancti Angeli castrum totius Baronie caput, ipsiusq; Eremiti sustentaculum. Ex hac denique mirabili specu Eremiticę nostri sepius ex stricta, angustaq; valle egressi, in summa tamen solitudine manētes, in magnam afflicti animi consolationē longē, lateq; speculantur. Restat hīc ad lectoris edificatiōē addere multa, atque stupenda in hac Eremo edificanda Deū ad sui ipsius, & intemeratę Virginis matris filij sui honorem miracula operatū esse: veluti est, combustum fuisse totum ornatū ab altari maiori vsq; ad summū, & solā Deiparę imaginē cū sua arcula, ac subtili velo (quo tegebatur) intactam remansisse. Item oculum cuiusdam operarij lapillo effossum ab ipsa Virgine in visione tactum, integrē restitutum. Et alia multa, quę hīc referri non possunt. Sed nos, si Deus dederit, de istis miraculis tractatum seorsum aliquando, vulgari lingua, daturos pollicemur: ideoque hīc eadem consultō pręterire decreuimus. Sequenti verō anno post acquisitionem



tionem præfatę Eremi, putà LXXVIII.  
 Gregorius Decimustertius Põtifex Ma-  
 ximus, qui semper Coronensibus propi-  
 tius extitit; interuentione, ac fauore præ-  
 dicti Illustrissimi Cardinalis Carrafę,  
 Ecclesiam Sancti Leonardi trans Tybe-  
 rim Romę (quę prius Capituli sancti Pe-  
 tri fuerat) societati nostrę in perpetuũ  
 aggregauit. Vbi nũc opportuno hospi-  
 cio fabricato, procuratores generales,  
 qui propter religionis negocia in curia  
 residere coguntur, satis commodẽ, ac re-  
 ligioso more commorantur.

## DE EREMO S. SALVATORIS à Prospectu Neapoli. Cap. IX.

**Q**UANTVM vtilitatis Christianę  
 Reipublicę afferant pietatis  
 exempla, ex hoc colligi fas  
 est: quòd audito Neapoli  
 prospero successu prædictę Eremi San-  
 ctę Marię, & Eremitarum illic degentiũ  
 pia conuersatione, non minus pij, quàm  
 generosi ciues, tanti boni participes fie-  
 ri cupientes: confestim nos vrbi propin-  
 quiores

quiores optare ceperunt. Quod ut illis facilius obtentu foret, varia quotidie loca, atq; adeò magnifica palatia offerētes modis omnibus nos inuitare nō cessabant: quæ tamen quia ritui nostro minus apta censebantur, eorum pium desiderium non erat possibile adimpleri. Tandem anno *M D L X X X V*. Vir Illustris Ioannes Baptista Crispus obtento à Reuerēdo Ioāne Capasanta Abbate quodam simplici sacerdotio sancti Saluatoris à Prospectu nuncupato: cuius situs ad Eremum condendam satis idoneus videbatur, nostros vocare & ad eandē Ecclesiam suscipiendam hortari non distulit: quibus cū locus placuisset, facilis fuit negotij conclusio. Est autem delubrum hoc sancti Saluatoris in cacumine mōtis præalti ab ipsa vrbe quatuor millibus passuum distantis: qui à sua celsitudine nomen accipiens à Prospectu dicitur. Nec impropriè sanè, cū inde & Tyrrhenū mare, quod à meridie habet, cum omni litore suo ab orientē & occidente, cumq; insulis multis: necnon à septentrione fertilis, atque iucunda Campaniæ



paniæ ager dilucidè prospiciantur. Patet etiam intuētibus inclyta Parthenope ex vna; ab alia verò parte Caieta vetustissima: & tandem quòquò te veritas, omnia aperta parent. Licet autē mons iste altissimus existat, ita nihilominus urbem versus celsitudinem suā in planiciē declinat, vt nobiliū currus, siue quadrigæ ad eius fastigiū facilè ascendere, indeque descendere valeant: via autem hæc suburbanis villulis hincinde decorata cernitur. Cū itaque sancti Saluatoris agellus angustior videretur ad Ere mum condendam idem Crispus sufficiēte finitimi agri, ex latissimo fundo (quem ibi possidet) partē ex mera liberalitate adiūxit; necnō optimū fabricæ proprijs pecunijs principiū dare nō distulit. Huic accessit & Illustrissimus vir D. Carolus Caracciolus, qui non modicā summā de proprio adiecit, & ornamenta altaris, vestesq; sacerdotales magni pretij statim ab initio, summa cū charitate, dedisse compertū est. Erat equidē Ecclesia Saluatoris paupercula nimis, eoq; nō poterat ibi cōueniens Eremitarū numerus

residere, neq; obseruantia Eremiticam custodiri. Et ecce diuinitus afflatus Illustrissimus D. Ioannes de Aualos excellentissimi Marchionis Vasti (qui totius exercitus Imperialis quondam dux strenuus fuit) filius, iam antea Palatiū quoddā mirabili arte fabricatū, in Monasteriū reducendū nostris, cū sufficienti patrimonio dare voluerat: quod à Patribus obtinere nequiuit. Is postea morte propinquus prædictæ futuræ Eremo sancti Saluatoris quingentos aureos annui census in perpetuū testamēto reliquit: nouū templū erigi, & sub inuocatione S. Mariæ scala cœli cōsecrari, atque in eo corpus suū sepeliri iubens. His ergo auxilijs, & magnificis largitionibus hæc sacra Eremus initiū sumpsit: quæ indies domunculis, & alijs necessarijs ædificijs, iuxta morem Eremitarū cōstructis mirabiliter augeatur. Et quia nūc fieri incipit, plenam eius descriptionē dare non valemus: quæ tñ attēta opportunitate, Neapolitanorūq; principū, ac nobiliū liberalitate, in maximā tūm ædificiorū, tū aliarū cōmoditatum perfectionem ventura speratur.

DE



## DE BEATO RODVLPHO VERONENSE. Cap. X.

**F** VIT nostris tēporibus in societate ista vir quidā venerabilis, patria Veronensis, nomine Rodolphus: iusta corporis statura, vultu placido, grauiq; incesu dotatus: liberalibus disciplinis non mediocriter eruditus, cuius tamē prēcipuū studiū in sacris literis erat. In iuuentute sua inter Monachos Oliuetanos conuersatus, in virili autem ætate factus Eremita, tanta in religione ista integritate, morumq; sinceritate vixit, vt omnibus esset admiratio. Cuius cōuersatio per omnē vitā non solū sine crimine, sed etiā sine reprehensione trāsiuit: atq; in tantū solitudinē adamauit, vt per annos viginti (quo tempore ferē semper aut Prior, aut Maior fuit) ab Eremiti ostio nō sit egressus. In senectute verò bis reclusionē obtinuit, quā mirabili cōstātia, ac legis ipsius custodia obseruauit. Rursus innata ei grauitas, & syncera morū integritas ī causa erat, vt ab oībus vnicē diligeretur pariter, ac timeretur:

cuius solius oculi intuitus durior transgressoribus reprehensio videbatur, quàm cuiusq; alterius Prelati grauissima correctio. Non erat austerus, neq; hypocrisis vitio maculat<sup>r</sup>: sed vbiq; , inq; omni sua actione liber ac purus, simplex & rectus. Induebatur iuxta Eremitici instituti ritū honestè, vestibus semper mundissimis vtēs: nō nimia inedia delectabatur, neq; indiscretas abstinentias affectabat: sed summa cū discretione quotidianū cibū, prout illi dabatur, capiēs (aliqua frequēter portiuncula relictā, siue ex ordinario detractā) cōtinua parsimonia gaudebat. Breui insuper somno cōtentus, ac moderatas vigilias obseruās, diuinis precibus priuatæq; orationi iugiter vacare solitus est. Ad nocturnas pariter, atq; diurnas laudes primus semper accedere, easdēq; mirabili deuotione, ac perfecta attentione persolvere illi de more fuit. Nouerat hic vtiq; linguā frenare, labiaq; custodire, ne loquerentur dolū: silentiū nisi coactus rūpere, neq; vaniloquiū audire nisi inuitus assueuerat: cui omnis laus proximi iucunda, & è contrā omnis detractio



tractio abominabilis semper visa fuit. perpetua ei Psalmorem cū meditatione prolatio, ita vt quoties eū extra cellā inuenire cōtingerat, aliquē per sussurrū alloquētē iudicares. Fuit etenim illi in celebrationibus decus, & in cūctis religiosis actibus gratia admirāda: hic deniq; scriniū quoddā virtutū, hic regularis vitæ exēplar, & solitarię vitę norma oībus esse solebat, foelixq; ille reputatus est, q̄ eius vestigia seq̄, vel actiones imitari studuit. Tādē qualis illi vita, talis & exitus fuisse cōstat: nēpē quiet⁹, sineq; afflictioe, imò cū manifesto lætitiæ signo spiritum exalauit. Quā ob rē fm vitæ perfectionē, foelicēq; finē affirmare nō dubitamus, eius beatam animam è corpore ad cœlos rectā euolasse. Obijt verò 21. Aprilis, anno MDLXXXIII. ætatis suæ 79.

Potuissem hīc multos nō modò defunctos, verū etiā adhuc inter viuos agentes meritò, optimoq; iure laudibus extollere: sed singulos pprijs virtutibus efferre difficile nimis, atq; infinitū opus aggredier. Multi siquidē è maioribus nostris fuere, quorū alter silētio inuiolabili, ve-

lut Zacharias quidā Siculus : alter abstinentia; quidā oratione iugi, sicut Arsenius nuper defunctus: nō pauci patiētia, laboribusq; tolerādis multū valuerunt. Nec desunt profectō hodie, qui mirabili ciborū parsimonia, perpetua taciturnitate, cōtinuaq; oratione, non sine admiratione præcellāt. Quales sunt Antonius, & Foelix Conuersi, qui adhuc viuētes mortui reputantur; & alij innumeri. Sed cū superstitēs laudare prohibeat Ecclesiasticus; satiūs erit ab eorum encomijs, etsi iustissimis, penitūs abstinere. Postremō expediti de his, quæ ad historiæ cursū pertinet, iam tēpus est, vt ad institutū, & vitæ Eremiticæ obseruantiam transeamus: quibus magis lectorem delectari, eiusq; animum refici speramus, quàm in his, quæ dicta hætenus fuerunt, recreari contigerit. Quantum enim anima corpori præstare cognoscitur: tantum religionis institutio, gestorum narrationi anteponenda venit.

FINIS QVARTI LIBRI.


RO-



ROMVALDINÆ,  
SEV EREMITICAE  
MONTIS CORONAE  
CAMALDVLENSIS  
ORDINIS HISTORIÆ.

*Liber Quintus.*

PROOEMIUM.



**M**ONTIS tempus habent,  
dixit Ecclesiastes, & suis  
spatijs transeunt vniuer-  
sa: ea nimirum est rebus  
omnibus innata proprie-  
tas, vt in simplicitate na-  
turæ exortæ, paulatim crescant: ac rur-  
sus formæ cuiusq; expleta mensura, de-  
crescere incipiant; quæ nisi reparatione  
quadam instaurentur, in interitum cele-  
riter pergunt. Quæ misera conditio, nō  
corporeis modò, sed & his, quæ corpore  
carent, quævè spiritus sunt, plerumque  
inesse solet. Sic de limo terræ, in virum

perfectum sublimatus Adam, parua mora, gula illectus, in mortis corruiť miseriam. Sic diu stare non potuit aurea illa prima hominum ætas, quæ lege naturæ dotata, vitio postea cõsentiens, penitus corrupta, diluuij aquis submersa est. Bonum habuit initium secundum legem Moisi Synagoga, dum in via mandatorũ stetit dilecta Deo, veruntamen in auaritiã hypocrisisque declinans, facta est abominatio. Heu me miserũ, quò abiit tam sancta, doctrina Apostolorum fundata, perfectionis schola? quò recessit nascentis Ecclesiæ ignita charitas? Vbi nam est illa fidelium omnium, cordium animarumq; vnitas? Vbi nam apparet Martyrum fides, & inuicta constantia? Vbi Confessorum spes, seu innocentia vitę? Eodem sanè modo defecit sanctorum Patrum ardentissima deuotio, Anachoretarum austeritas, omnisque perfectionis operatio. Sic euauit Magni Basilij regularis doctrina: sic in varia dissecta Augustini eremitica institutio cernitur. Quid moror? nisi toties reformata fuisset venerãda Benedicti pgenies, nisi tot instau-



instauratores habuerit olim Monastica  
 institutio : regula eius sanctissima pro-  
 culdubiò abolita foret. Nil ergo mirū,  
 si Camaldulensis religio (quæ tamē sem-  
 per sui Romualdi vera æmulatrix fuit,  
 atq; primæ institutionis tenacissima ob-  
 seruatrix) aliquādo suum rigidum nimis  
 institutum, temporum, locorum, ac per-  
 sonarum habita ratione, aliquatenus mi-  
 tigasse, moderassevē noscatur. Quin po-  
 tius cunctis admiratio esse debet, in tot  
 seculorum curriculis, in tam multiplici  
 rerum, ac personarum varietate, Patres  
 nostros semel arrepti propositi, pertina-  
 ces fuisse semper obseruatores. Consen-  
 taneum ergo censebitur, gestorum narra-  
 tione expedita, tantorum Heroum præ-  
 celsas virtutes consimili stylo demonstrā-  
 re : necnon temporis seruato ordine eo-  
 rundem victitandi rationē, ritus, & exer-  
 citationes commemorare. Veruntamen  
 de re temporibus nostris penitūs inusi-  
 tata verba facturus, non possum non ve-  
 hementer formidare : ne non parū fidei  
 cū apud seculares, profanosq; homi-  
 nes, tū etiam penēs religiosos habitu-  
 ra

ra sit narratio nostra. Neq; talia tenta-  
 re ausus fuisset, nisi maiorum nostrorū  
 monumenta nobis testimonio essent:  
 nec paucos ex Patribus idoneos verita-  
 tis testes habuisset. Alioquin, quæso,  
 quis credat fortem reuixisse Antonium:  
 resurrexisse abstinentiæ typum humili-  
 tatisque exemplar Hilarionem: denuò  
 apparuisse silentes Macharios: aut ite-  
 rum cōuersatos in terris Ephræm, Teo-  
 nem, Ammonam, atq; Serapionem cum  
 reliqua sanctorum Patrum cohorte?  
 Quis, obsecro, eorum virtutes homini-  
 bus ætatis nostræ restitutas esse affirma-  
 re non erubesceret? Nō etenim illis dis-  
 similes multum viros, nec alios, quàm  
 qui illis fuere mores (si tamen nobis ex  
 Alto tanta fuerit concessa facundia)  
 ostensuri sumus. At si quid durum ni-  
 mis, asperum, difficilevè offenderis,  
 amice lector, benignis auribus accipias,  
 bonique consulas oportet: quod ni fiat,  
 pro animi solatio desolationem spiri-  
 tus reportabis.



DE EREMITICO HABITU,  
cilicio, & tonsura. Cap. I.

**V**NIVERSAE igitur tractationis nostræ ratio, atq; solitariæ militiæ substantia, in habitu & habitatione, in victu & exercitatione potissimum consistit: nam alia cuncta ab his tanquàm riuuli à fonte defluunt: eoq; singula quasi species sub genere suo veniunt collocanda. Primum autem narrationis locum habitus sibi vendicat, ut qui primus Monachum designare, ab alijsq; eum hominum generibus distinguere solet. Porro gratam fuisse semper solitarijs, ac pœnitentibus pauperem, asperamq; vestem, Helias Thesbytes, & Ioannes Baptista, sacrarum literarum testimonio, nobis apertè ostendunt: quorum alter hirsuto incultoq; corpore, zona pellicea accinctus; alter verò pilis camelorum indutus, ac simili zona circa lumbos suos incedebat. Legimus & fuisse quosdam Dei seruos, qui consutis infimul arborum folijs, sibi operimenta conficiebant, panni delitias omninò nescien-

nescientes. Quis ignorat Paulum Thebeum primum Eremitam veste ex palmæ folijs contexta per totam vitā fuisse vsum? Talem utique ornatum huius militiæ miles sibi assumere debet: ut continuo aduersus carnem, mundum, & diabolum in procinctu esse videatur. Sint lumbi vestri præcincti, inquit ille, non certè relaxati, nec ampla, aut delicata veste contecti. Vnde meritò Apostolus mundum indignum putat pœnitentibus illis, quos simili cultu ornatos describit: illos, inquam, qui circuierūt in melotis, in pellibus caprinis, egentes, angustiat, atque afflicti. Verum ut suo ordine rem tractare videamur, de forma, & materia vestium paucis differendū hoc loco censeo. Quare si Cassiano, reliquisq; antiquioribus, qui hac de re scripserūt, fides aliqua adhibenda sit: manifestum est, inter Aegyptios atq; Thebaidis Patres nullam fuisse certam determinatamque vestimentorū formam. Sed vnusquisq; ex his rebus, quæ sibi parare poterat, ea utebatur veste, quæ corpus contegeret tantum, ac nuditatis verecundiam, frigorisq;



gorisq; iniuriam repelleret, nulla autem  
vanitatis iactantiæve seminaria enutri-  
ret. Illud, scilicet, Apostoli tenaciter  
obseruantes: habentes alimenta & ope-  
rimenta, his contenti simus. Quod tamē  
non ita intelligendū est, vt existimemus  
vnumquenq; eorum proprio sensu pror-  
sus diuersas sibi adaptasse vestes: immò  
inter eos præcipua cura erat, ne amictus  
singularitatis nota penes quem deprehē-  
deretur. Attamen nulla Patrum constitu-  
tio cauebat, vt omnes vno eodēq; colo-  
re, aut vna eademq; forma induerentur.  
Hinc factum est, vt alter lineis, alter la-  
neis; hic melioribus, ille vilioribus ve-  
stibus vteretur: quin & eorum multi sa-  
go cilicino, lineovē; multi melote; non  
pauci caprarum pilis tegebantur: mul-  
tis eorum strictus cucullus, quibusdam  
colobium in vsu erat: plerique mauorte  
(hoc est, breui palliolo) necnon rebra-  
chiatorio vtentes. Et hæc omnia vilia,  
rudissimaq; parabantur. Omnes autem,  
quod valdē mirabile erat, in ista varie-  
tate, & paupertati, & conformitati mirū  
in modum studebant. Ac perinde beatus  
Pater

Pater noster Benedictus hæc sanctorum Patrum exempla perpetuò insecutus, parum definitam in sua Regula dedit nobis indumentorum speciem: cum plura his de rebus fecerit verba. Nam licet cucullæ, tunicæ, scapularis, pedulum, atque caligarum expressè meminerit; tamen nihil eorum certa demōstratione descripsit. Quid quòd illicò subiunxit: vt nō de harum rerū colore, aut grossitudine causarentur Monachi; sed eas tales haberent, quales in prouincia ipsa inueniri aut vilius comparari possent. Per quæ verba Glo. in Clem. Ne in agro, de statu monach. ait: tres colores esse permisos Benedictinis; nigrum, album, & brunum. Sed de his satis: sufficit etenim nobis, quòd Benedictus non eodem colore, & vna vestis forma, aut eiusdem qualitatis indutus incessit: vt ex Dialogis Gregorij colligi fas est. Similiter Magnus Basilii cum magnum tractatum de habitu ratione dedisset, solam honestatem atque decentiam vestium cōmendauit: nihil certum statuens. Quod item beatus Augustinus in sua Regula fecit. Merito



ritò igitur Cassianus in simili materia  
 concludit, illa à nobis tantummodò esse  
 tenenda, quæ vel situs locorum, vel pro-  
 uinciæ vsus admittit . Porro his pijssi-  
 mis considerationibus motus sanctissi-  
 mus Pater, & Religionis huius fundator  
 Romualdus, nec sibi neq; discipulis suis  
 certam statuit amictus qualitatem : sed  
 his semper vsus est, quæ iuxta Benedicti  
 Regulam viliùs & commodius parari vi-  
 debantur. De suorum quoque Eremita-  
 rum indumentis, varia prout tempus, lo-  
 cus, & opportunitas ferebant, legimus :  
 qui tamen nuditatis decorum, pauperta-  
 tis ornamenta, atque humilitatis, simpli-  
 citatisq; gemmas alacriter vsquequa-  
 complexi sunt . Nec refert, quòd quidã  
 sine fundamento asserat : Romualdum  
 post Angelorum visionem nigrum habi-  
 tum in album mutasse . Adeò ne vecors  
 fuit, alioquin diligentissimus Petrus Da-  
 mianus, qui in tam proluxa historia cer-  
 to amictu Romualdũ indutum dare ne-  
 sciuerit? Apud quem modò abiecto cul-  
 tu, modò excalciatum, modò pedibus  
 ornatum sanctũ Patrem legimus . Adde  
 quòd

quòd de eo, & discipulis eius in Pereo  
 manentibus sic loquitur auctor. Quis  
 enim non obstupesceret, quis non immu-  
 tationem diuinæ dexteræ prædicaret, cū  
 vidisset eos vno birro contentos, inclu-  
 sos, discalciatos, incultos, & tanta absti-  
 nentiæ ariditate contritos? In summa  
 nulla fuit antiquitūs præfinita Romual-  
 dinis vestium norma; neque species, vel  
 qualitas prohibita; dummodò honesta-  
 tis, paupertatisq; Eremiticæ metas non  
 excederet. Succedentibus verò tempo-  
 ribus, dissecta est Religio Monastica in  
 diuersa, ac penè innumerabilia Religio-  
 forum genera: quæ licèt cuncta ab ipso  
 Apostolico fonte descendant, & magna  
 pars Benedicti Regulam sequatur; attā-  
 men vel regula, vel moribus & constitu-  
 tionibus valdè inuicem distare noscun-  
 tur. Vnde proculdubiò cōsecuta est, atq;  
 orta (necessitate cogente) hæc habitus  
 varietas: ne promiscui diuersorum rituū  
 homines incedentes, semper damnabilē  
 confusionem parerent. Hinc Cassinen-  
 ses (quo frequentius vsus esse Benedictus  
 perhibetur) nigrū: Oliuetani, & reliqui  
 similes



similes album; Dominicani vtrunque simul: à quibus parum distare videntur Cartusiani; vtrumque retinent quoque Augustiniani. Naturalem commistæ lane colorem sibi sumpsere Franciscani: & alios alij, prout quibusque placuit, Religionum præsidentibus: Apostolica, vt crediderim, auctoritate approbante. Eo quoque modo, quo singulis color datus, vel assumptus est proprius: eodem & vestimentorum species, vel forma eisdẽ attributa creditur, & cernitur. Quam ob rem Archiepiscopus Florentinus enumeratis plurimis Benedictinorum scholis; quas & nos primo libro plenius recensuimus: omnes hi, ait, sub regula Benedicti, differunt tamen constitutionibus, & habitu. Hæc tandem causa est, vt tam dispari amictu incedāt Monachi, tamq; discolores nobis appareant religiosi viri. Verum ne ex hac varietate rerū causam calumniandi accipiant nostri tēporis calumniatores; ac religionem confusam, atque dissipatam existiment, & prædicent: opere pretium putavi hæc carmina aliquot inferere Cornelij Mussij,

A A

viri

# EREMITICÆ HISTORIÆ

viri certè de militia ista vndiquaq; benemeriti. Is ergo calumnijs istis occurrens, atque malignorum ora obtundens: sic cecinit olim.

Iam qui multi hìc videntur

Monachi, vnum fatentur

Fide, mente, actibus.

Nec ab vno sunt disiuncti,

Sed in vnum sunt coniuncti

Mutuis affectibus.

Neque Monachi dicuntur

Tantum, quòd cellis abduntur,

Aut quòd soli victitant.

Sed quòd vno delibuti,

Et ab vno instituti,

Vnum bonum quæritant.

Nec idcirco diuiduntur,

Varijs quòd discernuntur,

Mistisvè coloribus.

Aut quòd mœstis hì vtuntur,

Hi lætis amiciuntur,

Alijsvè vestibus.

Sed distinctis colorati,

Qui putantur separati,

His, & his habitibus.

Vnum simul Deum volunt,

Indi-



Indiuiduique colunt

Votis vniformibus.

Sciunt enim quòd nitorem

Non curet, neque squalorem,

Neque formas vestium.

Qui mansuetis delectatur,

Et in intimis moratur

Cordibus credentium.

Sic de regulis censendum,

Ac de multis sentiendum,

Putà, ceremonijs.

Quæ quantumlibet deformes

Pareant, sunt pariformes

Suis ex indicijs.

Ex quo dulcissimo cantu perbellè nos docet religiosissimus Poeta, quàm conformes sint in Deum Monachorum apparentes foris deformitates: cuius sufficientissimis rationibus aliquid addere superuacaneum existimari posset. Ac perinde consultiùs erit ad nostrum institutum reuerti. Inter has itaque colorum varietates, visum est Camaldulensibus Patribus albi candorem sibi eligere: nimirum candida columba Eremitica vita apud candidos auctores appel-

lari solet. Quo ad formam autem indumentorum, memores esse oportet prædictorum tres, scilicet, esse Camaldulensiū species: quarum prima eorum, qui in ipsa Camaldulensi Eremo Eremiticè degunt. Secunda est Monachorum, qui in pluribus vrbibus, plurimisvè Italiæ locis inhabitant, monasticam vitā ducentes. Sunt etiā & Eremitæ societatis sancti Romualdi Montis Coronæ, qui in diuisis cellulis commorantes, plures Eremos per Italiam incolunt; quarum prima, Corona Mons. Qui ergo Camalduli viuūt Eremitæ, monastico more amittuntur: nec scio inter Eremitas præfatos, & suos monachos aliquam esse indumentorum differentiam: nisi quòd Eremitarum cuculla strictior est, & ex simplici panno. Communis autem eorum habitus forma ( nigro colore in album mutato ) similis est, per omnia vestitui Cassinensium; excepto quòd Camaldulenses scapularium ( quod habitum vocant ) laneo cingulo astringunt: Cassinenses verò, corij cinctorio accincti, scapularium solutum relinquunt. Eremitæ  
tandem



tandem Coronenses longè aliter induuntur: nam & in hoc Paulus noster strictiorem statuit modum; qui hætenus obseruatur, licèt paulisper benigniùs hodie, propter multos imbecilles, qui tantam rigiditatem sufferre nequeunt. Sed vt illius temporis & præsentis, cunctis rei ferries patefiat, viuente Paulo qualiter in Eremo Criptarum, & reliquis Marchiæ locis induti discipuli eius incedebant, ex eiusdem epistola quadam, ordine seruato, commonstrabimus. Qui quidem de se ipso semper modestissimè tacens, de his, qui secum erant, in hæc ferè verba rē describit. Eorū vestitus, inquit, pauperimus, atq; vilissimus, vnicuique vnica est tunica, vix sub dimidiam tibiā descendens. Scapularium (cui cucullus perparuus, consutusq; affigitur) ad genua vsque protractus. Tunicella, quæ subuculæ loco carni adhæret, sacco persimilis (putà pannus asper, ex rudissima lana) nec multum cilicio dissimilis, retrò & antè ad genua pendens, quo caput transeat perforata; nihil additamenti ad latera habēs, quo dilateretur, sed vtrinque consuta cor-

pus astringit. Caligis non vtuntur, præter paucos infirmiores, tibialia ad genua tantū eleuata deferentes. Sunt prætereà nonnulli, qui ligneo focculo, more Franciscanorum vtantur, pede nudo. Sunt & multi, quibus nudo pede terram calcare magis placet, æstate durâte; hyeme focculum assumentes. Materia itē, seu qualitas panni, quo operiuntur Fratres, vilissima, minimique precij: nam tunica, & palliolum siue mantellum, quod loco cucullæ monachorum super omnia ab humeris ad genua vsque deferunt, ex grisso, omnium scilicet pannorum rudissimo conficiuntur. Tunicella, & habitus, siue scapulare, ex eadem quidem lana, sed laxiori textura, nullaque molendini pressura contusa, quæ leuidentia dicitur, seu Sclauonica rascia. In summa affirmat idem Pater se nouitium, paulò antè quàm hæc scripserit, induisse, omnibus quibus Eremita indui solet: nec ampliùs quàm quatuordecim carlinos Marchianos (summam vnus scuti facientes) expendisse. Cingulum, inquit, quo cinguntur, vel ex tenui fune, vel ex ora ipsius panni



panni desumitur. Omnis superfluitas in vestibus odiosa ipsis: quippè qui vnica tunicæ sint contenti: atq; perpauci sunt, qui duas habeant tunicellas. Tandem hæc erat temporibus illis, Paulo viuente, indumentorum series, & obseruatio. Postea verò maturiùs considerauerunt Patres, plenaq; experientia sunt edocti, nuditatem hanc prouinciæ regionisque intemperatam temperiem nõ pati: neq; debiliora nostrorum hominũ corpora rigidissimi aeris seuitiæ resistere posse: ideoq; citiùs æquo Fratres miserè mori; aut certè catarris, alijsvè perpetuis morbis repleri. Sic Deus agere consuevit, vt feruor nascentis religionis perennis non esset, sed paulatim decrescens ad vsum rationis descenderet. Ipse enim dixit: Ego Dominus diligens iudicium, & odio habens rapinam in holocaustum. His igitur ita perpensis, saniori consilio statutum est, vt nihil ex qualitate, aut quantitate vestium immutato, paulò cõmodiùs corpuscula tegerentur. Hodie itaque eodem grisseo palliolo, graui ac rudissimo sine aliquo ornamento, ad pe-

ctus ligneo globo coniuncto (quale olim deferbat Helias, cū assumptus est) in omni simplicitate: licet æstatis tempore molestissimo, libenter utimur. Sic tunicella, scapularium quoque, cui strictissimus cucullus, siue cappucium cōsuevit, quod Paulo & suis fuit, nobis manet; in nullo immutatum, vel alteratum. Tunica insuper, quæ totum corpus tegit, ex panno sui natura vilissimo (non tamen ex grisso, ut olim) dari solet: quæ sacerdotibus ad pedes vsq; honestatis causa descendat: conuersis tamen atq; cōmissis breuiori mensura eandem porrigi, vsus habet. In reliquis ferè salua manet prima Pauli sociorumq; eius consuetudo, excepto quòd propter munditiam duæ tunicellæ, duoq; scapularia singulis dantur. Quod autem ad centonem, tibialia, atque pedules attinet, quæ minus necessaria sunt, libera est nobis non utendi facultas: eoq; non pauci ab ijs, vel aliquorum libenter abstinent. Adde quòd multi, ea quæ necessaria sunt: tunicā, scilicet, palliolum, habitum, & tunicellam semper viliora deferre summoperè gaudent.



dent. Veruntamen pretiosiora, aut pom-  
pofa; alterius formæ, aut qualitatis ha-  
bere indumēta prorsus interdictum est.  
Hæc est tandem paupertatis nostræ in  
amictu inuiolabilis obseruatio. Nō hīc  
pelliculæ lenes, & calidæ; non panni sub-  
tiles, & pretiosi. Veros namque solitu-  
dinis cultores, nuditas, pauper vilissi-  
maq; vestis, refarcita millies, ac panno-  
sa tunica summoperè ornat. Inter pœ-  
nitentiæ instrumēta multum sibi vendi-  
cat cilicium, quod tamen inter vestes cō-  
putari certum est. Hanc itaque vestem  
neque Aegypti, neque Thēbaidis Patres  
olim, vt Cassianus tradit, neque postea  
Camaldulenses approbauerūt, eò quòd  
elationis non minimū videatur habere  
fomentum: & ad necessarij operis exer-  
citiū, ad quod semper Eremitam impi-  
grum, expeditumq; incedere oportet,  
inhabilis atque inepta esse dignoscatur.  
Longa item experientia compertū est,  
maceratum perpetuo ieiunio, & abstine-  
tiæ inedia corpus, cilicij grauamine ad  
orationem & omne opus pium, reddi  
inutile. Ita nihilominus rem réperauit  
consti-

## EREMITICÆ HISTORIÆ

constitutio nostra: vt qui vti eodem velit, cum Prælati licentia, possit. Tonsura præterea monachalis ad habitum magis pertinere videtur: quia & ipsa cum habitus electione inuenta est. Vnde fit, vt Benedictus in regula de illa nullam mentionem faciat: & Maurus per capillos ex aquis Placidū extraxit. Neq; beatus Romualdus aliquādo rasura vsus est: cū scriptum sit, cap. 52. suæ historiæ: quia nouaculam nunquā in suum caput patiebatur ascendere, sed ipse sibi solebat excrementa capillorum, & barbæ forcipibus attondere. Demum & nobis, & Camaldulensibus commune est, monachalem tonsuram, & prolixam barbam deferre.

## DE HABITATIONE EREMITARUM. Cap. II.

**Q**UEM AD MODUM in vestibus paupertas pijs placuit semper hominibus: sic humilis, abiecta q; habitatio nunquā displicuit: immò multos fuisse legimus deserti



deserti habitatores, qui omni habitaculo carentes, in asperrima penitentia syluas peragrantes, vitam peregerunt. Nam quod de cella Helix apud quendam legimus, vix scripturæ sacræ auctoritas admittit: quæ nobis eundem vel absconditum, vel perfugum, vel sine certa mansionem vixisse ostendit; filij verò Prophetarum, quorum meminit scriptura, qui libenter Eliseo adhibebant; in agris, & solitudinibus ut plurimum habitantes, per nemora circa Iordanem, Hieronymo teste, sibi tabernacula faciebant. Alij erant, quos nobis plenè descripsit Apostolus, qui in cauernis, & speluncis commorantes coram Deo suo, mundi conseruabantur. Præcursores Domini Ioannem in deserto fuisse affirmat Euangelista Mattheus, nulla de habitaculo facta mentione; quod utique non tacuisset, si eo usum fuisse sciuisset. Errabant per solitudines viri illi de corporis commoditatibus nil cogitantes. In secunda Eremitarum ætate sancti illi Patres varij satis hac in re extiterunt: ita ut nulla certa de habitatione doctrina dari queat. Nam Paulus Thebeus

beus primus Eremita dictus in spelunca,  
 quæ etiam lapide quodam claudabatur  
 per annos ferè nonaginta, Hieronymo  
 auctore, solus permansit. Hilarion pri-  
 mum sibi tugurium iunco contexerat,  
 deinde loco mutato cellam sibi compe-  
 git ex luto, longitudine pedum quinque,  
 latitudine paulò ampliorem, quàm eius  
 corpusculum patiebatur: vt sepulchrum  
 potiùs, quàm domum crederes: super  
 nudam humum, vsq; ad mortem cubans.  
 Sed ne singula frustrà percurramus, om-  
 nes illi sãctissimi viri Anachoretæ (quos  
 in vitis Patrum, vel alibi legimus) in ca-  
 sis, rupibus perfossis, in speluncis, in tugu-  
 rijs, sine parietibus confectis; sed ex lu-  
 to, stramentis, arundinibus, vel similibus  
 rebus constructis, siue contextis, alacres  
 vitam ducebant. Tales equidem mihi  
 narrat, atq; describit Cassianus Abbatis  
 Archebij cellas, quas venientibus ad se  
 facilè dabat: ita vt breuissimo tempore  
 tres ipse sibi in loco arenoso, omni mate-  
 ria carente, proprijs manibus, ac labore  
 fabricauerit. Quales autem illis cellæ,  
 talia instrumenta, ytenfiliavè erāt: quod  
 ex



ex qualitate ædificij conijci potest. In specu vixisse Benedictum, dum Eremita fuit, manifestum est. Non aliter, nec in melioribus ædificijs, quàm suprà retulimus, commorabantur Marinus, & Romualdus in paludibus Venetiarum: non aliter habitabat in Gallijs cum Vrsiolo, & Grandenico, vel cum alijs discipulis in Istria, Parentio, Bifurco, Sitria, & alibi. Sic equidem tam facilè suas Eremos ac monasteria condere solitus est: nimirum Eremiticæ institutionis metas transire nunquàm voluit sanctissimus Pater. Tales proculdubiò fuere, quas Camalduli cellulas Theodaldus Episcopus beato viro construxit: humillimas utiq, nimis, veraq; pauperum habitacula. Nilominus tamen quæ hodie in præfata Eremo sunt, superfluitatem aliquam nō sapiunt; sed potiùs religiosam, Eremiticamq; modestiam permaximè redolent atque ostentant: nec certè loci asperitas, aut aeris rigiditas minus habere permittunt. His obiter de Camaldulo dictis: pauca de nostra societate dicamus, ne præmissum ordinem videamur prætere-

præterire. Paulus itaq; Iustinianus, per omnia beati Romualdi vestigia sequēs, quem sciebat ambitiosas cellas abhorruisse semper, easque in Eremo Bifurci aliquando intrare noluisse: ideò auctoris sui humilitatem affectans, foramina potiùs cum suis habitare elegit. Ac proinde cùm primùm Criptas Massacij habitandas suscepit, cuncta iuxta intentionem suam instituere cepit; ab ipsa, scilicet, habitatione faciens initium. Fecit namque & sibi, & suis habitacula non in medio agri ex lateribus decoctis, aut ex lapide quadrato calce conglutinato; sed in alta montis ripa effodit foramina; paruulas, scilicet, cauernas, ac sic cuniculorum more foueas habere illi, & socijs satis fuit. Vnum certè grauius ferebant omnes, vt ipse quodam in loco refert, quod non singulis singulæ specus statim ab initio effodi poterant: vnde bini commorari coacti sunt, donec tractu temporis labore proprio, fideliumq; ope plures effectæ fuere latebræ, ita vt virorum numerum adæquarent. Sicque actum est, vt non hominum frequentia modò,



modò, verùm & humanis quoq; carerēt habitaculis : & ferarum more in deserto loco, inter sylvarum densitates, in profunda valle, omni terreno solatio destituti, sola spiritus consolatione contenti libentissimè latitarent. Atqui durum videtur tibi quod diximus; durius certè videbitur quod sequitur: nimirum palatij istis similis erat instructa suppellex. Non etenim ea ornabat perpolita mensa, non elaboratum scannum, non vasorum copia, aut pulchritudo: vix siquidè simplex super humo tabula aderat, in qua panis frustra ponerētur ad manducandum: pro sedibus duri natura lapides mensæ adhærebant. De vasculorū penuria, deq; mapparum inopia, & omnium vtenfilium egestate spontè taceo: ne mihi vera dicenti mendacij nota impingatur. Porro vix credibile est, quanta passi sunt in illis diebus Patres nostri. Lectuli verò eorū, aut faccus paleis plenus, aut certè iunceæ, scirpeæve mattæ solo distentæ: opertorij autem sclauonicis, quibus talia data fuerant, aut his carentes proprijs palliolis eorum loco  
ala-

alacriter utebantur. Attamen beato Paulo defuncto, oblataq; Dei beneficio meliori opportunitate; Patres discreta consideratione, quam suprà de habitu differentes retulimus, aptiora & plura loca consecuti, rem omnem in meliorē statum reduxerunt. Temperantes videlicet ad iustum sanctitatis modum rigorem illum, illis fortasse (Dei adiutorio) facilem; multis tamen intolerabilem: non enim omnia possumus omnes. Quia autem id ratione actū sit, ne omnes Eremos superflue, cumq; lectoris tædio describere cogamur: Montis Coronæ, quæ Eremus inter ceteras principatum tenet, modum ac ritū plenius demonstrabimus. Nam ab ipsa reliquæ omnes religionis huius Eremi viuendi normam accipiunt: ideoq; quod de ista dictū fuerit, de reliquis quoque dictum intelligatur. Locus ergo iste solitarius valdè, ac solitarijs viris conueniens nimis: cui distinctæ inuicem domunculæ cum interpositis hortulis, magnum præbent ornamentum. Non admodum ibi magnificæ ædificia reperiēs, sed humillima atque abiecta:



abiecta : quorum vnumquodque hospi-  
 tiolum in tres mansiunculas diuiditur,  
 quarum prima vestibulum est, ad cuius  
 leuam camerula parua focum lectulūq;  
 simul continens : ad dexteram lignile, in  
 quo & alia necessaria habentur. Neque  
 altior habitatio datur : pauimento nāq;  
 sine intermedio correspondet tectum :  
 præter quàm in cubiculo præfato, vbi  
 lectulum manet, in quo tecto coniunctū  
 quasi lacunar pertenuè appositum, cer-  
 nitur. Lectulus verò faccus paleis plenus,  
 vel scirpea matta tabulis superposita;  
 singulis opertorium sclauonicum datur,  
 quo frigoris tempore dormiens coope-  
 riri possit : ad caput pro cervicali saccu-  
 lus palarum apponitur; puluinar au-  
 tem, vel molle cervical nemini concedi-  
 tur, nisi infirmo. Verum tamen est, inter  
 eos, quosdam iminò non paucos esse,  
 qui neutris istorum quiescentes vtātur :  
 sed vel super nudis tabulis, vel etiam se-  
 dentes obdormiant ; ne graui sopore  
 sternerentes desides efficiantur : corporis  
 nimirum perpetuum laborem omnimo-  
 dæ quieti antepponentes. Suppellex qui-

dem brevis nobis, quæ in vasis fictilibus quatuor, mappis duabus, & linteo consistit. In cubiculo prædicto tabula quoq; seu mensula est, super quam libri & reliqua, quæ ad studium, seu lectionem sacrorum pertinent, prout cuiusq; capacitas, vel sancta affectio exposcit, apponuntur. Præter hæc autem, quæ diximus, aliquid aliud in propria domuncula Eremitam possidere nefas, atque damnabile est; nec facilè à superioribus impetratur: nisi aut infirmitas, aut certè vrgens necessitas ad hoc ipsum concedendum seniores compellat. Scire tandem pulchrum est, quicquid in priuata cella senioris permissu retinent Eremitæ, commune quoque omnibus esse: alter enim alteri indigenti, ac sciente superiore petenti, id ipsum communicare tenetur. Hæc siquidem inter hos Dei seruos mutua charitas præstat, vt quæ singulis priuatim conceduntur, communia omnibus videantur: neque priuata habitatio aliquo modo, quod continet, priuatum facit. Hæc de habitatione sic breuiter exarauimus; in quibus tamen plenissimè apparet



paret antiquorum simplicitas, & nostrorum temporum fragilitas. Illuc ergo respicite Patres, illorum vestigia sequimini, & sicut in reliquis agere studeatis, sic & in humilitate ædificiorum agere non cessetis. Sufficiunt profectò turguria nostra, cum tenui suppellectili sua, homini verè poenitenti; immò superabundant homini propediem morituro. Memētote maledixisse Bernardum cellæ centum solidorum; & beatum Romualdum aliquando faustuofas cellas noluisse intrare.

## DE VICTV, ET PARSIMONIA antiquorum Patrum. Cap. III.

**R**EFICIENDI, seu cibi capiendi corporalis modum, quidam non incongruè discretionē vitæ appellant: eò quòd sine discretionē esse neutiquam debeat. Vnde auctores, qui Anachoreticam parsimoniam laudauerunt, vix eorum mentionem faciūt, qui pane, proprio scilicet hominū cibo, relicto; herbis, vel leguminibus conten-

ti viciſſitarunt. Nō ob aliud certè, quàm  
quòd eorum vita, etſi illis Dei beneficio  
ſufficiens, alijs tamen imitanda proponi  
cum diſcretione non poſſit. Nihilomi-  
nus ſua laude non carent ſancti Dei ho-  
mines, qui olim hanc religionis præci-  
puam, immò neceſſariam partem ædifi-  
cantes, neglecto pane, vixiſſe feruntur.  
Quis, quaſo, indiſcretum appellet Ioan-  
nem Baptiſtam, qui aliud præter locu-  
ſtas, ac mel ſylueſtre, dū in deſerto man-  
ſit, non guſtauit? Quis Paulum Thebeū  
ſanctiſſimum Dei ſeruum indiſcretionis  
nota afficiet; qui ſolis palmarum fructi-  
bus veſcebatur: donec Dei iuſſu coruus  
dimidium paximatiū indies afferre con-  
ſuevit? Quis tandem, vt reliquos præ-  
termittamus, Hilarionē ſtultum faciet;  
qui per multū tempus quindecim cha-  
ricas tantū in cibum diarium perce-  
pit? Inter Aegyptios, Paleſtinæque Pa-  
tres fuerunt, qui radicibus, & qui herbis,  
item qui folijs arborum decoctis paſce-  
bantur; qui pauci admodum fuere. In-  
ter eos autem, qui cibario pane, ratio-  
nabili eſca quodam modo uſi ſunt, tanta  
fuit



fuit varietas, ac cibi sumendi diuersitas, vt certa inde viuendi ratio dari neutiquam possit. Fuere siquidem omnes tantæ abstinentiæ viri, vt impossibilis nobis fiat huiusmodi obseruatio. Veruntamen eorum multi ex solis leguminibus, tum coctis, tum crudis, seu arborum fructibus victitasse apud idoneos auctores leguntur. Atqui ij omnes (licet ipsis Dei gratia id facile extiterit) à discreta viuendi regula excluduntur. Ideò nos illos diuersos ieiunandi modos, quos Diuus Romualdus in se tantum expertus est, hìc referre non curamus: cum admirandi potius, quàm imitandi videantur. Quis namque ex pugillo ciceris infusi, vel elixi, vt ille fecit, per annum viuere queat? Quis ex modicæ farinæ, & cuiusdam herbulæ sorbitiuncula, per integrum Quadragesimam sustentari valebit? Porro hæc adimplenda nunquàm vir bonus discipulis proposuit: sed ita eos quotidie refici voluit; vt semper esuries, non autem satietas aliquando foueretur. Dum itaque simul in Gallia cum Marino, Vrsiolo, & Grandenico vixit Pater,

quinque continuas ferias in hebdomada, in pane & aqua abstineri iussit: Sabbato & Dominica rigore ieiunij temperatè relaxantes. At indicto postea per Pōtificem Sabbati ieiunio, refectiōnem Sabbati in quintam feriam commutauit. Non erit tamen inutile legentibus scire; inter Camaldulenses, non quamcumque ciborum parsimoniam abstinentiam nuncupari: neque vnumquodque ieiunium huius vocis significatu completi. Sed cū in pane & aqua tantū, addito sale, ieiunatur; tūc abstinentia nuncupatur; nam cū pulmentum vnicum cū vino, simplex: si verò duo ministrātur, Regulare ieiunium appellamus. Itē cū triduana & biduana, seu triduanas & biduanas audies: duorum vel trium dierum in pane & aqua continuatum ieiunium intellige. Idem dicas, si integram hebdomadam, vel hebdomadas aliquē fecisse legas. Quas significationes & apud antiquos auctores non rarò reperies. Romualdus itaque regularis vitæ maximus obseruator carnes, dum vixit, nō manducauit, nec discipulos suos māducare



ducare permisit. Docuit insuper in hebdomada triduanas & biduanas ieiunando: quinta feria & Dominica, olera, vel quodcunque liquamen cum gratiarum actione percipere. Exceptis tamen duabus anni Quadragesimis; in quibus non solum ipse, sed ferè omnes eius discipuli soliti erant integras in pane & aqua facere hebdomadas. Hæc sanctissima viuendi norma, non ipso viuente tantum, verum etiã eo defuncto per annos octoginta Camalduli ad vnguem custodita noscitur. Nam beatus Rodulphus, qui circa annum M C. Eremitis Camaldulensibus præfuit, suorum temporum obseruantiam in hæc verba commemorat: Mos est enim, inquit, in hac Eremo Camaldulensi degentibus per binas Quadragesimas, Aduentus scilicet, & ordinariam, quam maiorem vocamus, non solum à caseo, & ouis per omne tempus omninò se abstinere; sed pisces quoque nullatenus edere, vel vinum bibere. Nisi in solennitate sancti Andree, sancti Benedicti, sancte MARIAE Virginis, & Dominica in Palmis, atque in coena Domi-

ni. In his enim Quadragesimis mos est, quinque dies in pane & aqua, & sale ieiunare: Dominica, & quinta feria cui placet cum aqua pulmentum tribuere. Et sunt etiam quidam, qui tertiam Quadragesimam, id est per quadraginta ante Pentecostem dies ieiunantes, similiter obseruant. Per totum verò anni circulum, extrà binas Quadragesimas prædictas, assuetum est per vnâquâque hebdomadâ quatuor diebus, secunda, quarta, & sexta ferijs cum Sabbato in pane & aqua & sale ieiunare. Attamen idem Rodolphus abstinentiæ laudator, eiusdē conseruator esse nesciuit: nam antequâ moreretur, siue suorum Fratrum imbecillitatem considerans, siue futurorum delicatam naturam præuidens: ordinatione in scriptis redacta, in multis, discretionis titulo, præfatam ieiunandi cōsuetudinem relaxauit. Atque multa indulgendo nouam ieiunij, abstinentiæq; formam per totius anni circulum Eremitis obseruandam reliquit. Ducentesimo deinde anno, aut circiter, post Rodolphum, Gerardus tunc Eremitæ Prior laxio-



laxiorem multò abstinendi, ac ieiunandi regulam instituit: & inter alia, Quadragesimales abstinētias, ad tres solummodò dies in singulas hebdomadas reduxit. O bone Deus, quàm multi impietate affecti, quasi subditis compatientes, crudelitatis maximæ fiunt inuentores: qui dum imbecilles fouere intendunt, robustos eneruant, commune facientes quod vix tribus infirmis erat indulgendum. At Paulus noster semper & vbique sui Romualdi verus æmulator existens, antiquas Romualdinorum abstinētiās restituere viriliter tentauit: nec certè in cassum abiit labor eius. Quandoquidem (vt ipse scriptum reliquit) omnes socij eius tanto feruore parsimoniam & abstinētiā adamarunt; vt ne licitos quidem cibos, putà oua, pisces, caseum vel lactaria, etiam in solennitatibus voluerint gustare. Vnde repertum est, in quatuor Piceni locis, quos sæpe commemorauimus, in vnius anni curriculo centum non esse consumpta oua. Quid quòd infirmi non solum à carnibus, sed etiam ab ouis omninò absti-

abstinere solebant? Maior deinde Eremitarum pars, pisces tangere, ne dicam edere, abhorrebat. Erant præterea qui in vtraque Quadragesima dies abstinentiæ deputatos duplicantes, integram Quadragesimam, præter Dominicas, abstinentes transirent: nec deerant multi, qui perpetuò vino renunciantes, sola aqua illis potus dulcissimus fiebat. Soliti insuper erant eorum non pauci æstatis tempore perinde atque in hyeme continuò ieiunare: necnon à Kalendis Augusti vsque ad diem Assumptionis, deuotionis ardore in pane & aqua abstinere: & quidam eorum reperti sunt, qui in Quadragesimis singulas quasque sextas ferias penitùs sine cibo transigerent. Adde, quòd cibus eorum panis biscoctus, & multoties non biscoctus, sed mucitus: pulmenta eorum herbarum vel leguminum, nec quotidie decoqui solita, sed vna vice ad tres aut etiam quatuor dies frequenter parabantur. Si caseus, allia, vel cēpæ, aliavè agrumina illis ministrabantur, pro magno reputabatur conuiuio: quod mirum videri non



non debet, cùm toto brumali tempore glandibus ex quercu, vel ilice quotidie vesci delectarentur. Hæc est tandem palæstra sacra, quam Paulo duce, exercuere nobilissimi palæstritæ: inter quos Hieronymus Sueffanus, Romualdus Fabrianensis, Zacharias Siculus, Nicolaus Triuisanus, Augustinus de Bassano, Daniel Venetus, & Iustinianus Bergomensis, omnes venerabiles Sacerdotes. Item Venantius, Hieremias, Oliuus, Innocentius, Placidusque Conuersi: & alij plures verissimi pœnitentes. Hæc autem omnia (ne fabulam putes) ex quadam ipsius Pauli Epistola carptim desumptimus.

## DE CIBORVM DELECTV, & discreta eorum distributione.

### Cap. IIII.

**C**ARNES manducare Eremitis Camaldulensibus, ab ipso Religionis exordio per ipsum Romualdum fundatorem prohibitum extat: & in hunc vsque diem inuiolabiliter

ter obseruatum : sic & epulas omnes de-  
uitant, quibus vel decoctione, vel com-  
mixtione, aut quocunque alio modo,  
carniū participatio fieri comperiat.  
Quæ prohibitio nec loco, nec tempore  
circumscribitur : sed tam in Eremo, quā  
extrā vbique terrarum fuerit : atque dū  
vixerit Eremita, ab esu carniū absti-  
nere cogitur. Infirmus tamen, medico  
iubente, ac Prælato consentiente ( in lo-  
co infirmis dedicato tantū, non autem  
in propria cella ) manducare carnes po-  
test. Quæ res tantæ obseruationis ha-  
betur : vt ne in Eremi quidem hospitio,  
quòd aduentantibus quibuscunque ho-  
spitibus deputatum est : neque intra  
Eremi septa, siue clausuram, carnes pe-  
regrinis hominibus cuiuscunque gradus  
existant, siue conditionis edere permit-  
tatur. Quod & in operarijs, seu artifi-  
cibus ibidem laborantibus, ad vnguem  
obseruatur. Quæcunque igitur cibaria,  
quæ carnis speciem, commistionemvè  
non habeant ; nisi diei aut temporis  
qualitas vetet, in escam Eremitis ce-  
dunt. Præcipuè tamen in vfu sunt oua,



caseus, & pisces: nam butyrum, & lac recens, siue coagulatum, licet prohibitū non sit, rarò nobis ministrantur. Inter omnes autem ciborum species, ouorum est frequentior vsus: rara quidem extrà Quadragesimas piscium ministratio, eò quòd pretiosior cibus reputetur, ac difficiliùs paretur: neque satis conueniat verè abstinentibus. Porrò ouorum portio (quam Pitantiam vocant) extra duo oua non extenditur, quamuis magna sit solennitas, nec piscium sex vnciarum pondus excedit. Pulmenta communiter ex leguminibus, oleribus, & salubribus hortorum herbulis, necnon ex acuminibus, ex farre, & his similibus præparantur: quandoque etiam acetariū concedi solet. Non est minima inter Eremiticas escas fructuum editio: ideoque tam nucum, quam pomorum fructuū ex generibus cunctis nobis modesta copia tradi solet: quasi in supplementum deficientium epularum. Panis tandem, quo vescimur, non exquisitus, aut ex farinæ flore, sed cibarius, & cōmunis. Item vinū, quod bibimus, non optimū, sed mediocre

diocre nobis communiter dari solet .  
 Iam ergo cognita ciborum qualitate,  
 quemadmodum distributio fiat, doceamus,  
 oportet . Secundùm itaque antiquissimam  
 consuetudinem, Camaldulenses Eremitę  
 duodecim tantum sollemnissimis diebus  
 in anni totius curriculo, in communi  
 refectorio insimul conuenientes refectio-  
 nem capere consueuerunt . Dies autem  
 hi sunt ; Natitiuitatis Domini, Epiphanię,  
 sancti Benedicti, in cęna Domini, Resurre-  
 ctionis, Pentecostes, sancti Romualdi,  
 Assumptionis sanctę **MARIAE**,  
 Omnium Sanctorum, Consecrationis  
 Ecclesię, & inuocationis eiusdę .  
 Reficitur insimul quoque licet non in  
 refectorio in diebus Dominicę Quinquagesimę,  
 & sancti Martini, qui nobis pro  
 carnis priuio reputantur . Reliquo  
 vero anni tempore, sine exceptione aliqua  
 vnusquisque priuatim in propria cella  
 manducat : cui modo quo sequitur, victus  
 indefinēter ministrantur . Quęcūq;  
 in esum Eremitarum distribuenda  
 veniunt, aut in communi penu ( dispensam  
 vocant ) conseruantur : aut in communi  
 culina



culina præparantur. Vnde ministri ad hoc deputati singulis diebus (præter panem, qui semel in hebdomada in sufficienti quantitate datur, & casei vnciæ sex) ad singulas cellas deputata cuiusq; diei cibaria deferunt: quæ in armario-  
lo, quod iuxta cellæ ostium cernitur, sine strepitu, ac cum summo silentio recô-  
dunt. Hæc autem cibaria eiusdem generis, & eiusdem quantitatis omnibus & singulis, siue fructus, siue pulmenta fuerint, ministrantur. Idq; & in vino, quod quotidie (diebus abstinentiæ exceptis) datur, inconcussè obseruatur. Eremita tandem post refectiorem, vasa quæ euacuauerit, benè mundata in eodem armario reponit: vnde manè veniens minister in coquinam reportet. At si panis fortè aliquando defecerit, appposito eius frustra in eodem armario, statim per ministrum affertur. Sic cum deficit sal, vel oleum, apponuntur vasa: & denique vnumquodq; signum ibidem appositum, eiusdem rei indigentiam sine verbis denunciat.

002 EREMITICÆ HISTORIÆ  
IEIUNIORVM, ET ABSTI-  
nentiærum summa. Cap. V.

**Q**Vo ieiunij, & abstinentiæ di-  
lucidior tractatio dari valeat,  
in primis anni totius tem-  
pora sunt distinguenda; vt  
habita cuiusque temporis consideratio-  
ne, ieiunij declaratio fiat. Diuiditur au-  
tem apud nos annus in duas præcipuas  
partes: in æstatem, scilicet, & regulare  
tempus; in quo per regulam perpetuum  
ieiunium indicitur. Aestas à die sancto  
Paschæ vsque ad Idus Septembris com-  
putatur: regulare verò ab Idibus ipsis  
seu ab Exaltatione sanctæ Crucis vsque  
ad Pascha. Rursus regulare tempus in  
duo bipartita membra secatur: in duas,  
videlicet, Quadragesimas; quarum pri-  
ma à die sancti Martini vsque ad diem  
Natiuitatis Domini. Secunda, à Domi-  
nica Quinquagesimæ vsque ad Pascha  
Resurrectionis: & in duo tempora re-  
gularia; quorum alterum ab Exaltatio-  
ne sanctæ Crucis vsque ad festum sancti  
Martini: alterum à die Natiuitatis vsq;  
ad



ad Quinquagesimam . Aestatis ergo tē-  
 pore ordinarium est Eremitis bis in die  
 reficere : ad prandium manè solum pul-  
 mentum ; ad coenam verò solam pitan-  
 tiam, cū insalatitio sumentes . Excipiū-  
 tur tamen inde duo cuiusque hæbdoma-  
 dis dies ; feria nempè quarta, in qua ( si  
 de feria Officium dicatur ) simplex ieiun-  
 ium cum vnico Quadragesimalis cibi  
 pulmento, & vino obseruatur : sed si de  
 festo aliquo fiat, ouis cum caseo vesci-  
 mur, pulmentum cum pitantia recipien-  
 tes . Item feria sexta, in qua ( nisi solenni-  
 tas celebretur ) in pane & aqua cum fru-  
 ctibus , acruminibusq; abstinemus . At-  
 tamen si solennitas fuerit, in præceden-  
 tem, aut subsequenter diem abstinencia  
 transfertur . Obseruantur præterea æsta-  
 tis tempore præceptiua ieiunia, & non-  
 nulla alia ex religionis consuetudine,  
 qualia sunt vigiliæ sancti Marci, Aposto-  
 lorum Philippi & Iacobi, necnon tres  
 Rogationum dies, & si quæ sunt alia .  
 Deinde regularibus temporibus ab Idi-  
 bus Septembris, & à Natiuitate Domi-  
 ni vsque ad Quadragesimas perperuum

ieiunium est. Verùm feria secunda, quarta, & Sabbato simplici vtimur ieiunio: feria tertia, & quinta oua & caseũ edentes: feria nihilominus sexta nobis abstinentia sicut in æstate celebratur, nisi interueniente solennitate in alium diem commutetur. In vtraque tandem Quadragesima tribus in hebdomada diebus abstinentia fit, in pane & aqua cum sale, sine alterius rei additamento: feria tertia & Sabbato simplex ieiunium cum vnico pulmento & vino, fructibusq; custoditur: sola feria quinta regulari ieiunio, cum pulmento & pitantia deputata. Sed si in aliquo abstinentiæ die solennitas inciderit, abstinentia dispensatur: dūmodò sine vna saltē die abstinentiæ hebdomada nō trāseat. Dominica verò dies propriam obtinet legem: bis nāq; volens Eremita in ea refectionem capit. Volens, inquam, nam toto regulari tempore, si placuerit, coenam non gustabit: quod multi apud nos diligenter obseruant. Verùm qui coenare intendit, ex his, quæ manè percepit, quod maluerit, sibi reseruare eum oportet: alioquin frustra



frustrà nouum edulium expectabit .  
 Aestatis autem tempore diebus Domi-  
 nicis nobis manè solum pulmentum, &  
 in serò pitantia ; reliquo tempore totū  
 manè offerri solet. Tria iam nobis ma-  
 ximè notanda veniunt : quorum primū  
 est illud, quod ex cibarijs, quæ hodie  
 Eremitæ ministrantur, nihil in crastinū  
 sibi reseruare, neque in cella pulmentū  
 aliquod, vel aliud quod pulmenti spe-  
 ciem habeat, coquere, aut parare po-  
 test : immò si quid manducare, aut no-  
 luit, aut propter indispositionem non  
 potuit, in prædicto armariolo reponat,  
 necesse est : vt inde per ministrum dedu-  
 ctum alijs in crastinum vel pauperibus  
 largiatur. Sed tamen caseus, qui singu-  
 lis Dominicis, temporibus licitis, ad sex  
 vnciarū pondus vnicuique datur: necnō  
 fructus, & acrumina, quæ sæpius sine cer-  
 ta die ad nutum Prælati, seu opsenatoris  
 dari consueuerunt; benè donec consum-  
 muntur, in cella retinentur. Secundò  
 sciendum est, Eremitam cibum capere  
 non oportere, nisi sacra, aut saltem de-  
 uota lectione præcedente: quo simul spi-

ritus cum corpore reficiatur. Quæ sanctissima lex in maxima obseruantia habetur. Tertium & illud magnæ considerationis sit, quòd quoties abstinentia celebratur, siue in pane & aqua tantû fiat, siue cum fructibus, Eremita librum ante oculos habere, & in terra sedendo pedibus nudis cibum capere debet. Cuius sanctissimi instituti beatus Rodolphus auctor extitit.

DE SEQUESTRATIONE  
corporis, & sancto silentio.

Cap. VI.

**O**FFERT se tandem quarta pars tractatus huius; conuersatio nimirum Eremitarû: quæ maximè in corporis sequestratione, & virtutum exercitatione consistit: quemadmodum autem intra Eremi septa iugiter maneant Eremitæ nostri, hinc intelligi potest, quòd Eremus tota illis veluti claustrû est, cuius sepem vel fossas, quibus circumdata existit, sine licentia Superioris impunè egredi non licet.

Intrâ



Intrâ clausuram hanc liberum est vnicuiq; nostrum per vias præfatas, & nemora, seu syluas deambulare; & animi piam recreationem capere. Non equidē semper, sed horis diebusvè statutis: multa namq; sunt temporis momenta, in quibus id fieri prohibetur. Quomodo autem in sequestratione illa Eremiticæ sancti se habeant, paucis agamus. Communis igitur Camaldulensium Eremitarum in Eremo commorantiū conuersatio ita se habere videtur: vt nulla victus, aut vestitus sollicitudo; nulla omninò corporalium rerum sibi necessariò parandarum anxietas inesse videatur: nulla deniq; periculosæ libertatis, aut diuagationis occasio permaneat. Quo fit, vt omnibus huiusmodi occupationibus, atq; periculis exclusis, sub obedientiæ iugo solitudinis commodis omnibus perfruatur: sicq; Eremitæ cultores penitus à terrenis curis expediti, nullo negotio, mente eleuare, ac Deo coniungere possint: quod Eremiticæ conuersationis finis esse apud Cassianum describitur. Rursus cum illis innumeris incom-

modis, ac distractionibus Cœnobij careat: obedientiæ bonum, fraternæque societatis & consolationis securitatem possidet. Sic tandem mixtam viuendi rationem habet Camaldulensis institutio: vt & solitudinis, & Cœnobij simul bonis perfruatur. Quæ quidem omnia ab illis antiquioribus Aegypti atq; Thæbaidis Eremitis multum aliena fuere. Oportebat enim illis temporibus Anachoretam cum solitudinis iucunditate obedientiæ, paupertatisq; iacturam facere, ac proprii corporis, aduentantiūq; necessitatibus quotidiani operis industria prouidere. Si verò hanc sollicitudinem à se reijcere desiderans, eligebat magis obedientiæ bonum, ac paupertatis retinere; solitudinis tranquillitatem possidere non poterat. Adde, quòd beatissimus vir Romualdus huius mirabilis vitæ auctor; præter hanc, in qua & Cœnobialis, & Eremiticæ commoda inveniuntur coniuncta; aliam longè perfectiorem, ac sublimiorem viuendi normā adinuenit. Excogitauit namque sacrosanctam inclusionis, seu reclusionis insti-



institutionem: quam multi rectè considerantes, consueuerunt postquàm in cōmuni vita aliquandiù in Eremo religiosè conuersati sunt; contemplationis, perfectiorisque quietis solatia affectantes: cum Maioris, ac Prælatorum, seniorumque consensu singuli per singulas cellas se sponte sua includere. Vbi tamē sub Prælati potestate, sub constitutionū iugo, in sancta obedientia viuentes continentur; videntes, aut alloquentes neminem, præter Fratrem vnum eorum ministerio deputatum. Sic demùm in cellulis inclusi, tantò magis cum Deo in coelestibus conuersari satagunt: quantò magis in terris ab omni humano confortio se faciunt alienos. Quo viuendi instituto contemplationi deditis, nil beatius contingere potest. Porro reclusio ista & perpetua in hominis vitā; & ad tēpus concedi, ac fieri consuevit. Huius sacratissimæ legis ipse Romualdus primus obseruator extitit: quam sæpe, ac præcipuè Camalduli expertus est: vnde factum est, vt ferè nunquàm defuerit in Eremo illa, qui hoc spontaneo carcere

non fit delectatus. Nam beatus Rodolphus scribit, ab initio alios per vtrāsq; Quadragesimas; alios per centum continuos dies: alios per integrum anni cursum, in cellis se includere consueuisse. Quæ sanctissima consuetudo ab illa ætate vsque in præsentem diem foeliciter perdurauit: & nunc Dei beneficio, cum apud Camaldulenses, tum etiam in Mōte Corona maximè viget. Fuerunt & propè lapsis temporibus alij, inter quos maximè excelluit beatus Michael, qui plusquàm annos quindecim inclusus manens magna perfectionis signa dedit: necnon illam precum normam, quam Domini Coronam vocant, quamque Sedes Apostolica tot indulgentijs decorauit, adinuenit. Similiter ex quo Eremus Montis Coronæ condita fuit, nunquàm ferè defuit, qui reclusionis legem obseruaret: quorum primus magnus Iustinianus Bergomensis: & pòst eum alij non pauci: nouissimè illud Eremiticæ vitæ vnicū exemplar, venerabilis Rodolphus Veronēsis, qui per annos aliquot inclusus summa cū omniū ædificatione



tione permanſit . Nemo tamen exiſti-  
 mare debet huiusmodi incluſos in ocio  
 eſſe in clauſura ſua : cùm oneroſior mul-  
 tō vita eorum exiſtat,quàm ſolutorum :  
 tùm quia Pſalmodiam ( vltra regulare  
 Officium ) duplicant : duplicant & extrà  
 Quadrageſimas panis & aquæ abſtinen-  
 tias . Tenentur prætereà alia multa in-  
 cluſionis lege ſeruare, quæ difficillima  
 ſunt : & longum eſſet enarrare . Iam re-  
 liqui omnes Eremitæ etſi nō in propria  
 cella : attamen intra ſepta Eremi ſatis  
 incluſi perpetuò conſiſtunt : vnde ſine  
 Prælati conſenſu, vt diximus, egredi non  
 valent : in ſilentio , & ſpe patientiam  
 ſuam collocantes . An non ſatis inclu-  
 ſus tibi videtur, qui perpetui ſilentij re-  
 ligione ligatus ; & omni exteriori con-  
 ſolatione priuatus viuut ? Lex autem  
 Eremitici ſilentij hæc eſt : vt in omni  
 loco ſacro, ſeu publico intra Eremum,  
 per omnes Dominicas , ac ſolennitates,  
 quæ ab Eccleſia ſeruari ſolent : in qua-  
 cunque feria ſexta, & alia quauis die ab-  
 ſtinentiæ dicata : per vtramq; integram  
 Quadrageſimam : item à Completorio

cuiusque diei vsque quò Prima diei se-  
 quentis finita fuerit; necnon singulis ho-  
 ris diei somno & Orationi deputatis,  
 iugi custodia obseruetur. His, inquam,  
 locis, temporibus, & horis; nisi cum se-  
 nioris expresso consensu, colloquium  
 commisceri, penitus interdictum cen-  
 setur. Attamen toto æstatis tempore  
 ter in hebdomada; inque regularibus  
 temporibus, extra Quadragesimas, bis  
 tantum silentium per Maiorem dispen-  
 sari solet. Hæc est tandem angusta Ere-  
 mitarum via, quæ ducit ad vitam: lon-  
 gè semota ab illa latissima, quæ ducit  
 homines ad perditionem. Amant igitur  
 nostri sanctæ solitudinis toto corde  
 profundam tranquillitatem; in loco de-  
 serto, longè à populis, ab omni seculi  
 strepitu semoti viuentes: omnium vi-  
 uentium frequentiam, atque commer-  
 cium (inquantum tamen charitas pa-  
 titur) studiosè deuittantes: ac demum  
 temporalium rerum negotia, atque ad-  
 ministraciones à se procul arcantes.  
 Quam ob rem eorum vita meritò à mul-  
 tis Angelica in terris reputata est: quæ  
 tota



tota in solius Dei fruitione versatur :  
 quapropter cunctis Mundi delitijs, cui  
 vis hominum statui, ritè, ac iustè soli-  
 tudo præfertur. Hanc profectò beati-  
 tudinem cognouit qui eius amore ca-  
 ptus, lyrico carmine iubilando cane-  
 bat.

O beata solitudo,

O sola beatitudo

Pijs secessiculis.

Quàm beati candidati,

Qui ad te volant alati

Porro à Mundicolis.

Solitudo diuinarum

Est thesaurus gratiarum

Seculo absconditus.

Solitudo optimorum,

Et donorum perfectorum

Ager est reconditus.

Domus hìc orationis,

Campus speculationis

In Dei operibus.

Hìc mons contemplationis,

Hìc fons meditationis

In diuinis legibus.

Et similia multa.

DE

EREMITICÆ HISTORIÆ  
DE COMMUNI, ET PRIVATA  
Psalmodia Eremitarum.

Cap. VII.

**L**AVDATE Dominum, inquit Propheta, quoniam bonus est Psalmus. Et alibi: Iubilare Deo omnis terra, cantate, & exultate, & psallite. Sciebat etenim Rex sanctissimus; semper iucundam, atque decoram fuisse Deo nostro canticis ornatam laudem. Id ipsum prævidens Moyfes, cùm Mare rubrum cum populo suo sicco transisset pede, Pharaone cum exercitu suo submerso; gratias Domino pro accepto beneficio redditurus: Cantemus, inquit, Domino; gloriosè enim magnificatus est. Et hinc longam editam cantilenam populo canendam illicò tradidit. Non aliter fecit Virago illa Delbora, quæ deuicto Sisara in torrente Cisson; tam magnificum Domino in gratiarū actionem cecinit canticum. Ac proinde David in singulis vitæ suæ actibus siue tribulationis, siue exultationis essent, singulos composuit Psalmos. Quorum volumen,



lumen, Psalterium dictum, Sinagogis decantandum tradidit: continens nimirum in se & Magni Dei laudes, & orationes supplicum, peccatorum preces, deprecationes pauperum; atque acceptorum beneficiorum præclaras gratiarum actiones. Ad hos Psalmos canendos hortabatur Apostolus Ephesios suos, dicens: Loquentes vobismet ipsis in Psalmis, Hymnis, & Canticis spiritualibus; canentes, & psallentes in cordibus vestris Domino, gratias agentes pro omnibus: qua doctrina edocta Ecclesia sancta diu noctuque canendo, vota sua continuò reddit Domino tripudians. Quam ob rem antiqui religionum fundatores semper in Psalmis meditari anxie suis discipulis præcipere consueverunt: eoque sancti Patres, qui olim solitariae vitæ fundamenta posuerunt, non satis habuerunt, in communi Ecclesia certum numerum Psalmorum decantare; verum etiam priuatim plures eorum semel in die totum Dauidicum Psalterium meditando persoluebant. Veruntamen inter eos certa ratio in psallendo

psallendo non constabat; eò quòd, Cas-  
 siano referente, diuersi diuersos sibi ty-  
 pos, ac regulas constituissent: alij vi-  
 cenos, alij tricenos; alij plures, alij  
 pauciores Psalmos, quibusdam Anti-  
 phonis interpositis, canentes. Per Ae-  
 gyptum autem duodenario numero  
 (quia ab Angelo illis sic traditum fue-  
 rat) vniformiter utebantur Patres: in  
 reliquis sine certo ordine procedentes.  
 At beatissimus Benedictus recta consi-  
 deratione edoctus, eundem numerum  
 Psalmorum in nocturnis vigilijs assump-  
 sit; & in reliquis ordinem sanctæ Ro-  
 manæ Ecclesiæ insecutus, tripartitum  
 Canticum addens in diuinis horis, nil  
 ferè ab vniuersali ordine discedens, Mo-  
 nasticum confecit Officium; quod suis  
 Monachis tradidit singulis diebus per-  
 soluendum. Noster verò Romualdus  
 his non contentus; quotidie cum Mari-  
 no, & reliquis socijs totum Psalterium  
 dicendo percurrerebat; illud suis Eremi-  
 tis vnoquoque die perstringendum po-  
 steà proponens. Sciendum præterea ve-  
 nit, antiquiores Eremi constitutiones,  
 quæ



quæ multò pòst obitum Romualdi factę sunt, continere vt quilibet Eremita extra duas quadragesimas singulis diebus integrum Psalterium pro viuis dicat; & pro defunctis si non totum, dimidium, aut ad minus tertiam partem. In quadragesimis verò duo integra Psalteria in die, Eremitis dicenda erant. Nec tamen dubitare quis debet saltem eos, qui Sacerdotio fungebantur, simul cum his regulare Officium quoque dixisse: nam etsi mihi ipsi tantum negotij admirationem adducat; verissimum tamen esse, plusquàm compertum habeo. Nostris itaque temporibus sic Patres rem temperauerunt, vt in Eremo Camalduli singulis diebus omnes, qui Clericatu ordinantur aperti Eremitę quinquaginta Psalmos persoluant: ita vt duo tantum Psalteria in hebdomada referantur. Coronates verò, quibus multę ac maiores (sanctę tamen) occupationes incumbunt, semel in hebdomada Dauidica carmina meditando pronunciare consueuerunt, viginti singulis ferijs, Dominica die triginta recitantes. Di-

uinum tandem opus ( quod Officium regulare vocant ) sine aliqua differentia, saltem in substantialibus Officij apud vtramque Romualdi familiam celebratur. Perpetuo namque tenore, seu bruma hyemalis, seu feruida æstas decurrat: media nocte, vel circa, ad communem Sinaxim ( Matutinum scilicet ) ad campanæ signum omnes Eremitæ assurgunt, atque in communi Ecclesia congregantur. Quos nec tenebrosus imber, nec candidæ niuis densitas quicquam detinet: tanti momenti apud eos habetur, diuinis interesse laudibus. Congregati insimul tam Sacerdotes, quàm Clerici; quàmque Commissi, & Conuersi ( quibus certus Dominicarum orationum numerus dicendus incumbit ) per horas tres, & quandoque amplius illi canendo, isti audiendo iugiter occupantur. Porro sicut idē est nobis, & Camaldulensibus Officiū; ita idem est & illud celebrandi ritus: idem in psallendo modus; idem tonus, & modulatio. Alternantur ab vtroque Choro Psalmorum, Hymnorumque versiculi,



vno eodemque penè diuino concentu  
 resonantes. Emissionem enim ab omni-  
 bus voces illæ æquales sine discrepan-  
 tia, sineque cantus figura, sonores ac  
 plenæ: non altæ, neque depressæ nimis;  
 sed mediocritate quadam deuotæ, de-  
 uotionem mirabili modo excitantes.  
 Tali denique modo prolata; vt potius  
 planctum, quàm cantum audire tibi vi-  
 dearis. Dicuntur autem singulæ horæ  
 canonicę suis singulis deputatis dici ho-  
 ris: nunquàm duæ diuersi temporis ho-  
 ræ continuatæ, seu coniunctæ. Quam  
 ob rem verè dicere possunt Eremitæ;  
 septies in die laudem dixi tibi: septies  
 enim Chorum ad hoc ipsum (diuinis,  
 ac nocturnis horis computatis) ingre-  
 diuntur. In quibus officijs persoluen-  
 dis, communiter octo horarum spa-  
 tia consumi non est ambigendum. Præ-  
 ter autem regulare, seu Monachale; of-  
 ficiū Beatæ Mariæ quoque, quotidie  
 in Choro (præter quasdam solennita-  
 tes) dici indefinenter consuevit. Offi-  
 cium Mortuorum singulis hebdomadi-

D D                      bus,

bus, diebus tamen præordinatis, nunquam prætermittitur. Dicitur & pro Pontifice semel in hebdomada Psalmū 19. cum certis versiculis, & orationibus ad hoc deputatis.

DE LECTIONE, ET ORATIONE priuata. Cap. VIII.

**C**Vm ex sacrorum, aliorumvè piorum librorum lectione facile animus ad meditandū accendi soleat; quasi præparatam habens ad opus materiam: ideo rectè vtriusque congregationis constitutione cauetur, nullam Eremitæ sine lectione præteriri diem; quod in feruenti obseruatione habetur. Ideoque diligenti cura Maiorū sanctissimè prouisum est, vt non solum Bibliorum volumina pararentur multa, sed etiam quorumcūq; piorum librorū tūm vulgariū, tūm latinorum copia in Eremo adesset. Vnde fit, vt sine difficultate vnusquisque libros, quos maximè desiderat, iuxta capacitatem, intel-  
ligen-



ligentiamque propriam habere queat. Præcipit itaque constitutio præfata Sacerdotibus, & Clericis, & reliquis legere scientibus, vt saltem quotidie, vel modicum (vnum scilicet noui, veterisve testamenti capitulum, vel tantundem ex aliquo deuoto libro, quales sunt sanctorum Patrum vitæ, & exempla; collationes Patrum, Benedicti regula, & similia Sanctorum opera) deuotè ac piè legant. Idque præcipuè obseruare iubentur ad mensam accedentes: quapropter vnusquisque Eremita, mensa perpriùs benedicta, antequàm cibum capiat, aliquid ex supradictis legere asfolet, vt refectionem corporis refectio spiritus præcedat: dumque cibus corporalis sumitur, præcedentis lectionis meditatione anima quoque recreetur. Hinc ergo quasi armatus spiritus ad orandum faciliùs consurgit: & semper prælecta meditatur. Sed ne res confusè fieret: vel à negligentibus tam sancta, atque fructifera operatio prætermitti possit: orandi quoque iustus mo-

dus constitutione datur. Sic etenim ordinata est, vt tam manè, quàm serò (horis præordinatis) solitæ campanulæ signo dato, singuli genu flexo, vel commodiori modo positi, donec secundum signum audierint, deuotè, attenteque orationi, seu meditationi vacantes, siue in templo, siue in propria cella iugiter permanere debeant. Quæ sanè duo orationis tempora simul iuncta vnius horæ spacium occupant. Hæc autem sanctissima ordinatio etsi equo breuior multò videatur; attamen valdè laudanda est. Nam pigros, segnes, frigidosque, si qui sunt, vel modicum orare cogit: diligentes, atque deuotos stimulat, feruidos, accensosque viros preparando exhilarat, redditque constanter. Quanquàm præfinito hoc breuissimo meditandi tempore verus Eremita contentus nec sit, nec esse debeat: quod in plerisque congregationis huius compertum esse, satis lucidè scimus. Sunt etenim, qui (immò ferè omnes) consueuerunt, quicquid temporis superest



pereſt (peractis obedientiæ operibus, atque naturæ indigentijſ ſatisfactis) diuinæ meditationi impendere. Scientes vtique omnia opera noſtra, etiam bona, ſine oratione parum vel nihil prodeſſe ad ſalutem; Oratio nimirum eſt, quæ nos, & opera noſtra ſanctificat. Quid enim prodeſt ieiuare, vigilare, ſolacium hominum fugere, deſerta habitare; ſi interiora cordis noſtri à vitiorum labe, à paſſionum fecibus, à cogitationum denique immunditijs non mudentur? Ideo quæ Paulus ad Timotheum dicebat: Exerce autem te ipſum ad pietatem. Nam corporalis exercitatio ad modicum vtilis eſt; pietas autem ad omnia vtilis eſt, promiſſionem habens vitæ, quæ nunc eſt, & futuræ. Attamen ſola oratio, ſiue meditatio potens, efficax quæ eſt ad iſtas ſpurcitijs extergendas; necnon ad ſenſus mentis, corda quæ noſtra purificanda, atque adeò ſanctificanda. Reliqua tandem opera, etiam ſancta, præparatoria ſunt, non autem mundatoriæ, aut ſanctifican-

tia. Attendant ergo Eremitę deuoti  
quanti momenti sit exercitatio ista ;  
cū parum vel nihil sit benè operari ,  
vel etiam miracula edere foris , nisi in-  
tùs per continuam orationem , medita-  
tionem , ac contemplationem inhabi-  
tet Deus , cui semper mens nostra uni-  
ri debet .

DE CORPORALI, SEV MA-  
nuali exercitio. Cap. IX.

**V**IA nihil operantium, inquit  
Salomon , frate sunt spinis :  
multa enim mala docuit ocio-  
sitas . Eoque Paulus ad Thessalonicēses  
clamabat : Obsecro vos fratres , opera-  
mini manibus vestris , sicut pręcepimus  
vobis . Hanc doctrinam intelligentes  
olim Aegypti , Thebaidisque Patres ,  
nullo modo ociosos esse Monachos , ac  
pręcipuè iuuenes sinebant : qui non tan-  
tū victum sibi opere parabant , sed  
etiam de laboribus suis peregrinos su-  
peruenientes reficiebant , & sterilia Li-  
bię



bię loca lustrantes habitantium pēnuriā subleuare soliti: vicinarum quoque urbium pauperibus, ac carceratis alimoniam ministrabant. In tantū denique manuum opus probauerunt Patres antiqui, vt quidam eorum victu non egens, quia de fructibus palmarum sustentabatur, à semet ipso quotidianum pensum exigens, quotannis factum opus concremaret. Ideò debitis, & ordinatis horis Monachis suis manuale opus iniunxit Benedictus. Laudat etiam Fratres labori assuetos Augustinus: magnificat hoc exercitium Bernardus: quid? nonne Hieronymus ait; Semper fac aliquid operis, vt Diabolus inueniat te occupatum? Sane in desiderijs est omnis ociosus, & multa mala in Monacho parit: vnde versiculus ille.

Quæritur Agistus quare sit factus adulter:

In promptu causa est, desidiosus erat.

Hanc sanctissimam consuetudinem viriliter amplexus Romualdus ad finē vsq; manibus suis operatus est: quem rite

imitati sunt discipuli, & successores eius. Hanc eandem cōsuetudinem ( iam olim remissam, atque neglectam ) renouauit Paulus noster, & nobis in vtilissimam, atq; fructiferam hæreditatem reliquit: per quam & carò subiicitur, & cogitationes mentis stabiliuntur; & vnà cum corpore mēs ipsa exercetur. Quid enim vetat, operante manu, seu ambulante pede, mente cordeque tractare Deum? Siue enim in ocio, siue in negotio mentalis de Deo cogitatio à nobis excidere non debet. Quod plerique nostrum ita obseruare crediderim: vt sæpe quid manu tractent, vix mente percipiant. Manuale ergo, seu corporale exercitium, aut cōmuniter ab omnibus simul fieri solet: aut à singulis seorsum, priuatimque peragitur. Vnde aduertendum est, quòd commune iussu maiorum fit, eoque ad illud omnes, dato solito tintinnabuli signo, simul ad designatum locum conuenire tenentur; nisi infirmitas, aliudvè iustum impedimentum excuset. Atqui priuatam exercitationem

vnus-



vnusquisque prout vult, & quando vult  
(horis tamen ocio datis) pro libito si-  
bi assumit: quod in diuersis artificij ge-  
neribus diuiditur, vt infrà dicetur.  
Diebus itaque operi dicatis, statutis ho-  
ris, audito campanulæ signo; vnusquis-  
que cella egressus, festinus, iubiloque  
animo ad locum per Priorem assigna-  
tum sine mora contendit: vbi per vnus  
horæ spacium omnes simul iuxta cuius-  
que vires, atque capacitatem, omni di-  
scretione adhibita, operi iniuncto in-  
cumbunt, atque insudant. Hora autem  
hæc, si æstas sit, post Primam, re sacra  
peracta: si verò hyems, post Sextam  
assumitur; ne videlicet in æstate nimius  
æstus, aut in hyeme frigidus rigor Ere-  
mitas plus æquo molestat. Quandoque  
enim in agro ligone terram scindendo,  
siue sarculo fodiendo: quandoque ex  
lapidicina scalpro lapides excindendo,  
è rupeque excisos veste ferreo; atque  
malleo perfringendo: nonnunquàm ve-  
rò sic præparatos lapides, arenamque  
ad locum operis se exercentes depor-  
tant.

tant. Inter hæc exercitia est panificium: subacta namque farina, ac per Pistorem ( qui & ipse Eremita est ) præparata massa, omnes pistorum facti, panes conficimus. In quo sanctissimo exercitio, istud infallibiliter obseruatur, vt per aliquem peritum, disertumque lectorem ex aliquo sancto, siue deuoto libro lectio perpetua, durante opere, alta ac dilucida voce legatur. Et sic dum corpori cibus paratur, anima alitur. Sunt præterea & alia multa exercitationum genera, quæ secundum tempus ac rerum necessitates occurrunt, quorum seriem figillatim enarrare prolixum, tædiosumque foret. Porro quodcunque sit exercitium, quod in commune fiat, cum summo silentio, sineque strepitu, aut clamore agitur; semperque finitur cum deuota pro defunctis fratribus, ac benefactoribus deprecatione: dicitur enim Psalmus 129. De profundis, cum cōmemoratione: Deus veniæ largitor. Præterea vnusquisq; Eremita nisi ignauissimus ac deplorandus sit, aliqua priuata



uata industria pollet; qua & cogitationes vanas expellit, & ociositatis vitium deuitare solet. Alij namque sportulas iunco contexunt: alij cochlearia ex varijs lignis perpolita, atque artificiosè elaborata conficiunt. Sunt qui ex nodis abietum, ex ebano, & alijs lignis, ex ossibus, ex cornu bubali, & similibus materijs globulos perpolitos, ac medio perforatos dare sedulò nitantur. Ij sanè sunt globuli, ex quibus filo, vel tenui neruo connexis coronæ Domini (vt vocant, & beatæ Virginis, seu si maius Rosaria; ad Dominicas orationes, seu Angelicas salutationes inter orandum enumerandas constituuntur. Adsunt & alij laudabiles quidem per omnia artifices, torno (ex varijs lignis) varia, pulchra, atque vtilissima opera efficientes. Multi sartorem; multi sarcinatore præstant: conficientes regulares habitus, quos ex integro panno in formam recisos vnusquisque sibi datos per se confuit: ita vt nunquàm ad nos laicus sartor accedat. Quid moror? Videas alios  
 conte-

contexere vimine fiscellas : alios contorto filo capiendis piscibus retia componere : & sic aliud alios, pro cuiusque capacitate elaborare . Similiter non pauci meliori sorte dotati, literis sacris grauitè infudant : qui enim penna, stiloque aliquid valet, in his exercetur : non tam certè vt inde gloriam quærat, quàm vt sanctissima occupatione ocium maledictum euadat . Qui verò hanc peritiam non habet, aut his minus delectatur ; lectioni sanctæ frequentius incumbens ; hinc continuò ad orationem informatur : & ita corpus piè exercitatum spiritui obedientius redditur . Tandem nullus est, qui in aliquo honesto exercitij genere nimis quàm libens non occupe-  
tur.

HOSPI-



# HOSPITALITAS IN PERE- grinos, & in pauperes charitas describitur. Cap. X.

**H**OSPITALITATIS virtus non solum in Abraham, & Lot, verum etiam in alijs multis veteris testamenti Patribus summo perè commendatur: nec minori laude in scriptura sacra in pauperes largitas celebrata reperitur. Ideoque Veritas ipsa in Euangelio apud Mattheum, hospitales ac beneficos viros ad se tanquam benedictos venire iubet, & regnum sibi ab initio Mundi paratum tradidit possidendum. Quam ob rem apud sanctos Patres olim in magno pretio utramque harum virtutum fuisse, eorum descriptæ vitæ nos satis plenè edocent. Cuius rei benè conscius sanctissimus Pater Benedictus eandem suis discipulis sectandam, non frigidis verbis commendavit. Eam summa diligentia ad se venientibus exhibuit Romualdus: quam & successoribus suis præcipuè ob-  
seruan-

seruandam tradidit : adeò vt non ob  
alium finem hospitium Fontisboni ipse  
ædificauerit . Quæ quidem sanctissima  
institutio semper tenaciter obseruata  
exitit, & hodie multò magis obserua-  
tur . Et ne res confusè tractetur : hospi-  
talitas in primis tractanda venit : ad  
quam commodius exercēdam apud nos  
(vti præcedenti libro retulimus) aptis-  
simum iuxtà communem cuiusque Ere-  
mi portam, nec longè ab Ecclesia, ho-  
spitium constructum cernitur . Huic di-  
ligentissimus, pariter ac pijs moribus  
imbutus Frater cum aliquo socio singu-  
lis annis præponi solet . Ij ergo conti-  
nuò domum ipsam mundam, paratas  
cum omni munditia mensas, perpolita  
vasa cuncta præparare tenentur: nec non  
lectulos (qui tamen tales sunt, qualēb;  
nos in cellulis utimur) quotidie primo  
manè strare accuratè debent . Vnde tan-  
ta religione hæc sanctissima hospitali-  
tatis virtus obseruatur; vt vnusquisque  
superueniens hospes, seu peregrinus, nō  
aliter ac si eadem ipsa Christi persona  
adesset,



adesset, suscipiatur. Et quod magis laudabile est, tanta in hospitibus suscipiendis, pascendis, refouendis, ac recreandis æqualitas exhibetur: vt nisi personę dignitas, aut præeminens excellentia rationabiliter hoc postulet, nulla inter diuitem, vel pauperem; inter notum, & ignotum; inter indigenas, seu alienigenas; inter denique cognatum & extraneum discretio constituatur: maiori tamen religiosi viri reuerentia exhibitā. Cibos prætereā illis non alios ministramus, quā qui nobis ex propria constitutione permittuntur. Ideoque carnes cuiusq; generis hospitibus nunquā apponuntur: neque in feria sexta per totum anni cursum oua, vel caseus eisdem ministrari possunt: nec refert etiam si ipsi secū hæc cibaria cōportent. Alia quoque multa circa eos obseruantur in mensa, quæ longum esset referre. Iam dormitum ituris pedes cum humilitate multa, cumque Psalmi quinquagesimi pronuntiatione, calida aqua ad hoc præparata abluuntur: & alia item chari-

charitatis officia læta fronte exhibentur. Præterea tempore congruo, hoc est, oratione facta in templo, re sacra audita, per aliquem ex Fratribus, de Superioris mandato, Eremus & quæ in ea sunt, præter solitariorum cellas, ostenduntur. Tandem quicquid eis commodè potest, tum corporalis, tum spiritualis solatij, hilari corde impenditur. In summa sciendum est, præter triduum, non licere hospitibus hic moram trahere. Iam opere pretium est scire, non minus inuigilare Patres nostros circa pauperum subuentionem, quàm erga aduentantium recreationem sollicitos esse, demonstrauius: quinimmò maiori cura ac diligentia, atque vberiori sumptu egenis subuenire nituntur. Nam ultra quòd ad ostium cuiusque loci accedentibus mendicis copiosa semper elemosyna elargiri solet: etiam indigentibus rusticorum vicinorum familijs alimenta in subsidium sæpius transmittere non negligunt: quòd maximè, largiusq; infirmis præstare student. Nec certè minimas



nimas quantitates dotandis pauperum puellis, ac præcipuè orphanis erogare consueuerunt. Et, vt semel dicam, plus in hospites, ac pauperes societas nostra elargiri, quàm in alendis, sustentandisvè Fratrum familijs consummare solet.

## DE INFIRMIS CVRANDIS.

### Cap. XI.

**E**CCE iam Dei beneficio ad vltimū, omniumq; sanctissimū institutum explicandum accedimus: pijsissimum, scilicet, erga infirmos obsequiū, atq; in debiles pietatē: qua maiorem, seu officiosiore nullibi languentibus præstari posse, iure nostro affirmare audemus. Vix namque dici potest, in loco deserto, arido, ac desolato, quanta solatia ad infirmos recreandos inueniantur: eorum enim necessitatibus subleuandis cura ante omnia, & super omnia, iuxta Benedicti Regulam (ac si re-

E E uera

uera Christo seruiretur ) adhiberi solet. Est etenim & ad refouendos ægrotos, sicuti alibi diximus, seorsum separatus, ac præparatus locus : quò vbi peruenit, seu deductus est infirmus, illicò morbi illius qualitas, grauitasque diligenter attenditur. Secundùm autem infirmitatis speciem, & cibi & medicamenta præparantur, dantur, & applicantur. Accersitur medicus, aut certè si eius præsentia necessaria non est, præmissa plena informatione consulitur: iuxta eius consilium pascitur, curaturq; ægrotus. Sed & ne doloris pressura, aut solitudinis tædio impatientiæ quid imbibat languens: in nullo, obstante regula, libet cuique Fratrum absque licentia aliqua infirmi cubiculum ingredi, cumque eo silentium frangere, & charitate dictante vel de grauib, vel de leuib, deque serijs rebus, vel modè iocosis, prout conducibilius videbitur, tractare licebit. Iam si hyems sit, perpetuò in cubiculo ipso (est enim in eo appositum caminum) congruus ignis ardet:



ardet : si verò ferueat æstas, irrigatur  
 si hoc morbus patitur, pauimentum :  
 redimitur pauperculum stratum rosis,  
 aut iuxta tempus alijs odoriferis floscu-  
 lis . Denique quicquid paupertas no-  
 stra solatij habere potest, languidis in-  
 credibili cum charitate impertitur .  
 Solent insuper bis, aut saltem semel in  
 die Maiores, senioresvè Patres eos-  
 dem quasi Christi personam repræsen-  
 tantes summa cum benignitate visita-  
 re: de inferioribus autem Fratribus nul-  
 lum esse puto, qui semel ad minus in  
 die similes ægrotantes non inuiset, nisi  
 qualitas infirmitatis, vel infirmi condi-  
 tio hoc vetet: hoc certè mirabile est,  
 quòd à maiori ad minorem nullus ab  
 obsequio infirmorum eximitur: sed sæ-  
 pissimè certari solet quis prius, aut me-  
 lius eisdem seruire queat . Astant in  
 summa continuò infirmis duo ad hoc  
 Patrum decreto deputati Fratres Con-  
 uersi: quorum vnus velut præsidens, qui  
 senior, & in tali opere exercitator sit;  
 alter verò quasi eidem subditus, & obe-

E E 2 diens

diens se habet . Quibus tota istorum  
cura incumbit , quibusque tale opus  
commissum est ; cum omnibus , quæ ad  
hoc sanctissimum ministerium necessa-  
ria sunt . Hij profectò , quantum ego  
ipse semper vidi , ac coniectare valeo ;  
vbique diligentissimè , atque solerter  
munus suum expedire consueuerunt :  
adeò vt verè dici possit in eis negligenti-  
æ notam non haberi , sed econuerso  
charitatis sedulitatem apud eos semper  
vigere . Magna quidem cura ægrotan-  
ti in Eremo sacramenta ministrantur :  
quo morti appropinquanti , lectulum  
Patres omnes cum Clericis suis , cereo-  
lum accensum singuli manu tenentes ,  
circundant : Psalmos pœnitentiales cum  
litanijis iuuiter decantantes . Ex qui-  
bus saltem duo deputantur , qui conti-  
nuò languenti agonizanti assistant , & ad  
mortem cum vera resignatione susci-  
piendam , ac salutiferæ passionis Chri-  
sti , Dei que misericordiæ , & similium  
memoriam habendam , ipsum diligen-  
ter & cum charitate exhortent . Vnde  
fit ,



fit, vt omnes ferè ( quod ipse sapiùs oculis vidi ) sine dolore, & cum magno animi feruore Deo suo spiritum reddant. Licèt autem quæ de hospitalitate peregrinorum, curaque infirmorum dicta sunt, de MONTE CORONA tantùm dicta videantur: nemo tamen existimet, eandem virtutem apud Camaldulenses Patres non esse: cùm illic saltem in rerum largitione, abundantior charitas esse credatur: suppetente maximè illis diuitiarum affluentia. Verùm, quia apud illos non in Eremitico, sed in Fontisboni Monasterio ista fiunt: nec eodem modo, quo apud nos: ideò hìc specialiter de his tractare distulimus. Nec certe defunt qui elegantiori stylo Camaldulensium caritatem laudauerint: adeò vt nobis salbutientibus nullum reliquerint maioris encomij locum, quæ facile quærenti obuiam occurrent.

En tibi tandem amantissime lector,  
quæ de Eremitica, ac Romualdinorum,  
Camaldulensiumque gestis, & institu-  
tis

tis breuius fortasse, quàm par erat,  
exarauimus. Tu si quid est, quod mi-  
nus arrideat, placeatvè tibi: boni con-  
sule. Nos intercedente Gloriosa Dei  
Genitrice MARIA, cum Beatissimis  
Benedicto, & Romualdo, promissum  
opus, pro nostri ingenioli modu-  
lo, ad finem perduximus.

Ad laudem, & hono-  
rem Sanctissimæ

Trinita-

tis,

Patris, & Filij, & Spiritus sancti.

Cui sit gloria in secula  
seculorum.

Amen.



FINIS QVINTI,  
ET VLTIMI LIBRI.




*Registrum.*

a b, A B C D E F G H I K L

M N O P Q R S T U V X Y Z . 7.

In sacra Eremita S. MARIAE de Ruah,  
In agro Patauino. MDLXXXVII.





T. II. 23



1040236 Bibliotheca 8009  
P.P. Camaldulensium in Bielany

Depozyt w Bibliotece Jagiellońskiej



06687





T - II - 23